


〔重刊訂正本〕

中國醫學大成

錢若利題



〔重刊訂正本〕

中國醫學大成

〔二〕

上海科學技術出版社

中國醫學大成（全套共五十冊）

上海科學技術出版社出版

（上海瑞金二路四五〇號）

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷

增評傷暑全書

〔清〕張鳳逵 原著

葉子雨 增評

伏氣解

〔清〕葉子雨 撰著

伏邪新書

〔清〕劉吉人 著述

伏陰論

〔清〕田雲槎 編著

羊毛瘟論

〔清〕隨萬寧 著述

原 編 曹炳章

總審定 裘沛然

總審閱 蕭敏材 朱邦賢 沈麗君



## 重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲二人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於  
上海中醫學院



增訂葉評傷暑全書提要

明張鳳達撰。鳳達字鶴騰。潁州人。賜進士出身。戶部陝西司郎中。自序有云。若傷暑一症。藥書止列小款。中世皆忽之。一遇是證。率目爲傷寒。以發散等劑投之。間加衣被。取汗甚之用。灸以致傷生者。纍纍不悟。可不悲歟。予諸生時。萬歷戊子。夏患茲證。勢極氣索。瞀然自憤。庸醫以爲脾胃內傷。或以爲勞役中折。幾不自持。微醫汪韞石適在傍。感然曰。心煩面垢。此暑證也。何多指聞之。皆駭其名。予於瞀中微解依之。服益元散二劑而蘇。仍調以加味香薷飲。數劑而愈。遂著傷寒傷暑辨一篇。刊於暑月印布。兼施藥餌。其捷效若谷響。乃發願搜羅羣書。著爲全帙。以濟世。懼閱歷未久。不中窾。期五十以後。方就筆研。後至天啓壬戌。感仙師教就筆研。挾古諸名家參考。編集而成帙。拮据十餘載。約二萬餘千言。分爲上下兩卷。議論皆常語。不敢鈎深。以便醫家覽解。方多遵古。無他奇。宜證則靈云云。此述鳳達著書之旨也。葉霖增訂序云。去歲於書肆獲覩張鳳達傷暑全書。亟購歸案頭。日加索玩。而歎曰。張氏其素問之功臣乎。暑症之階。舍此奚復他求乎。然亦時有未盡。

愚誠譴陋。敢取諸家精當之言。附益於後。猶懼學者之難躋也。又自伸鄙意以釋之。凡正其譌謬。補其脫略。仍整爲兩卷。目之增訂傷暑全書。冀初學者有以見暑證之要焉。俾由鄙意可以識張氏之意。即張氏之意可以明素問之旨。而六氣之書。殆無缺憾矣。舊有林北海增刊。無所得失。似屬贅疣。盡刪之云。本書前雖有裘吉生君校刊。不久售罄。炳章舊藏鳳達原書。有清康熙十四年漁陽林起龍北海序。校勘印行本。卷末附刊喻嘉言疫論首論次案次方。並有北海疫論序。辨析瘟疫。其識多有足補吳又可之未詳。末有林氏後跋。葉氏盡刪去。周禹載雖將林氏喻嘉言瘟疫論序。及瘟疫論附刊入溫熱暑疫全書後。然亦刪去醫案附方。非林氏全書矣。今仍以林刊原本作考校。補刊林氏附增疫論全編及後跋。以成全璧。查本書原目。上卷。首辯春夏秋冬暑溫涼寒四證病原。天時地氣。辨寒暑證各異。暑證。暑厥。暑風。暑瘍。暑瘵。絞腸痧。時疫。寒疫。脈理。運氣。下卷。列治暑主方二十一。方。九散五方。增補十八方。痢疾二方。瘧疾二方。增補二方。發斑一方。服藥總法。古今名醫品彙。如張仲景。孫真人。劉河間。李東垣。朱丹溪。方古菴。王節齋。陶節菴。虞花溪。李文清。王宇泰等。各名醫論暑學說。採錄無遺。後附名醫治暑醫案。各條附



有葉霖評註。闡發精義。頗切實用。周禹載云。張鳳達傷暑全書。申明理蘊。精確不磨。雖有小疵。不掩大德。誠可振聵於千古者也。確是定評。

增評傷暑全書 提要

## 裘序

素問有熱病者。皆傷寒之類。及凡病傷寒者。先夏至日爲病溫。後夏至日爲病暑之言。後人妄解經旨。多以熱病卽是傷寒。溫病暑病亦卽傷寒之所伏。但因發時不同。而名各別也。惟難經曰。傷寒有五。有中風。有傷寒。有濕溫。有熱病。有溫病。已明示傷寒爲一般感證之總稱。故世俗有濕溫傷寒。暑濕傷寒。熱證傷寒等之名目。蓋此傷寒二字。無異一病字之代名詞。猶之曰濕溫病。暑濕病。熱證病是也。夫辨名不清。設治亦混。竟有以治傷寒之麻黃湯方。施於溫暑諸病者。草菅人命。言之痛心。考張氏仲景傷寒論。本亦溫暑並及之書。不過亦以傷寒名各感證耳。反之。且有疑張氏爲傷寒專家。張氏書專治傷寒。凡溫暑證未可以張氏方治也。吳氏又可著溫疫論。以比擬傷寒論。葉氏天士著溫熱論。亦比擬傷寒論。至吳氏鞠通。於葉氏書脫胎而著溫病條辨。凡例第一條曰。一是書倣仲景傷寒論作法。其亦以溫病條辨爲傷寒論對待之文章也。蓋不知傷寒論原亦包括溫病。如太陽病。發熱而渴。不惡寒者。曰溫病等言。是吾謂諸氏實推廣傷寒論一部份之言。溫

疫論焉。溫熱論焉。皆屬於傷寒論統系的病理學及治療法。非與傷寒論並行的病理學及治療法也。至溫病條辨。既非傷寒論並行的書。尤非傷寒論統系的書。實爲溫熱論之注解書也。則於傷寒論有前條辨後條辨同。雖然病變無窮。病理至微。吾儕學者。認傷寒論爲六氣感證之綱要。能於六氣各有專書條分縷晰。如諸氏之論溫熱一氣者。未始非後學之導師。先賢之功臣也。不佞於二十年來。讀書臨證。凡見夫患溫病者固多。患暑病者尤多。獨怪後學不知暑爲六氣之一證。先賢亦無暑之專書以相示。吳氏鞠通且謂暑亦溫之類。是猶古之溫爲寒之類。同一混稱。夫傷寒與病溫。果相逕庭。而病溫與病暑。豈無差池。顧暑以日者二字合之而成。明是夏月烈日之氣而爲病。故內經曰。後夏至日爲病暑。以病之在夏至後得者。多屬於暑。傷寒論特立中暍之篇。日本醫稱之曰日射病。古今新舊。無不以暑屬專病。當火傘高撐。酷日臨空之際。或天時以陣雨相霖。或人事以冷水相潑。則地面上驟起令人不耐觸鼻之氣。是氣焉。卽暑氣也。較之日本醫以爲日光所照射以成病者。爲尤甚。蓋日光所照射而成之病爲冒暑。衛生家猶可避之。地氣所蒸騰而受之病爲中暑。衛生家不易避之。張氏潔古老人謂避暑納涼於



深堂大廈。大扇風車得之者。屬靜而得之之陰暑證。足徵暑邪防避之難也。業醫者苟於一年間診治之證。按日記之。自必以暑症居多數。故專治感證之醫生。夏秋之間。其門如市。一過其時。遂無問津者。此尤足徵六氣感證中最多者爲暑病。是以暑溫、暑濕、暑毒、中暑、冒暑、伏暑等之病名。幾乎家喻戶曉。奈何論暑專書。惟張氏鳳達傷暑全書已。且張氏原刻在明天啓年。相距不過數百年。其書已湮沒不可覓。讀醫書者。於傷寒論後。但於有溫熱論一。若傷寒病外。祇有溫熱病。口頭日日念暑溫、暑濕、暑毒、中暑、冒暑、伏暑等病名。心上習焉不深求論治暑溫、暑濕、暑毒、中暑、冒暑、伏暑之書。嗚呼。暑病之重。關人生既如彼。暑書之輕。於人世又如此。不佞常引爲醫界一憾事也。今秋揚州葉君仲經。自南京郵寄尊甫子雨先生遺著若干種。間有增訂傷暑全書未刊稿二卷。不禁喜出望外。開卷讀之。則張氏原書於暑之爲證。固屬兼收並蓄。已不愧爲全書。經葉氏增訂於暑之爲證。尤見發凡糾正。更足稱爲全書。葉氏原序有曰。素問六氣之理。惟張長沙能造其微。又曰。增訂傷暑全書。冀始學者。有以見暑證之要焉。又曰。張氏其素問之功臣乎。數語見先輩著書之本旨。無不以羽翼先賢。啓導後學爲心。不佞所主張以傷寒論

爲六氣病之綱要。溫熱論爲推廣傷寒論六氣中一氣之書。今是書亦可謂爲推廣傷寒論六氣中一氣之書。張氏其亦爲傷寒論之功臣乎。學者能本葉氏增訂之心。有以見暑證之要者。當必知是書與溫熱論諸書並重焉。今有刊行國醫百家之舉。爰亟亟以是稿付諸手民。俾廣流傳。吾知溫熱論出。而溫病與傷寒鑒別明。是書出。而溫病與暑病鑒別亦明矣。從此醫者多一方法。病者少一天扎。然則葉氏保存與增訂是書之功。微特羽翼先賢。啓導後學已哉。民國六年冬月紹興吉生裴慶元謹序。



## 葉序

醫家以素問有風寒暑濕燥火之病。合於天之六氣。其變化若不可測。然則素問蓋醫之聖經也。聖經之義猶天也。天可幾及乎。階而升也。故涉山必歷層磴。登屋必藉高梯。欲明素問之旨。必賴後人之解說。解說之書也。非徒省誦讀率爾操觚之可至。發明奧蹟者也。余常以素問六氣之理。惟張長沙能造其微。他如金元諸家。亦時有著述。而暑之專論。代鮮及之。學者無可矩式。豈卒病論闕佚而失之耶。抑以暑病蓋寡。而遺而弗取耶。次復怪今之醫士。畏難而樂易。避深而就淺。日習溫病條辨。溫熱經緯諸書。詢以素問。則茫然不知所對。此所謂逐末而舍本矣。蓋患無階徑之可由也。六氣者同源而異流。是以經言寒暑六入。寒火之要。長沙河間既述於前矣。庸得於暑而無其階乎。心恆歉然。欲有作而未逮也。去歲於書肆獲覩張鳳達先生傷暑全書。亟購歸案頭。日加索玩。而歎曰。張氏其素問之功臣乎。暑證之階。舍此奚復他求乎。然亦時有未盡。愚誠譴陋。敢取諸家精當之言。附益於後。猶懼學者之難躋也。又自忖鄙意以釋之。凡正其譌謬。補其脫略。仍釐爲

二卷。目之曰增訂傷暑全書。冀始學者。有以見暑證之要焉。俾由鄙意。可以識張氏之意。卽張氏之意。可以明素問之旨。而六氣之書。殆無缺憾矣。庶留心醫道之士。有可以幾於岐黃未顯之微言。舊有林北海增刊。無所得失。似屬贅疣。盡刪之。時著雍閏茂杪秋石林醫隱葉霖書於鷓寄軒中。

## 原序

夫醫九流一技也。而回夭札與安樂。躋壽域而補造物之不逮。厥功博已。顧五行在手。則夭可延。陰陽未分。則延者促已。審之在跬步。而適之則燕越。可畏哉。寒暑均天地之厲氣。傷寒傷暑二病。均厲氣之能生殺人者。素問因寒因暑之說。昭昭爲萬世的。顧傷寒書創自張長沙。詳於朱南陽。而反覆精析於陶節庵。其全書若眉列然。學者類能據籍按方而施治。故往往取効。若傷暑一證。醫書止列小款中。世皆忽之。一遇是證。率目爲傷寒。以發散等劑投之。間加衣被取汗。甚灸以致傷生者。纍纍不悟。可不悲歟。予諸生時。萬歷戊子夏。患茲證。勢極氣索。惓然自憤。庸醫以爲脾胃內傷。或以爲勞役中折。幾不自持。微醫汪韞石適在旁。感然曰。心煩面垢。此暑證也。何多指。聞之皆駭其名。予於晉中微解。依之服益元散二劑而蘇。仍調以加味香薷飲數劑而愈。遂著傷寒傷暑辨一篇。刊於暑月印布。兼施藥餌。其捷效若谷響。乃發願搜羅羣書。著爲全帙。以濟世。懼閱歷未久。不中窾。期五十年以後。方就筆研。戊申自計部以目恙請告。杜門靜攝。得畢志於性命。黃老諸家。所



夕矻矻。無逸晷暇。卽焚香兀坐。間入園內視。百日不他。及目愈後。至天啓壬戌。感仙師教。就筆研挾古諸名家。參考編集而成帙。拮据十餘載。約二萬餘千言。分爲上下兩卷。議論皆常語。不敢鉤深。以便醫家覽解。方多遵古無他奇。宜證則靈。菽粟豈珍錯。而食其時。百骸理宜也。要在於燕越歧路處着力耳。平高貢。除妬忌。澄心察理。審證投咀。醫之上計乎。寧獨醫人一心耳。虛與實相反。拘與圓相仇。古今成敗之大關也。秉國成者。與謀國計者。身係社稷安危。操萬性命脈。虛心圓智。蓋可忽乎哉。予因醫而廣其說。

天啓三年歲次癸亥孟夏朔旦賜進士出身奉政大夫戶部陝西司郎中穎郡張鶴騰撰

增補葉評傷暑全書目錄次第說

病生有原。治法順其原。故辯冬春夏秋寒溫暑涼證冠其首焉。暑陽氣也。寒陰氣也。氣之運有遲速。有順逆。有次舍。故次天時。天運於上。地載於下。南北異疆。寒燠殊氣。令不能督之使齊。故地氣次焉。天地交而陰陽有序。蓋則寒暑病作。證候各異。故剖其異若黑白。其獨詳於暑者。明專科也。忽者使之驚。闇盲者使其昭昭。躊躇顧望而不敢決者。使其奮袂而投咀。令膏肓不能匿。藥餌可施。生民庶有托矣。若暑厥暑風絞腸沙。諸名家俱載。因之耳。時疫詳朱南陽。寒疫獨創於李東垣。第宗而演之。至於暑瘍暑瘰。常有此證。從無此名。不識其證。安識其藥。予特摹證而立名。庶可據而施治焉。辯疑決證。因證施藥。五藏不能告人。而脈告之。脈不能接人。而指接之。是脈乃天真委和之氣。非圖可狀。非言可傳。在人手指心會而已。乃天時有定期。地氣有方隅。求其宛轉變易。與脈相符者。惟運氣爲最微焉。夫五運有旋轉之機。六氣有遲早之妙。天以示始終之因於地。地以示始終之因於物。然則五藏六腑與物之旺落感應。以此而已。斡旋而調適之。權在乎藥餌。若列饌然。

惟其所投。投則醴然若嗜。神喜而病畏之。不投則恚然若讐。病喜而神惡之。是在取者。藥方列左。古人立方。良有深意。其議見良有慧識。卓越不可磨滅者固多。中亦有泥古任臆。不可爲訓者。予採各名家論暑原文。後各附愚見品評。以俟覽者取裁焉。然無徵不信。有考斯傳。醫學綱目所載。古今名醫類案。非後學之鑑衡乎。彼俟百世而不惑。吾考先正而不謬。庶幾哉與古作者默契乎。至若治於未病。防其外邪。順時頤養。保命度生。是在智者之自調如何耳。



增訂葉評傷暑全書目錄

卷上

辯春夏秋冬溫暑涼寒四	證病原	天時	地氣	辯寒暑證各異	暑證	暑厥	暑風	暑瘍	暑瘵
一	五	八	九	二	五	六	七	八	八

增評傷暑全書 目錄

卷中

絞腸痧	時疫	寒疫	脈理	五運六氣	五運配十干之年	六氣爲司天之歲	南政北政	十二支年分運氣	增訂客氣客運活法
一九	二一	二三	二四	二六	二七	二七	二七	二七	四〇

古今名醫暑證彙論	一
張仲景傷寒例第三論瘧	
濕喝第四論辨太陽病脈	
第五論	三
孫思邈傷寒例論	八
劉河間中暑論	九
李東垣暑傷胃氣論	九
附清暑益氣湯	一〇
朱丹溪中暑論	一一
辯動得靜得	一二
方古菴附餘暑論	一三
王節齋附餘暑論	一四
陶節菴辯張仲景傷寒論	一五
治傷寒用藥大略	一七

傷寒變溫熱病	一七
溫病辨	一八
辯惡寒	一九
辯溫暑涼寒諸證	二〇
辯風溫	二二
虞花溪醫學正傳論暑	二二
李文清醫學入門論暑	二四
救痰壅法	二四
救絞腸沙法并乾霍亂	二五
救途中熱倒法	二五
王宇泰證治準繩論暑	二五
加減清暑益氣湯	二六
名醫類案 增補名醫類	
案	二八

# 卷下

治暑主方	一
六和湯	一
香薷飲	二
十味香薷飲	二
五苓散	二
桂苓甘露飲	三
益元散	三
藿香正氣散	三
二香散	四
九味羌活湯	四
人參敗毒散	五
香樸飲	五

枇杷葉散	六
縮脾飲	六
黃連解毒湯	六
人參白虎湯	七
白虎加蒼朮湯	七
竹葉石膏湯	七
三黃石膏湯	八
桂苓甘露飲合敗毒散	八
百合湯	八
丸散方類	九
加味胃苓丸	九
黃龍丸	九
消暑丸	一〇
玉露散	一〇

卻暑散	一〇〇
備用方類	一〇〇
大順散	一〇〇
龍鬚散	一一一
加味桂苓甘露飲	一一一
補中益氣湯	一一一
調中湯	一二二
增補諸方	一二三
一物瓜蒂湯	一三三
紫金錠	一四四
黃連香薷飲	一四四
麥門冬湯	一四四
生脈散	一五五
白頭翁湯	一六六

升麻鼈甲湯	一七
達原飲	一八
三消飲	一九
大承氣湯	一九
小承氣湯	二〇
調胃承氣湯	二〇
升降散	二一
清瘟敗毒飲	二三
聖散子方	二五
附霍亂瘧痢發斑	二五
乾霍亂吐法	二五
二陳湯	二六
痢疾方	二六
芍藥湯	二六

香連丸	二七
瘧疾方	二七
清脾飲	二七
胃苓湯	二八
附方	三〇
半夏瀉心湯	三〇
小陷胸湯	三一
發斑方	三二
消斑青黛飲	三二
服藥總法	三二
附刻喻嘉言瘟疫論序	三五
附刻喻嘉言瘟疫論	三九
疫證治案	四四
治疫名方	五一

黃連阿膠湯	五一
黃連湯	五一
黃連瀉心湯	五一
黃連龍骨湯	五二
黃連犀角湯	五二
黃連橘皮湯	五二
黑膏	五二
消毒飲	五三
犀角消毒飲	五三
羌活升麻湯	五三
漏蘆湯	五四
消毒丸	五四
雄黃丸	五四
運氣五瘟丹	五五



大青丸	五五
太無神朮散	五五
升麻葛根湯	五六
二黃湯	五六
救急解毒丸	五六
茵陳五苓散	五七
參苓平胃散	五七
神授香蘇飲	五七
製人中黃法	五八

---



增訂葉評傷暑全書

明 穎郡 張鶴騰鳳達原著  
清 揚州 葉霖子雨增評  
鄞縣 曹赤電炳章校點

卷上

辯春夏秋冬溫暑涼寒四證病原

生氣通天論曰。夫自古通天者。生之本。本於陰陽。天地之間。六合之內。其氣九州九竅五臟十二節。皆通乎天氣。其生五。其氣三。數犯此者。則邪氣傷人。此壽命之本也。由此論之。人身元氣。與天相通。頤養有道。病何從生。然則病生有因。其發有原乎。從其原而治之。則易療。陰陽應象大論曰。天有四時五行。以生長收藏。以生寒暑燥溼風。人有五藏。化五氣。以生喜怒悲憂恐。又曰。因於露風。乃生寒熱。是以春傷於風。邪氣留連。乃爲洞泄。夏傷於暑。秋爲痃瘕。秋傷於濕。上逆而欬。發爲痰。

厥冬傷於寒。春必病溫。四時之氣。更傷五藏。此四時四氣之病原也。黃帝明以春溫根於冬寒。其間氣候相近。症恙相同。猶可言者。原未兼及暑也。至漢張長沙仲景著傷寒書。遂演內經之說曰。其傷於四時之氣。皆能爲病。以傷爲毒者。以其最成殺厲之氣。中而卽病者。名曰傷寒。不卽病者。寒毒藏於肌膚。至春變爲溫病。至夏變爲暑病。暑病者。熱極重於溫也。自此論出。而後之業岐黃術者。皆宗之。果爾是專主一寒氣。三病分久近。皆寒爲根。故後世醫家有四時傷寒之說。甚至通以麻黃桂枝湯兼治溫熱症。誤人良多。陶節菴諸名家。亦剖三病若列眉。而根始於寒。不免沿而未能脫。又何怪乎碌碌者。愚謂道以一炁生天地。以二氣生五行。五氣各司其用。而水火爲最要。水火能生物。亦能殺物。若仲景之說是水專擅其權。而火爲虛而無用矣。愚爲冬之寒病。專屬寒威。此固然不易者。至春時陽氣漸舒。孔竅開張。服御單夾。乃天氣變幻。倏暖倏寒。又多蕩風。人感寒直入臟腑。故爲溫病。猶可名曰春寒。已與冬寒不相蒙矣。况夏至後。炎火時流。蒸鬱燦人。得病似傷寒者。皆是暑火所感而成。與冬之寒氣。毫不相涉。而亦以爲冬寒之積久所發者。誤矣。卽生氣通天論曰。是故陽因而上衛外者也。因於寒。欲如運樞。起居如驚。神



氣乃浮。因於暑。汗煩則喘喝。靜則多言。體若燔炭。汗出而散。是寒暑分因。水火別證。明列斷案。萬世醫學之祖也。又何惑乎。然內經之溫根於寒者何故。案山海經桂名招搖。葉長二尺。桑名帝女。大圍五十尺。桂竹葉大二尺餘。高數丈。其草樹奇怪類若此。據經想太古時。洪水橫流。懷山襄陵。草木閉塞。天地濛昧。陰靄拂鬱。陽明未舒。以故寒氣盛行。元和令少。卽當大夏。亦無燦金之患。後世文明漸開。五行分布。水火之氣。各司其權。若斯爭烈者。卽今春值淫雨。餘寒爲厲。甚者如隆冬。挾續不能去。試觀晉中暑證寥寥。絕無痄瘧。皆陰勝之左券也。何況古洪荒世乎。此內經溫根於寒所由發也。何仲景遂申演其說。并暑而一類乎。是蛇足也。且古人茹毛衣草。簡緣淡薄。無助火之具。後世炙煖之味適口。醲鬱之酒充腹。嗜欲灼精。塵勞食氣。皆足以噓焰而煽熾。宜暑火之乘類而善入也。謂古之寒病多而暑病少。今之寒暑並重。而暑爲尤劇。則可。愚故特列論曰。傷寒者感於冬之嚴寒。溫病者感於春之輕寒。若暑病則專感於夏之炎熱。若冰炭霄泉之不相及。一水一火。各操其令。治法一熱劑一涼劑。各中其竅。而概以爲寒因。不幾於執一遺二哉。予俯仰躊躇。萬不得已。敢於翻千古之案。以開百世之覺。破迷而拔苦。遂自甘於僭

竊云耳。

霖按素問生氣通天論言春傷於風邪氣留連乃爲洞泄夏傷於暑秋爲痲瘧。秋傷於濕上逆而欬發爲痿厥冬傷於寒春必病溫此四時伏氣之機陰陽互根之理也。春傷於風者陽邪也留連日久乃下爲洞泄之陰病秋傷於濕之陰邪乃爲上逆而欬之陽病夏傷於暑熱之陽邪至秋發爲痲瘧之陰病冬傷於寒之陰邪至春必發爲溫熱之陽病是陰陽上下之相乘也此六淫之邪傷人由人身之陰陽不固故金匱真言論曰夫精者身之本也故藏於精者春不病溫夏暑汗不出者秋成風瘧足徵人身之氣血皆生於精冬宜閉藏則陰氣固密若縱慾精耗則陰虛陰虛則陽邪易犯故多病溫夏宜疎泄逆之而汗不出汗不出則暑邪內伏遇秋風淒切寒熱相戰則爲瘧病陰陽啓閉時氣宜然舉冬夏言其春秋伏氣自可類推而陰陽應象論又重複言四時伏氣者蓋六淫之邪亦由七情不慎五藏化五氣爲內賊以傷之此內經反復闡明伏邪之義也。

又按素問熱論曰今夫熱病者皆傷寒之類也越人五十八難曰傷寒有五有



中風。有傷寒。有濕溫。有熱病。有溫病。其名各不同。是傷寒爲古醫經之通稱可證。仲景太陽篇。首揭發熱汗出。惡風脈緩者。名中風。惡寒發熱。體痛嘔逆。脈陰陽俱緊者。名傷寒。發熱而渴。不惡寒者。爲溫病。發汗已。身灼熱。脈陰陽俱浮者。爲風溫。辨論寒溫形證。朗若列眉。治喝三法。尤有深義。奈書經兵火散佚。雖高平王叔和編次。僅存傷寒治法。而溫暑亡失益多。不得拉雜叔和序例中語。妄議仲景寒溫莫辨也。內經溫根於寒。謂嚴寒遏熱。乃習坎之義。亦不須遠引洪荒。曲爲解說。溫病固非春日之輕寒。暑病亦非專感夏日之炎熱。欲明溫暑伏氣之義。當細參內經。庶不爲羣言所惑。

## 天時

真源曰。天地之間。親乎上者爲陽。自下而上四萬二千里。乃曰陽位。親乎下者爲陰。自上而下四萬二千里。乃曰陰位。既有形名。難逃度數。且一歲者。四時八節。二十四氣。七十二候。三百六十日。四千三百二十辰。十二辰爲一日。五日爲一候。三候爲一氣。三氣爲一節。二節爲一時。四時爲一歲。一歲以冬至節爲始。是時也。地

中陽生升。凡一氣十五日。上升七千里。三氣爲一節。四十五日。陽升共二萬一千里。二節爲一時。一時九十日。陽升共四萬二千里。正到天地之中。而陽合陰位。是時陰中陽半。其氣爲溫。而時當春分之節也。過此陽升而入陽位。方曰得氣而升。亦如前四十五日。立夏。立夏之後。四十五日。夏至。夏至之節。陽升通前計八萬四千里。以到天。乃陽中有陽。其氣熱。積陽生陰。一陰生於二陽之中。自夏至之節爲始。是時天中陰降。凡一氣十五日。下降七千里。三氣爲一節。一節四十五日。陰降共二萬一千里。二節爲一時。一時九十日。陰降共四萬二千里。正到天地之中。而陰交陽位。是時陽中陰半。其氣爲涼。而時當秋分之節也。過此陰降而入陰位。方曰得氣而降。亦如前四十五日。立冬。立冬之後。四十五日。冬至。冬至之節。降極通前計八萬四千里。以到地。乃陰中有陰。其氣冷。積陰生陽。一陽生於二陰之中。自冬至之後。一陽升如前。運行不已。周而復始。卽陽升陰降之八節。而知天地。卽溫涼寒熱之四氣。而識陰陽。夫陰陽判分。若黑白然。故春夏秋冬四時。隨令各別。溫熱涼寒四時。隨節候變易。冬至已後。至春分屬傷寒。自春分至夏至屬溫病。自夏至至白露屬傷暑。自白露至立冬屬涼病。自立冬以後。至春俱屬傷寒。蓋春秋之



氣嘗不足。冬夏之氣嘗有餘。卽四月八月間亦有暑病。蓋八月間曉暮夜氣雖涼而午未之時。秋陽燥烈。日火灼人。反毒於伏。蓋伏時氣發汗出。陽氣在表。此時陽氣漸斂。真火內燃。而又以烈日熏之。故毒易中人。熱證更劇。當細察之。雖其外證相類。而受氣不同。治法迥異。稍有不中節。害人不淺。而概用以寒證劑。其害可勝言哉。治者先數時令。後審時氣。隨令加減斟酌之。未有不立取效者。故爲天時說。霖按。論四時陰陽升降。卽十二辟卦。六陰充足於十月亥。陰極則陽生。故十一月冬至。一陽生於下。爲地雷復卦。二陽生爲地澤臨。三陽生爲地天泰。四陽生爲雷天大壯。五陽生爲澤天夬。至四月六陽充足。則爲乾卦。陽極陰生。故五月夏至。一陰生於下。爲天風姤卦。二陰生爲天山遯。三陰生爲天地否。四陰生爲風地觀。五陰生爲山地剝。至十月六陰純靜。則爲坤卦。夫坤爲萬物之母。坤靜而純陰。何能生物。必待乾與之交。得其陽而後始能生萬物也。然交必陽體充足。乾之六陽乃充足於四月之巳。次爲午。乾至五月夏至。陽氣升極。則下交感。坤陰之氣上承。故一陰動於下。爲天風姤也。再交於六月未。三交於七月申。所謂坤三索於乾也。乾陽潛藏於坤陰。至冬至一陽動於下。故爲地雷復也。此陰

陽消長之機。不可移易者也。然既明陰陽升降消長之理。闢叔和序例。寒毒藏於肌膚。春變爲溫。夏變爲暑是矣。然不得界劃時日。爲溫熱涼寒。未免緣木求魚。夫治病之法。首當察其微甚。辨其陰陽。觸類旁通。則頭頭是道。冬至陽生。井泉溫。人身所伏者陽熱。被冬日嚴寒所折。藏於肌骨之間。或爲外邪逗引。或爲情慾所傷。感而觸發。伏氣至淺。感寒至重。則爲傷寒。伏氣日久較重。至春感風熱而發者。則爲春溫。伏氣至重。延至立夏後。夏至前。爲情慾所傷而發者。則爲熱病。然微甚之機。又不必泥執。立夏前爲溫。夏至前爲熱。惟當以伏氣之輕重。以分溫熱也。若夫夏至陰生。井泉寒。人身所伏者陰濕。伏氣微感。天日之陽。熱重者。陰邪易消。惟餘熱熾。自當以辛寒泄熱。伏氣重。所感之陽邪微。宜用苦溫以燥溼。設表裏兩重。又當消息香薷飲以加減矣。活法運乎一心。固不可囿於方圓之中。亦不可出於規矩以外。天時人事。其庶幾乎。

## 地氣

天地之形。其狀如卵。六合於中。其圓如球。日月出沒。運行於天之上。地之下。上下



東西周行如飛輪。春夏日行北陸。秋冬日行南陸。太陽所臨其氣燠。故四方風氣各有偏勝。秦晉地氣寒。遂寒病多而暑病少。吳越滇黔及粵地氣暖。故寒病常而暑病獨劇。至八九月猶如伏時。彼中盲醫不知。率以治寒熱劑投之。以火助火。又且禁人飲水食瓜。至不可救。予萬歷丙午。典試粵四。棘闈中。簾官廝役多病。此呻吟聲相聞。醫皆以爲寒。予詰之曰。某日曾風雨。爾曾服絮否。皆如法用涼劑而痊。撫臺楊公異而索方。予穴中姑抽胸臆數款并方。楊公遂付之梓。題曰張司農活人說。今其板貯西粵藩司中。楊公仁者乎。急於濟人如此。地氣不同。治法亦異。猶越人見罽而駭。毳燕人見布而疑。贗氣局之識。圉之耳。安可一概施藥哉。寒而但見其寒。限於今也。熱而不知其熱。拘於古也。予慮大迷不解。特變而表之。

霖按。地形如球。凡日光所臨之赤道。其氣煖。故南北皆有冰海也。以中國言。西北高原。病多風寒。東南卑下。病多濕熱。豆疹一證。相傳爲馬伏波征南所染。流入中原。蓋南越爲君火之方。得氣最先。北口外至今未有豆患。緣寒水凝結之鄉。君火之氣不及。素問異法方宜論。不可不究心研玩也。

### 辯寒暑證各異

傷寒傷暑二證。流毒天地。沿襲古今。人率習而不察。據其外證。頭痛身痛。發熱惡寒等證相同。皆混於象。而不審內景。不觀乎時。因一名之曰寒。而不知其歧多端。甚不可一律論者。寒之傷人也。一二日在膚宜汗。三四日在胸宜吐。五六日在藏宜下。確有定期可據者。若暑則變幻無常。入發難測。不可尋想。彼暴中之激烈。扁鵲不及攬指而投咀。久伏之深毒。長桑不能隔膚而見藏。最爲難察而難救已。卽尋常之感。亦難覺知。非若傷寒之有定期定證。可據可療者。不拘表裏。不以漸次。不論藏腑。冒暑蒸毒。從口鼻入者。直中心胞絡經。先煩悶。後身熱。行坐近日。熏爍皮膚肢體者。卽時潮熱煩渴。入肝則眩暈頑麻。入脾則昏睡不覺。入肺則喘咳痿。入腎則消渴。非專心主而別藏無傳入也。中暑歸心。神昏卒倒。暑傷肉分。周身煩躁。或如針刺。或有赤腫。蓋天氣浮於地表。故人氣亦浮於肌表也。冒暑入腸胃。腹痛惡心。嘔瀉。伏暑卽冒暑。久而藏伏三焦腸胃之間。熱傷氣而不傷形。旬日莫覺。變出寒熱不定。霍亂吐瀉。膨脹中滿。瘧痢煩渴。腹痛下血等。自入肝至此并主治法。皆以清內火爲主。而解表兼之。寒之中人。乘其虛。暑則虛實并中。而實更劇。蓋氣血強盛之人。內已有伏火。加之外火炎炎相合。故焦灼爲甚。經虛處寒棲之。



經實處暑棲之。寒凌其弱。而暑親其類也。又藜蘆常被寒。惟膏粱獨能禦。若暑則不問膏粱藜蘆。而咸能勝之侮之。雖廣廈疊冰。蕙質生粟。輕羅紈綺。冷冷玉樹。一犯其烈焰。詎能却之乎。是以知暑氣之毒甚於寒。乃古人專以寒爲殺厲之氣。而不及暑何也。試觀寒病至七八日方危。暑病則有危在二三日間者。甚至朝發暮殆。暮發朝殆。尤有頃刻忽作。拯救不及者。如暑風、乾霍亂之類。然則暑之殺厲之氣。視寒尤甚。彰明較著矣。寒病止一途。察脈審候。執古方以療之。易爲力。暑證多歧。中熱中暍。中內中外。甚者爲厥。爲風。爲顛癇。卽發則泄瀉、霍亂、乾霍亂。積久後發。則瘡、痢、瘡瘍。種種病名。約有十餘科。皆暑爲厲。則暑殺厲之氣。視寒不幾倍哉。除暴中暴發。久伏後發。不可度量。其餘受發。亦有漸次焉。蓋盛夏之時。熱毒鬱蒸。無論動得靜得。其初入人也。不識不知。外之流火。與內之陽氣驟遇而爭。陽氣不服。先昏憤倦疲。及火與氣合。氣不能勝。火力雖漸散。爲外熱燒灼不已。氣耗而血枯。故燥渴、痞塞、腹痛諸惡證作焉。此其變化。或乍或久。人莫自覺。醫家亦不能辯。至病深而後施治。故難速愈。宜早辯而早治之。則易愈而取效速。

霖按。此篇辨暑證。精細入微。辨傷寒尤有未盡。然寒暑辨易。溫暑辨難。請詳溫

暑之辨。以補司農未盡之義。素問熱論曰。凡病傷寒而成溫者。先夏至日者爲病溫。後夏至日者爲病暑。暑當與汗出勿止。此節經義不明久矣。詮釋家多以冬傷於寒。伏寒化熱。發於夏至前爲溫病。發於夏至後爲暑病。暑卽熱也。溫爲熱之漸。熱爲溫之甚解。殊不知傷寒爲外感通稱。故上經有熱病類傷寒之文。越人作傷寒有五之辨。此言凡病傷寒而成溫者。謂溫病熱病之類乎傷寒者。非謂先病傷寒。轉輾不愈。而成溫成熱也。且此一節也。亦專論伏氣而言。當作兩截看。凡病傷寒而成溫者。先夏至日爲病溫。爲一截。蓋言凡病類乎傷寒之溫病。在夏至前發者。乃冬至後陽熱被嚴寒殺厲之氣折伏。至春夏間因感觸發。謂之病溫。後夏至日者爲病暑。暑當與汗出勿止爲一截。此卽夏暑汗不出者。秋成風瘧之互詞。夏至陰生。人身所伏者陰氣。遇天日之陽熱。蒸地氣以上騰。人在氣交中。感之爲暑病。熱濕相搏。熱蒸濕爲汗。熱清則汗止。故曰當與汗出勿止也。夫溫暑之治。其清熱雖同。而一宜兼益陰。一宜兼滲濕。陰陽之機有間。安可概論。泥執暑爲熱病。熱乃溫之甚者。非也。

暑證



立夏以後。暑熱盛行。時人有頭疼惡心。身熱惡寒。手足厥冷。肢節沉痛。不思飲食。或氣高而喘。或氣短而促。甚者用手捫之。如火燎皮膚。或腹腸絞疼。或口鼻流血。病候與傷寒相似。不知者誤認傷寒。用風熱發汗藥。或加衣出汗。則元氣益虛。終不知悟。蓋此證乃夏屬陰虛。元氣不足。濕熱蒸人。暴傷元氣。人初感之。即骨乏腿軟。精神倦怠。昏睡懶語。其形如醉夢間。或無汗。或微汗不斷。或大汗不止。煩渴飲水。胸膈痞悶。小便黃而少。大便溏而頻。或嘔或瀉。或結或霍亂不止。此等證與傷寒大異。按時而施治。據證而急療。無不應手者。語曰。勿伐天和。正因時之道也。亦有不頭痛身痛惡寒者。治法皆同。治法輕者以五苓散。以利小便。導火下瀉而暑自解。或香薷飲辛散以驅暑毒。木瓜制暑之要藥也。或藿香正氣散。十味香薷飲之類。重者人參敗毒散。桂苓甘露飲。竹葉石膏湯。白虎湯之類。弱者用生脈散。清暑益氣湯。補中益氣湯等。若不分內外。不論輕重強弱。一概以和解。百發百中。隨試隨應。則無如六和湯最良矣。方書名家。古今甚衆。其中多所發揮。明切精密者。惟朱丹溪爲最詳且要。近世著作。王宇泰先生有證治準繩。證治類方諸帙。獨得其解。批竅中竅。轉丸游刃之技。力追古名流已。工醫者所當時披誦而潛玩者也。

方見後。

霖按暑證論治。此篇要言不煩。可作醫門棒喝。然未若仲景治喝精簡也。第一節言暑證總綱論曰。太陽中喝。發熱惡寒。身重而疼痛。其脈弦細。芤遲。小便已。洒洒然毛聳。手足逆冷。小有勞。身即熱。口開前板齒燥。若發其汗。則惡寒甚。加溫針。則發熱甚。數下之。則淋甚。夫暑爲天日之陽邪。由口鼻皮毛襲入者多。先見寒熱。其身重疼痛。脈弦細。芤遲者。暑多兼濕。蓋弦細芤遲中。寓濡象。挾濕故也。太陰主表。膀胱亦主表。熱邪傷氣。故小便已洒洒然毛聳也。手足冷者。陽氣內鬱而不能外達也。熱濕盛於內。氣絀於外。故氣出身熱。口開齒燥也。若發汗則更傷其表氣。溫針則益其燥熱。下之則熱邪內陷。此示人以暑病之脈證禁忌。而不出方也。第二節論曰。太陽中熱者。喝是也。汗出惡寒。身熱而渴。白虎加人參湯主之。此言熱甚者。宜清熱生陰也。第三節論曰。太陽中喝。身熱疼重。而脈微弱。此以夏月傷冷水。水行皮中所致也。一物瓜蒂湯主之。此言濕甚熱微者。以瓜蒂去身面四肢水氣。水去暑無所依則自解。觀其三法鼎峙。由此類推。其熱濕微甚。治暑已無餘蘊。誰謂長沙知治寒而不知治暑哉。



## 暑厥

夏月有卒然暈倒。不省人事。手足逆冷者爲暑厥。此陰風也。不可驟用寒涼藥。先以辛溫藥散解之。俟醒然後用辛涼以清火除根。誤用熱藥及艾灸立死。童便和薑汁灌亦易甦。

霖按暑厥乃熱邪閉塞諸竅。先以紫金錠涼水磨服一二錢。俟厥回或以竹葉石膏湯。或以黃連香薷飲。夾濕者白虎加蒼朮湯。陰虧者麥冬湯。或生脈散。消息加減治之。西瓜蘆根蘿蔔甘蔗諸汁。清涼滋潤之品。皆可與服。此言暑厥。若寒厥誤認爲熱。則禍不旋踵。然其寒熱之辨。不可不知。凡四肢逆冷。身冷面青。踈臥。手足指甲青黯。腹痛不渴。小便清白。大便溏泄。脈微遲者。陽衰於下之寒厥也。若四肢厥逆。身熱面赤。脣燥口乾。舌苦目閉。或不閉。煩渴。小便短濇。大便燥。脈滑者。陰衰於下之熱厥也。然而寒厥亦有忽然煩躁不寧。欲坐臥泥水井中。此陰極發躁之戴陽證。不可作熱治。熱厥亦有肢冷脈伏。乃熱邪入裏。氣血不得宣通。所謂火極似水也。不可作寒治。夫卒然不省人事。肢冷脈伏。何以辨

其脈之滑數爲熱。微遲爲寒耶。雖然。兩手六部脈乍不見。而尺中應有一兩部未伏。設兩手雖伏。十二經動脈中必有兩三部不伏。即在此未伏脈中。仔細尋其微遲滑數。以定寒熱。若果全身之脈皆伏。其人已氣悶而絕矣。夫暴厥之因實繁。此就寒熱而論。然不獨寒熱當辨。即溫暑同爲熱深之厥。其治有間。而況寒熱乎。是不容不辨也。

### 暑風

忽然手足搐攣。厲聲呻吟。角弓反張。如中惡狀。爲暑風。亦有先病熱後甚。漸成風者。譫語狂呼浪走。氣力百倍。此陽風也。治法以寒涼攻劫之。與陰風不同。皆宜解散化痰。不宜汗下。有日久而脾胃弱者。宜溫補。

霖按。暑風卽痧也。痧甚則厥。近世雖嚴寒溫之防。而取重於安宮。至寶、清營、紫雪之類。全是溫病伏氣。治法與中暑之痧厥。究隔一間。經言先夏至爲病溫。後夏至爲病暑。蓋夏至陰生。太陰濕土用事。濕熱火三氣交蒸。合而爲暑。異乎春夏木火司令。觸發伏氣之溫熱也。夫暑邪由口鼻吸入。直逼血絡。鼓動內風。風



火盤旋。勢不可遏。此少陽相火。太陰濕土。厥陰風木。三氣合邪。奔竄無常。故爲瘥爲瀕也。蓋手少陽三焦相火。與手厥陰包絡相通。暑熱之邪內襲。招引相火。火動風生。則肝木失養。故筋攣脈急。風煽火熾。則包絡受邪。故神識昏迷。身中之氣。隨風火上炎。而有升無降。常度盡失。由是而形若尸厥矣。正內經所謂血之與氣。併走於上。則爲暴厥者是也。外竄經絡。則成瘥。內逼膻中。則爲厥。其治速宜熄風泄火。達絡疎肝。急折其勢。以平其暴。不令其煎熬胃液。甚則用釜下抽薪法。以白頭翁湯消息治之。直折其厥少之盛。待勢稍衰。再議清通包絡。漸進化痰養陰清濕之劑。此正治也。更有暑邪熱極。脈微而躁。肢冷膚冷。面赤氣短。大汗不止而舌潤。或手拘攣。脅亂昏迷者。乃邪熱逼汗。爲陽越之證。急宜參附加童便以回陽。俟甦後再以清暑養陰。以善其後。否則亡陽不救。然苟非脈微足冷。汗出舌潤。則仍是熱證。誤用參附卽死。若無真知灼見。不可輕試。要亦不可不知也。

## 暑者瘍

凡癰疽毒瘡發熱有時。晡甚旦止。若夏月間。有頭面外項赤腫。或咽喉腫痛。或腿足掀腫。長至數寸。不能動履。人皆疑爲瘡。但其頭痛內燥。晝夜發熱不止。自與瘡證不同。但以敗毒散加石膏、黃連等藥。熱證一解。赤腫自消。全無膿血。此名暑瘍。毫厘而千里者也。

霖按。暑瘍一證。熱勝者紅腫堅痛。風勝者則痒。濕勝者多膿水。治宜清達泄熱。消風祛濕。當權其微。甚以消息之。

### 暑瘵

盛暑之月。火能灼金。若不禁辛酒。脾火暴甚。有勞熱燥擾。而火動於心肺者。令人咳嗽氣喘。驟吐血衄血。頭目不清。胸膈煩渴不寧。卽童稚老夫。間一病此。昧者以爲勞瘵。不知火在血上。非真陰虧損而虛勞者等也。宜四物湯、黃連解毒二陳湯三藥內。去川芎、白芍、黃柏。以貝母易半夏。加桔梗以抑之。薄荷以散之。麥冬、五味以斂之。自愈。或加童便、藕汁。或黃連香薷飲一二劑亦可。靜攝數日。忌酒煎炒。自安。是名暑瘵。宜酌而善用焉。或用東垣參苓調中亦妙。

霖按、暑瘵乃陰氣不生。陽氣不潛。證見咳血吐血。日晡煩蒸。早間清爽。舌白口渴。頭脹身疼。皆暑熱之邪內襲。陰劫絡傷。雖有宿恙。亦當先清絡熱。宜沙參、甜杏仁、川貝、薑皮、連翹、麥冬、竹葉、鮮生地等味。鮮荷葉汁一盃和服。尤有奇功。俟血止後。再議育陰。若先後失序。或誤用溫補。則絡中伏熱不得外達。必成不治之證。醫見舌苔白。多疑伏寒。未敢逕用清涼。因循貽誤者有之。不知舌苔白乃暑邪傷氣。肺主氣屬金。金色白故也。

### 絞腸沙

夏間有不頭痛發熱。但覺小腹疼痛。或心腹俱痛。鼓脹痞滿。不能屈伸者。人或疑爲陰證。或執爲食生冷過多。不知皆暑火流注藏腑不能解。故先小腹痛。後及偏心腹。法宜六和湯清解之。或五苓散加香薷、木瓜、紫蘇、半夏之類利散之自愈。若以爲陰病生冷。而用熱藥熱物助之。不可救已。或用炒鹽和滾水服。探吐痰涎亦妙。亦有發熱身痛等證。內兼心腹痛。大概吐法爲上。用藿香正氣散。或二陳湯加厚朴、炒梔佳。



霖按、沙脹爲寒熱錯雜之病。其因甚繁。絞腸特其一證耳。金匱所謂陰毒陽毒者是也。其試沙之法。脈與證相反者沙也。嚼黃豆無豆腥氣。嚼帶毛生芋子而不麻口者沙也。辨沙之法。先吐瀉而心腹絞痛者。多由穢氣而發。先心腹絞痛而吐瀉者。多由暑氣而發。心胸昏悶。痰涎膠結者。多從伏熱而發。遍身腫脹疼痛。四肢不舉。舌強不言者。多因寒氣冰伏火毒而發。治沙之法。病在孫絡者表也。先宜在病者背心輕輕向下刮之。病在絡脈者裏也。先宜於十手指指甲處舌下兩旁兩臂彎及委中等穴刺之。以泄其毒。然後審證製方。王養吾沙書。郭右陶玉衡言之最詳。豈六和五苓正氣二陳便能歲事哉。仲景於金匱未便定方。祇以一升麻鼈甲湯加減示人途徑。其意深矣。然沙脹之治難定。而沙脹之原不可不知。

又按、內經言營氣取營運於中之義。西醫謂食入於胃。至小腸皆有微絲管吸其精液。上至頸會管。過肺入心左房。化赤爲血。此卽清者爲營也。其血從左房入總脈管。由脊之膂筋。循行經脈之間。一日夜五十周。盡八百十丈之脈道。以應呼吸漏下者之營氣也。經言衛氣取衛護於外之義。西醫謂經脈中之血氣。

由脈管之尾。出諸氣街。入微絲血管。經謂孫絡者是也。與陽明之悍氣人之飲食五味西醫謂之炭氣者是也。相合。散布通體。皮膚之間。充膚熱肉。淡滲毫毛。此即濁者歸衛也。脈管之赤血。既入微絲血管。合陽明悍氣。則其色漸變漸紫。西醫謂之炭氣有散布遍體。漸併漸粗。入迴血管者是也。之尾。血入迴血管。內而藏府。外而經脈。並脈管交相逆順而行。外行經脈者。有陰陽之別。一支浮於肌腠之上。一支沉於分肉之間。即陽絡行於皮表。陰絡行於皮裏。而皆與脈管偕行。經言營在脈中。衛在脈外者是也。迴血管內外行。遍入總迴管。至心右房。遞入於肺。呼出悍氣。吸入生氣。其血復化為赤。入心左房。經言陰陽相貫。如環無端者。此之謂也。沙脹為寒暑錯雜之毒邪。由皮毛而入者。與陽明悍氣合。阻遏纏布周身孫絡中之血氣。由口鼻吸受者。阻遏絡脈中之血氣。暑毒鬱遏悍氣。愈遏其毒愈烈。故一發燎原。苟不急治。則毒由迴血管入心。入心則死矣。急治之法。藥餌功緩。故宜刮宜刺。急泄其毒邪。不令入心。徐圖解救。否則不明致沙之原。妄使湯藥。幾同操刃。

時疫

見朱丹溪



春應煖反寒。夏應熱反涼。秋應涼反熱。冬應寒反溫。此非其時而有其氣。是以一歲之中。長幼之病。多相似者。爲時行溫疫病也。治法用人參敗毒散。九味羌活湯。夏加滑石。石膏。冬加麻黃。桂枝。春秋止依原方。或藿香正氣散。五積散。防風通聖散亦可。甚者黃連解毒湯。竹葉石膏湯。

霖按。疫者猶徭役之謂。大則一郡一城。小則一村一鎮。比戶傳染。多見於大凶之後。蓋旱潦兵火之餘。烈日鬱蒸。尸骸之氣。與亢勝之氣。混合化爲沴厲之毒。散漫於天地之間。沿門闔境。最易沾染。若不傳染。便非溫疫。乃四時常氣之溫熱證耳。越人所謂異乎寒熱之溫病。其脈行在諸經。不知何經之動也。各隨其經之所在而取之。緣古無瘟字。溫卽瘟疫之謂也。夫溫疫爲天地沴厲之氣。不可以常理測。卽不可以常法治。方書溫瘟不分。治法多誤。良可慨矣。先哲治疫。有上焦如霧。升逐解毒。中焦如瀉。疏逐解毒。下焦如瀆。決逐解毒之論。深得治疫要領。故吳又可溫疫論。治熱濕相搏之疫。首用達原飲。繼則三消承氣。以決逐之。陳錫三二分晰義。揚栗山寒溫條辨中。亦以升降散升決併用爲首方。若余師愚疫疹一得之清溫敗毒飲。乃專治熱淫所勝之溫疫。故一意清熱。而不



兼驅濕也。更有爛喉丹沙。傳變甚速。亦不外乎疎達清散。清化下奪。救液諸法。陳耕道疫沙草論之最詳。近又出熱疫白喉一證。其治法載諸張紹修白喉捷要。此兩證亦互相傳染。皆溫疫之流亞也。龐安常傷寒總病論所載。青筋牽赤。脈攢黃肉。隨白氣狸。黑骨溫諸疫。是本於素問遺編之五行五疫也。近人約爲六證。所謂大頭瘟、蝦蟇瘟、瓜瓢瘟、疔瘡瘟、軟脚瘟、絞腸瘟是也。斯皆疫之兼於溫者。其病層出不窮。其方亦難備載。豈人參敗毒九味羌活兩方加減。便可概治。非常理所能測之溫疫哉。

## 寒疫

一夏月亦有病涼者。偶遇暴風怒雨。不及加衣。或夜失覆。或路行冒犯。皆能爲涼證。此非其時而有其氣。謂之寒疫。治法與暑症異。亦以九味羌活湯敗毒散以辛散和解爲主。不可專用汗藥。此論乃李東垣先生發自十書中。從來醫書罕及。然僅百之一耳。以一律百。以或然爲固然。左矣。

霖按。寒疫多病於金水不斂之年。人氣應之。以其毛竅開而寒氣閉之也。疫乃

天地不正淫洩厲氣。頗難驟逐。非風寒之邪。一汗可解。治法宜蘇桂杏草等溫散。更察其兼濕兼風。消息治之。東坡在黃州。以聖散子治疫甚效。亦寒疫挾溼之方也。後永嘉宣和間服此方殞命者。不知凡幾。蓋以寒疫之方。誤施於溫疫者也。

## 脈理

脈訣舉要曰。暑傷於氣。所以脈虛弦細。訖遲。體狀無餘。劉覆真曰。暑脈虛而微弱。按之無力。又脈來隱伏弦細。訖遲。皆暑脈也。脈虛身熱。得之傷暑中暍。脈虛而微者是也。寒病傳經。故脈日變。溫熱不傳經。故脈不變。寒病浮洪有力者易治。訖細無力者難治。無脈者不治。若溫熱則不然。溫有一二部無脈者。暑熱有三四部無脈者。被火所逼勒而藏伏耳。非絕無也。於病無妨。攻之亦易。醫人一診。驚走不知。照經用辛寒藥。火散而脈起。脈起而病愈。徒駭何益乎。要在辨之詳耳。蓋溫熱病。有中一二經。始終止在此一二經。更不傳遞。別經者。其一二經或洪數。則別經弱且伏。依經絡調之。則洪者平。伏者起。乃愈徵也。昔在萬



歷丁未三月間。予寓京師。備員太倉庫差。忽一日吏部同鄉劉蒲亭馳報曰。病劇求教。予就其寓。吏部同僚諸公環守之。已備後事。譖語抹衣不寐者七八日。已御醫院吳思泉。名醫也。偕醫數人治之。予診脈止關脈洪大。其餘皆伏。乃書方竹葉石膏湯。諸公皆驚曰。吳等已煎附子理中湯。何冰炭如是。予詰之曰。吳云陽證陰脈。故用附子。予曰。兩關洪大。此陽脈也。其餘經爲火所伏。非陰脈也。吳厲聲相爭。予亦動色自任。諸公從之一劑。晡時卽止譖語抹衣。就寐片時。予視其脈已洪者平而伏者起。諸公相視曰。此真張仲景也。又用辛涼藥調理痊愈。脈症有相合者。易知。有相左者難知。脈明而後可以辨證。證真而後可以施藥。要在虛心細察。不可執己見而以百藥嘗試。令命在反掌間也。慎之慎之。

霖按。溫暑之脈多有伏者。然總不全伏。若診一二部未伏之脈必洪數。雖不洪數。細按之定必有力。初病尤當於血氣中以辨寒熱。素問陰陽應象大論曰。左右者。陰陽之道路也。水火者。陰陽之徵兆也。此論血氣陰陽之升降。以藏氣言。肝木左升。肺金右降。以脈體言。左屬血。右屬氣。凡診感證之脈。傷寒多盛於左部。寒傷形。傷其有形之營血也。溫暑多盛於右部。熱傷氣。傷其無形之衛氣也。



此水火之徵兆。血氣之左右。不可不察。若濕甚熱微者。又不可泥此。

又按。夫血氣陰陽。錯宗互用。其理淵微。言之不盡。自東垣辨感論。強分左爲人迎。右爲氣口。以人迎脈大於氣口。屬外感。氣口脈大於人迎。屬內傷。然此所云外感者。指外感風寒而言。云內傷者。指內傷飲食而言。蓋寒傷形血。故脈盛左部。食傷胃府。故脈盛右關。後世醫家。誤會其意。竟謂凡病外感。皆當左盛。凡病內傷。皆當右盛。血氣不分。陰陽莫辨。雖有王安道論之於前。吳又可論之於後。奈積習難反。寒熱倒施。能不遺人天扎。鮮矣。若夫傷寒傳入陽明。右關脈實大者。燥矢填於胃府。宜議下。溫暑陷入陰經。左關尺數大者。肝腎之伏熱。與外熱相搏。多不治。活法在人。不可拘執。左大風寒。右大溫暑也。然而初病風寒。浮緊必盛於左部。初病溫暑。洪數必盛於右部。此又不可不察也。

## 五運六氣

運氣症治者。所以參天地陰陽之理。明五行衰旺之機。考氣候之寒溫。察民病之凶吉。推加臨補瀉之法。施寒熱溫涼之劑。古人云。治時病。不知運氣。如涉海問津。

誠哉言也。今遵先賢圖訣。撮其要領。使人一覽而知其悉也矣。

### 五運配十干之年

甲己得合爲土運。乙庚得合爲金運。丁壬得合爲木運。丙辛得合爲水運。戊癸得合爲火運。

### 六氣爲司天之歲

子午少陰君火。丑未太陰濕土。寅申少陽相火。卯酉陽明燥金。辰戌太陽寒水。巳亥厥陰風木。

### 南政北政

甲己土運爲南政。蓋土居中央。君尊南面。行餘四運。以臣事之。面北而受令。所以有別也。

### 十二支年分運氣

子午年少陰君火司天。歲氣熱化之候。

司天者。天之氣候也。

君火者。手少陰心經也。心者君主之官。神明出焉。君火乃主宰陽氣之本。餘

象生土。乃發生萬物之源。

陽明燥金在泉。

在泉者。地之氣候也。

初之氣。厥陰風木用事。子上父下。益辛瀉苦。自年前十二月大寒節起。至二月驚蟄終止。

天時 寒風切冽。霜雪水冰。蟄蟲伏藏。

民病 關節禁固。腰腿疼。中外瘡瘍。

二之氣。少陰君火用事。火盛金衰。補肺瀉心。自二月春分節起。至四月立夏終止。

天時 風雨。時寒雨。生羽蟲。

民病 淋氣鬱於上而熱。令人目赤。

三之氣。少陽相火用事。君相二火。瀉苦益辛。自四月小滿節起。至六月小暑終止。

天時 大火行。熱氣生。羽蟲不鳴。燕百舌杜宇之類。



民病 厥熱心痛。寒更作咳喘目赤。

四之氣。太陰濕土用事。子母相順。瀉肺補腎。自六月大暑節起。至八月白露終止。

天時 大雨時行。寒熱互作。

民病 黃疸衄血。咽乾嘔吐痰飲。

五之氣。陽明燥金用事。心盛肺衰。火怕水復。自八月秋分節起。至十月立冬終止。

天時 溫氣乃至。初冬尤煖。萬物向榮。

民病 寒熱伏邪。於春爲瘧。

六之氣。太陽寒水用事。火衰心病。瀉鹹益苦。自十月小雪節起。至十二月小寒終止。

天時 暴寒勁切。火邪恣毒。寒氣暴止。

民病 生腫咳嗽。甚則血溢。下連小腹而作寒中。

丑未年太陰濕土司天。歲氣濕化之候。

太陰濕土者。足太陰脾經也。脾屬中央戊己土。每季寄王一十八日。合爲七十二日。以應一歲。六六三百六十日之成數也。

太陽寒水在泉。

初之氣。厥陰風木用事。主旺客衰。瀉酸補甘。自年前十二月大寒節起。至二月驚蟄終止。

天時 大風發榮。雨生毛蟲。

民病 血溢。經絡拘強。關節不利。身重筋痛。

二之氣。少陰君火用事。以下生上。瀉甘補鹹。自二月春分節起。至四月立夏終止。

天時 大火至。疫癘。君命宜行。濕蒸相搏。暴雨時降。

民病 瘟疫盛行。遠近咸若。

三之氣。少陽相火用事。土旺尅水。補腎瀉脾。自四月小滿節起。至六月小暑終止。

天時 雷雨電雹。地氣騰。濕氣。

民病 身重跗腫。胸腹滿。感冒濕氣。  
四之氣。太陰濕土用事。甘旺鹹衰。補腎益膀胱。自六月大暑節起。至八月白露  
終止。

天時 炎熱沸騰。地氣升。濕化不流。

民病 腠理熱。血暴溢。寒瘧。心腹脹。浮腫。

五之氣。陽明燥金用事。土能生金。益肝瀉脾。自八月秋分節起。至十月立冬終  
止。

天時 大涼。霧露降。

民病 脾胃寒。瘧痢甚行。

六之氣。太陽寒水用事。以上尅下。瀉脾補腎。自十月小雪節起。至十二月小寒  
終止。

天時 大寒凝冽。

民病 關節禁固。腰腿拘痛。

寅申年少陽相火司天。歲氣火化之候。



少陽相火者。三焦浮流之火。火邪則炎上。上尅肺金。金受尅。腎水失母。則上盛下虛。虛陽上攻。變生諸疾。至傷元氣。

厥陰風木在泉。

初之氣。厥陰風木用事。子父相逢。瀉苦益辛。自年前十二月大寒節起。至二月驚蟄終止。

天時 熱氣傷人。時氣流行。

民病 寒熱交作。咳逆頭痛。血氣不調。心腹不快。

二之氣。少陰君火用事。肺衰心盛。制苦益辛。自二月春分節起。至四月立夏終止。

天時 暴風疾雨。溫濕相蒸。

民病 上熱咳逆。胸膈不利。頭痛寒熱。

三之氣。少陽相火用事。夏旺火熾。補益大腸。自四月小滿節起。至六月小暑終止。

天時 炎暑亢旱。草萎河輪。

民病 煩熱。赤目喉閉。失血熱渴風邪。人多暴死。

四之氣。太陰濕土用事。火能生土。瀉甘補鹹。自六月大暑節起。至八月白露終止。

天時 風雨時降。炎暑未去。

民病 瘧痢交作。寒熱頭疼。

五之氣。陽明燥金用事。肺金受邪。瀉苦補辛。自八月秋分節起。至十月立冬終止。

天時 寒熱風雨。草木黃落。

民病 邪寒風熱。君子周密。

六之氣。太陽寒水用事。心火受尅。瀉鹹補苦。自十月小雪節起。至十二月小寒終止。

天時 寒溫無時。地氣正寒。霜露乃降。

民病 感冒寒邪。關節不利。心腹痛。

卯酉年陽明燥金司天。歲氣燥化之候。

陽明燥金者。肺與大腸之氣。象庚辛金也。

少陰君火在泉。

初之氣。厥陰風木用事。金木相尅。補酸瀉辛。自年前十二月大寒節起。至二月驚蟄終止。

天時 陰始凝。風始肅。水乃冰。寒雨多。花開遲。

民病 寒熱浮腫。失血嘔吐。小便赤淋。

二之氣。少陰君火用事。火盛金衰。瀉辛益酸。自二月春分節起。至四月立夏終止。

天時 臣居君位。大熱早行。

民病 疫癘流行。人多卒暴。

三之氣。少陽相火用事。主盛客衰。瀉心補肺。自四月小滿節起。至六月小暑終止。

天時 燥熱交合。風雨暴至。

民病 寒熱頭疼。心煩作渴。



四之氣。太陰濕土用事。以下生上。瀉辛益酸。自六月大暑節起。至八月白露終止。

天時 早秋寒雨。有傷苗稼。

民病 卒暴寒熱。風邪傷人。心疼浮腫。瘡瘍失血。

五之氣。陽明燥金用事。金盛木衰。瀉肺補肝。自八月秋分節起。至十月立冬終止。

天時 冬行春令。草木生青。風雨生蟲。

民病 寒熱作痢。氣血不和。

六之氣。太陽寒水用事。客來助主。益苦瀉鹹。自十月小雪節起。至十二月小寒終止。

天時 氣候反溫。蟄蟲出現。

民病 疫癘溫毒。寒熱伏邪。

辰戌年太陽寒水司天。歲氣寒化之。

太陽寒水者。足膀胱經也。與足少

太陰濕土在泉。

初之氣厥陰風木用事。脾胃受邪。瀉鹹助甘。自年前十二月大寒節起。至二月驚蟄終止。

天時 氣早煖。草早榮。溫風至。

民病 瘟疫寒熱。頭痛嘔吐瘡瘍。

二之氣少陰君火用事。心火受邪。瀉酸補甘。自二月春分節起。至四月立夏終止。

天時 春寒多雨。寒濕無時。

民病 氣鬱中病。浮腫寒熱。

三之氣少陽相火用事。以上尅下。瀉鹹助苦。自四月小滿節起。至六月小暑終止。

天時 暴熱乍涼。疾風暴雨。

民病 寒熱吐痢。心煩悶亂。癰疽瘡瘍。

四之氣太陰濕土用事。木旺土衰。瀉甘補酸。自六月大暑節起。至八月白露終

止。

天時 風濕交爭。雨生羽蟲。暴風疾雨。

民病 大熱短氣。赤白痢瀉。

五之氣。陽明燥金用事。金生水旺。制鹹益苦。自八月秋分節起。至十月立冬終止。

天時 濕熱而行客主令。

民病 氣虛客熱。血熱妄行。肺氣壅盛。

六之氣。太陽寒水用事。水盛火衰。瀉酸助苦。自十月小雪節起。至十二月小寒終止。

天時 凝寒雨雪。地氣正。濕令行。

民病 病乃悽慘。孕婦多災。脾受濕。肺旺肝衰。

巳亥年厥陰風木司天。歲氣風化之候。

厥陰風木者。足厥陰肝經也。肝屬東方甲乙木。春旺七十二日也。

少陽相火在泉。



初之氣。厥陰風木用事。脾胃受邪。瀉酸補甘。自年前十二月大寒節起。至二月驚蟄終止。

天時 寒始肅。客行主令。殺氣方至。

民病 寒居右脇氣滯。脾胃虛壅。

二之氣。少陰君火用事。火旺金衰。瀉心補肺。自二月春分節起。至四月立夏終止。

天時 寒不去。霜雪冰。殺氣施。木草焦。寒雨至。

民病 熱中。氣血不升降。

三之氣。少陽相火用事。肺經受邪。瀉苦益辛。自四月小滿節起。至六月小暑終止。

天時 風熱大作。雨生羽蟲。

民病 淚出。耳鳴掉眩。

四之氣。太陰濕土用事。木土相刑。瀉酸益甘。自六月大暑節起。至八月白露終止。

天時 熱氣返用。山澤浮雲。暴雨溽濕。

民病 心受邪。黃疸。面爲浮腫。

五之氣。陽明燥。金用事。以金刑木。瀉肺益肝。自八月秋分節起。至十月立冬終止。

天時 燥濕更勝。沉陰乃布。風雨乃行。

民病 寒氣及體。肺受風。脾受濕。發爲瘧。

六之氣。太陽寒水用事。主助客勝。瀉酸補甘。自十月小雪節起。至十二月小寒終止。

天時 畏火司令。陽乃化火。蟄蟲出現。流水不冰。地氣大發。草乃生。

民病 瘟疫。心腎相制。

按天上地下。而人居其中。一炁布分。三才並立。人與天地。呼吸相通。升降相符。故陰陽寒暑之氣。內外合一。若魚與水然。故運氣所感。卽人之疾病應之。善攝生者。能調和臟腑。使血氣順軌。天時不能侵。不則逐氣而化疫癘。扎瘥不可勝瘳。至於因證而思治。癘不能干。人可以勝天。是在乎司命留意焉。

霖按。運氣之學。白首難窮。本不必過泥。然此篇言六氣而不言五運。且有主氣而無客氣。何以明勝復亢制之理。設逕執某年某氣應患何病。必用何藥。則誤人非淺。轉不若繆希雍之不言爲善。茲將客氣主運客運錄於左。聊備詳查。不足知運氣之奧也。

### 增訂客氣客運活法

客氣者。乃地之陰陽。正化對化。加臨主氣。六位之客氣也。夫天干起運。地支起氣。如子午年少陰君火。司天。陽明燥金在泉。氣由下而升上。卽以在下之陽明起之。陽明燥金。金生水。客之初氣爲太陽寒水。水生木。二氣爲厥陰風木。木生火。三氣爲少陰君火。火生土。四氣爲太陰濕土。三陰極生一陽爲震。卽少陽相火。故少陽相火爲客之五氣。太陰濕土。土生金。陽明燥金爲客之六氣。餘倣此推。故丑未年客之初氣。厥陰風木。二氣少陰君火。三氣太陰濕土。四氣少陽相火。五氣陽明燥金。六氣太陽寒水。寅申年客之初氣。少陰君火。二氣太陰濕土。三氣少陽相火。四氣陽明燥金。五氣太陽寒水。六氣厥陰風木也。卯酉年客之



初氣。太陰濕土。二氣少陽相火。三氣陽明燥金。四氣太陽寒水。五氣厥陰風木。六氣少陰君火。辰戌年客之初氣。少陽相火。二氣陽明燥金。三氣太陽寒水。四氣厥陰風木。五氣少陰君火。六氣太陰溼土。巳亥年客之初氣。陽明燥金。二氣太陽寒水。三氣厥陰風木。四氣少陰君火。五氣太陰溼土。六氣少陽相火也。主運者。每歲不移之主運也。以木爲初運。在年前大寒後交木生火。以火爲二運。在春分後交火生土。以土爲三運。在芒種後交土生金。以金爲四運。在處暑後交金生水。以水爲五運。在立冬後交。每運各主七十三日五刻有奇。此歲歲之常也。客運者。十干合化之運也。甲己之年爲土運。乙庚之年爲金運。丙辛之年爲水運。丁壬之年爲木運。戊癸之年爲火運。此每歲加臨之中運。每歲以中運起運。如甲己之年。土運統之。卽土爲初運。土生金。金爲二運。金生水。水爲三運。水生木。木爲四運。木生火。火爲五運。乙庚之年。初金運。二水運。三木運。四火運。五土運。丙辛之年。初水運。二木運。三火運。四土運。五金運。丁壬之年。初木運。二火運。三土運。四金運。五水運。戊癸之年。初火運。二土運。三金運。四水運。五木運。此歲歲變遷之客運也。但乙丁己辛癸屬陰干。爲五陰年。主不及之運。甲丙

戊庚壬屬陽干。爲五陽年。主太過之運。此陰不及陽太過之例也。所載主氣客氣主運客運者。皆四時之常。不足候天地之變。沈存中曰。寒暑風雨水旱螟蝗。率皆有法。而人之衆疾。亦隨氣運盛衰。其術多不驗何歟。蓋膠於定法。而不知所用故也。假令厥陰用事。其氣多風。民病溼泄。豈普天之下皆多風。普天之民皆病溼泄耶。至於一邑之間。而暘雨有不同者。此氣運安在。欲無不謬。不可得也。大凡物理有常。卽有變。運氣所主者常也。異乎所主者皆變也。常則如本氣。變則無所不至。而各有所占。故其候有從逆。淫鬱勝復太過不及之變。其發皆不同。若厥陰用事多風。而草木榮茂。是之謂從。天氣明潔燥而無風。此之謂逆。太虛埃昏。流水不冰。此之謂淫。大風折木。雲物濁擾。此之謂鬱。山澤焦枯。草木凋落。此之謂勝。大暑燔燎。螟蝗爲災。此之謂復。山崩地震。埃昏時作。此謂之太過。陰森無時。重雲晝昏。此之謂不及。隨其所變。疾厲應之。皆視當時當處之候。雖數里之間。但氣候不同。而所應全異。豈可膠於一定。熙寧中京師久旱。祈禱備至。連日重陰。人謂必雨。一日驟晴。炎日赫然。予時因事入對。上問雨期。予對曰。雨候已見。期在明日。衆以謂頻日晦溽。尙且不雨。如此暘燥。豈

復有望。次日果大雨。是時溼土用事。連日陰者。從氣已効。但爲厥陰所勝。未能成雨。後日驟晴者。燥金入候。厥陰當折。則太陰得伸。明日運氣皆順。以是知其必雨。此亦當處所占也。若他處候別。所占亦異。其造微之妙。間不容髮。推此而求。自臻至理。夫沈氏爲以主客皆常。而以當時當處所見者爲客。深得軒岐活法。若邵弁占候補遺十五條。尤嫌緣刻。未能盡運氣之變也。故不錄。其太過不及。淫鬱從逆。勝復之應。仍當於內經中求之。



增評傷暑金書 卷上 增訂客氣客運活法

增訂葉評傷暑全書

明 穎郡 張鶴騰鳳遶原著

清 揚州 葉霖子雨增評

鄞縣 曹赤電炳章校點

卷中

古今名醫暑證彙論

張機 字仲景。東漢南陽人。舉孝廉。官至長沙太守。作傷寒論。醫方大備。扁鵲倉公。無以加焉。後世稱為醫聖。

孫思邈 唐景北華原人。幼稱聖童。隋文帝召不拜。太宗即位。召見。拜諫議大夫。固辭。隱太白山。學道養氣。得度世之術。洞曉天文。精究醫業。著千金方三十卷。朱肱 號無求子。宋吳興人。深於傷寒。著活人書。道君朝詣闕投進。授奉議郎。醫學博士。其中論暑一二款。見節菴內。不另載。

劉完素 字守真。金河間人。少聰敏博學。忽遇異人。以酒飲之。大醉。及寤。洞達醫術。撰運氣要旨論。精要宣明論。素問玄機原病式。然好用涼劑。以降心火益腎水爲主。自號通玄處士。

張元素 字潔古。金易州人。八歲試童子舉。二十七歲試經義進士。犯廟諱下第。乃學醫。洞徹其術。其學則李東垣深得之。其論不另載。

李杲 字明之。號東垣。元之鎮人也。幼好學。博經史。尤樂醫藥。捐千金從張元素。盡傳其業。當時稱爲醫聖。東垣十書。多其著述。

朱震亨 字彥修。學者尊之曰丹溪先生。元末婺之義烏人也。自幼好學。日記千言。從許文懿公得朱子四傳之學。因母病。卽慨然曰。士苟精一藝。以推及物之仁。雖不仕於時。猶仕也。乃棄舉業。一於醫致力。寢然稱醫大成焉。

方廣 字約之。號古菴。休寧人。讀儒之暇。留意醫經。爲名醫。善用丹溪法。

王綸 字汝言。號節齋。浙江慈谿人。官至廣東布政。因父病。精醫。著明醫雜著。發丹溪所未發。世甚尊信之。

陶華 字尙文。號節菴。餘杭名醫。幼讀儒書。旁通百氏。著傷寒瑣言。發仲景所



未發。大行於世。正統間被徵。引疾歸。時論高之。

虞搏 字天民。號恆德老人。正德花溪人。著醫學正傳、醫學權輿、醫學集成。岐黃之宗匠也。

李梴 字文清。江右南豐人。生儒家。習詩禮之訓。惓惓有志於澤物。遂博古今方論。著醫學入門。雖時業乎。而精詳可追花溪。

王肯堂 字宇泰。號損菴。金壇人。中萬曆己丑進士。授翰林檢討。制舉義鑿覈。傳誦海內。尤以岐黃顯。所著有證治準繩、證治類方諸書。大行於世。慧識燭照。精心縷析。力追古人焉。

按自古以方術名世者。多不能徧列。姑卽其切於治暑者。錄其論并方。因錄其姓氏。使後之業岐黃者。誦其書以考其世。奮然有仰止之思焉。安知不與古長桑、伯元諸公。競駕而馳聲乎。

張仲景 傷寒例第三論 痊濕喝第四論 辨太陽病脈第五論

傷寒例第三論曰。脈盛身寒得之傷寒。脈虛身熱得之傷暑。

霖按此乃王叔和序例中語。不得拉雜謂是仲景之論。脈盛傷寒是矣。然必盛

於左部。脈虛身熱傷暑是矣。虛大之脈。必盛於右部。且傷寒未有不發熱者。此序例言其略例耳。不可泥也。

瘧瘧喝第四論曰。太陽中熱者喝是也。其人汗出惡寒。身熱而渴也。

又曰。太陽中喝者。發熱惡寒。身重而疼痛。其脈弦細。訖遲。小便已。灑灑然毛聳。手足逆冷。小有勞。身即熱。口開。前板齒燥。若發汗。則惡寒甚。加溫針。則發熱甚。數下之。則淋甚。

按此證一味涼藥清內火。辛以散之。酸以收之。三者爲妙。汗下俱不可。若加之溫針。則速其斃耳。

釋按仲景治喝三法。鼎峙前已釋明。註言此證一味涼藥清內火。辛以散之。酸以收之。三者爲妙。恐未盡然。身重而疼痛。其脈弦細。訖遲。瘧勝也。豈寒涼酸收所能治哉。疎矣。

辯太陽病脈第五論曰。傷寒二三日。陽明少陽證不見者。爲不傳也。

釋按此節正仲景示人以傳經之活法也。天有寒暑燥溼風火之六氣。人之藏府有三陽三陰之六氣。天之寒熱感於人。人即以己身之寒氣應之。所謂同氣



相得也。靈樞本藏篇云。三焦膀胱者。腠理毫毛其應。是太陽寒水主皮毛。爲膚表之第一層。故風寒首傷太陽。然亦有不從太陽而竟至於陽明少陽。以及於三陰者。蓋三陽三陰所主之部位。何經虛。何經卽受邪也。如病形篇云。中於面則下於陽明。中於項則下太陽。中於頰則下少陽。其中於膺背兩脇。亦中其經。又曰。中於陰者。常從肱臂始是也。至於素問熱論。所謂傳經之法。一日太陽。二日陽明。三日少陽。四日太陰。五日少陰。六日厥陰者。乃人身之六氣。以次相傳。此氣傳非病傳。但人身何經何氣之虛。其病邪亦卽由此而入。所謂邪之所湊。其氣必虛也。仲景恐治傷寒者。泥於按日傳經。故曰傷寒二三日。陽明少陽證不見者。爲不傳也。是二日陽明如傳。當見身熱目疼鼻乾不得臥。三日少陽當見胸脇痛而耳聾。若不見陽明少陽經病證。則不傳也。三陰亦然。是傳經不可拘執按日。見何經病證。卽以何經法治之。至若言足不言手者。省文也。須知陰陽有互根之義。寒邪首傷足太陽。熱邪必首傷手太陰。此互根之理。不可移易者也。後世言傷寒按日傳經。固屬大謬。而謂溫暑祇在三焦。而不傳他經者。亦非果否。則一日太陽。二日陽明傳經之說。何以見諸熱論乎。夫傷寒有直中三



陰者。溫熱伏氣有發於少陰。出諸少陽者。暑邪中人。有入心入肝入脾之辨。是皆不可膠柱者也。

又曰。太陽病發熱而渴。不惡寒者爲溫病。

按。溫病無專經。隨其所中。以脈辨之。亦有不中太陽。初不頭痛惡寒諸證。而庸醫認爲痰火內傷。禍不旋踵矣。此證不傳經。止中一二經。慎之慎之。

霖按。溫病乃冬至陽生。人身所伏之陽熱。被嚴寒折伏。藏於肌骨之間。至春鬱遏之陽熱。爲外邪逗引。始得發泄。伏陽既出。肌膚遇春令之氣。暄熱兩熱相干。而成溫病。卽素問生氣通天論所謂冬傷於寒。春必病溫者是也。其外感之邪。輕故不惡寒。祇發熱而渴。亦有微惡寒。旋即熱渴者。外邪較重也。若口黏苔膩。身痛便溏。有汗不解。脈濡數者。非中風。乃溫病挾溼也。溫邪內發。其脈多盛於右部。熱傷氣也。風熱之邪外受。先傷手太陰經。風寒之邪。則先傷足太陽經。蓋肺主表。膀胱亦主表也。治傷寒之麻黃湯。非瀉肺藥乎。言太陽病則手太陰亦包括於中。省文也。溫熱當察三焦論治。其傳經見何經證。以何經法治之。傷寒亦然。惟用藥寒熱之不同耳。或言溫熱不傳經。祇重三焦。則熱論何以又有一

日巨陽。二日陽明傳經之文。此不待辨亦明矣。謂溫病無專經。此越人五十八難指疫證而言。不得拉雜冬日伏氣之溫熱病也。

又曰。若發汗已身灼熱者。名曰風溫。風溫爲病。脈陰陽俱浮。自汗出。身重多眠睡。鼻息必鼾。語言難出。若被下者。小便不利。直視失溲。若被火者。微發黃色。劇則如驚癇。時瘵癰。若火熏之一逆。尙引日。再逆促命期。

按此證皆春溫。以內有火熱。感以風寒。故一發劇也。眠睡語難。皆火內灼。非風溫外甚也。自汗風傷衛。不惡寒。外證輕也。止宜辛涼藥內解。微發表則愈。霖按風溫爲內蘊伏熱。外感風邪。其惡風怯寒。爲或有之證。而熱渴欬嗽。爲必有之證也。發汗已身灼熱者。是誤以辛溫發表。風藥多燥。觸引伏氣。風火相煽。致有自汗。身重多睡。鼻鼾。語難出諸候。斯皆誤汗劫液後之變證。非風溫初病固有之證也。若再誤下誤火。則直視失溲。驚惕瘵癰。一逆尙引日。再逆促命期矣。此明初旣誤表。繼又誤下誤火。釀成不可救藥。足徵風溫爲燥熱之病。泄熱和陰。爲斯證一定治法。縱或稍挾表邪。祇宜葱豉。薄荷等味。辛涼經劑。啓腎氣疎風熱是矣。豈可妄施麻桂哉。



孫思邈 傷寒例論

傷寒例論曰。易稱天地變化。各正性命。然則變化之迹無方。性命之功難測。故有炎涼寒燠。風雨晦冥。水旱妖災。蟲蝗怪異。四時八節。種種施化不同。七十二候。日月運行各別。終其晷度。得成年。是謂歲功畢矣。天地尙且如此。然在人安可無事。故人生天地之間。命有遭際。時有否泰。吉凶悔吝。苦樂安危。喜怒愛憎。存亡憂畏。關心之慮。日有千條。謀身之道。時生萬計。乃度一日。是故天無一歲不寒暑。人無一日不憂喜。故有天行溫疫病者。卽天地變化之一氣也。斯蓋造化必然之理。不得無之。故聖人雖有補天之極之德。而不能廢之。雖不能廢之。而能以道御之。其次有賢人。善於攝生。能知撙節。與時推移。亦得保全。天地有斯瘴癘。還以天地所生之物以防備之。命曰知方。則病無所侵矣。然此病也。俗人謂之橫病。多不解治。皆曰日滿自差。以此致枉者。天下太半。凡始覺不佳。卽須救療。迄至於病愈。湯食競進。折其毒勢。自然而差。必不可令病氣自在。恣意攻人。拱手待命。斯爲誤矣。按真人此論。從天人合基處發脈。義理源頭上起瀾。而議論蒼古。渾渾灑灑。真與南華並傳。雖論寒哉。而溫與暑之秘。皆兼之矣。敬錄置之座右。以爲玄宗之



一助。醫道特其餘耳。

劉河間 中暑論

中暑之證。身熱頭痛。背寒面垢。自汗煩燥。大渴口乾。倦怠而身不痛。或時惡寒。或畏日氣。脈虛而弱。無問表裏。通宜白虎湯。并感冒發熱煩渴。五苓散。桂枝茯苓甘露飲。黃蓮香薷飲。或雙解散。或裏熱甚。腹滿而脈沉可下者。大承氣湯下之。或三一承氣湯尤妙。半表半裏者。小柴胡湯。涼隔散。天水散。  
按。劉河間論暑證甚詳。獨明於諸家用藥。頭頭中款。可謂得其解者。但暑證不分表裏。一味清內。得寒涼而解。苦酸而收。不必用下承氣湯走馬之糞也。却之却之。

李東垣 暑傷胃氣論

刺志論云。氣虛身熱。得之傷暑。熱傷氣故也。痿論云。有所遠行勞倦。逢大熱而渴。則陽氣內伐。則熱舍於腎。腎者水臟也。今水不能勝火。則骨枯而髓虛。足不任身。發為骨痿。故下經曰。骨痿者。生於大熱也。此濕熱成痿。令人骨乏無力。故治痿獨取陽明。時當長夏。濕熱大勝。蒸蒸而熾。人感之多。四肢困倦。精神短少。懶於動作。

腦氣促。肢節沈痛。或氣高而喘。身熱而煩。心下膨痞。小便黃而少。大便澀而頻。或痢出黃糜。或如泔色。或渴或不渴。不思飲食。自汗體重。或汗少者。血先病而氣不病也。自時當長夏至。此已採入正款。不敢擺別。故重出其脈中得洪緩。若濕氣相搏。必加以遲。病雖互換。少差。其天暑濕令則一也。宜以清燥之劑治之。名曰清暑益氣湯主之。

清暑益氣湯

黃耆汗少者減五分

蒼朮泔浸去皮各一錢五分

升麻一錢

人參去蘆

白朮

橘皮

神麴炒

澤瀉各五分

甘草

黃蘗酒浸

當歸身

麥門冬去心

青皮去白

葛根各三分

五味九個

內經云。陽氣者衛外而為固也。炅則氣泄。今暑邪干衛。故身熱自汗。以黃耆、人參、甘草補中益氣為君。橘皮、當歸身、甘辛微溫。養胃氣和血脈為臣。蒼朮、白朮、澤瀉、滲利除濕。升麻、葛根、苦甘平。善解肌熱。又以風勝濕也。濕勝則濕不消而作痞滿。故炒麴甘辛。青皮辛溫。消食快氣。腎惡燥。急食辛以潤之。以黃蘗苦辛



寒。借甘味瀉熱補水虛者。滋其化源。以五味子、麥門冬、酸甘微寒。救天暑之傷。庚金爲佐也。

右以咀作一服。水二盞。煎至一盞。去粗稍熱。食遠服。

按、東垣意見精密。立方中和。清暑益氣湯一劑。近世多宗之。然氣血虛弱之人。用之最宜。如遇強壯者。不能取效。且助溫火。不可不斟酌也。

### 朱丹溪 中暑論

中暑論曰。暑乃夏月炎暑也。盛熱之氣着人。也有冒、有傷、有中。三者有輕重之分。虛實之辨。或腹痛水瀉者。胃與大腸受之。惡心者。胃口有痰飲也。此二者冒暑也。可用黃連香薷飲。清暑益氣湯。蓋黃連退暑熱。香薷消畜水。或身熱頭疼。躁亂不寧者。或身如針刺者。此爲熱傷在肉分也。當以解毒湯。白虎湯加柴胡。如氣虛者。加人參。此爲傷暑。或咳嗽發寒熱。盜汗出不止。脈數者。熱在肺經。用清肺湯。柴胡湯。天水散之類。急治則可。遲則不救。盛火乘金也。此爲中暑。凡治病須要明白辨別。慎勿混同施治。春秋間亦或有之。切莫執一。隨病處方爲妙。

按、暑病原有輕重。分傷冒中三款是已。但凡感暑而病者。皆從冒火而得。總謂



之傷暑。其感火多而熱重者。乃爲中暑。以內外諸雜證分屬五臟。猶爲近理。至以五臟分屬冒傷中三者。則誤矣。其內外諸雜證。卽有重輕。均從臟腑而發。若以分屬之三證。豈不泥且左矣。名家亦有此誤。又何以破後人之迷也。

辨動得靜得

丹溪曰。若暑之時。無病之人。或避暑熱。納涼於深堂大廈。涼臺冷館。大扇風車得之者。是靜而得之陰證也。其病必頭痛惡寒。身形拘急。肢節疼痛而心煩。肌膚大熱。無汗。此爲陰寒所遏。使周身陽氣不得伸越。宜用辛溫之劑。以解表散寒。用厚樸、紫蘇、乾葛、藿香、羌活、蒼朮之類。若外既受寒。內復傷冰水。生冷瓜果之類。前藥再加乾薑、縮砂、神麴之類。此皆非治暑也。治因暑而致之病也。

按靜動而得。分中暑傷暑。此論出自張潔古。後皆因之。天盛暑之時。炎火若炙。無之非是。故古人聞避暑而未聞避寒。深堂大廈。正以避暑。安得入而中之。且房室陰涼。正可護衛陽氣。又安得而遏傷之乎。卽膏粱深處。必不能無冒暑。應接其傷暑者。亦於動中得之耳。老子曰。人能常清靜。天地盡皆歸。一靜卽可祛暑。從何而中也。至於冰水瓜果等寒物。多食自傷脾胃。亦生雜證。謂瀉痢雜證。

內有此物積聚則可。謂專以此致暑病則不可。若執口得寒物。身犯寒氣。同冬時寒病治之。則謬以千里矣。

霖按。潔古論暴以動靜分陰陽。甚屬不經。致啓後人訾議。然亦出諸不得已也。何以言之。夫暑字從日。云暑而不云火。其義可思。蓋天日之陽熱。蒸地氣以上騰。人在氣交中。感之者爲病暑。素問五運行大論。謂暑以蒸之。禮記月令。謂土潤溽暑者是也。夏至陰生。人身所伏者陰氣。暑在六氣。屬之君火。在藏屬心。在卦屬離。且離火中虛。則暑爲陽熱中含陰象可徵。是以仲景治喝。三法鼎峙。潔古猶恐世醫不明其義。故設陰暑陽暑之名以辨治。丹溪引伸潔古之意。故曰此非治暑也。治因暑天所致之病也。何等曉暢。初不料遺譏於後世也。夫潔古所謂動而得之爲陽暑者。是言藜藿之人。或奔走長途。或戮力田間。暴中天日之熱。爲陽暑。乃動中之動也。所謂靜而得之爲陰暑者。是言膏粱之人。廣廈風車。恣慾無度。致損真陽。陰溼內伏。寒熱外襲。爲陰暑。乃靜中之動也。若果清靜無爲。真氣內守。百邪亦不能侵。豈獨一暑病哉。

### 方古菴 附餘暑論



論曰。寒則傷形。熱則傷氣。何以言之。人與天地同一橐籥。夏月天之氣浮於地表。則人之氣浮於肌表。况被盛暑所傷。膚腠疎豁。氣液為汗發泄於外。是表裏之氣俱虛矣。不善攝生者。暑熱傷於外。生冷戕於中。若之何而能運化也。是以水穀停積而為溼熱。發為嘔吐。為泄瀉。甚則吐瀉俱作。而揮霍悶亂也。若不卽病。溼熱怫鬱於內。他日為瘧為痢之所由矣。今大順散。非治暑熱之藥。乃治暑月飲涼過多。為病之劑也歟。

按此論精當。但大順散不可輕用。

王節齋 附餘暑論

論曰。夏至日後病熱為暑。暑者相火行令也。夏月人感之。自口齒而入。傷心包絡之經。其脈虛。或浮大而散。或弦細芤遲。蓋熱傷氣。則氣消而脈虛弱。其為證汗煩則喘渴。靜則多言。身熱而煩。心痛大渴引飲。頭疼自汗。倦怠少氣。或下血發黃生斑。甚者火熱制金。不能平木。搖擗不省人事。治暑之法。清心利小便最好。暑傷氣。宜補真氣為要。又有惡寒或四肢逆冷。甚者迷悶不省。而為霍亂。吐利痰滯。嘔逆腹痛瀉痢。此則非暑傷人。乃因暑而自致之病也。以其因暑而得。故亦謂之暑病。



然治法不同也。

按節齋此論。氣脈證方俱備。種種精妙。暑月可錄一通於座右。古菴節齋。以世代不宜列此。因原係丹溪附錄。姑附之。

霖按。節齋此論。似是而非。夫天之六氣。風寒暑濕燥火。應地之五行。則木水火土金火。君火以明。相火以位。暑爲君火。在卦爲離。離中虛。乃明兩作之義。故口中多挾溼也。暑先入心。應乎君火。包絡主手厥陰相火。其氣與心相通。其脈與心相連。心病每治包絡者。以心爲君主之宮藏。義不受邪也。不得舍君火而言相火。是六氣尙不能明。豈可錄之座右哉。

陶節菴 辯張仲景傷寒論

辯張仲景傷寒論曰。傷寒者。乃冬時感寒。卽病之名。桂枝麻黃二湯。爲當時之傷寒。設與過時之溫暑者。有何預焉。夫受病之原則同。亦可均謂之傷寒。所發之時既異。治之則不可混也。請略陳之。夫春溫夏熱。秋涼冬寒者。四時之正氣也。以成生長收藏之用。風亦因四時之氣而成。溫涼寒熱也。若氣候嚴寒。風亦凜冽。天道和煦。風亦溫暖。冬時坎水用事。天令閉藏。水冰地凍。風於寒相因。而成殺厲之氣。

人觸冒之。腠理鬱塞。乃有惡風惡寒之證。其餘時月。則無此證也。仲景固知傷寒乃冬時殺厲之氣所成。非比他病可緩。故其爲言。特詳於此書。而略於雜病。倘能因名以求其實。則思過半矣。不幸此書傳世久遠。遺帙頗多。晉太醫令王叔和得散亡之餘。詮次流傳。其功博矣。惜乎以己論混經。未免穿鑿附會。陳無已氏因之順文註釋。並無缺疑正誤之言。以致將冬時傷寒之方。通解溫暑。遺禍至今而未已也。溫暑必別有方。今皆失而無徵也。我朝宋景濂學士嘗嘆傷寒論非全書。得其旨哉。蓋傷寒之初中人。必先入表。表者何。即足太陽寒水之經。此經行身之後。自頭貫脊。乃有頭疼脊強惡寒之證。在他經則無此證矣。況此經乃一身之綱維。爲諸陽之主氣。猶四通八達之衢。治之一差。其變有不可勝言者矣。故宜此二湯發散表中寒邪。經曰。辛甘發散爲陽者是也。若以此湯通治春溫夏熱之病。則誤之甚矣。

按麻黃桂枝湯。原爲冬月傷寒正藥。溫暑二病。不可混施。節菴力破從來之迷。至於辯仲景書中多遺帙缺誤。歸罪於王叔和之詮次。陳無已之註釋。可謂發前人所未發。但仲景醫書。專明傷寒。故詳於寒病。略於溫暑。原不爲溫暑設也。



### 治傷寒用藥大略

論曰。四時皆有傷寒。治之不可一概論也。冬時氣寒。腠理微密。非辛甘溫不可。故以桂枝等湯以治之。然風與寒常相因。寒傷榮。惡寒頭痛。脈浮緊而無汗。則用麻黃湯。開發腠理以散邪。得汗即愈。風則傷衛。頭痛惡風。脈浮緩而有汗。則用桂枝湯。克塞腠理以散邪。汗止即愈。經云。辛甘發散爲陽者是也。若夫榮衛俱傷。又非此二湯所能治也。須大青龍湯。然此湯太峻。又非庸俗所可擬也。予亦有代之者。蓋冬時爲正傷寒。天氣嚴凝。風寒猛烈。觸冒之者。必宜用辛溫散之。其非冬時亦有惡寒頭疼之證。皆宜辛涼之劑。通表裏和之。則愈矣。若以冬時所用桂枝辛溫之藥。通治之。則殺人多矣。曰辛涼者何。羌活沖和湯是也。兼能代大青龍爲至穩。嗚呼。一方可代三方。危險之藥。

按、辨寒溫暑藥甚明。沖和一湯。尤爲溫涼二證穿楊之劑。百發百中者也。

### 傷寒變溫熱病

論曰。活人書發於溫病曰。陽熱未盛。爲寒所制。豈有伏寒既已變而爲溫。尙可言寒。能制其陽熱耶。又於熱病曰。陽熱已盛。寒不能制。亦不當復言其爲寒也。蓋是



春夏陽熱已變其伏寒。即非有寒能制其陽熱耳。外有寒邪。能折陽氣者。乃是時行寒疾。仲景所謂春分已後。秋分節前。天有暴寒。爲時行寒疫是也。三月四月。其時陽氣尙弱。爲寒所折。病熱則輕。五月六月。陽氣已盛。爲寒所折。病熱則重。七月八月。陽氣已衰。爲寒所折。病熱亦微。是知時行寒疾。與溫熱二病所論陽氣盛衰。時月則同。至於論暴寒之寒。與伏寒已變之寒。自是相違。名不正則言不順矣。張仲景又云。其病與溫及暑病相似。但治有殊耳。要在辨其病源。寒熱溫三者之殊。則用藥之冷熱判然矣。

按南陽發變字。大有慧心。至於伏寒之誤。南翁亦灼然知其然。而不敢明攻其非。恐起襲聞者議耳。乃亦爲非時寒疾。以破其惑。始自東垣設寒疫一款。皆可羽翼內經。啓蒙萬世也。

溫病辯

難經曰。溫病之脈。行在諸經。不知何經之動。隨其經之所在而取之。如太陽證。頭疼惡寒。汗下後。過經不愈。診得尺寸俱浮者。太陽病溫也。過時而發。不在表也。已經汗下。亦不在表也。經曰。不惡寒而反渴者。溫病也。明其

熱自內達外。無表證明矣。

按傷寒傳經。由腑入臟。由陽入陰。溫病不傳經。止中一二經。或乘某經火。或乘某經虛。被春時寒氣所中。自內發外。而作寒熱等證。或中腑則腑病。或中臟則臟病。不論日期。始終惟此一二經。內經言惟經所動。隨經而取。自是明明斷案。節菴分經良是。而以過太陽經不傳別經。定爲溫病。此辯別寒溫之口訣。所當佩服者。

### 辯惡寒

論曰。惡寒否乎。曰傷寒自冬月風寒而成。外則有惡寒惡風之證。旣名爲溫。則無此證矣。曰然則子之言何所據乎。曰據乎經耳。經曰。太陽病發熱不惡寒而渴者。溫病也。不惡寒則病非因外來。渴則明其自內達表。

按冬月傷寒。由於外感而惡寒是矣。曰溫證不惡寒非也。蓋溫證緣陽氣發暢。爲春時風寒所迫。雖係內熱。亦由外感。故亦有惡寒等證。豈獨溫卽暑病。亦有此證。蓋暑屬外火。傷於臟腑。內外炎熾。故熱極戰慄而成惡寒。醫不知。遂爲傷寒。不可不詳辯也。



辯溫暑涼寒諸證

論曰。傷暑與傷寒俱有熱。若誤作傷寒治之則不可。蓋寒傷形。熱傷氣。傷寒則外感寒而脈浮緊。傷暑則不惡寒而脈虛。此爲異耳。經云。脈盛身寒。得之傷寒。脈虛身熱。得之傷暑。治宜小柴胡湯。渴加石膏。知母。或人參白虎湯。天久淫雨。濕令大行。蒼朮白虎湯。若元氣素弱。而傷之重者。清暑益氣湯治之。夫傷寒二字。蓋冬時天氣嚴寒。以水冰地凍。而成殺厲之氣。人觸犯之。卽時病者。爲傷寒。乃有惡寒頭疼發熱之證。故用麻黃桂枝發散表中寒邪。自然熱退身涼。有何變證。如或頭疼惡寒。表證皆除。而反見譫語怕熱燥渴。大便閉者。以法下之。大便通而熱愈。有何怪證。其餘春夏秋三時。雖有惡寒身熱。頭疼亦微。卽爲感冒。非時暴寒之輕。非比冬時氣正傷寒爲重也。如冬感寒不卽病。伏藏於肌膚。至春夏秋時。其伏寒各隨時氣改變。爲溫爲熱者。因溫暑將發。又受暴寒。故春變爲溫病。既變之後。不得復言其爲寒矣。所以仲景有云。發熱不惡寒而渴者。其理可見。溫病也。暑病亦然。比之溫病。尤加熱不惡寒。則病非外來。渴則明其熱自內達表。無表證明矣。治溫暑大抵不宜發汗。過時而發。不在表也。其伏寒至夏。又感冒寒。



變爲暑病。暑病者。卽熱病也。取夏火當權而言暑字。緣其溫熱二證。從冬時伏寒所化。總曰傷寒。所發之時既異。治之不可混也。若言四時俱是正傷寒者。非也。此三者皆用辛涼之劑以解之。若將冬時正傷寒之藥通治之。定殺人矣。辛涼羌活冲和湯是也。兼能代大青龍湯治傷寒見風。傷風見寒爲至穩。一方可代三方危險之藥。如垣夷其神乎哉。世俗皆所未知也。若表解其裏證具者。亦以法下之。無惑。又傷寒下後。過經不愈者。亦溫病也。已經汗下。亦不在表也。隨病制宜。凡有辛苦勞役之人。有患頭疼惡寒身熱。加之骨腿酸疼。微渴自汗。脈雖浮大而無力。此爲勞力感寒。用補中益氣辛溫之劑爲良。經云。溫能除大熱。正此謂也。若當和解者。卽以小柴胡加減和之。下證見者。卽以本方加大黃微利之。切勿過用猛烈。其害非細。若初病無身熱。無頭疼。便就怕寒厥冷。腹痛嘔吐泄瀉。脈來沉遲無力。此爲直中寒證。宜溫之。而不宜汗下也。疫癘者。皆時行不正之氣。老幼傳染相同者。是也。緣人不近穢氣。免傷真氣。若近穢氣。有傷正氣。故病相傳染。正如牆壁固。賊人不敢入。正氣盛。邪氣不敢侵。正氣既虛。邪得乘機而入。與前溫暑治又不同。表證見者。人參敗毒散。半表半裏證者。小柴胡。裏證具者。大柴胡下之。無以脈診。以

平爲期。與其瘧痢等證。亦時疫也。照常法例治之。

按此辯傷寒傷暑最爲吃緊。廣度慈航。一披卷而了然者。當熟讀精思。方得其解。斟酌用之。方得其妙。

### 辯風溫

論曰。風溫尺寸俱浮。素傷於風。因而傷熱。風與熱搏。卽爲風溫。其外證四肢不收。身熱自汗。頭疼喘息。發渴昏睡。或體重不仁。慎勿發汗。汗之則譫語煩躁。目無精彩。病在少陰厥陰二經。咸蕤湯。人參敗毒散。小柴胡湯選用。

按溫病外證。四肢不收等惡證。乃溫病之極重者。輕則爲溫。重則爲風溫。乃病名也。朱南陽曾道及之。若謂素傷於風。因而傷熱。風與熱搏。卽爲風溫者。非確論也。謂不可發汗。乃調溫之訣。

釋按。陶氏極力辯論溫暑。而於陰陽伏氣。瞢然不知。且將難經所載沴厲雜氣之溫病。古無溫字。溫卽瘟也。拉雜是瘟溫不分。無怪乎執柴葛解肌。人參敗毒數方。貽誤後學也。



內經曰。因於暑。汗煩則喘渴。靜則多言。潔古又曰。靜而得之爲中暑。動而得之爲中熱。中暑者陰證。中熱者陽證。仲景傷寒論中一證曰中暍。卽暑也。脈虛而微弱。煩渴引飲。體熱自汗。此蓋得勞役體虛而暑邪干衛之候。是宜東垣清暑益氣湯等補益之劑。治之而愈。一證曰熱病。卽中熱也。脈洪而緊盛。頭疼身熱。口燥心煩。此蓋得之於冬感寒邪。鬱積至夏而發。乃挾暑而成大熱之候。是宜黃連、白虎、解毒等湯清涼之劑。調之而愈。曰中暑者。陰症內傷之爲病也。曰中熱者。恐亦外感之爲病也。曰陰曰陽。豈不於斯而明辯之乎。學者宜再思之。

按暑熱一氣也。感暑而病熱。原不可分爲二氣。中與傷有輕重之別。丹溪有冒中傷三名。細思總爲傷暑。其極重者則稱中耳。冒不必言也。已有專辯傷寒證。分有陰陽。暑證屬火。多發揚激烈之狀。總謂之陽。似無所爲陰者。惟其感深。日久驟發。而沉昏不省人事。閉目息微。此類似陰。其實火極氣結。痰盛氣閉。臟腑不通。咽喉嗌塞使然。乃陽勝非陰也。陰證陽證。尙不可分。况以暑與熱分之。益不達矣。

霖按。此關花溪以暑熱分陰陽是矣。而謂暑爲火極之證。與熱不分。然則以六



和湯爲治暑主方。火熱之證。果宜厚樸、砂仁、藿香、半夏諸燥熱之品乎。自相矛盾。亦不思甚矣。總因不明陰陽互根之義。故開口便錯。近世王孟英泥執暑爲火邪。而不兼濕。亦由不讀內經。勦襲一家之說。率爾操觚也。

李文清 醫學入門論暑

暑病身熱自汗。口渴面垢而已。餘證皆後傳變。或兼內傷。必先問其人素虛胃弱。或大病大勞後。縱暑中傷者。宜清暑益氣。素強盛壯實。無虛損病者。宜祛暑和中。自襲暑氣而言曰中暑。自被日逼而言曰中暍。然暑初入。自口鼻牙頰。達於心主胞絡。以火從火。故古法治暑。取冷水灌漑勿嚥。卽暑暍證。但以手足搐搦爲風。手足逆冷爲厥。厥與傷寒熱厥義同。黃連香薷飲。暑風乃勞役內動五臟之火。與外火交熾。則金衰木旺生風。香薷飲加羌活六和湯。合消風散。素有痰飲。因暑觸動痰熱生風者。六和湯合星香散。

救痰壅法

暑毒痰火。窒塞胸中。量體虛實吐之。火鬱發之之義也。如痰喘氣急痞塞。入藥不得者。急煎六和湯。調麝二厘服。

絞腸沙腹痛不可忍。或連心痛。展轉在地。手足亦冷。乃腸絞縮在腹。須臾能死。用熱湯調鹽一兩。灌入即安。或再用陳艾、陳樟木、陳壁土各等分。水煎連進三四服。

### 救途中熱倒法

若道途卒倒。湯藥不便。恐氣脫難治。急扶陰涼處。不可臥濕冷地。掬道上熱土放臍上。撥開作竅。令人尿與其中。待求生薑或蒜嚼。以熱湯或童便送下。外用布蘸。按入門一書。雖係時出。中間亦頗詳細。故錄其數條以備覽。暑喝一氣也。若中暑中喝之分則強矣。

### 王宇泰 證治準繩論暑

論曰。此事難知。傷暑有二。動而傷暑。心火大盛。肺氣全虧。故身脈洪大。動而火勝者。熱傷氣也。辛苦人多得之。白虎加人參湯。靜而傷暑。火勝金位。肺氣出表。故惡寒脈沉疾。靜而濕勝者。身重也。安樂之人多受之。白虎加蒼朮湯。傷暑必自汗。背寒面垢。或口熱煩悶。或頭疼發熱。亦有身痛者。更有痛甚。身如骨碎者。神思倦怠殊甚。暑傷氣而不傷形故也。但身體不痛。與感風寒異。宜香薷飲、六和湯。嘔而渴。



者。浸冷香薷湯。或五苓散。兼吞消暑丸。嘔不止者。批杷葉散去茅根。吞來復丹。嘔而痰。却暑散。吞消暑丸。或小半夏茯苓湯。或消暑飲。又有不瀉而腹乾痛者。六和湯煎熟。調蘇合香丸。暑先入心者。心屬南方離火。各從其類。小腸爲心之府。利心經。暑毒使由小腸中出。五苓散利小便。治暑上劑也。暑月身痒如針刺。間有赤腫處。亦名暑風。末子六和湯。和消風散。酒調服。暑風而加以吐瀉交作者。六和湯。藿香正氣散。各半貼。加全蠍三個。有暑毒客於上焦。胸膈痞塞。湯藥至口卽出。不能過關。或上氣喘急。六和湯浸冷。調入麝香少許。暑氣久而不解。遂成伏暑。內外俱熱。煩躁自汗。大渴喜冷。宜香薷飲。加黃連一錢。繼進白虎湯。若服藥不愈者。暑毒深入。結熱在裏。譫語煩渴。不欲近衣。大便秘結。小便赤澀。當用調胃承氣湯。或三黃石膏湯。

按承氣湯必不可轉用。

### 加減清暑益氣湯

復立變證。加減法於後。如心火乘脾。乃血受火邪。而不升發。陽氣伏於地中。地者人之脾也。必用當歸和血。少用黃柏以益真陰。如脾胃不足之證。須少用升麻。



乃足陽明太陰引經之藥也。使行陽道。自脾胃中左遷。少陽行春令。生萬物之根蒂也。更加柴胡。使諸經右遷。生發陰陽之氣。以滋春之和氣也。如脾虛。緣心火亢盛。而乘其土也。其次肺氣受邪。爲熱所傷。必須黃耆最多。甘草次之。人參又次之。三者皆甘溫之陽藥也。脾始虛。肺氣先絕。故用黃耆之甘溫。以益皮毛之氣。而閉腠理。不令自汗而損元氣也。上喘氣短。懶言語。須用人參以補之。心火乘脾。須用炙甘草以瀉火熱。而補脾胃中元氣。甘草最少。恐滋滿也。若脾胃之急痛。并脾胃大虛。腹中急縮。腹皮急縮者。却宜多用。經曰。急者緩之。若從權。必加升麻以引之。恐左遷之邪堅盛。卒不肯退。反致項上及臀尻肉添而行陰道。故引之以行陽道。使清氣出地。右遷而上行。以和陰陽之氣也。若中滿者。去甘草。咳甚者。去人參。口乾嗌乾者。加甘葛。如脾胃既虛。不能升浮。爲陰火傷其生發之氣。榮血大虧。榮氣伏於地中。陰火熾盛。日漸煎熬。血氣虧少。且心包絡與心主血。血減則心無所養。致使心亂而煩。病名曰惓惓者。心惑而煩悶不安也。是由清氣不升。濁氣不降。清濁相干。亂於胸中。使周身血氣逆行而亂。經云。從下上者。引而去之。故當加辛溫甘溫之劑。生陽。陽生而陰長也。故曰甘溫何能生血。又非血藥也。曰仲景之法。血

虛以人參補之。陽旺則能生陰血也。更加當歸和血。又宜少加黃柏以救腎水。蓋甘寒瀉熱火。火滅則心氣得平而安也。如煩亂猶不能止。少加黃連以去之。蓋將補腎水。使腎水旺而心火自降。扶持地中陽氣也。如氣浮心亂。則以硃砂安神丸鎮固之。得煩減。勿再服。以防瀉陽氣之反陷也。如心下痞。亦少加黃連。氣亂於胸。爲清濁相干。故以陳皮理之。能助陽氣之升。而散滯氣。又助諸甘辛爲用。故長夏濕土。客邪火旺。可從權加蒼朮。白朮。澤瀉。上下分消其濕熱之氣。濕氣大盛。主食不消化。故食減不知穀味。加炒麴以消之。便加五味子。麥門冬。人參。瀉火益肺氣。助秋損也。此三伏中長夏正旺之時藥也。

按此證治準繩中論暑證者。至精緻密。立中含和王道之宗匠。不能具載。謹摘其要者。錄於左。至加減清暑益氣湯。尤東垣之知己。

名醫類案 增補名醫類案

羅謙甫治蒙古百戶。因食酒肉飲潼乳。得霍亂吐瀉證。從朝至午。精神昏憤。已困急來告。羅視之。脈皆浮數。按之無力。所傷之物已出矣。卽以新汲水半碗。調桂苓白朮散。徐徐服之。稍得安靜。又於牆陰掘地約二寸。貯以新水。在內攪動。待



一時澄定。用清者一盃。再調服之。漸漸氣調。吐瀉遂止。至夜安臥。翌日微煩渴。遂煎錢氏白朮散。時時服。良愈。或曰。用地漿者何也。坤屬地。地屬陰。土平曰靜。煩感至陰之氣。又於牆陰貯新汲水。以收重陰之氣也。陰中之陰。能瀉陽中之陽。陽霍亂因暑熱內傷所得。故用地漿之意也。

提舉父年近八十。六月中暑毒。霍亂吐瀉。昏冒終日。不省人事。時夜參半。請羅視之。脈七八至。洪大有力。頭熱如火。足冷如冰。半身不遂。牙關緊急。蓋年高氣弱。營暑氣極盛。陽明得令之際。爲陰得而動之中暑明矣。非甘辛大寒之劑。不能瀉其暑熱。墜浮溜之火。安神明也。遂以甘露散。甘辛大寒瀉熱補氣。加茯苓以分陰陽。約一兩。水調灌之。漸漸省事。諸證悉去。慎言語。節飲食三日。以參朮補中湯。以意增減。旋服。理正氣愈。十日平復。

滑伯仁治一人。病自汗如雨。面赤身熱。口燥心煩。當盛暑。帷幕周密。自以虛亡陽。服朮附數劑。脈虛而洪數。舌上苔黃。伯仁曰。前藥誤矣。熱病熱治。醫者死之。素問云。必先歲氣。毋伐天和。朮附豈可輕用。以犯時令。又云。脈虛身熱。得之傷暑。暑家本多汗。加剛劑。脈洪數而汗甚。乃令撤慢開窗。少頃漸覺清爽。以黃連人



參白虎湯。三進而汗止大半。諸證亦減。兼以既濟湯。渴用冰水調天水散。二日而愈。

孫兆治一人自汗。兩足冷至膝下。腹滿不省事。孫診六脈小弱而急。問其所服藥。取視。皆陰病藥也。孫曰。此非受病重。藥能重病耳。遂用五苓散。白虎湯十餘貼。病少甦。再服全愈。或問治法。孫曰。病人傷暑也。始則陽微厥而脈小無力。醫謂陰病。遂誤藥。其病厥用五苓散。利小便則腹消。白虎湯解利邪熱。則病愈。凡陰證。脛冷則臂亦冷。汝今脛冷臂不冷。則下厥上行。是如陽之微厥也。此證乃先傷溼。後傷暑。爲溼之證也。

丹溪治一人夏大發熱。譫語。肢體莫舉。喜冷飲。脈洪大而數。以黃耆、茯苓濃煎如膏。用涼水調服。三四次後。昏臥如死。氣息如常。次日方醒而愈。

一人夏發大熱。大汗。惡寒戰慄。不自禁持。且煩渴。此暑病也。脈虛微細弱而數。其人好賭。致勞而虛。以人參、竹葉作湯。調辰砂四苓散。數劑而安。

項彥章治一人病甚。醫皆以爲瘵。盡愕束手。項診之。脈細數而且實。細數者暑也。暑傷氣宜虛。今不虛而反實。乃熱傷血。藥爲之也。家問死期。曰。何得死。爲作白

虎湯。飲卽瘥。

吳茱山治一婦人。冬月偶感。患灑灑惡寒。翕翕發熱。惡食乾嘔。大便欲去不去。諸醫皆以虛弱痰飲治之。以二陳補心等藥服不效。延及半月。吳診其脈。虛而無力。類乎傷暑。衆不然之。究問其病因。其婦曰。因天寒換著綿衣。取綿套一床蓋之。須臾煩渴。寒熱嘔吐。綿延至今耳。吳曰。誠哉傷暑也。蓋綿套晒之。盛暑夾熱收入箚中。必有暑氣。尙未開泄。今人體虛。得之易入。故病如是。其婦曰然。遂製黃連香薷飲。連進二服而愈。

逢年歲熱甚。凡道路城市。昏作而死者。此皆虛人勞人。或饑飽失節。或素有病。一爲暑氣所中。不得泄。卽關竅皆窒。非暑氣使然。氣閉塞而死也。古方治暑無他。但用辛甘發散。疏導心氣。與水流行。則無害矣。崇寧乙酉。吳爲書局。時一馬夫馳馬出局下。忽仆地絕。急以五苓大順散灌之。皆不驗。已踰時。同舍王相使取大蒜一握。道上熱土雜研爛。以新水和之。濾去渣。決其齒灌之。少頃卽甦。至暮此僕爲吳御馬而歸。乃知藥病相對。有如此者。此方本徐州沛縣門。忽有板書釘其上。或傳神仙救人者。沈存中王聖美皆著其說。而吳親驗之。出石林老人



避暑錄。

汪希說治一壯男子。形色蒼黑。暑月客游舟回。患嘔噦。顛倒不得眠。粒米不入六日矣。脈沉細虛豁。諸醫雜投藿香、柴、苓等藥不效。危殆。汪曰。此中暑也。進人參白虎湯。人參五錢。服下嘔噦即止。鼾睡五鼓。方醒索粥。連進二三服。乃減參稍輕。調理數劑而愈。

霖按。治暑之案甚多。此於千百中祇有其一。附選數則。以補其不足。

許叔微治一人頭痛身熱。心煩燥渴。診其脈大而虛。授以白虎湯數服愈。仲景云。脈虛身熱。得之傷暑。又云。其脈弦細芤遲何也。素問曰。寒傷形。熱傷氣。蓋傷氣不傷形。則氣消而脈虛弱。所謂弦細芤遲者。皆虛脈也。仲景以弦為陰。朱龐亦云。中暑脈微細。則虛可知。

霖按。白虎湯數服愈者。其脈大而虛也。若弦細芤遲。則中含濡象。暑傷氣而中挾溼故也。非白虎湯所宜。亦不可泥執補氣全作虛治也。凡醫案須發明其脈證之所以然。方可為後學程法。惟許學士其庶幾乎。

萬密齋治縣丞李天泉。六月中暑腹痛。渠有婢妾。醫謂病寒。進理中湯一劑痛止。



乃發熱。一身骨節盡痛。又進十神湯。發汗熱退。身不痛矣。萬候之。李稱病愈。觀其面色帶赤。知病未解。請脈之。洪滑而數。色對脈經曰。大則病進。今汗後脈猶洪數。病方進也。而彼自稱愈。萬去食頃而病作矣。滿腹急痛。狀如奔豚。上下左右。舉手按摩。亟延萬至曰。汝先診脈。不言而去。知我病也。幸急救我。萬曰無傷。乃進建中湯一服而痛定。次日有省祭官萬朴來問疾。朴善醫診之。且駭且顧。李亦疑懼。萬診之。謂朴曰。汝怪其脈之促止乎。蓋心下怔忡。故脈如是耳。李即應曰。我心下跳亂不寧。即命取藥方。用人參、麥冬、甘草、白芍、生地、五味、獼猴心。煮湯煎一服。心跳止。脈不促矣。蓋心惡熱。用熱治熱。向服理中。十神俱犯禁。故病復作也。

霖按。面赤脈洪數。色脈相參。自是暑病方進。以建中定痛然矣。但暑先入心。傷其營血。况以理中。十神用熱治熱者乎。萬以尙未清理暑熱。故見脈數歇止。則知其熱傷心營。虛而跳止也。西士言由肺入心之血。從心入脈管。以榮養藏府。經脈皮毛。血由心左房落脈管一次。則脈跳一次。西醫聽心血之聲。知脈有病變。而營衛循行之道。六氣標本之理。莫不由此悟入。總在細心體察耳。粗工視

人命同草菅。爲足與言此。

江應宿治其岳母年六十餘。六月中旬。勞倦中暑。身熱如火。口渴飲冷。頭痛如破。脈虛豁二三至一止。投人參白虎湯三貼。渴止熱退。惟頭痛。用白蘿蔔汁吹入鼻中。良愈。

孫子華赴試南都。六月初旬夢遺。畏寒驚懼。重裘厚被。取汗過多。身熱。六脈滑數無力。與清暑益氣湯。次日舌強。語言不清如癰。目瞪不識人。江曰。此爲暑風。與人參白虎湯。加膽星、殭蠶、秦艽、天麻、竹瀝、薑汁。漸愈。數日後。舌心黑如墨。與黃連解毒湯。涼膈散不退。與犀角地黃湯而愈。

一人瘦長而脆。暑月過勞。飢飲燒酒。遂身熱汗出。昏憒語亂。江視之。脈皆浮小而緩。按之虛豁。曰。暑傷心。勞傷脾也。蓋心藏神。脾藏意。二臟俱傷。宜有是證。法宜清暑益脾。用八物湯。加麥冬、山梔、陳皮。十餘貼而愈。

霖按。江公三案。平正可法。其第二案解毒涼膈不應。易犀角地黃湯始愈。同一涼藥。有對與不對之別。讀者最宜深思。

張路玉治金魯公觸熱。勞形醉飽不謹。後受涼。遂發熱頭痛。脹滿喘逆。大汗如蒸。



面赤戴陽。足冷陽縮。脈弦數無力。曰。此傷暑夾食而復夾陰也。與大順散一服不應。轉脹急不安。因與枳實理中加厚朴、大黃。是夜更衣二次。身涼足暖而痊。霖按。此案於不謹後受涼。而見面赤陽縮。足冷汗多且喘。最易作陰證。其辨在發熱頭痛脹滿。與陰證不合。更察其不謹之前。有醉飽之病因。故大順散不應。即用枳實理中加厚樸、大黃。得更衣而愈。若誤以白通四逆殆矣。此暑天變證。非暑證也。要亦不可不知。

汪石山治一人年三十餘。形瘦弱。忽病上吐下瀉。水漿不入口七日。自分死矣。診脈入至而數。曰。當夏而得是脈。暑邪深入也。吐瀉不納水穀。邪氣自盛也。遂以人參白虎湯進半杯。良久復進一杯。覺稍安。三服後減去石膏。知母。而人參漸次加至四五錢。黃柏、橘皮、麥冬等隨其所兼之病而佐使。一月後平復。霖按。此暑熱霍亂之輕者。吐瀉至七八日而不死。亦由未服溫補燥熱之劑故耳。汪公制劑固當。而進退操縱有法。暑盛氣傷之治。此案可師。一人病霍亂。欲吐不吐。欲瀉不瀉。心腹疼痛。脈之沈伏如無。此乾霍亂也。急令鹽湯探吐宿食痰涎。梔許遂瀉。與六和湯愈。



霖按、痛脈多伏。以鹽湯探吐。乃開其上竅。上竅開則下竅自通。而得吐瀉。即可治矣。

孫文垣治程氏子。先醉酒。後入房。次早四肢冷。胃腕痛極。脈僅四至。或以鬱火治。投以寒涼。痛更甚。三日前所食西瓜。吐出未化。乃翁以爲陰證傷寒。欲用附子理中湯不決。逆孫視之。面色青慘。叫痛而聲不揚。坐臥煩亂。是霍亂兼虵厥證也。先當止痛安虵。後理霍亂。可免死也。遲則誤事矣。急用醋炒五靈脂三錢。蒼朮一錢五分。烏梅三個。川椒、炮薑、桂心各五分。水煎飲下。痛減大半。下午以大腹皮、藿香、半夏、橘皮、山查、茯苓、五靈脂兩帖全安。

霖按、此人以縱慾貪涼。恣食生冷致病。而又誤投寒涼之劑。故以溫胃安虵。和中化滯而効。其霍亂亦不甚重。

張石頑云。一少年新婚。陡然腹痛麻脊。或令飲火酒半杯。腹痛轉劇。旋增顫脹。身發紅點。與蘆根汁得吐痛解。復有鼻衄口燥。胸腹略見紅斑。啜童子小便稍安。又濃煎葱豉湯。仍入童便。續續與之。得大吐汗出而痊。

霖按、此證卽夏日之暑沙伏毒。得酒愈熾。先以蘆根汁清熱解毒。以殺其勢。繼

進葱豉湯倍用童便解穢清營仍從宣達分消而愈治法穩當

懷抱奇治一男子。恣飲梅水。吐瀉無度。手足厥逆。面色慘晦。聲音不出。而脈沈伏。小水點滴不通。服藥入口即吐。醫告技窮。懷思梅味酸主收。故小便癰閉。而果得麝則敗。麝又香竄走竅。乃取麝半入臍中。半入鼻孔。病者即以手拂其鼻曰。此何物也。少頃小水大下二三行。忽如醉而醒。夢而覺。越日索粥漸安。霖按。此亦暑厥。而無外因者。以敗果通竅。即能奏効。然其巧思。正不可及。童栻廬治陳氏婦。盛夏病霍亂吐瀉。腹中疝痛。四肢厥冷。冷汗漉漉。轉筋戴眼。煩躁大渴。喜冷飲。飲已即吐。六脈皆伏。雖曰霍亂。實臟厥也。經云。大氣入臟。腹痛下注。可以致死。不可以致生。速宜救陽爲急。遲則腎陽絕矣。以四逆湯薑附各三錢。炙甘草。吳茱萸各一錢。木瓜四錢。煎成冷服。日夜連進三劑。四肢始和。危象皆退。口渴反喜沸湯。寒象始露。即於方中佐以生津存液之品。兩服而安。霖按。肢冷脈伏。大渴喜冷飲。此霍亂屬乎熱者。但喜冷飲而飲已即吐。服熱藥後反喜沸湯。此真寒假熱證也。故宜四逆湯。然而小溲必清白。吐出瀉出必無穢濁氣味。方是真寒的候。否則真假莫辨。殺人事矣。



倪姓患霍亂吐瀉。審知始不作渴。四肢不逆。脈不沉細。一醫用大順散兩帖。漸至於此。因見四逆。復加附子。脈證更劇。童曰。此病一誤再誤。命將殆矣。若果屬寒。投熱病已。今反四逆。脈轉沉細欲伏。乃釀成熱深厥深。與熱邪傳入厥陰者何異。卽以竹葉石膏湯。人參易西洋參。加黃連。滑石兩劑而安。同時有陸姓患此。醫用回陽之劑。日夜兼進。厥逆煩躁日增。病人欲得冷水。禁絕不與。甚至病者自起。拾地上痰涎以解渴。遷延旬日而死。噫。卽使真屬陰寒。陽回躁渴如是。熱藥之性。鬱而無主。以涼藥和之。病亦立起。不學無術。曷勝浩歎。霖按。此非真熱霍亂。然其證甚輕。醫者藥誤。致釀熱深厥深。竹葉石膏湯。人參易西洋參。極是。卽使寒證回陽後躁渴。亦當參以涼潤和之。此千古不刊之論也。



增訂葉評傷暑全書

明 穎郡 張鶴騰鳳達原著  
清 揚州 葉霖子雨增評  
鄞縣 曹赤電炳章校點

卷下

治暑主方

六和湯 治心脾不調。氣不升降。霍亂轉筋。嘔吐泄瀉。寒熱交作。痰喘咳嗽。胸膈痞滿。頭目昏痛。肢體浮腫。嗜臥倦怠。小便赤澀。并傷寒陰陽不分。冒暑伏熱。煩悶。或成痢疾。中酒煩渴。畏食。婦人胎中亦可服。

縮砂仁	研	半	夏	傷七次	杏	仁	去皮尖	人	參	去蘆
甘草	炙各一兩	赤茯苓	去皮	蘆香葉	去土	白扁豆	蘆汁略炒			
木瓜	各二兩	香薷		厚樸	蘆汁製各四兩					

右呖咀。每服一兩。水二鍾。生薑三片。棗一枚。煎至一鍾溫服。此清火調中和解之劑。治暑要藥也。

香薷飲 治伏暑引飲。口燥咽乾。或吐或瀉。並皆治之。一方加黃連四兩。用薑汁同炒令老黃色。名黃連香薷飲。如有搖擲。加羌活煎服。

香薷去土一斤

白扁豆微炒半斤

厚樸去皮薑汁炙熟半斤

右呖咀。每服三錢。水一鍾。入酒少許。煎七分。沉冷不拘時服。熱則作瀉。香薷須陳者佳。

十味香薷飲 消暑氣和脾胃。

香薷一兩

人參去蘆

陳皮去白

白朮土炒

黃耆去蘆

白扁豆炒去殼

甘草炙

乾木瓜

白茯苓去皮

厚樸去皮薑汁炙黑色各五錢

右爲末。每服二錢。熱湯冷水任調下。

以上辛散驅暑之劑。蓋香薷氣厚能散暑。木瓜善勝暑。厚樸寬中。故爲要藥。五苓散 治中暑煩渴。身熱頭痛。霍亂吐瀉。小便赤少。如心神恍惚。加辰砂。又名

辰砂五苓散

白朮二錢

白茯苓去皮二錢

猪苓去粗錢五分

肉桂一錢

澤瀉去毛錢五分

右㕮咀。作一貼。水一鍾半。煎八分。溫服。或作散用亦可。

桂苓甘露飲。治伏暑引飲過度。肚腹膨脹霍亂。

白茯苓去皮

白朮土炒

猪苓去皮

滑石研各

寒水石研

甘草炙

澤瀉各一

肉桂去皮五錢

右爲末。拌勻。每服二錢。熱湯冷水任下。入蜜少許更妙。

益元散。治中暑身熱。小便不利。此藥性涼。除胃脘積熱。又淡滲濕。故利大便而

散濕熱也。又名天水散。六一散。加硃砂良。

滑石白膩者去黃

甘草去皮一兩

右爲末。每服二錢。新汲水調服。

以上清利消暑之劑。但孕婦禁用。

藿香正氣散。治人感四時不正之氣。頭痛憎寒作熱。上喘嗽咳。反胃嘔吐。惡心



瀉泄霍亂。臟腑虛鳴。山嵐瘴氣。

大腹皮黑豆水洗七次 白茯苓去皮各一兩 廣陳皮去白三兩 半夏湯泡洗七次二兩

白芷一兩 白朮土炒 厚朴薑製炒 桔梗

甘草炙 紫蘇各二兩 藿香三兩

右咬咀。每服一兩。水二鍾。薑三片。紅棗一枚。煎一鍾溫服。

二香散 治暑濕相搏。霍亂轉筋。煩渴悶亂。

藿香二兩 半夏薑製 廣陳皮 桔梗

白朮土炒 厚朴薑汁炒 白茯苓 紫蘇

白芷各一兩 甘草二兩 黃連去鬚二兩 香薷一斤

扁豆炒八兩 大腹皮黑豆水洗七次一兩

右咬咀。每服一兩。水二鍾。生薑三片。葱白二根。煎一鍾。食後溫服。

九味羌活湯 治發熱惡寒無汗。或自汗頭痛項強。或傷風見寒脈。傷寒見風脈。

並宜服之。此藥不犯三陽禁忌。為四時發散之通劑也。溫證如神。暑亦可解。

羌活 防風 蒼朮各一錢五分 甘草

川芎

白芷

生地

黃芩

細辛各一錢細辛用五分亦可

右咬咀。作一服。水二鍾。生薑一片。煎至一鍾溫服。

人參敗毒散。治傷寒頭痛。壯熱惡寒。及風痰咳嗽。鼻塞聲重。如心經蘊熱。口舌乾燥者。加黃芩。溫暑通用。皆臻神妙。

柴胡去苗

甘草炙

桔梗

人參去蘆

羌活去苗

川芎

白茯苓去皮

枳殼去穢炒

前胡去苗洗

獨活去蘆各等分

右咬咀。每服三錢。水一鍾。薑三片。薄荷少許。同煎七分。去滓溫服。

以上正氣驅邪之劑。但暑不可汗。微發解之。敗毒散尤為調和之宗也。

香樸飲。治伏熱吐瀉。虛煩霍亂。

人參去蘆八分

茯苓一錢

甘草炙三

紫蘇葉七分

木瓜七分

澤瀉五分或七分

香薷一錢

白扁豆炒七分

法半夏湯泡七分

廣陳皮七分

厚樸七分

烏梅肉七分

右呖咀。水二鍾。生薑三片。棗一枚。煎一鍾。食前熱服。  
一發一飲。一驅一補。巧力并中長技也。當與六和湯并善。

批杷葉散 治中暑伏熱。煩渴引飲。嘔噦惡心。頭目昏眩。

批杷葉 二兩

香薷 五分

白茅根

麥門冬 去心

甘草 炙

乾木瓜 各一兩

廣陳皮 去白

厚樸 去皮薑汁炒

丁香 各五錢

右爲末。每服二錢。水一鍾。薑三片。煎服。如止渴燥。去丁香。加知母。冷水調下。  
以上辛散之劑。

縮脾飲 消暑氣。除煩渴。止吐瀉霍亂。

縮砂仁 研四兩

乾葛 二兩

白扁豆 炒香去

烏梅肉

草果 炒去

甘草 炙各四兩

右呖咀。每服四錢。水二大碗。煎七分。以水沉冷服。

消導解利之劑。

黃連解毒湯 治實火燥亂。煩渴蓄熱內甚等證。此所謂實火宜瀉。



黃連去毛

黃芩

黃柏

梔子各一錢

右咀片。水煎服。

人參白虎湯 治伏暑發渴。嘔吐身熱。脈虛自汗。

人參五錢

知母二錢

石膏五錢

甘草炙一錢

右咬咀。入粳米一合。水二鍾。煎一鍾。不拘時熱服。如伏暑作寒熱未解。宜和五苓散同煎服。伏熱後或冷水沐浴。或吃冷物。冷氣在脾不散。今日晡作寒慘壯熱。渾身洒淅。宜加桂煎服便解。

白虎加蒼朮湯 治中暑無汗。脈虛弱。腹滿身重。口燥面垢。譫語發黃。

石膏二錢

知母去粗

蒼朮米泔水浸晒

羌活各一錢

甘草五分

右作一劑。水二鍾。糯米一撮。煎八分。不拘時服。

竹葉石膏湯 治伏暑內外發熱。煩躁大渴。

石膏研一兩六錢

法半夏二錢五分

人參二錢

甘草炙二錢

麥門冬去心五分

淡豆豉二錢

糯米一合

右咬咀。每服五錢。水一鍾。入青竹葉、生薑各五片。煎服。

三黃石膏湯 治陽毒發斑。身黃如塗朱。眼珠如火。狂叫欲走。六脈洪大。燥渴欲死。鼻乾面赤齒黃。

黃連

黃柏

黃芩 各一錢

石膏 五錢兩

山梔 三十個

香豉 二合

右水二鍾。薑三片。棗二枚。搥法入細茶一撮。煎之熱服。

桂苓甘露飲合敗毒散 消暑更捷。

以上諸方皆大寒味。鎮墜消毒之劑。驅暑之將軍也。中用人參者。攝氣保中。防驟損耳。此等藥必重病而後用。輕則惟前十方內酌用為妙。

百合湯 病已愈而觸犯者。用之最效。

柴胡 去蘆一錢

人參 去蘆五錢

黃芩 一錢

甘草 五分

知母 去粗八分

百合 二錢

陳皮 去白一錢

生地黄 七分

渴加天粉花。胸中煩熱加山梔。有微頭疼加羌活。川芎。嘔吐入薑汁炒半夏。胸中飽悶加枳殼。桔梗。食復者加枳實。黃連。甚重大便實者加大黃。胸中虛煩加

竹茹、竹葉。瘥後乾嘔。錯語失神。呻吟睡不安者。加黃連、犀角。咳喘者加杏仁。心中驚惕為血少。加當歸、茯神、遠志。虛汗加黃耆。脾虛加白朮。腹如雷鳴加煨生薑。勞復時熱不除。加葶藶、烏梅、生薑汁。右以水二鍾。薑三片。搥法醋煮鼈甲煎之溫服。

### 丸散方類

#### 加味胃苓丸

蒼朮	五兩	陳皮	三兩	厚朴	二兩	甘草	炙二兩
白朮	四兩	雲茯苓	二兩	肉桂	二兩	猪苓	二兩
澤瀉	去粗二兩	人參	去蘆一兩	黃連	去毛薑二兩	白芍	炒二兩

右為末。蜜丸。清米湯下。每服五六十丸。

#### 黃龍丸

治伏暑發熱。煩渴嘔吐惡心。

黃連  
去毛極淨者二斤

右以好醋五升。煮乾為末。麵糊丸。梧子大。熱湯下。每服三十丸。



消暑丸 治伏暑引飲。脾胃不和。

半夏一斤 生甘草

雲茯苓去皮各半斤

右爲末。薑汁煮糊爲丸。如梧桐子大。每服五十丸。熱湯下。此藥味平。備一班耳。

玉露散 治暑渴。

寒水石

滑石去黃垢土

石膏火煨

括蕓根各二兩

甘草一兩

右爲細末。每服五錢。新水調下。

卻暑散 治冒暑伏熱。頭目眩暈。嘔吐泄痢。煩渴背寒面垢。

赤茯苓

生甘草各四兩

寒食麵

生薑各一斤

右爲末。每服二錢。白湯調下。

### 備用方類

大順散 治冒暑伏熱。引飲過多。脾胃受濕。水穀不分。霍亂嘔吐。臟腑不調。

甘草三斤

乾薑

杏仁去尖炒

肉桂去皮各六兩

右先將甘草用白砂蜜炒。及八分黃熟。次入乾薑同炒。却入杏仁。候杏仁不作聲爲度。用篩篩淨。後入肉桂。一處搗羅爲末。每服三錢。水一鍾。煎五七分溫服。如煩躁。并花水調下。不拘時候。以沸湯點服亦可。

此劫劑也。從治火攻。用暑厥等劇證則效。效後仍用辛涼劑調理。切不可常用。

龍鬚散一名甘草散

治中暑迷悶。不省人事。及泄瀉霍亂煩渴。一服即愈。能解暑毒。

白礬生一兩

五倍子生三錢

烏梅去仁二兩

甘草炙一兩五錢

飛羅麵明一兩一方用清

右爲末。入飛羅麵拌勻。每服二錢。新水調下。

一方加訶子肉。滴水爲丸。如彈子大。細嚼水下。

名龍涎丸。此豁痰劫劑。輕證

不可用。

加味桂苓甘露飲

即桂苓甘露飲。外加人參、香薷、甘草煎服。治法同前。

補中益氣湯 治暑傷元氣。脈虛身弱者用之。

黃耆炙一錢五分

人參

甘草炙各五分

當歸七分

白朮土炒八分

柴胡三分

升麻三分

廣陳皮留白一錢

渴加葛根五分。咳加麥門冬一錢。五味子十五粒。

一方有白芍藥五分。秋冬不用。黃柏三分。以滋腎水。瀉伏火。加紅花三分。入心養血。

右作一服。水煎。午前稍熱服。

溫補但助火。反昏沉。須加連膏方效。

調中湯

大黃去皮七錢

葛根

黃芩

藁本

白朮

芍藥

桔梗

雲茯苓去皮

甘草炙各五錢

右㕮咀。每服五錢。水盞半。煎八分。移時再服。得利即止。

此下藥也。須有生冷麵食積聚者。方可用。

霖按。治暑首以六和湯。香薷飲。此兩方乃暑月外感風寒。內傷生冷之劑。未可概治也。五苓散為傷寒中風有表裏證。渴欲飲水。所以用桂朮蒸膀胱之津液。



上騰。宣陽氣。布水精。乃治濕之方。九味羌活湯。人參敗毒散。辛溫升散。暑濕忌汗。用者皆宜慎。其大順散。治暑月內傷。飲冷證。非治暑也。移治暑厥。燥火之病。恐貽人夭殃。即使脈伏肢冷。汗多舌潤。亦當以參附回陽。斷不可專恃薑桂燥烈之品。况熱厥亡陽。辨之不真。雖參附亦殺人。事也可不慎。諸增訂數方。附列於後。

白虎加人參湯 見前

### 增補諸方

一物瓜蒂湯 金匱

瓜蒂 二十個

右剉以水一升。煮去五合。去滓頓服。

尤在涇曰。暑之中人也。陰虛而多火者。暑即寓於火之中。為汗出而煩渴。陽虛而多濕者。暑即伏於濕之內。為身熱而疼重。故暑病恆以濕為病。而治濕即所以治暑。瓜蒂苦寒。能吐能下。去身面四肢水氣。水去而暑無所依。將不治而自

解矣。此治中暑兼濕者之法也。

紫金錠

一名玉樞丹

治一切藥毒。拔子鼠莽惡菌。疫死牛馬河豚等毒。及時行瘟疫。

山嵐瘴癘。纏喉風痺。黃疸赤眼。瘡癰熱毒上攻。或自縊溺水。打撲傷損。癰疽發

背魚臍瘡腫。百蟲蛇犬所傷。男子婦人癩邪狂走。鬼胎鬼氣。並宜服之。

山茨菰

去皮洗焙二兩

川文蛤

一名五倍子。洗刮內穢。焙二兩。

麝

香

細研盡三錢

紅芽大戟

洗焙一兩

千金子

去殼用紙包裹。換紙研數十次。去盡油。無油成霜。二兩。

右各研細末和勻。以糯米粥為劑。每料分作四十粒。於端午、七夕、重陽合。如欲

急用。辰日亦得。於木臼中杵數百下。不得令婦人、孝服人、不具手足人、及雞犬

之類見之。

竹葉石膏湯

見前

黃連香薷飲

即前香薷飲。加黃連。

白虎加蒼朮湯

見前

麥門冬湯

金匱

麥門冬七升

半夏一升

人參

甘草各二兩

粳米三合

大棗十二枚

右六味。以水一斗二升。煮去六升。溫服一升。日三。夜一服。

霖按。此方治胃中津液乾枯。虛火上炎之良法。海藏去半夏加竹葉。治房勞復氣欲絕者佳。

生脈散 治熱傷元氣。氣短倦怠。口乾出汗。

人參

麥門冬

五味子

右三味。用水煎服。

柯韻伯曰。肺為嬌藏。而朝百脈。主一身元氣者也。形寒飲冷則傷肺。故傷寒有脈結代。與脈微欲絕之危。暑熱刑金則傷肺。故傷熱有脈來虛散之足慮。然傷寒是從外來者為實邪。故雖脈不至而可復可通。傷熱是從所不勝來者為賊邪。非先從滋化其源。挽回於未絕之前。則一絕而不可復。此孫真人為之急培元氣。而以生脈名方也。麥門冬甘寒。清權衡治節之司。人參甘溫。補後天營衛之本。五味酸溫。收先天天癸之原。三氣通而三才立。水升火降。而合既濟之理。



矣。仲景治傷寒。有通脈復脈二法。少陰病裏寒外熱。下利清穀。脈微欲絕者。製通脈四逆湯。溫補以扶陽。厥陰病外寒內熱。心動悸。脈結代者。製復脈湯。涼補以滋陰。同是傷寒。同是脈病。而寒熱異治者。一挽坎陽之外亡。一清相火之內熾也。生脈散本復脈立法。外無寒故不用薑桂之辛散。熱傷無形之氣。未傷有形之血。故不用地黃、阿膠、麻仁、大棗。且不令其泥膈而滯脈道也。心主脈而苦緩。急食酸以收之。故去甘草而加五味矣。脈資始於腎。資生於胃。而會於肺。仲景二方。重任甘草者。全賴中焦穀氣以通之。復之。非有待於生也。此欲得下焦天癸之元氣以生之。故不藉甘草之緩。必取資於五味之酸矣。

白頭翁湯 傷寒論

白頭翁 二兩

黃連

黃蘗

秦皮

各三兩

右四味。以水七升。煮取二升。去滓。溫服一升。不愈更服一升。

霖按。此治厥陰熱利方也。何以移治暑厥。夫白頭翁臨風偏靜。長於驅風。用爲君者。以風動則火生。風平則火熄。欲平走竅之火。必寧搖動之風也。秦皮、黃柏。瀉少陽相火。而手少陽與手厥陰表裏。故佐以黃連。以瀉心包絡火熱。風平火

熄。則瘧止厥回矣。此釜下抽薪法也。

升麻鼈甲湯金匱

升麻

當歸

甘草各二兩

雄

黃半兩

蜀椒炒去汗

鼈甲一片炙

右六味。以水四升。煮取一升。頓服之。老小再服。取汗。肘後千金方。陽毒用升麻

湯無鼈甲。有桂。陰毒用甘草湯無雄黃。

趙以德曰。按古方書。謂陽毒者。陽氣獨盛。陰氣暴衰。內外皆陽。故成陽毒。謂陰毒者。陰氣獨盛。陽氣暴衰。內外皆陰。故成陰毒。二者或傷寒初得。便爲是證。或服藥後變而成之。陽毒盡治以寒涼。陰毒盡治以溫熱。藥劑如冰炭之異。何乃仲景用一方治之乎。雖曰陰毒去雄黃。蜀椒。則是反去其溫熱者矣。且註曰。肘後千金方。陽毒用升麻湯無鼈甲。有桂。陰毒用甘草湯無雄黃。豈非皆是熱毒之傷於陰陽二經絡耶。在陽經絡則面赤斑斑如錦文。吐膿血。在陰經絡則面青身如被杖。此皆陰陽水火動靜之本象如此。豈是寒熱之邪乎。嘗以升麻鼈甲之藥考之本草。謂升麻能解時氣毒。厲諸毒。攻咽喉痛。與熱毒成膿。開壅閉。



療發斑。當歸能破惡血。養新血。補五藏肌膚。甘草和中。利血脈。緩急止痛。調藥奏功。鼈甲去惡血。雄黃破骨節積聚。辟鬼邪惡氣。骨蒸熱極。蜀椒通血脈。調關節。逐肌骨皮膚死肌。去留結破血。治天行時氣。諸藥所能者如此。卽此觀之。仲景於陰陽二毒之證。總用一方。蓋可見矣。病形雖由陰陽發證。論邪則一屬熱毒與血病也。所以不分表裏。俱以升麻解熱毒爲君。當歸和血爲臣。餘者佐之而已。但雄黃蜀椒。理陽氣藥也。故病在陰者去之。如肘後千金陽毒去鼈甲有桂枝者。鼈水族。乃陰中之陽。不如桂枝能調陽絡之血。陰毒不去。蜀椒者。蜀椒亦陰中之陽。非若雄黃陽中之陽。故留之以治陰也。方旨如此而已。

達原飲 溫疫論

檳榔 二錢

厚朴 一錢

草果仁 五分

知母 一錢

芍藥 一錢

黃芩 一錢

甘草 五分

右用水二盅。煎八分。午後溫服。

吳又可曰。檳榔能消能磨。除伏邪。爲疎利之藥。又除嶺南瘴氣。厚朴破戾氣所結。草果辛烈氣雄。除伏邪蟠踞。三味協力。直達其巢穴。使邪氣潰散。速離募原。



是以名為達原飲也。熱傷津液。加知母以滋陰。熱傷營血。加芍藥以和血。黃芩清燥熱之餘。甘草為和中之用。以後四味乃調和之品。如渴與水。非拔病之藥也。凡疫邪遊溢諸經。當隨經引用。以助升洩。如脇痛耳聾。寒熱嘔而口苦。此邪熱溢於少陽經也。本方加柴胡一錢。如腰背項痛。此邪熱溢於太陽經也。本方加羌活一錢。如目痛眉稜骨痛。眼眶痛。鼻乾不眠。此邪熱溢於陽明經也。本方加葛根一錢。但證有遲速輕重不等。藥有多寡緩急之分。務在臨時斟酌。所定分兩。大略而已。不可執滯。

三消飲溫疫論

檳榔	甘草	厚朴	芍藥
草果	知母	黃芩	大黃
羌活	柴胡	生薑	
葛根			

大棗為引。

鄭素圃曰。按三陽加法。不必全用。各隨其所見之經。而加用之。

大承氣湯溫疫論

大黃五錢

厚朴一錢

枳實一錢

芒硝三錢

水薑煎服。弱人減半。邪微者各復減半。

小承氣湯 溫疫論

大黃五錢

厚朴一錢

枳實一錢

水薑煎服。

調胃承氣湯 溫疫論

大黃五錢

芒硝五分

甘草一錢

水薑煎服。

吳又可曰。三承氣湯。功用彷彿。熱邪傳裏。但上焦痞滿者。宜小承氣湯。中有堅結者。加芒硝軟堅而潤燥。病久失下。雖有結糞。然多黏膩。得芒硝則大黃有蕩滌之能。設無痞滿。惟存宿結而有瘀熱者。調胃承氣湯宜之。三承氣功效。皆在大黃。餘皆治標之品。不耐湯藥者。或嘔或噦。當爲細末。蜜丸湯下。如人方肉食。而病適來。以致停積在胃。用大小承氣連下。惟是臭水稀糞而已。於承氣湯中。但加人參一味服之。雖三四十日所停之完穀及完肉。於是方下。

蓋承氣借人參之力。鼓舞胃氣。宿物始動也。

升降散

白殭蠶酒炒二錢

全蟬脫去土一錢

廣薑黃去皮三分不

川大黃生四錢

右爲細末。合研勻。病輕者分四次服。每服重一錢八分二厘五毫。用冷黃酒一杯。蜂蜜五錢。調勻冷服。中病卽止。病重者分三次服。每服重二錢四分三厘三毫。黃酒一半。蜜七錢五分。調勻冷服。最重者分二次服。每服重三錢六分五厘。黃酒二杯。蜜一兩。調勻冷服。如一二帖未愈。可再服之。熱退卽止。胎產亦不忌。煉蜜丸。名太極丸。性稍緩。服必空心。服後須忌半日。不可吃茶水。吃烟。吃飲食。若不能忌。並不效。能遵禁忌。下咽卽甦。半日而愈。若飽食後服此。亦不效。愈後最忌飽食。只宜吃稀粥四五分飽。永不再發。至於腥葷。更須着實牢忌。萬不可吃。凡患瘟疫。未曾服他藥。或一二日。或七八日。或至月餘未愈。但服此藥。卽愈。若先用他藥不效。後用此藥。亦間有不驗者。服藥雜故也。

楊栗山曰。處方必有君臣佐使。而又兼引導。此良工之大法也。是方以殭蠶爲



君。蟬蛻爲臣。薑黃爲佐。大黃爲使。米酒爲引。連蜜爲導。六法俱備。而方乃成。竊嘗考諸本草。而知殭蠶味辛苦氣薄。喜燥惡濕。得天地清化之氣。輕浮而升。陽中之陽。故能勝風除濕。清熱解鬱。從治膀胱相火。引輕清氣上潮於口。散熱濁結滯之痰也。其性屬火。兼土與木。老得金水之化。殭而不腐。溫病火炎土燥。焚木燦金。得秋分之金氣而自衰。故能辟一切怫鬱之邪氣。夫蠶必三眠三起。眠者病也。合簿皆病。而皆不食也。起者愈也。合簿皆愈。而皆能食也。用此而治合家之瘟病。所謂因其氣相感。而以意使之者也。故爲君。夫蟬氣寒無毒。味鹹且甘。爲清虛之品。出糞土之中。處極高之上。自甘風露而已。吸風得清陽之真氣。所以能祛風而勝濕。飲露得太陰之精華。所以能滌熱而解毒也。蛻者退也。蓋欲使人退去其病。亦如蟬之脫然無恙也。亦所謂因其氣相感。而以意使之者也。故爲臣。薑黃味辛苦溫無毒。蠻人生啖。喜其祛邪伐惡。行氣散鬱。能入心脾二經。建功闢疫。故爲佐。大黃味苦大寒無毒。上下通行。蓋亢甚之陽。非此莫抑。苦能瀉火。苦能補虛。一舉而兩得之。人但知其建良將之大勳。而不知有良相之碩德也。故爲使。米酒性大熱。味辛苦而甘。令飲冷酒。欲其行遲。傳化以漸。上

行頭面。下達足膝。外週毛孔。內通臟腑經絡。驅逐邪氣。無處不到。如物在高巔。必奮飛冲舉以取之。物在遠方及深奧之處。更必迅奔探索以取之。且喜其和血養氣。伐邪辟惡。仍是華陀舊法。亦屠蘇之義也。故爲引。蜂蜜甘平無毒。其性大涼。主治丹毒斑疹。腹內留熱。嘔吐便秘。欲清其熱。潤燥而自散瘟毒也。故爲導。蓋蠶食而不飲。有大便無小便。蟬飲而不食。有小便無大便。以清虛而散火。君明臣良。治化出焉。薑黃辟邪而靖疫。大黃定亂以致治。佐使同心。功績建焉。酒引之使上行。蜜潤之使下導。引導協力。遠近通焉。補瀉兼行。無偏勝之弊。寒熱並用。得時中之宜。所謂天有覆物之功。人有代覆之能。其洵然哉。用治溫病。百發百中。屢試屢驗。萬無一失。

### 清瘟敗毒飲

生石膏	大劑六兩至八兩 中劑二兩至四兩 小劑八錢至一兩二錢
小生地	大劑六錢至一兩 中劑三錢至五錢 小劑二錢至四錢五分
烏犀角	大劑六錢至八錢 中劑三錢至四錢 小劑二錢至三錢
真川連	大劑四錢至六錢 中劑二錢至四錢 小劑一錢至二錢半

梔子 桔梗 黃芩 知母



赤芍

元參

連翹

甘草

丹皮

鮮竹葉

先煮石膏數十沸。後下諸藥。犀角磨汁和服。

余師愚曰。此十二經泄火之藥也。凡一切火熱。表裏俱感。狂躁煩心。口乾咽痛。大熱乾嘔。錯語不眠。吐血衄血。熱甚發斑。不論始終。以此爲主方。蓋斑疹雖出於胃。亦諸經之火。有以助之。重用石膏。直入胃經。使其敷布於十二經。退其淫熱。佐以黃連、犀角、黃芩。泄心肺火於上焦。丹皮及梔子、赤芍。泄肝經之火。連翹、元參。解散浮遊之火。生地、知母。抑陽扶陰。泄其亢甚之火。而救欲絕之水。桔梗、竹葉。載藥上行。使以甘草和胃。此大寒解毒之劑。重用石膏。則甚者先平。而諸經之火。自無不安矣。證疫若初起。惡寒發熱。頭痛如劈。煩躁譫妄。身熱肢冷。舌刺唇焦。上嘔下泄。六脈沉細而數。即用大劑。沉而數者。即用中劑。浮大而數者。用小劑。如斑一出。即加大青葉。併少佐升麻四五分。引毒外透。此內化外解。濁降清升之法。治一得一。治十得十。以視升提發表而加劇者。何不俯取芻蕘之一得乎。



聖散子方

草豆蔻十個 麝炮 木猪苓去皮 石菖蒲 高良薑  
獨活去蘆 附子炮製去 麻黃去根 藁本去土炒  
厚朴去皮薑 芍藥 枳殼去穢炒 柴胡  
澤瀉 白朮 細辛 防風去蘆  
藿香 半夏薑汁製 甘草炙一 茯苓半兩  
右挫碎。如麻豆大。每服五錢七。水一鍾半。煮取八分。去滓熱服。餘滓兩服。合為  
一服。重煎空心服。

附霍亂瘧痢發斑

暑證即發為熱病。吐瀉霍亂。積久後發為瘧痢。霍亂瘧痢三證。醫書各有專科。治  
法亦詳。故不具載。姑以主方取效速者。附列於左。

乾霍亂吐法

暑氣入腹。惡心腹痛。上吐下瀉。瀉如水注。此暑火暴發。升降不利。清濁不分。所瀉

者皆五臟之津液。宜速止之。用五苓散。或胃苓湯。利小便清火實臟。甚者桂苓甘露飲。此證間有夾食積者。醫家認為食傷。而用下誤矣。亦有謂其穢濁當去者。不知津液暴涸。元氣頓傷。當立止之為上。更有吐瀉無物者。為乾霍亂。令人立斃。急用炒鹽湯。或二陳湯探吐之。通則易救。丹溪亦用理中湯吐。恐熱不敢載方。

二陳湯 化痰利氣。乾霍亂多煎服之。探吐代瓜蒂散。瓜蒂性峻而損胃。此藥利痰而性平。

廣陳皮錢五分 半 夏薑汁炒 雲茯苓錢二分 甘草三分  
右咬咀水煎服。

痢疾方

芍藥湯加減 兼治赤白痢。

白芍藥	一錢	黃連	一錢	枳實	一錢	白茯苓	一錢
檳榔	七分	當歸	八分	黃芩	一錢	川芎	五分
大黃	二錢	加滑石	二錢				

大黃初痢二三日內用一貼。動後即去之。痢日久者不可用。水一鍾半。煎至八分。和木香末三分溫服。日夜三服方效。

香連丸 方伯王嵩淮傳自楚府。

木香二兩

黃連茱萸炒八兩

廣陳皮二兩

槐角子五錢兩

地榆一兩

枳殼麸炒二兩

枳實麸炒一兩

檳榔二兩

益元散二兩

醋糊爲丸。每服一錢。紅痢、米湯下。白痢、薑陽滾白水送下。亦每日三服。或湯一

丸二丸亦可。老弱數服後。即當溫補。

瘧疾方

清脾飲加減

青皮

厚朴

白茯苓

柴胡

半夏

黃芩錢各一

白朮八分

甘草

草果仁

砂仁各五分

滑石二錢

渴加麥門冬一錢。烏梅一個。水一鍾半。煎至八分。和薑汁二匙溫服。瘧發過兩



個時辰服一貼。到癰臨來前一個時辰。再服一貼方效。二日一發者。先於空日早晚服二貼。至臨發日前一個時辰。又服一貼方效。如服前藥後。尚未全愈。即服後劑。

胃苓湯

厚朴薑製炒

蒼朮泔水浸炒

陳皮一錢

甘草炙五分

澤瀉

雲茯苓

猪苓各八分

白朮一錢

官桂三分

右水二鍾。煎至八分。溫服。

霖按。乾霍亂欲吐不得。欲瀉不得。頃刻危亡。恐非二陳湯探吐可通。當以屋角結網之大蜘蛛一枚。搗爛。水冲服。即可痛止便通。蓋暑溼伏鬱之邪。賊及太陰溼土。非風木之相尅。則不劇。邪穢深伏。上下爲之不通。風邪肆虐。故心腹爲之絞痛。蜘蛛善能定風。風平則土氣得伸。而上下皆通矣。通後再議進藥。若夫霍亂之治。雖載方書。可不具錄。然既云附列主方。若不辨其寒熱綱領。誠恐貽誤來茲。凡霍亂吐瀉。吐出澄澈而不酸濁。瀉出而不臭穢。口不渴。小溲利。此寒證。

卽素問至真要大論。諸病水液。澄澈清冷。皆屬於寒者是也。若吐出酸濁。瀉出臭穢。溲渾口渴。此熱證。卽諸轉反戾。水液渾濁。諸嘔吐酸。暴注下迫。皆屬於熱是也。轉筋者。感風木之變。土爲木尅也。夫霍亂吐瀉後。每多肢冷如冰。脈伏欲絕。口渴甚。以涼水與之。卽止。若驗其所吐酸臭。所下穢惡。小溲赤澀。此假寒真熱證也。口渴喜冷飲。却不多。手足逆冷。面赤戴陽。煩熱發躁。揭去衣被。若察其瀉出不臭惡。吐出不酸穢者。陰盛格陽之假熱真寒證也。如煩渴躁擾。口乾恣飲。舌本不冷者。乃氣液告竭之候。宜兼救陰。如吐利止而身痛不休。宜兼達表。此寒熱之略也。然易之山風蠱卦。艮上巽下。蠱者蟲類也。風木之邪。尅制溼土。則蟲生。霍亂之重者。殺蟲又不可緩也。此義仲景以後。未有知者。近西士言之。司命者亦不可忽。

又按痢瘧各有專書。原不須縷述。但清脾飲治少陽正瘧之方。胃苓湯治太陰寒濕之瘧。溫瘧等瘧。若誤用。禍尙不測。况暑瘧乎。此書專言傷暑。而舍暑瘧不論。殊覺未備。夫微寒壯熱。心煩多汗。口渴引飲。脈或虛或濡。或洪或弦。或一日一發。或間日一發者。卽所謂陰氣先傷。陽氣獨發之暑瘧也。當與內經金匱瘧

瘧治法相仿。然有微甚之不同。若因外感觸發伏氣。宜清涼滌暑。如滑石、青蒿、生草、連翹、茯苓、竹茹、枳實。暑熱甚者。黃芩、黃連皆可加入。外邪甚者。可加豆豉、薄荷、香、薄荷之屬。若暑熱內動者。宜甘寒生津。如鮮生地、麥冬、沙參、花粉、知母、石膏、鮮石斛、梨汁、蔗漿。夾濕者可加入蘆根、通草、六一散。熱濕兩重。日晡煩痞、昏譫。而陰氣未見大傷者。半夏瀉心。合小陷胸。去參棗。稍挾表邪。可佐以豉、薄、蘇、蘆、葱白等兩三味是矣。若夫十二經之瘧。風寒濕及痰食疫癘諸瘧。仍當考之專書。茲不載。

附方

半夏瀉心湯

半夏 夏半升

黃芩

乾薑

甘草炙

人參 各二兩

黃連 一兩

大棗 十二枚

水一斗。煮取六升。去渣再煎。取三升。溫服一升。日三服。方中行曰。半夏、乾薑。辛以散虛滿之痞。黃芩、黃連。苦以泄心膈之熱。人參、甘草。甘以益下後之虛。大棗甘溫。潤以滋脾胃之液。曰瀉心者。言滿在心膈。而不在



胃也。

# 小陷胸湯

括蕒實大者一枚

黃連一兩

半夏半升

水六升。先煮括蕒。取三升。去滓。內諸藥。煮取二升。去滓。分溫二服。  
鄒潤安曰。觀仲景之用括蕒實。在此湯曰小結胸。正在心下。按之則痛。在括蕒  
薤白白酒湯曰喘息欬唾。胸背痛短氣。而其脈一則曰浮滑。一則曰寸口沉遲。  
關上小緊數。是皆陰中有陽。且踞於陽位者也。夫胸背痛。較按之方痛。則甚。痺  
則較結爲輕。欬唾喘息。是其勢爲上衝。而居於心下。按之纔痛。似反靜而不動。  
此其機總緣氣與飲相阻。寒與熱相糾。熱甚於寒者。其束縛反急而爲結。寒甚  
於熱者。其蔽塞自盛而爲痺。是故結胸之病伏。胸痺之病散。伏者宜開。散者宜  
行。故一則佐以連夏之逐飲泄熱。一則佐以薤酒之滑利通陽。括蕒實之裏無  
形攢聚有形。使之滑潤而下。則同。能使之下。似是治實之方。僅能使之下。不能  
使其必通。又非純乎治實之道矣。何以知不能使之必通。蓋有停飲。痛甚至不  
得臥。即當加半夏。若兼胸滿脇下逆搶心。則仍加枳朴桂枝。儻竟能通。又何必

如是哉。是知括蕪實之治。大旨在火與痰結於陽位。不純乎虛。亦不純乎實者。皆能裹之而下。此其擅長矣。

發斑方

消斑青黛飲 治邪熱傳裏。裏實表虛。血熱不散。熱氣乘於皮膚而為斑也。

黃連去毛一錢

甘草五分

石膏煨一錢五分

知母五分

柴胡去蘆五分

人參去蘆五分

犀角鎊一錢

青黛一錢

山梔一錢

生地一錢

大便實者。去人參。加大黃。多寡酌之。

右㕮咀。水二鍾。薑一片。棗二枚。煎之。搥法。臨服入苦酒一匙調服。

寒溫暑三病。有發斑證。而暑斑人多。忽之。不知其形與寒溫同。或大如豆。或細如線痕。或如蚤點。甚亦有羊毛疔者。皆宜前藥清之。

服藥總法

傷寒傷暑。溫涼諸證。皆邪氣欺正氣也。用藥如對敵。藥入則邪漸退。藥力盡而邪

復熾。必一服周時。卽詳勢診脈。藥對則連進。日夜三五服。以邪退病安爲止。此法惟漢張仲景傷寒。隋孫思邈千金方中載此。孫云夏月晝五夜三。冬月晝三夜五。必期病退而後止。如禦敵者。愈驅逐愈加精銳。期於蕩平而後班師。此萬全之勝算也。自宋以後不傳。故取效寡而活人之功疎。愚以此法屢治人。極有神效。



增評傷暑全書 卷下 服藥總法

三四

## 附刻喻嘉言瘟疫論序

張鳳達之著傷暑全書也。翻古人之成案。妙生心之化裁。可謂善於立言者矣。第疫證引說不明。關係醫學非小。雖以東垣之淵通。丹溪之博洽。亦隨俗相沿。未有確解。近喻嘉言先生。以通今博古之才。著開天闢地之論。掃叔和之穢。闡仲景之奧。不勦陳言。獨標新義。從來迷謬。渙然冰釋。至於治法。高出千古。直發前人所未發。誰謂今人不及古人之精乎。故附刊之。而以治案名方。綴於其後。用告業醫之士焉。蓋天地以生爲心。寒熱溫涼。四氣遞運。萬古不易。人生其間。感觸寒暑而病者。皆其起居無時。飲食不節。氣虛體弱。自行犯之。非寒暑之過也。然亦不過千百之一二耳。若以寒暑爲殺厲之氣。觸之卽病。則人無噍類久矣。豈天地生人自然之道哉。至非其時而有其氣。謂之不正之氣。則可。謂之疫氣。則非也。何也不正之氣。人感之者。有病有不病。未可一概論也。若夫疫氣。則不論富貴貧賤。老幼男女。強弱虛實。沿門合境。傳染相同。人無得免者。此唯大兵大荒之後。則有之。而饑饉之年尤甚。流離滿野。道殣相望。或趨鄉鎮。或集郡邑。或聚都城。安置失所。賑濟乏

術九重萬里。呼籲無門。三五爲羣。死無虛日。千百一塚。埋藏不深。掩蓋不厚。時至春和。地氣轉動。浮土塌陷。白骨暴露。血水汪洋。死氣屍氣。濁氣穢氣。隨地氣上升。混入蒼天清淨之氣。而天地生物之氣。變爲殺物之氣。無形無影。無聲無臭。從口從鼻而入。直犯臟腑。正氣閉塞。邪氣充斥。頃刻云亡。莫可救藥。說文云。疫者。民皆病也。厲鬼爲災。斯爲疫耳。禮記月令云。孟春之月。先王掩骼埋胔。正以是月。天氣下降。地氣上升。誠恐髣髴污穢之氣。隨天地之氣升降。溷合爲一。有害人物。故掩埋之。此預補造化。天無功也。蓋以人在氣交之中。如魚在水。一毫渣滓。混雜不得。設川澤潑灰。池塘入油。魚鮮有得生者。人受疫氣。何以異此。是以自古聖君賢相。參贊化育。變理陰陽。消弭疫端。於平日。捍患禦災。煮粥施藥。救濟疫害。於臨時。人無橫夭。世躋雍熙。文人解爲澤及枯骨。失其旨矣。詎春月當澤及枯骨。而夏秋冬之枯骨。遂不當澤及哉。近有好事之輩。設立壇廠。每於小兒出痘之年。購求天亡屍骸。雖經埋瘞。亦必創集如山。架火焚燒。烈燄張熾。腥聞於天。神人掩鼻。毒氣熏蒸。惡味氤氳。流行傳染。以致嬰孩生出一等怪症。似痘非痘。似疹非疹。似斑非斑。一二日間。卽涉危篤。雖有良醫。莫能措手。共相詫愕。咸謂天生災異。不知致此之



由。頻年以來。冤枉赤子。何啻數萬。離城二三十里。卽無此症。豈非明驗與。嗟嗟。異端妖術。惑世誣民。昧者反以爲善。聚衆譁之。斂財助之。此倡彼和。奔走若狂。揆之先王掩骼埋胔之義。不大相乖舛耶。因序疫症而並及之。以望世之學醫者加之意焉。時

康熙十四年七月朔漁陽林起龍北海識於補拙齋

增評傷暑全書

卷下

附刻喻嘉言瘟疫論序

三八

## 附刻喻嘉言瘟疫論

喻昌曰。聖世御宇。春無愆陽。夏無伏陰。秋無淒風。冬無苦雨。乃至民無夭札。物無疵癘。太和之氣。瀰滿乾坤。安有所謂瘟疫哉。然周禮。儺以逐疫。方相氏掌之。則瘟疫之由來。古有之矣。鄉人儺。孔子朝服而致其誠敬。蓋以裝演巨象爲儺神。不過彷彿具形。聖人以正氣充塞其間。俾疫氣潛消。迺位育之實功耳。古人元旦汲清泉以飲。芳香之藥。上巳採蘭草以襲。芳香之氣。重滌穢也。後漢張仲景著傷寒論。欲明冬寒春溫夏秋暑熱之正。自不能并入疫病。以混常法。至理已畢。具於脈法中。叔和不爲細繹。乃謂重感於寒。變爲溫疫。又謂春時應暖而復大寒。夏時應大熱而反大涼。秋時應涼而反大熱。冬時應寒而反大溫。此非其時而有其氣。是以一歲之中。長幼之病。多相似者。此則時行之氣也。又謂冬溫之毒。與傷寒大異。冬溫復有先後。更相重沓。亦有重輕。治法不同。又謂從春分節以後。至秋分節前。天有暴寒者。皆爲時行寒疫也。蓋春夏秋爲寒疫。冬月爲溫疫。所以又云三月四月。或有暴寒。其時陽氣尙弱。爲寒所折。病熱猶輕。五月六月。陽氣已盛。爲寒所折。病



熱則重。七月八月。陽氣已衰。爲寒所折。病熱亦微。後人奉此而廣其義。謂春感清邪在肝。夏感寒邪在心。秋感熱邪在肺。冬感溫邪在腎。損箴遞奏。舉世若狂矣。嗟。疫邪之來。果爲寒折。陽氣乘其所勝。而直入精神魂魄之藏。人無噍類久矣。更有謂疫邪無形象聲臭。定時定方可言。是以一歲之中。長幼莫不病此。至病傷寒者。百無一二。治法非疏裏則表不透。非戰汗則病不解。愈募愈遠。究竟所指之疫。仍爲傷寒傷溫傷暑熱之正病。疎裏則下早可知。戰汗則失表可知。祇足自呈敗闕耳。夫四時不正之氣。感之者。因而致病。初不名疫也。因病致死。病氣尸氣混合。不正之氣。斯爲疫矣。以故雞瘟死雞。猪瘟死猪。牛馬瘟死牛馬。推之於人。何獨不然。所以饑饉兵凶之際。疫病盛行。大率春夏之交爲甚。蓋溫暑熱濕之氣。交結互蒸。人在其中。無隙可避。病者當之。魄汗淋漓。一人病氣。足充一室。況於連牀並榻。沿門合境。共釀之氣。益以出戶。尸蟲載道。腐壇燔席。委壑投崖。種種惡穢。上溷蒼天清淨之氣。下敗水土物產之氣。人受之者。親上親下。病從其類。有必然之勢。如世俗所稱大頭瘟者。頭面腮頤腫如瓜殼者是也。所稱蝦蟇瘟者。喉痺失音。頸筋脹大者是也。所稱瓜瓢瘟者。胸高脇起。嘔汗如血者是也。所稱疔瘡瘟者。遍

身紅腫。發塊如瘤者是也。所稱絞腸瘟者。腹鳴乾吐。水瀉不通者是也。所稱軟脚瘟者。便清泄白。足重難移者是也。小兒痘瘡尤多。以上疫症不明治法。咸委劫運。良可傷悼。大率瘟疫痘疹。古昔無傳。不得聖言折衷。是以墮落叔和坑塹。曾不若俗見摸索病狀。反可顧名思義也。昌幸微窺仲景一斑。其平脈篇中云。寸口脈陰陽俱繁者。法當清邪中於上焦。濁邪中於下焦。清邪中上。名曰潔也。濁邪中下。名曰渾也。陰中於邪。必內慄也。表氣發虛。裏氣不守。故使邪中於陰也。陽中於邪。必發熱頭痛。項強頸攣。腰痛脛酸。所謂陽中霧露之氣。故曰清邪中上。濁邪中下。陰氣爲慄。足膝逆冷。便溺妄出。表氣微虛。裏氣微急。三焦相溷。內外不通。上焦怫鬱。藏氣相熏。口爛舌斷也。中焦不治。胃氣上衝。脾氣不轉。胃中爲濁。榮衛不通。血凝不流。若衛氣前通者。小便赤黃。與熱相搏。因熱作使。遊於經絡。出入藏府。熱氣所過。則爲癰膿。若榮氣前通者。陽氣厥微。陰無所使。客氣入內。噦而出之。聲嗝咽塞。寒厥相逐。爲熱所擁。血凝自下。狀如豚肝。陰陽俱厥。脾氣孤弱。五液注下。下焦不闔。清便下重。令便數難。臍築湫痛。命將難全。凡二百六十九字。闡發奧理。全非傷寒中所有事。乃論血邪從入之門。變病之總。所謂赤文綠字。開天闢地之寶符。人



自不識耳。篇中大意。謂人之鼻氣通於天。故陽中霧露之邪者。謂清邪從鼻息而  
上入於陽。入則發熱頭痛。項強頸攣。正與俗稱大頭瘟、蝦蟆瘟之說符也。人之口  
氣通於地。故陰中水土之邪者。爲飲食濁味。從口舌而下入於陰。入則其人必先  
內慄。足膝逆冷。便溺妄出。清便下重。臍築湫痛。正與俗稱絞腸瘟、軟脚瘟之說符  
也。然從口從鼻所入之邪。必先注中焦。以次分佈上下。故中焦受邪。因而不治。中  
焦不治。則胃中爲濁。營衛不通。血凝不流。其釀變卽現中焦。俗稱瓜瓤瘟、疔瘡瘟  
等症。則又陽毒癰膿。陰毒遍身清紫之類也。此三焦定位之邪也。若三焦邪混爲  
一。內外不通。藏氣熏蒸。上焦拂鬱。則口爛舌斷。衛氣前通者。因熱作使。遊行經絡  
藏府。則爲癰膿。營氣前通者。因召客邪。噦出聲。嗝咽塞。熱擁不行。則下血如豚肝。  
然以營衛漸通。故非危候。若上焦之陽。下焦之陰。兩不相接。則脾氣於中難以獨  
運。斯五液下注。下焦不闔。而命難全矣。傷寒之邪。先行身之背。次行身之前。次行  
身之側。繇外廓而入。瘟疫之邪。則直行中道。流布三焦。上焦爲清陽。故清邪從之。  
上入。下焦爲濁陰。故濁邪從之。下入。中焦爲陰陽交界。凡清濁之邪。必從此區分。  
甚者三焦相混。上行極而下。下行極而上。故聲嗝咽塞。口爛舌斷者。亦復下血如



豚肝。非定中上不及下。中下不及上也。傷寒邪中外廓。故一表即散。疫邪行在中道。故表之不散。傷寒邪入胃府。則腹滿便堅。故可攻下。疫在三焦。散漫不收。下之復合。此與治傷寒表裏諸法。有何干涉。奈何千年憤憤。試折衷以聖言。從前迷謬。豈不渙然冰釋哉。治法未病前。預飲芳香正氣藥。則邪不能入。此爲上也。邪既入。急以逐穢爲第一義。上焦如霧。升而逐之。兼以解毒。中焦如漚。疏而逐之。兼以解毒。下焦如瀆。決而逐之。兼以解毒。營衛既通。乘勢追拔。勿使潛滋。詳訂諸方。載春溫方後。或問春夏秋蒸氣成疫。豈冬溫獨非疫乎。余曰。冬月過溫。腎氣不藏。感而成病。正與不藏精之春溫無異。計此時有春無冬。三氣即得交蒸成疫。然遇朔風驟起。則蒸氣化烏有矣。是以西北土高地燥。即春夏氣難上升。何況冬月之凝沍。東南土地卑濕。爲霧露之區。蛇龍之窟。其溫熱之氣。得風以播之。尙有可耐。設旦暮無風。水中之魚。衣中之蟲。且爲飛揚。況於人乎。蒸氣中原雜諸穢。益以病氣屍氣。無分老少。觸之即同一病狀矣。此時朔風了不可得。故其氣轉積轉暴。雖有薰風。但能送熱。不能解涼。盛世所謂解慍阜財者。在兵荒反有注邪佈穢之事矣。叔和以夏應大熱而反大寒爲疫。詎知大寒正疫氣消彌之候乎。故疫邪熾盛。唯北

方始能消受。詩惡譴人。思欲投畀有北。以熄其燄。析義精矣。

### 疫證治案

靖康二年春。京師大疫。有異人書一方於齋舍。凡因疫發腫者。服之無不效。其方  
黑豆二合。炒令香熟。甘草二寸炙黃。水二盞。煎減半。時時呷之。

泰和二年四月。民多疫癘。初覺憎寒。壯熱體重。次傳頭面腫盛。目不能開。上喘咽  
喉不利。舌乾口燥。俗云大頭傷寒。諸藥雜治莫能愈。漸至危篤。東垣曰。身半已  
上。天之氣也。邪熱客於心肺之間。上攻頭面而為腫耳。須用下項藥。共為細末。  
半用湯調。時時服之。半用蜜丸。嚙化服盡。良愈。活者甚衆。時人皆曰仙方。謂天  
仙所製也。

### 普濟消毒飲

升	麻	七	分				
柴	胡	八	分				
桔	梗	五	分				
板	藍	根	一	錢			
黃	芩	半	兩				
黃	連	五	錢				
人	參	三	錢				
陳	皮	二	錢				
甘	草	二	錢				
連	翹	一	錢				
黑	參	二	錢				
殭	蠶	七	分				

馬勃一錢

鼠粘子炒一錢

右爲末。服如上法。或加防風、川芎、薄荷、歸身、細切五錢。水煎。時時稍熱服之。如大便燥結。加酒蒸大黃一二錢利之。腫勢甚者。砭鍼刺之。

羅謙甫治中書右丞姚公茂。六旬有七。宿有時毒。至元戊辰春。因酒再發。頭面耳腫而疼。耳前後腫尤甚。胸中煩悶。咽嗌不利。身半以下皆寒。足脛尤甚。由是以床相接作炕。身半以上臥於床。身半以下臥於炕。飲食減少。精神困倦而體弱。命羅治之。診得脈浮數。按之弦細。上熱下寒明矣。內經云。熱勝則腫。又曰。春氣者。病在頭。難經云。蓄則腫熱。砭射之也。蓋取其易散故也。遂於腫上約五十餘刺。其血紫黑如露珠之狀。頃時腫痛消散。又於氣海中。大艾炷灸百壯。乃助下焦陽虛。退其陰寒。次三里二穴。各灸三七壯。治足胫冷。亦引導熱氣下行故也。遂處一方。名曰既濟解毒湯。

既濟解毒湯

黃芩酒炒一錢

黃連酒炒一錢

桔梗一錢

甘草生五分

柴胡五分

升麻七分

連翹一錢

歸身酒洗一錢



大黃一錢酒煨

水二盞煎一盞徐徐溫服。

論曰。熱者寒之。然病有高下。治有遠近。無越其制度。以黃芩、黃連、苦寒酒製炒。以爲因用。以瀉其上熱。以爲君。桔梗、甘草辛甘溫上升。佐諸苦藥以治其熱。柴胡、升麻苦平。味之薄者。陰中之陽。散發上熱。以爲臣。連翹苦辛平。以散結消腫。當歸辛溫。和血止痛。酒煨大黃苦寒。引苦性上行至巔。驅熱而下。以爲使。投劑之後。腫消痛減。大便利。再服減大黃。慎言語。節飲食。不旬日良愈。

總帥相公。近年七旬。戊午秋南征。過揚州。俘虜萬餘口。內選美色室女。近笄年者。四。置於左右。予因曰。總帥領十萬衆。深入敵境。非細務也。况年高氣弱。凡事宜慎。且新虜之人。驚憂氣蓄於內。加以飲食不節。多致疾病。近之則邪氣相傳。其害爲大。總帥笑而不答。其副帥時亦在坐。異日召予曰。我自十三歲從征。回鶻。此事飽經。汝之言深可信矣。至臘月中。班師。值大雪三日。新掠人不耐凍餒。皆爲頭疼咳嗽。腹痛自利。多致死亡者。逮春正月至汴。隨路多以禮物來賀。相公因痛飲數次。遂病。脈得沉細而弦。三四動而一止。其證頭疼咳嗽。自利腹痛。與

新虜人病無異。其脈短澁。其氣已衰。病已劇矣。三日而卒。邪氣害人。其禍如此。內經云。乘年之虛。遇月之空。失時之和。因而感邪。其氣至骨。又曰。避邪如避矢石。錢仲陽亦曰。蜚履不可近。襁褓嬰兒。多生天弔驚風。亦由正氣尙弱。不能勝邪故也。由是觀之。聖賢之言。信不誣矣。

成化二十一年。新野疫癘大作。死者無虛日。鄰人樊滋夫婦。臥床數日矣。余自學來。聞其家人。如殺羊聲。不暇去衣巾。急往視之。見數人。用綿被覆其婦。牀下致火一盆。令出汗。其婦面赤聲啞幾絕。余叱曰。急放手。不然死矣。衆猶不從。乃強拽去被。其婦躍起。倚壁坐。口不能言。問曰。飲涼水否。領之。與水一碗。一飲而盡。始能言。又索水。仍與之。飲畢。汗出如洗。明日愈。或問其故。曰。彼發熱數日。且不飲食。腸中枯涸矣。以火蒸之。速死而已。何得有汗。今因熱極。投之以水。所謂水火既濟也。得無汗乎。觀以火然。枯鼎雖赤。而氣不升。注之以水。則氣自來矣。遇此等證者。不可不知。

江篁南治給事。中游讓溪。嘉靖壬子正月。忽感大頭風症。始自頸腫。時師以爲外感。而誤表之。繼以爲內傷。而誤補之。面發赤。太陽俱腫。頭頂如裂。身多汗。寐則



譚語。綿延三日。喘咳勢急。其親汪子際。以竹茹橘皮湯。繼以川芎茶調散。合白虎湯。去人參服一劑而減。次日用前方。去寒峻藥。至晚漸定。目輪發水泡數箇。餘腫漸消。獨耳後及左頰久而不散。又次日以當歸六黃湯為主。加散毒之藥。延及兩旬。頂巔有塊如雞子大。突起未平。及面頰餘腫未消。有時頭疼。大便稀溏。時二月中旬。江至診得左脈浮小而駛。右脈大近快。有勃勃之勢。江按脈症。當從火治。以生黃耆八分。白朮、薏苡各一錢半。茯苓、片苓各八分。生甘草三分。煎加童便服。次日脈稍平。然兩頰尚赤。早間或覺頭痛。蓋餘火未全殺也。黃耆加作一錢二分。薏苡加作二錢。頂塊漸消。以後加生耆二錢。更飲綠豆湯。童便五劑而愈。

宿按。陽明邪熱。兼少陽相火爲病。視其病勢在何部。隨經處治。當緩弗令重劑。過其病所。陽明爲邪。首大腫。少陽爲邪。出於耳前後。予每治此症。初用涼膈散。繼以消毒飲。無不立愈。

嘉靖己未五六月間。江南淮北。在處患時行瘟熱病。沿門闔境。傳染相似。用人參敗毒散。倍人參。去前胡。獨活。服皆盡效。全無過失。



萬歷十六年。南都大疫。死者甚衆。余寓雞鳴僧舍。主僧患疫。十餘日。更數醫。皆云禁飲食。雖米飲不容下咽。病者飢甚。哀苦索食。余曰。奪食則愈。雖有是說。此指內傷飲食者言耳。諺云。餓不死。傷寒。乃邪熱不殺穀。雖不飲食。亦不致死。經云。安穀則生。况病挾內傷不足之症。禁食不與。是虛其虛。安得不死。雖與稀粥。但不使充量。進補中益氣湯而愈。若此類者甚衆。余未嘗禁飲食。而活者不少。每見都城諸公。但說風寒二字。不辨有無內傷虛實。一例禁絕飲食。有二十餘日。邪氣已盡。米飲尙不容入口。而餓死者有限。表而出之。以爲習俗之戒。

萬歷戊子己丑年。時疫盛行。凡服人參敗毒散發表者。無不全活。江應宿治陳氏子。年十七歲。患疫。大渴大熱。頭痛如破。泄瀉頻數。六脈洪大。與三黃石膏湯。日進三服。石膏加至一兩。三日而愈。

何氏僕患天行時疫。目不識人。狂言妄語。投以地漿。童子小便浸白頭頸蚯蚓。搗細。新汲井花水。濾下清汁。任服一二碗。卽知人。三日愈。

壺仙翁治文學張薇伯。病風熱不解。時瘟疫大行。他醫診其脈。兩手俱伏。曰。此陽證見陰。不治。欲用陽毒升麻湯升提之。翁曰。此風熱之極。火盛則伏。非陰脈也。

升之則死矣。卒投連翹涼膈之劑。一服而解。

橘泉翁治一人。病頭面項喉俱腫大惡寒。醫疑有異瘡。翁曰。非也。此所謂時毒似傷寒者。丹溪曰。五日不治殺人。急和敗毒散。加連翹、牛蒡子、大黃下之。三日愈。俗名發痧之症。江南舊無。今隨地有之。醫家不載。大凡纔見寒慄。四體懈怠。頭痛身熱。狀似傷寒發瘧。其治或先用熱水蘸搭臂膊。而以苧麻刮之。甚者或以針刺手足出血。或以香油燈照視背有紅點處皆烙之。以上諸法皆能使腠理開通。血脈舒暢而愈。有用艾灸以得痧爲良。或因灸膿血迸流移時而死者。誠可憐也。有雍承節印行方云。初得症以飲艾湯試吐。卽是其症也。急以五月蠶退紙一片碎煎安碗中。以碟蓋密。以湯泡半碗許。仍以紙封碟縫。勿令透氣。良久乘熱飲之。就臥以衣被蓋之。令汗出愈。

一婆婦身肥。常患發沙之症。每用苧麻刮之。卽愈。輒愈輒發。不出二三日。醫用四物等治。反加鼻衄。江以香附、撫芎、黃芩、梔子等開鬱降火清熱之劑。與之數服而愈。不復發。以上二條係類案

崇禎壬午癸未時疫盛行。道殣相藉。各處醫者發汗和中藥。內唯用人參者多以

活人

治疫名方

黃連解毒湯見前

黃連阿膠湯 治下利膿血。煩躁不得臥。

黃連二錢

黃芩一錢

芍藥一錢

雞子黃一枚

阿膠錢半

水二盞。煎三物至一盞。去渣內膠。煎一二沸。再內雞子黃。和勻服。日三服。

黃連湯 治胸上有熱。胃中有邪氣。腹痛欲嘔吐者。

黃連一錢

甘草一錢

乾薑一錢

人參五分

桂枝三分

半夏五分

大棗一枚

黃連瀉心湯

黃連

生地黄

知母各錢半

甘草生五分

水盞半。煎八分。溫服。



黃連龍骨湯 治腹痛咽痛。體熱煩苦。

黃連

黃芩

芍

藥各八分

龍

骨五分

水盞半。煎八分服。

黃連犀角湯 治狐惑。

犀角三錢

黃連二錢

烏

梅四箇

木

香三分

水盞半。煎八分。入犀角汁、木香汁。和勻服。

黃連橘皮湯 治疫毒發狂。下部生瘡。

黃連一錢

橘皮七分

杏

仁七分

麻

黃六分

葛根六分

厚朴五分

甘

草五分

水盞半。煎八分服。

黑膏 治疫毒發斑嘔逆。

生地黄二錢

好

豉六錢

猪膏十兩。合煎。令三分減一。絞去滓。取濃汁如膏。入雄黃豆大。麝香少許。和勻

分三服。

以上係喻嘉言尙論春溫篇。解毒八方。

人參敗毒散見前

藿香正氣散見前

九味羌活湯見前

消毒飲 治疫毒頭皮腫痛。及赤丹火丹

牛蒡子炒一錢

荆芥一錢

甘草六分

防風六分

麥門冬五分

升麻五分

犀角磨汁一錢

桔梗八分

朴硝錢半

水二盞。煎八分。入犀角汁服。

犀角消毒飲 治毒氣發斑痛癢。

牛蒡子炒二錢

防風二錢

荆芥一錢

甘草八分

犀角磨汁

每服三錢。水煎入犀角汁服。

羌活升麻湯 治時行疫病。清熱解毒。

羌活

升麻

葛根

芍藥

人參

黃芩各一錢

黃連

石膏生

甘草生

生地

知母生各七分

水二盞。薑三片。棗一枚。煎八分。溫服。

漏蘆湯 治臟腑積熱。發為腫毒。時疫疔瘡。頭面洪腫。咽噤堵塞。水藥不下。一切羌惡疫癘。

漏蘆

升麻

大黃

黃芩各一兩

藍葉

黑參各二兩

右六味為粗末。每服二錢。水盞半。煎至六分。去渣溫服。腫毒甚。加芒硝二錢半。消毒丸 治時疫疔瘡惡證。

大黃

牡蠣燒

殭蠶炒各一兩

右為末。蜜丸彈子大。新汲水化下一丸。無時。

雄黃丸 治疫不相染

雄黃一兩研

赤小豆炒熟

丹參

鬼箭羽各二兩



共爲細末。煉蜜爲丸。如桐子大。每日空心以溫水下五丸。雖同床共屋不相染。  
運氣五瘟丹

黃 芩

黃 柏

黃 連

山 梔

香 附

紫 蘇

大 黃

甘 草梢

右八味生用。於冬至日爲末。將大黃三倍煎滾湯渣和藥丸。如雞子大。硃砂雄黃爲衣。再貼金箔。一九取泉水七碗。浸化可服七人。前藥乙庚年黃芩爲君。丁壬年山梔爲君。丙辛年黃柏爲君。戊癸年黃連爲君。甲己年甘草梢爲君。爲君者多一倍也。餘四味與香附紫蘇爲臣者減半也。

大青丸 治時行瘟疫發熱上膈熱。

薄 荷

梔 子

黃 芩

黃 連

連 翹六錢

甘 草三錢

大 黃

白龍粉錢各八

右爲末。用青蒿自然汁爲丸。綠豆大。雄黃爲衣。每服五六十九丸。白湯送下。

三黃石膏湯見前

太無神朮散 治四時瘟疫。頭痛項強。寒熱身痛。專主山嵐瘴氣。

蒼朮

厚朴

陳皮

甘草

石菖蒲

藿香

各一錢

水盞半。薑三片。棗一枚。煎八分服。

升麻葛根湯 治疫症無汗發熱口渴者。

升麻

葛根

芍藥

甘草 各等分

右水煎服。

人參白虎湯 見前

二黃湯 治大頭時疫。

黃芩 酒炒

黃連 酒炒

生甘草 各等分

每服五錢。水盞半。煎八分。稍溫徐徐呷之。

救急解毒丸 治時行疫氣。咽喉腫痛。項筋粗大。舌強聲啞。鼻塞氣悶。水漿難進。

危在須臾。非此不救。兼治頭面浮腫。疔瘡堅硬。浸淫濕瘡。耳內流膿。眼弦赤腫。

口內糜爛等症。

甘草 二兩

桔梗 二兩

荊芥 一兩

防風 一兩

連翹一兩 酒 芩一兩 酒 連一兩 薄荷一兩  
 升麻一兩 酒 大黃一兩 殭蠶五錢 蒲黃五錢  
 青黛五錢 盆消五錢 射干五錢  
 以上共為極細末。羅淨。以為梅湯調柿霜和丸。如圓眼大。噙化。煎湯亦可。  
 茵陳五苓散 治疫癘黃疸。

茵陳五錢 五苓散四錢  
 和勻。每服四錢。食前米湯調服。或濃煎茵陳湯。調五苓散。

參苓平胃散 治腹脹黃腫。腸鳴泄白。

厚朴薑汁炒 陳皮各五兩 蒼朮半斤 浸炒 茯苓

甘草炙 人參各二兩

共為細末。每服三錢。或五錢。薑棗湯調下。

神授香蘇散 治瘟疫。昔有城中大疫。一白髮老人。教富人合施。病者皆愈。疫鬼相顧曰。此老教三人矣。遂遁。

紫蘇 香附醋製各二兩 陳皮去白 甘草五錢



共爲細末每服三錢。水盞半。煎八分溫服。

製人中黃法

冬月以竹筒一段。刮去青。兩頭留節。一頭打通一竅。以大甘草切碎。內竹筒中。以木塞孔周密。投糞缸中。浸二三月。到清明取出。晒乾收貯待用。大治疫毒。一逢疫癘之時。用貫衆一二枚。旁浸日用水缸中。烹茶煮飯。一切俱用此水。疫不能染。活人甚驗。

凡遇天行時氣。恐其相染。須遲出早入。房中常燒蒼朮。以其避瘟驅邪。鼻孔塗雄黃。口中嚼大蒜最良。

老君神明散。東坡聖散子。此二方皆一派辛熱燥裂有毒之藥。全無扶正驅邪逐穢解毒之品。不知醫書何以列之疫條。必係後人僞托。學者慎勿徇名妄用。害人非淺。虞天民辨之最詳。不可不攷。

跋

李以理有言。我有所見。輒不能忘。我有所得。復不能公。此與無見無得何異。有所見欣然忘之。有所得廓然公之。乃昔人傳道之虛懷。不必身之所至。目之所營。使聞者心領神會。有以悟於語言象數之外。妙哉論至此乎。予雖不敏。心竊嚮往之。爲之執鞭。所願樂焉。故有是刻。

康熙歲在乙卯秋月漁陽林起龍自跋





〔清〕

葉子雨

撰著

伏氣解

中國醫學大成



## 伏氣解提要

清、葉霖撰。霖字子雨。江蘇揚州人。自序云。丁酉之冬。圍爐斗室。時暖日烘簷。凍蠅撲窗。鎔兒偕及門諸子。以六氣陰陽致病爲問。因具論四時陰陽伏氣之理。他病不及焉。凡七篇。都爲一卷。號曰伏氣解。非敢謂闡岐黃未顯之微言。聊以備諸子臨診之一助云爾。生氣通天論曰。是以春傷於風。邪氣留連。乃爲洞洩。夏傷於暑。秋爲痃瘕。秋傷於濕。上逆爲咳。發爲痿厥。冬傷於寒。春必病溫。此又言感之不卽病者。乃藏於經脈臟腑之間。而爲伏氣之病也。春傷於風者。陽邪也。留連日久。乃下爲洞洩之陰病。秋傷於濕之陰邪。乃爲上逆而咳之陽病。甚爲必成痿厥。夏傷於暑熱之陽邪。至秋發爲痃瘕之陰病。冬傷於寒之陰邪。至春必爲溫熱之陽病。是陰陽上下之相乘。然伏氣之因。不僅乎此。經文簡奧。特示人以四時之機。互根



之理。再推而論之。天之六氣傷人。由人之陰陽不固。而冬寒夏暑所伏之因各異。又於金匱真言論續之曰。夫精者身之本也。故藏於精者。春不病溫。夏暑汗不出者。秋成風瘧。言人身之氣血皆生於精。冬宜秘藏。則陰氣固密。若縱慾精耗。則陰虛。陰虛則陽邪易犯。故多病溫。夏宜疎泄。逆之則汗不出。汗不出則暑邪內伏。遇秋風淒切。則寒熱相戰而爲瘧病。陰陽啓閉。時氣宜然。舉冬夏言。其春秋伏氣自可類推。觀此則夏日之病暑。其非冬藏所變者明矣。軒岐釋伏氣之義已明。猶恐後之讀者不能隅反。更於陰陽應象大論補之曰。冬傷於寒。春必病溫。春傷於風。夏生飧瀉。夏傷於暑。秋必痎瘧。秋傷於濕。冬生咳嗽。此承生氣通天論言四時五行之氣。以生長化收藏。而生寒暑燥濕風爲外邪。人之五藏化五氣。而生喜怒悲恐憂爲內賊。苟七情不慎。六氣傷之。舉先生辨伏氣數則爲例。其二。如病瘧。其三。如論熱病。其四。如論五臟痿病。其五。如論五藏移熱。其六。如論暑燥。其七。如論痧

脹等七篇。皆能闡軒岐未發之秘。明天人一貫之理。苟能明乎先生伏氣之治。活法運乎一心。何難登軒岐之門。而入仲景之域也。

伏氣解提要

四



# 自序

夫一寒一暑。一晝一夜。天之陰陽也。一呼一吸。一寤一寐。人之陽陰也。以氣爲陽。以血爲陰者。權輿於素靈。後之言醫者。無不因此說。滔滔皆是。然是固不明陰陽之理。而違古聖人之意者。何則。天人氣血。各具陰陽。非可以他物配之也。嗟乎。近之醫。知乎其陽。不知其陰。議乎其前。不慮其後。微則不能察。劇則不得當。既不辨陰陽。何知寒熱真假。如水益深。如火益熱。妄投錯施。無知其惑。良可慨矣。丁酉之冬。圍爐斗室。時暖日烘簷。凍蠅撲牕。鎔兒偕及門諸子。以六氣陰陽致病爲問。因具論四時陰陽伏氣之理。他病不及焉。凡七篇。都爲一卷。號曰伏氣解。非敢謂闡岐黃未顯之微言。聊以備諸子臨診之一助云爾。

石林醫隱識於鷓鴣軒中

伏氣解自序

## 裘序

葉子雨先生伏氣解七篇。爲精參素靈陰陽氣化之道者也。發人所未發。晚近如吳鞠通、王孟英輩之學說。猶多辯正。其立言之價值可知。書成未刊。初爲社友吳傑三君惠寄。其哲嗣仲經君恐輾轉抄錄。或有錯誤。特示家藏原稿。得校刊焉。夫藝術日新。科學尙矣。陰陽氣化之道。東西醫者幾斥爲虛誕。病理學中。羅列致病之原。半屬有形之病菌。病菌爲病。必經若干日。始見發生。其未發之時。爲潛伏期。而潛伏期之意義。似與國醫說之伏氣同。惟伏氣根據陰陽氣化。病菌全憑器械（顯微鏡）檢視。膚淺評之。則國醫說之浮泛不切。爲東西醫者排斥也宜矣。雖然。昔日目力不得發見之病氣。今日以器械或化學檢得爲病菌。無他。顯微鏡等能擴大氣化爲質點故也。但他日發明。十百倍於今日之器械。今日所未得見而



斥爲虛誕者。豈難得顯而再爲有形之質點耶。則今日之器械。不亦與昔日之目力無異也。至時而陰陽氣化之道。始知非浮泛不切。確有奧旨存乎其間。學術遞嬗。理勢固可推想而定。毋謂余言辯焉。余刊伏氣解。敢解伏氣與病菌之不同點。爲如是而已。

民國八年四月吉生裘慶元謹序於紹興醫學報社

# 伏氣解目錄

解一	一——一〇
解二	一〇——一四
解三	一四——二一
解四	二一——二八
解五	二八——三四
解六	三五——四一
解七	四一——四四

伏氣解目錄



# 伏氣解

清 揚州 葉 霖子雨撰著

鄞縣 曹赤電炳章圈校

## 解一

六淫之邪。感之卽病者輕。伏久而發者重。內經於伏氣之義。不憚反覆數見。能闡明其旨者。仲景後未聞其人。近世醫家。侈談伏氣。言多道晦。徒事紛拏。不克明其所以然也。嗟乎。不究天人之理。不察陰陽之機。烏足言醫。醫可以小道視之哉。易曰。一陰一陽之謂道。此一陰一陽者。非各一之一。乃道之妙用。合一之一。而三氣卽存乎其間。蓋動一也。靜一也。所以能使其動靜者又一也。惟其合一。乃能各一。

有互根之理在焉。雖陰陽萬端。則是本一而已。明乎一之道。則知乾坤之動靜。三才之指歸矣。

漢儒以十二辟卦。候一年消息。乃乾坤二卦之旁解也。蓋乾之六陽。自十一月建子。冬至一陽生。爲地雷復卦。即乾之初九爻。十二月丑二陽生。爲地澤臨。即乾之九二爻。正月寅三陽生。爲地天泰。即乾之九三爻。二月卯四陽生。爲雷天大壯。即乾之九四爻。三月辰五陽生。爲澤天夬。即乾之九五爻。至四月建巳。六陽充足。而爲乾爲天。即乾之上九爻。此一年之乾卦也。五月建午。夏至一陰生。即坤之初六爻。爲天風姤卦。六月未二陰生。即坤之六二爻。爲天山遯。七月申三陰生。即坤之六三爻。爲天地否。八月酉四陰生。即坤之六四爻。爲風天觀。九月戌五陰生。即坤之六五爻。爲山地剝。十月亥六陰純靜。爲坤爲地。即坤之上六爻。此一年之坤卦也。夫坤爲萬物之母。而能生物。然坤本純陰。必待乾與之交。而得其陽。然後始能

生萬物也。十二支次序。世人皆以子爲首。因坤臨十月亥。坤爲純陰之卦。陰極則陽生。故十一月冬至一陽升於地上。爲地雷復也。不知造化端倪。實不在子而在午。蓋天地交而後萬物生。是乾坤交姤之初。卽爲萬物造端之始。然交必陽體充足而後能交。乾之六陽乃充足於四月之巳。次爲午。故乾至五月建午。夏至始與坤交。是則乾足於巳而動於午。巳午皆火。故周易乾居正南。乾之外體屬火。乾中含蓄陰精屬金。故五行家言庚金長生在巳。所謂長生者。乃指其生之之源而言也。乾之初動於午。每年五月夏至之時。乾上九爻一陽。已升至天頂極高。不得不轉而向下。向下卽感動。坤陰之氣。上升而交。故天地三交。五月建午爲第一交。六月未爲二交。七月申爲三交。所謂坤三索於乾也。乾坤交而謂之索者。以坤本純陰。必素於乾而後有陽。始能生化也。乾陽入坤陰而化爲氣。氣升爲雲。爲雨。蓋十二辟卦。乾位巳火也。坤位亥水也。乾與坤交。則火入水中。而化爲氣。以水爲質。火



爲性。試以一碗。人張口氣呵之。則生水。故知氣之形屬水。而其所以能升騰行動者。則火也。爻辭曰。見羣龍无首吉。言氣升能爲雲雨。故喻爲龍。而乾與坤三爻。則乾上四五之三爻。盡入於坤。而乾上爻。已火之首。早入亥水之中。爲育生胚胎之兆。故龍无首吉也。此天地陰陽化育之義。推之於人亦然。飲入於胃。由胃小腸相接處幽門。幽門之上有一竅。水飲從此竅散布下焦脂膜之中。由脂膜而滲入膀胱。膀胱無上口。故曰滲入也。氣血之升降。必由呼吸以循環。吸入天之陽。呼出地之陰。吸入之氣。由鼻入肺歷心。引心火從總脈管循督脈入腎。又從腎系以達下焦胞室挾膀胱。其吸入天陽之氣。合人身心火。蒸動膀胱之水。化而爲氣。循衝任而上。化精化汗化液。過膈入肺。還至於口。由呼而出。斯卽乾坤相交。三索之義也。明乎此。水火之徵兆。陰陽之盛衰。及夫四時伏氣之病機。莫不由茲悟入。否則如盲人之摸象耳。

索問生氣通天論曰。凡陰陽之要。陽密乃固。兩者不和。若春無秋。若冬無夏。因而和之。是爲聖度。故陽強不能密。陰氣乃絕。陰平陽秘。精神乃治。陰陽離決。精氣乃絕。夫論名生氣通天者。言人身陰陽五行之氣。上通於天。天之陰陽五行之氣。下通於人。天人一氣相感也。然天之五行。生化六氣。人苟陽固於外。陰秘於內。則邪弗能傷。反之則陰陽離決。精氣乃絕。其天之五行之氣。化爲淫邪以傷人。若因於露風。乃生寒熱。此感之卽病。其病尤淺。故又曰。是以春傷於風。邪氣留連。乃爲洞洩。夏傷於暑。秋爲痃瘕。秋傷於濕。上逆而咳。發爲痿厥。冬傷於寒。春必病溫。此又言感之不卽病者。乃藏於經脈臟腑之間。而爲伏氣之病也。春傷於風者。陽邪也。留連日久。乃下爲洞洩之陰病。秋傷於濕之陰邪。乃爲上逆而咳之陽病。甚則必成痿厥。夏傷於暑熱之陽邪。至秋發爲痃瘕之陰病。冬傷於寒之陰邪。至春必爲溫熱之陽病。是陰陽上下之相乘也。然伏氣之因。不僅乎此。經文簡奧。特示人以

四時之機。互根之理。再推而論之。天之六氣傷人。由人之陰陽不固。而冬寒夏暑。所伏之因各異。又於金匱真言論中續之曰。夫精者身之本也。故藏於精者。春不病溫。夏暑汗不出者。秋成風瘧。言人身之氣血。皆生於精。冬宜閉藏。則陰氣固密。若縱慾精耗。則陰虛。陰虛則陽邪易犯。故多病溫。夏宜疎泄。逆之而汗不出。汗不出則暑邪內伏。遇秋風淒切。寒熱相戰。則爲瘧病。陰陽啓閉。時氣宜然。舉冬夏言。其春秋伏氣。自可類推。觀此則夏日之病暑。其非冬寒所變者明矣。軒岐釋伏氣之義已明。猶恐後之讀者不能隅反。更於陰陽應象大論補之曰。天有四時五行。以生長收藏。以生寒暑燥濕風。人有五臟。化五氣。以生喜怒悲憂恐。故喜怒傷氣。寒暑傷形。暴怒傷陰。暴喜傷陽。厥氣上行。滿脈去形。喜怒不節。寒暑過度。生乃不固。故重陰必陽。重陽必陰。故曰冬傷於寒。春必病溫。春傷於風。夏生飧泄。夏傷於暑。秋必痃瘕。秋傷於濕。冬生咳嗽。此承生氣通天論言四時五行之氣。以生長化



收藏。而生寒暑燥濕風爲外邪。人之五臟化五氣。而生喜怒哀悲憂恐爲內賊。苟七情不慎。則六淫傷之。舉一喜怒不節。寒暑過度。內而及外。則疾疢生焉。其悲憂恐燥濕風。已包括於中。又不必泥執冬精不藏。夏汗不出也。然而伏氣之爲病。固有陰陽互根。上下相乘之變。而尤重於重陰必陽。重陽必陰之兩句。足徵坤臨十月亥。至冬至陰極則陽生。乾臨四月巳。至夏至陽極則陰生。天人相通。伏氣者。隨天時人事陰陽氣化以感召。故曰人與天地參也。何以後之論伏氣者。謂伏寒變熱。夏至前爲溫病。夏至後爲熱病。或謂傷其寒水蟄藏令氣。相火熾盛。宜作內傷水虧治。或謂陽熱之邪。由口鼻吸受。宜從三焦外感治。似是而非。離經悖道。坐不明陰陽合一之理故也。熱論曰。凡病傷寒而成溫者。先夏至日者爲病溫。後夏至日者爲病暑。暑當與汗出勿止。此節經義不明久矣。詮釋家多以冬傷於寒。伏寒化熱。發於夏至前爲溫病。發於夏至後爲暑病。暑卽熱也。溫爲熱之漸。熱爲溫之甚。

解。殊不知傷寒爲外感通稱。故上經有熱病類傷寒之文。越人作傷寒有五之辨。此言凡病傷寒而成溫者。謂溫病熱病之類乎傷寒者。非謂先病傷寒。輾轉不愈。而成溫成熱也。且此一節也。亦專論伏氣而言者。當作兩截看。凡病傷寒而成溫者。先夏至日爲病溫爲一截。蓋言凡病類乎傷寒之溫病。在夏至日前發者。乃冬至後一陽生。人身所伏之陽熱。被冬日嚴寒殺厲之氣所折伏。藏於肌骨之間。至春夏間。或爲風熱逗引。或爲情慾所傷。感而觸發。謂之病溫。後夏至日者爲病暑。暑當與汗出勿止爲一截。此卽夏暑汗不出者。秋成風瘧之互詞。夏至陰生。人身所伏者陰氣。遇天日之陽熱。蒸地氣以上騰。人在氣交中。感之爲暑病。熱濕相搏。熱蒸濕爲汗。熱清則汗止。故曰當與汗出勿止也。夫溫暑之治。其清熱雖同。而一宜兼益陰。一宜兼滲濕。陰陽之機有間。安可概論謂暑爲熱病。熱乃溫之甚者。謬說也。

傷寒平脈篇。師曰。伏氣之病。以意候之。今月之內。欲有伏氣。假令舊有伏氣。當須脈之。若脈微弱者。當喉中痛似傷。非喉痺也。病人云實咽中痛。雖爾今復欲下利。此仲景釋內經伏氣之旨。舉一春之風氣以例其餘。言春傷於風。其氣內伏。至夏將發。其脈必微弱。緣風木之邪。賊於中土也。傷於風者。上先受之。故當喉痛。然喉痛有時行之喉痺。更釋之曰。不特喉痛。而且咽痛。蓋以風氣通於肝。地氣通於咽。脾主地。風木之邪。尅土也。若風邪留連不愈。上行極則下。必爲下利。乃上下之相乘。一氣之相感。卽重陽必陰之義也。讀傷寒者。不明經旨。誤會仲景之意。見有脈微弱。喉痛下利。便作春溫伏氣。少陰水虧解。故喻西昌竟用溫經通陽諸法。以治溫熱。幾同操刃。近世吳鞠通。王孟英諸君。宗吳門葉氏說。輯溫病條辨。溫熱經緯等書。無不以此節冠諸首。僉謂伏氣溫病。當從少陰水虧論治。雖詆喻氏溫補之非。亦不能出其範圍。其所以誤會之故。蓋緣脈微細喉痛下利。乃少陰應有之脈。



證。不知少陰之脈乃微細。此云微弱。但弱與細有間。而微則加於弱細之上。非專論微脈也。弱乃真陽不足。胃氣大虛之候。固非少陰之細脈。亦斷無實熱之理。因其土虛。故木邪侮其不勝而尅之。夫春溫一證。本屬水虧火熾。加以冬至陽生。井泉溫。有習坎之義。乃天人之陽熱。爲嚴寒所遏而成。喻氏之溫經通陽。固屬大謬。若趙養葵、程郊倩輩。先不啓發。惟從事於滋陰壯水。亦非所宜。惟葉香巖用肘後葱豉湯。庶乎近之。然亦不可泥也。且伏氣之因。不僅乎春溫一證。四時伏氣之治。當於內經中求之。活法運乎一心。又未可囿於一偏之見也。醫豈易言哉。

解二

前熱論言先夏至日者爲病溫。後夏至日者爲病暑。此指陰陽潛伏爲病。然而亦有冬至後之陽熱。被嚴寒所折。深藏於骨髓之間。不能隨春陽之氣而升散。又未

遇六淫七情之邪以逗引。至夏因有所用力而觸發者有之。又不可執夏至陰生。無冬日伏熱之氣也。若謂凡夏日之暑證。皆冬時之伏熱。誤之甚矣。

素問瘧論。帝曰。夫病溫瘧與寒瘧而皆安舍。舍於何藏。岐伯曰。溫瘧者。得之冬。中於風。寒氣藏於骨髓之中。至春則陽氣大發。邪氣不能自出。因遇大暑。腦髓爍。肌肉消。腠理發泄。或有所用力。邪氣與汗皆出。此病藏於腎。其氣從內出之於外也。如是者。陰虛而陽盛。陽盛則熱矣。衰則氣復反入。入則陽虛。陽虛則寒矣。故先熱而後寒。名曰溫瘧。此言冬日之陽熱。爲寒所折。深伏於骨髓之間。腎主骨。故曰其氣藏於腎也。若在肌肉經脈間。即可隨春陽之氣而外泄。緣氣行經脈。邪熱伏於骨髓。兩不相值。不能引之而出也。至夏因遇大暑。暑熱上炎。則腦髓爍。腦乃腎氣之所主。或再有所勞力。則深伏骨髓之邪。因腦熱汗出。逗引而發爲溫瘧。其病則先熱而後寒。然先熱後寒之溫瘧。不因於腎藏之伏氣。亦有斯證。不可誤會也。上

經却先明此義。故帝曰。先熱而後寒者何也。岐伯曰。此先傷於風。而後傷於寒。故先熱而後寒也。亦以時作。名曰溫瘧。此陰陽兩感。是以寒熱交作。雖有先後之相同。然與邪熱伏藏骨髓之溫瘧有間。不可不知。

瘧論。帝曰。瘧瘧何如。岐伯曰。瘧瘧者。肺素有熱。氣盛於身。厥逆上衝。中氣實而不外泄。因有所用力。腠理開。風寒舍於皮膚之內。分肉之間而發。發則陽氣盛。陽氣盛而不衰。則病矣。其氣不及於陰。故但熱不寒。氣內藏於心。而外舍於分肉之間。令人消燂脫肉。故命曰瘧瘧。帝曰。善。此又論不必泥冬日之陽熱。伏藏於腎。而始爲病。卽其人氣分中素有伏熱。肺主氣。故曰肺素有熱也。因中氣實而不外泄。有所勞力汗出。風寒襲入肌腠之間。觸引而發者。名曰瘧瘧。因氣實。故邪不能入於陰。而單發於陽。心主血脈之氣。血脈之氣內通於心。故曰氣內藏於心也。邪藏於血脈之裏。外舍於分肉之間。陽氣盛而無陰氣以和之。是以陽熱不衰。而令人消



爍脫肉也。瘧者單也。單熱不寒。故曰瘧。此與邪藏於骨髓之中。而病於腎之伏氣。似同而異。蓋腎爲陰藏。故邪復反入之陰。則先熱後寒。心爲陽藏。故氣不及於陰。而單發於陽。則但熱不寒。雖然。論伏氣則一也。

金匱瘧病脈證論。師曰。陰氣孤絕。陽氣獨發。則熱而少氣煩冤。手足熱而欲嘔。名曰瘧。若但熱不寒者。邪氣內藏於心。外舍分肉之間。令人消爍肌肉。溫瘧者。其脈如平。身無寒但熱。骨節疼痛時嘔。白虎加桂枝湯主之。此仲景引申軒岐之義。於瘧溫瘧中。出一白虎加桂枝湯。示人以活法也。經言溫瘧先熱後寒。瘧瘧但熱不寒。然亦不可拘泥。如身無寒但熱者。爲暑熱之邪引動伏氣也。何以言之。在其脈如平知之。邪伏於內。鬱而未發。則脈如平人。及熱甚時。脈必大數。此非伏氣而何。若內外熱熾。消爍肌肉。自是白虎湯佐入甘寒益陰之品。何以又加桂枝。蓋暑多兼溼。骨節疼痛。則熱中挾有風寒溼可證。不加桂枝通陽取汗。則病何以瘳。

若謂暑熱證中。定必挾此三氣。則非仲景示人活法之意。夫治病固不容出諸規矩以外。又不得囿於方圓之中。是深得軒岐仲景之心者矣。

素問瘧論。帝曰。瘧先寒而後熱者何也。岐伯曰。夏傷於大暑。其汗大出。腠理開發。因遇夏氣淒滄之水寒。藏於腠理皮膚之中。秋傷於風。則病成矣。夫寒者陰氣也。風者陽氣也。先傷於寒而後傷於風。故先寒而後熱也。病以時作。名曰寒瘧。此言夏時暑熱溽蒸。腠理開發。或貪涼露坐。或溼汗當風。感淒滄之氣。伏藏於肌理之中。至秋復感於風而成病。故先受之寒。從陰而病寒。後受之風。從陽而病熱。是先有夏日水寒之伏氣。又傷於秋風之陽邪。乃陰陽兩感而爲病。經言寒瘧。卽正瘧也。謂非伏氣可乎。若王孟英謂冬日感寒卽病者。爲正傷寒。乃寒邪由表而受。其所感之風寒較輕。而入於少陽之經者。不爲傷寒。則爲正瘧。此謬論也。

人身素有伏熱。前於瘧瘧論中。已露一斑。夫五志之熱。五藏各有偏勝。不獨一肺藏爲然。且肺藏伏熱。亦非僅瘧瘧而已。今推釋經義。以闡明之。

素問刺熱論曰。肝熱病者。小便先黃。腹痛多臥身熱。熱爭則狂言及驚。脇滿痛。手足躁。不得安臥。庚辛甚。甲乙大汗氣逆。則庚辛死。刺足厥陰少陽。其逆則頭痛員員。脈引衝頭也。此言內因之伏熱傷五藏之神志也。何以知其內因之熱。觀其未病而小便先黃。蓋肝主疏泄。內熱動而先見是證也。熱爭則狂言及驚者。外淫之邪內干於藏。與內熱交爭而爲重病也。肝脈環陰器抵少腹而上。故腹痛。肝藏魂。魂不安則狂言。手足躁而不得安臥。肝與膽相表裏。肝主驚駭。膽熱亦易驚。故宜刺足厥陰少陽。以泄其熱。肝藏之伏熱發於外。與外邪相應。肝脈與督脈會於顛。氣脈相通。上逆於頭。故頭痛也。庚辛甚甲乙大汗庚辛死者。言干支生尅之略例耳。下倣此。



刺熱論曰。心熱病者。先不樂數日乃熱。熱爭則卒心痛。煩悶善嘔。頭痛面赤無汗。壬癸甚。丙丁大汗。氣逆則壬癸死。刺手少陰太陽。夫心爲君主之宮藏。內熱將動。故先不樂。數日熱始發。內熱外出。外邪內入。內外熱爭。干於神藏。故卒然煩痛也。心火上炎。故欲嘔。少陰之脈上出於頭。故頭痛。心之華在面。故面赤。汗爲心液。心熱則液乾。故無汗也。手少陰與太陽相爲表裏。刺二經以泄其內外之熱。

刺熱論曰。脾熱病者。先頭重煩痛。煩心煩青欲嘔。身熱。熱爭則腰痛不可用俛仰。腹滿泄。兩頰痛。甲乙甚。戊己大汗。氣逆則甲乙死。刺足太陰陽明。此節甲乙太素皆云頭重煩痛。青字衍文也。脾與胃爲表裏。以膜相連。脾病必及於胃。胃脈循頰車上耳前至頭顱。熱氣上逆。故頭重煩痛。脾脈注心中。故心煩。脾胃受邪。則飲食不納。故欲嘔。太陰陽明主肌肉。邪盛故身熱。胃脈合於氣街。在腰之前。機關不能約束。故腰痛不能俛仰。脾胃主腹。故腹滿而泄。胃脈循頤後下廉出大迎。故兩頰

痛。刺足太陰陽明者。泄其熱也。

刺熱論曰。肺熱病者。先淅然厥。起毫毛。惡風寒。舌上黃。身熱。熱爭則喘咳。痛走胸膺背。不得太息。頭痛不堪。汗出而寒。丙丁甚。庚辛大汗。氣逆則丙丁死。刺手太陰陽明。出血如豆大立已。夫肺合皮毛。熱甚於內。則陰氣浮越於外。故惡風寒。肺脈起於中焦。下絡大腸。還循胃口。肺熱入胃。則胃熱上蒸。又陽明主肌肉。故舌上黃。而身熱。內外之熱爭於肺臟。故喘咳不得太息。肺主胸中之氣。氣傷故痛走胸背。肺失清肅之令。氣不下行。三陽之脈壅。則氣逆上衝。故頭痛。衛虛陰浮。故汗出而寒。當刺手太陰陽明。以泄其熱。

刺熱論曰。腎熱病者。先腰痛胕酸。苦渴數飲。身熱。熱爭則項痛而強。胕寒且酸。足下熱。不欲言。其逆則項痛員員澹澹然。戊己甚。壬癸大汗。氣逆則戊己死。刺足少陰太陽。腰爲腎之府。腎主骨。故腰痛胕酸。腎爲水臟。而主津液。津液不能上資。故

渴飲。外邪在太陽。故項痛而強。內熱在腎。熱極反寒。故胛寒且酸。足下熱者。少陰之脈下趨足心也。不欲言者。少陰脈挾舌本也。夫五臟之熱病。皆主身熱者。內因之熱從內而外也。熱爭者。外因之熱交爭於內也。其爭氣之熱上逆。故項爲員員澹澹之微痛。刺足少陰太陽者。以泄其熱也。然五志之熱將發。必有先見於色者。故下經曰。肝熱病者左頰先赤。心熱病者顏先赤。脾熱病者鼻先赤。肺熱病者右頰先赤。腎熱病者頤先赤。病雖未發。見赤色者刺之。名曰治未病。是軒岐示人以治法。詳且盡矣。奈庸工漠然不知何。可慨也夫。

刺熱論曰。太陽之脈。色榮顴骨。骨熱病也。榮未交。曰今且得汗。待時而已。與厥陰脈爭見者。死期不過三日。其熱病內連腎。少陽之脈色也。少陽之脈色榮頰前。熱病也。榮未交。曰今且得汗。待時而已。與少陰脈爭見者。死期不過三日。此承上章言五臟之熱盛於內。六氣之熱熾於外。內外交結。而成兩感重證也。外因之熱在



表。始必見太陽之脈。內因之熱將發。其色必先見於顴頰之分。榮色初見在表者。可汗而解。在裏者。可刺而泄之。此治未病也。若待太陽與厥陰爭見。則表裏之熱交爭於營血之間。雖有良工。不可爲矣。少陽之脈色榮頰前。若與少陰脈爭見者。死。其義亦同。緣太陽爲傳表之始。厥陰爲傳裏之終。少陽爲傳表之終。少陰爲傳裏之始。自終而始。自始而終。六經皆遍。則陽明太陰之爭見。亦包括於中矣。其熱病內連腎兩句。是承上起下之文。靈樞本輸篇曰。少陽屬腎。蓋少陽之氣發原於腎。故熱病內連腎者。少陽之脈色也。夫熱邪傷氣。數大之脈當盛於右部。嘗診溫熱病右部脈緩弱。左關尺數大有力。證見胸脘痞痛。譫語神糊。入夜較劇。雖不必定以死期三日。而病終不起。乃外熱陽邪。內陷陰經。與陰經伏熱互結。亦陰陽交之義也。識此治熱病之兩感。當知所適從矣。司命者可不慎諸。

評熱論。黃帝曰。有病溫者。汗出輒復熱。而脈躁疾。不爲汗衰。狂言不能食。病名爲

何。岐伯曰。病名陰陽交。交者死也。帝曰。願聞其說。岐伯曰。人所以汗出者。皆生於穀。穀生於精。今邪氣交爭於骨肉而得汗者。是邪却而精勝也。精勝則當能食。而不復熱。復熱者邪氣也。汗者精氣也。今汗出而輒復熱者。是邪勝也。不能食者。精無俾也。病而留者。其壽可立而傾也。且夫熱論曰。汗出而脈尚躁盛者死。今脈不與汗相應。此不勝其病也。其死明矣。狂言者。是失志。失志者死。今見三死。不見一生。雖愈必死也。上經是統論內伏熱病而言。此復論冬至後。熱邪爲嚴寒折遏。至春所發之溫病。陰陽交者。陽熱之邪。交陷陰經。逼真陰外泄。而爲汗也。前刺熱論重在脈色。此又重在形證。是脈與證。皆當參論。甚矣軒岐教人以活法也。夫汗出輒熱者。病氣留而陰氣竭也。脈躁急不爲汗衰者。腎氣絕也。狂言不能食者。胃氣絕也。人身之汗津液。皆水穀精汁。由命火蒸騰膀胱之氣所化。今伏熱熾盛。蒸逼膀胱之精汁。不化津液而化汗外泄。脈仍躁急。是邪勝精竭。安有不死之理。更重

之曰狂言不能食者死。以明精生於穀氣所化。食不入精何由生。有出無入。是在必死。而況加以邪熱縱橫。生機有不息者乎。故又引靈樞熱論篇曰。汗出而脈尙躁盛者死。反覆諄諄示人以真諦。然而暑熱之證。熱邪蒸濕。汗出脈平。俄頃身復熱。脈又數盛者有諸。不得謂之死證。故首言有溫病者四字。以揭出溫暑同爲熱病。而治則不同之旨。觀此則前釋熱論。先夏至日爲病溫。後夏至日爲病暑。當分兩截解。非臆說也。

## 解四

五藏伏熱。爲外邪觸發者。諸熱論已盡詳其義。伏氣之熱。有不因外邪逗引而爲病者。不可不知。挾摘經文。以闡其旨。俾後之論伏熱者。不囿於一偏之見也。素問痿論。黃帝曰。五藏使人痿何也。岐伯對曰。肺主身之皮毛。心主身之血脈。肝主身



之筋膜。脾主身之肌肉。腎主身之骨髓。此言人之病痿。由於五藏伏熱。傷其藏氣。藏氣傷則不能吮養於皮毛筋脈骨肉。而成痿躄。先舉其五藏所主。以啓下經之義。

痿論曰。故肺熱葉焦。則皮毛虛弱急薄著。則生痿躄也。帝曰。何以得之。岐伯曰。肺者臟之長也。爲心之蓋也。有所失亡。所求不得。則發肺鳴。鳴則肺熱葉焦。故曰五臟因肺熱葉焦。發爲痿躄。此之謂也。此言五臟之熱而成痿者。由肺熱葉焦之所致也。臟真高於肺。肺朝百脈。而行氣於臟腑。故爲臟之長。若有所亡失。所求不得。則心志靡寧。而火氣炎上。肺乃心之蓋。金受火刑。即發喘鳴。而肺葉焦矣。肺所以行營衛。治陰陽。飲食之精。必自肺家傳布。變化津液。灌輸臟腑。肺臟一傷。五臟無所稟受。則五臟皆熱。故因之以成痿躄也。

痿論曰。心氣熱則下脈厥而上。上則下脈虛。虛則生脈痿。樞折挐。脛縱而不任地。

也。悲哀太甚則胞絡絕。胞絡絕則陽氣動。發則心下崩。數洩血也。故本病曰。大經空虛。發爲肌痺。傳爲脈痿。此言脈痿屬心火上炎。故三陰在下之脈。亦皆厥逆而上。上逆則下虛。而病生焉。悲哀太甚。神志俱傷。而上下之氣不交。是以胞絡絕。而陽氣內動。心熱動。其血故下崩。而洩血矣。夫心主百脈。胞絡乃心外之包衣。代心主以行令。與三焦胞室。同司相火者也。中焦之精液。奉心化赤爲血。流溢於中。從衝脈而上循背裏者。貫於脈中。循腹右上行者。至胸中而散於脈外。充膚熱肉。而生毫毛。是胞絡之血。半行於脈中。半行於肌腠。脈外之血少。則肌痺。脈內之血少。則爲脈痿。總由心臟之伏熱。逼血妄行。致大經空虛。而成斯證也。

痿論曰。肝氣熱則膽泄口苦。筋膜乾。筋膜乾則筋急而攣。發爲筋痿。思想無窮。所願不得。意淫於外。入房太甚。宗筋弛縱。發爲筋痿。及爲白淫。故下經曰。筋痿者生於肝。使內也。此言筋痿因於肝熱也。肝熱則逼膽液滲泄於外。故口苦。肝主筋膜。

熱甚則筋膜乾而攣急也。其肝熱之所由來。則因於思想無窮。意淫於外。故慾火內動。入房太甚。則宗筋縱弛。火盛傷其血液。血虧故筋失濡養。是筋痿雖生於肝。實由意淫於外。入房太甚故也。

痿論曰。脾氣熱則胃乾而渴。肌肉不仁。發爲肉痿。有漸於濕。以水爲事。若有所留。居處相濕。肌肉濡漬。痺而不仁。發爲肉痿。故下經曰。肉痿者得之濕地也。此言肉痿者脾病也。脾與胃以膜相連。而開竅於口。脾有伏熱。則精氣耗傷。故胃乾而渴。脾爲濕土之臟。水濕積蓄。而與熱相搏。致成肉痿也。生氣通天論曰。濕熱不攘。大筋軟短。小筋弛長。軟短爲拘。弛長爲痿。又曰。秋傷於濕。發爲痿厥。陰陽應象論曰。地之濕氣感則害皮肉筋骨。蓋脾既受濕。必流於關節。內熱應之。則爲痿躄。非止於肌肉不仁也。

痿論曰。腎氣熱則腰脊不舉。骨枯而髓減。發爲骨痿。有所遠行勞倦。逢大熱而渴。



渴則陽氣內伐。內伐則熱舍於腎。腎者水臟也。今水不勝火。則骨痿而髓虛。故足不任身。發爲骨痿。故下經曰。骨痿者生於大熱也。此言骨痿屬腎病。腰爲腎之腑。腎脈上股內。貫脊而主骨。腎氣熱故見斯證。其所由來。因於勞倦熱渴。是陽熱之氣內伐。則陰液大傷。夫腎爲水臟。水盛則能制火。今陽盛陰消。水不勝火。以致骨枯髓竭。足不任用於身。而爲骨痿也。

痿論曰。帝曰。何以別之。岐伯曰。肺熱者色白而毛敗。心熱者色赤而絡脈溢。肝熱者色蒼而爪枯。脾熱者色黃而肉蠕動。腎熱者色黑而齒槁。此言痿病之因。或憂思內傷。或勞倦積熱。五臟熱盛。則精液竭。不能榮養於筋脈肌肉而成痿。然有諸內必形諸外。五臟五痿。皆當驗其色也。肺屬金。金色白而主皮毛。故肺熱者。色白而毛敗。心屬火。火色赤而主百脈。故心熱者。色赤而絡脈溢。肝屬木。木色青而主筋。爪者筋之應也。故肝熱者。色蒼而爪枯。脾屬土。土色黃而主肌肉。故脾熱者。色

黃而肉蠕動。腎屬水。水色黑而主骨。齒爲骨之餘。故腎熱者。色黑而齒槁。察外而知內。則識所從治矣。

痿論曰。帝曰。如夫子言可矣。論言治痿者。獨取陽明何也。岐伯曰。陽明者。五臟六腑之海。主潤宗筋。宗筋主束骨而利機關也。衝脈者。經脈之海也。主滲灌谿谷。與陽明合於宗筋。陰陽總宗筋之會。會於氣街。而陽明爲之長。皆屬於帶脈。而絡於督脈。故陽明虛則宗筋縱。帶脈不引。故足痿不用也。帝曰。治之奈何。岐伯曰。各補其榮而通其俞。調其虛實。和其逆順。筋脈骨肉。各以其時受月。則病已矣。帝曰。善。此以痿之因之證。辨明又出以治法也。治痿當取陽明。蓋陽明爲水穀之海。血氣之所由生。五臟奇經。皆賴以潤養。若不知治陽明。則血氣竭。血氣竭則宗筋縱。宗筋縱則帶脈不引。帶脈不引則足痿不用。致成痿躄也。然治痿之法。雖取陽明。而當兼取其五臟之俞。夫補五臟之榮。培其真氣也。通五臟之俞。泄其伏熱也。氣血

虛者補之。邪熱邪盛者瀉之。要在良工消息調和。又不必泥執獨取陽明也。

按痿躄一證。經論綦詳。言外之旨。釋尤未盡。謹一申其義。經言肺熱葉焦者。是足軟而不任地。不痿痛。不紅腫。與痺證異也。獨取陽明者。肺氣熱則通陽明。陽明主宗筋。束骨而利機關。陽明爲熱所灼。而筋脈弛長。痿病之作。乃陽明之熱。實肺熱累及之也。下部屬肝腎根。由陰虧髓空。火逆於肺。肺葉焦枯。金不生水。水益虧。火益熾。筋爲熱灼。未有不痿躄者也。故痿手者少。痿足者多。然肺熱葉焦。亦是肺葉之脈絡焦枯。不是肺臟焦枯。若是肺藏葉焦。火灼之甚。安有足痿在下。而肺金傷不咳嗽者乎。果否。肺臟焦枯。必有咳嗽不已。毛髮敗落之徵兆。況痿有十年不死者。其爲肺絡焦而非肺臟焦明矣。但不腫不痛。非外因之風寒濕。實內臟之伏熱。益多不足可證。雖然氣血不足。亦有所感而致者。當明辨之。氣虛痿者。因於饑餓勞倦。脾胃氣虛。百骸谿谷。皆失所養。以致宗筋弛縱。凡人病後手足痿者。皆屬氣



虛。所謂脾病不能爲胃行其津液。四肢不得稟水穀氣。故不用者是也。血虛痿者。凡產後及諸失血後。面色萎黃。手足無力。不能行動者是也。陰虛痿者。由於酒色過度。下焦陰火燔灼筋骨。以致腿膝痿軟。行步艱難。脈來澀弱。或左大無力者是也。血瘀痿者。或產後惡露流於腰膝。或跌撲損傷。積血不消。四肢因而不運。脈澀而芤者是也。濕痿挾痰者。因於肥盛之人。血氣不能運動其痰。以致濕痰內停。客於經脈。腰膝麻痺。四肢不舉者是也。食積痿者。因於飲食太過。妨礙道路。以致升降失常。脾氣不得運於四肢。手足痿弱。或腹膨脹痛。惡心噯氣。右脈沉滑者是也。設不細審致痿之因。未有不僨事者矣。

解五

前解五藏之伏熱。不關外邪觸發者。摘一痿證。以明其義。惟經文簡奧。雖已申敘

其榮俞虛實之治。恐誤會者。謂痿屬伏熱一因。故又於釋經後。詳言致痿之由。不獨伏熱已也。然而伏氣之爲病。六淫皆有。豈僅一端。今略舉數節。以闡經旨。惟不足盡伏氣之原。而一隅三反。於醫家病家。或不無小補云。

素問氣厥論曰。心移寒於肺爲肺消。肺消者飲一溲二。死不治。金匱云。男子消渴。小便反多。以飲一斗。小便亦一斗。腎氣丸主之。氣厥論所云心有伏寒。金匱所云乃腎藏虛寒。皆伏氣爲病。不僅乎熱也。消渴一證。河間獨主燥熱。是不明軒岐仲景之旨。亦智者一失耳。請試明之。夫飲入於胃。從小腸散布下焦脂膜。而滲入膀胱。吸入天之陽。引心火從督脈達下焦。以蒸膀胱之水。上騰化而爲氣。此氣由任脈上升入肺而呼出之。循環無間。氣卽是水。凡諸津液汗。皆氣所化。肺爲五藏華。蓋得陽氣上蒸則潤。若無陽氣上蒸。則肺乾而渴。易否卦乾上坤下。陽無陰不降。陰無陽不升。上下不交而成否。卽此義也。軒岐所論心移寒於肺之消渴。言寒伏

於心。心火衰熄。不能引吸入之天陽下交。蒸水氣上騰。肺乾無陽氣蒸潤。則渴而就飲。飲一溲二。乃下焦精液輪泄無餘。故斷之曰死不治。陰陽別論云。心之肺謂之死陰者是也。仲景所論腎氣丸主之之消渴。乃腎有伏寒。致令命火微弱。不能蒸水氣上升。飲一斗小便亦一斗。未若飲一溲二。心陽衰滅之甚。而生化之源未絕。故可治。若夫傷寒論太陽篇。用五苓散五節。皆治渴。乃溼伏於脾。脾津不得上布。故君以白朮。以燥脾溼。臣以桂心。以助命火。而佐使以茯苓。澤瀉。滲利。令溼邪有出路。較腎氣丸虛實各異。而其義則一也。

氣厥論曰。心移熱於肺。傳爲膈消。此言心藏受熱。轉移於肺。肺屬金。其化本燥。心復以熱移之。則燥愈甚。而傳爲膈消。膈消者。膈上焦煩。飲水多而善消也。與心移寒於肺之肺消各異。一因火鬱於上。一因火衰於下。蓋陰陽寒熱不同。然寒熱辨之之法。寒則溺多而清。熱則溺少而赤。而更以脾溼之旺否爲進退也。然此寒此



熱。非心藏之伏氣而何。氣厥論言五藏伏氣。寒熱移易甚夥。舉此心藏。以明其厓略耳。

靈樞賊風篇。黃帝曰。夫子言賊風邪氣之傷人也。令人病焉。今有其不離屏蔽。不出室穴之中。卒然病者。非不離賊風邪氣。其故何也。岐伯曰。此皆嘗有所傷於溼氣。藏於血脈之中。分肉之間。久留而不去。若有所墮墜。惡血在內而不去。卒然喜怒不節。飲食不適。寒溫不時。腠理閉而不通。其開而遇風寒。則血氣凝結。與故邪相襲。則爲寒痺。此言伏氣之溼。藏於血脈分肉之間。若或有所墮墜。惡血留而不去。或卒然喜怒不節。則氣逆血菀。或飲食不適其宜。則內有所傷。或寒溫不時。致腠理閉而衛氣不通。若再感受風寒。新邪與故邪相襲。致氣血凝結而爲寒痺。雖不遇賊風。亦成斯證。蓋伏氣之爲病也。

素問風論曰。久風入中。則爲腸風飧泄。此卽春傷於風。夏生飧泄之義。推而言之。

也。風中於內。久而不散。入於腸胃之中。寒則水穀不化。而爲飧泄瀉利。熱則爲腸風下血。舉一風邪伏氣。有寒熱之不同。變證之各異。則六淫之伏氣。從可類推矣。評熱論。帝曰。勞風爲病何如。岐伯曰。勞風法在肺下。其爲病也。使人強上冥視。唾出若涕。惡風而振寒。此爲勞風之病。帝曰。治之奈何。岐伯曰。以救僂仰巨陽。引精者三日。中年者五日。不精者七日。咳出青黃涕。其狀如膿。大如彈丸。從口中若鼻中出。不出則傷肺。傷肺則死也。此言少陰不藏之人。風邪易感也。腎脈從腎上貫肝膈入肺。因精虧於內。則陽虛於外。陽虛於外。則風邪由皮毛襲受。抑遏三焦之相火。不得上升。金水同源。肺主皮毛。故曰勞風法在肺下也。其風寒由皮毛而入於肺。故惡風而振寒。三焦之相火被遏鬱而不升。則蒸灼精液爲涕。甚則爲喘爲逆。不能僂仰。瞑目而視。故曰使人強上冥視也。手太陰主表。足太陽亦主表。腎病在肺。由表入也。腎與膀胱相表裏。風寒抑遏。伏熱煎熬。腎水不能自行升散。必得

太陽之氣引之上升。其風熱。釀精液爲青黃涕。如膿而出。少壯者三日。中年者五日。老年之人。精衰氣虛。必待七日。始能出。若不出則傷肺。故曰傷肺則死也。此證初起。多見鼻塞聲重。惡風乾咳。或微惡寒。或身熱無汗。或喉痛頭昏。斯時以葱、豉、蠶、蟬、葶、薄等。辛涼輕劑。祛表邪而啓發腎臟伏熱。以助太陽之氣。引精外達。化爲稠涕濃痰。由嗽而出。數日卽愈。奈近世庸工。謂之傷風小恙。旣云小恙。而初劑却以大劑辛溫發表。風藥多燥。致金水兩傷。竟成不治者有之。見咳甚動血。不先達邪。肆用清涼。而致成不治者有之。因咳久身熱。用滋陰斂肺。令風熱之邪。不得外出。釀爲勞瘵而死。諺云傷風不愈變成勞。其實醫者有以成之也。

奇病論。帝曰。人有身體髀股脰皆腫。環齊而痛。是爲何病。岐伯曰。病名曰伏梁。此風根也。其氣溢於大腸。而着於盲。盲之原在齊下。故環齊而痛也。不可動之。動之爲水溺澀之病也。此言風邪伏氣積於內而爲病也。名之曰風根伏梁者。其風邪



之氣溢於大腸之外。空廓之間。留着於育。育之原出於腠腠。腠腠正在臍下。故環臍而痛也。外則身體腫。內則環臍痛。不可妄攻以動之。蓋風邪之根。留於臍下。動之則風氣淫佚。而鼓動其水。水溢於上。則小便爲之不利。風木尅土。土氣益弱。則身腫更不能消矣。

奇病論。帝曰。人有病頭痛。以數歲不已。此安得之。名爲何病。岐伯曰。當有所犯大寒。內至骨髓。髓者以腦爲主。腦逆故令頭痛。齒亦痛。病名曰厥逆。此言寒邪伏於骨髓而爲病也。人先生於腦。由腦氣筋散布周身而生臟腑百骸。腦髓卽由腎氣從督脈上滋。經言腦爲髓者是也。寒伏骨髓。上犯於腦。故頭痛。腎主骨。齒爲骨之餘。故齒亦痛也。觀此寒伏骨髓。至數歲之久。其不能變熱明矣。若夫春日之溫病。乃少陰水虧。相火熾盛。加以冬至陽生。內伏之陽熱。被嚴寒折遏。至春因感觸發。謂是伏寒變熱者。譌語也。

## 解六

論伏氣之邪。於寒熱風溼。已釋其大意。惟暑燥二氣。尤未能曉暢厥旨。婺源江氏言。人爲三才之一。本與天地相肖。督脈統一身之陽。任脈統一身之陰。此卽人身之乾坤也。其六子配十二經藏府。肺大腸屬兌金。脾胃屬艮土。心小腸屬離火。膀胱腎屬坎水。心包絡三焦屬震。肝膽屬巽。肝膽風木屬巽是矣。何以震爲陽木。而屬包絡三焦之相火。蓋火無體。以木爲體。說卦傳謂震爲雷爲龍。雷之火。豈不象人身之相火乎。此乾坤六子配人身之定體也。夫督任二脈者。人身之天地定位。肺金脾土。大腸金胃土者。人身之山澤通氣。心火腎水。小腸火膀胱水者。人身之水火不相射。心包絡三焦之相火。肝膽之陰木。卽人身之雷風相薄。人身與造化相符如此。而兌之燥。離之暑。震之火。陽儀之卦。其脈行於手。巽之風。坎之寒。艮之

土。陰儀之卦。其脈行於足。自然之理也。觀此。則暑燥二氣。卦屬陽儀。然陽中有陰。陰中有陽。亦陰陽互根之理。無足怪者。奈何王孟英謂暑爲陽邪。而不兼陰。沈目南謂燥爲陰邪。而不兼陽。皆屬一偏之說。貽誤來茲。不得不引軒岐仲景之旨。一詳其義。以破世惑。

素問五運行大論曰。燥以乾之。暑以蒸之。風以動之。濕以潤之。寒以堅之。火以溫之。故風寒在下。燥熱在上。溼氣在中。火遊行其間。寒暑六入。故令虛而生化也。詳暑以蒸之之義。則暑爲天日之陽熱。蒸地氣以上騰。人在氣交中。感而爲病。是暑乃熱熾之邪。而中多兼溼明矣。

金匱喝論曰。太陽中喝。發熱惡寒。身重而疼痛。其脈弦細芤遲。小便已洒洒然毛聳。手足逆冷。小有勞。身卽熱。口開前板齒燥。若發其汗。則惡寒甚。加溫針則發熱甚。數下之則淋甚。太陽中熱者喝是也。汗出惡寒。身熱而渴。白虎加人參湯主



之。太陽中暍。身熱疼重。而脈微弱。此以夏月傷冷水。水行皮中。所致也。一物瓜蒂湯主之。詳仲景此論。首節言暑證之大意。肺主氣。熱邪傷氣。則表虛。故發熱惡寒。暑多挾溼。故身重而疼痛。然熱傷氣。脈應浮大而虛。其見弦細芤遲者。中涵濡象。兼濕故也。小便已洒洒然毛聳。手足逆冷者。太陽經氣爲熱邪所傷也。小有勞身卽熱者。表陽虛而易感也。陽虛若發汗則惡寒。加溫針則助熱。數下之則淋甚。緣暑熱蒸汗。乃膀胱水液所化。若再屢下。則內虛而膀胱燥。小溲澀滯也。此爲暑熱之總綱。故不出方。次節則言熱重於溼者。主以白虎加人參湯。三節言溼重於熱者。主以一物瓜蒂湯。三法鼎峙。何等周密。潔古恐庸工不明。夏至陰生。人身所伏者陰氣。且暑爲天日之陽熱。蒸地氣以上騰。中多挾溼。故立奔走長途。役力田間。猝中天日之陽熱者。爲陽暑。納涼廣廈。飲啖冰菓。感陰寒風露之氣者。爲陰暑。陽暑陰暑。語雖不經。其用心亦良苦矣。而王孟英大斥其非。直謂暑乃陽邪。不兼

溼化。並言暑卽日之氣。日爲衆陽之宗。陽燧承之。火立至。以五行論。言暑則火在其中。非五氣外另有一氣。若風寒燥溼。悉能化火云云。斯言也。似近理而彌亂真。無怪乎吠聲吠影之徒。奉爲圭臬。不知在天爲暑。在卦爲離。在藏爲心。在六氣屬之君火。離卦內陰爻。坎之水也。外陽爻。離本卦之火也。惟其以水濟火。乃發光明而成離象。是以灌膏則燎盛。抽薪則燄息。膏有汁液。火得之而後燃。此以水濟火之明驗。大易所謂明兩作之義也。甚矣陰陽互根之理不明。不可談醫。而況逞才穿鑿哉。能不殺人幾希矣。

素問至真要大論曰。陽明司天。燥淫所勝。則木乃晚榮。草乃晚生。筋骨內變。民病左肱脇痛。寒清於中。感而成瘧。大涼革候。欬。腹中鳴。注泄。鶩溏。名木斂。生苑於下。草焦上首。心脇暴痛。不可反側。噤乾面塵腰痛。丈夫癰疽。婦人少腹痛。目昧皆傷。瘡痍癰。蟄蟲來見。病本於肝。太衝絕。死不治。此言陽明司天。燥金淫勝。則木受其

制。左肋脇痛。心脇暴痛。不可反側。噤乾面塵癩疔皆瘍。皆肝木受尅爲病。故曰太衝絕。死不治也。感寒成瘧。腹中鳴注泄驚澹。皆秋深變炎暑爲清涼。寒清於中而爲病也。

至真要論又曰。燥淫所勝。平以苦溫。佐以酸辛。以苦下之。此言苦而微溫。能勝清。辛則能潤燥。燥若內結。故當以酸苦泄之。經義以陽明金氣之燥而言。是言燥之常氣。而未及燥之變氣。且亦祇道燥之標。而未言燥之本也。若果燥是陰邪。何以屬陽儀之卦。五運行論。謂燥以乾之。則燥乃火燥乾澀之象可證。故汪雙池曰。燥之爲氣也。枯槁而非熱。蕭瑟而非寒。竟有難以楮墨形容之態。致沈目南言燥是寒邪。喻嘉言謂燥乃熱證。皆有至理。然均屬偏見。不能融貫燥氣之所以然也。夫太極判而有天地。有天地而有陰陽。有陰陽而有水火。故伏羲以乾坤爲體。而文王以坎離爲用也。坎爲水而中含乾之陽。離爲火中含坤之陰。是水火之陰陽。又



當以濕燥爲之用。故大易曰。水流濕。火就燥。此固同氣相求。自然之理也。夫一歲之中。偏旱偏水。苗物必傷而年歉。未見多寒多暑而損歲也。人感淫邪之氣。伏而成病亦然。十二辟卦。以候一年消息。其陰陽之機。卽在冬至夏至始。亦卽濕燥二氣之本也。冬至陽生。地雷復。一陽生於地中。則地中之濕氣已動。交春漸出於土。故地易潮濕。萬物含汁而萌芽。交夏濕蒸之氣更甚。萬物繁隆。濕盛水生。故多雨水。化剛爲柔。水不生於冬。而長於夏者。物生微時。否極泰來。剝極思復之義也。夏至陰生。天風姤。一陰生於天。陰從天降。燥氣已動。至秋漸降至地。故萬物漸乾。枝枯葉落。交於乾燥之氣更劇。地斥水冰。濕化乾象。雨化雪。露化霜。柔化爲剛。燥甚於冬。亦猶濕旺於夏也。然濕爲陰邪。應乎陽。燥爲陽邪。應乎陰。此卽陰陽互根之理也。人自不察耳。夫天地之間。陰陽之機用。如橐籥之開闔。時時不息。故能變化萬物。其機一停則病。一偏亦病。若機息則死矣。六氣中寒濕偏於闔。燥火偏於開。

風與暑有開有闔。風兼於寒濕則闔。兼於燥火則開。暑氣宜分別熱多濕多。偏於熱者多開。偏於濕者多闔。治病之機。但能體認六氣開闔之偏重。則思過半矣。若夫治燥之法。寒燥宜溫潤。熱燥宜涼潤。知燥爲乾澀之病。以潤字爲主腦。則常變標本。一以貫之。庶不爲偏見所誤。

## 解七

六氣伏邪。已釋其義。仍有寒熱錯雜之毒。伏藏絡脈間。一發燎原。殺人最速。仲景所謂陰毒陽毒。卽近世林藥樵郭右陶所謂沙脹是也。欲釋此證之伏氣。須明營衛循行之理。欲明營衛循行之理。非以經義證之。西書不可。蓋臟腑之學。西士言之最詳。其氣化之理。昧焉。是知其位之定。不明其氣之通也。故互相參證。

靈樞五味篇曰。穀始入於胃。其精微者。先出胃之兩焦。以溉五臟。別出兩行營衛

之道。其大氣搏而不行者。積於胸中。命曰氣海。

邪客篇曰。五穀入於胃也。其糟粕津液宗氣。分爲三隧。故宗氣積於胸中。出於喉嚨。以貫心脈。而行呼吸焉。營氣者。泌其津液。注之於脈。化而爲血。以營四末。內注五臟六腑。以應刻數焉。

營氣篇曰。營氣之道。內穀爲寶。穀入於胃。乃傳之肺。流溢於中。布散於外。精專者行於經隧。常營無已。終而復始。是謂天地之紀。

營衛生會篇曰。人受氣於穀。穀入於胃。以傳於肺。五臟六腑。皆以受氣。其清者爲營。濁者爲衛。營在脈中。衛在脈外。

經言營氣。取營運於中之義。西醫言食入於胃。至小腸。皆有微絲管。吸其精液。上至頸會管。過肺入心左房。化赤爲血。此卽清者爲營也。其血從左房入總脈管。由脊之膂筋循行經脈之間。一日夜五十周。盡八百十丈之脈道。以應呼吸。漏下者



之營氣也。經言衛氣取衛護於外之義。西醫言經脈中之血氣。由脈管之尾出諸氣街。入微絲血管。（經謂孫絡者是也。）與陽明之悍氣（人之飲食。五味雜投。奚能無毒。西醫謂之炭氣者此也。）相合。散布通體皮腠之間。充膚熱肉。淡滲毫毛。此卽濁者歸衛也。脈管之赤血。既入微絲血管。合陽明悍氣。則其色漸變漸紫。（西醫因其有毒。謂之炭氣。）散布遍體。漸併漸粗。而接入迴血管（經謂脈絡者是也。）之尾。血入迴血管內而臟腑外而經脈。並脈管交相逆順而行。外行經脈者。有陰陽之別。一支浮於肌腠之上。一支沉於分肉之間。卽陽絡行於皮表。陰絡行於皮裏。而皆與脈管偕行。經言營在脈中。衛在脈外者是也。迴血管內外行遍。入總迴管。至心右房。遞入於肺。呼出悍氣。吸入生氣。其血復化爲赤。入心左房。經言陰陽相貫。如環無端者。此之謂也。然氣中有血。血中有氣。氣與血不可須臾之相離。乃陰陽互根。自然之理也。至若外邪襲入。熱傷氣。寒傷血。當責諸孫絡。纏

布周身之營衛。伏氣之邪內發。當責諸脈絡中之營衛。沙脹爲寒暑錯雜伏邪。當先取浮於脈外之陽絡。急刺之以泄其毒。再察其陰陽之偏盛。以藥急攻之。以殺陰絡中之伏氣。蓋錯雜之邪。抑遏陽明。悍氣之毒。不得外泄。由絡脈入心。入心則死矣。其氣化之理。首篇已釋明。茲不復贅。

〔清〕

劉吉人

著述

伏邪新書

中國醫學大成





## 伏邪新書提要

清、劉吉人撰。吉人曰。感六淫而卽發病者。輕者謂之傷。重者謂之中。感六淫而不卽病。過時方發者。總謂之伏邪。已發者而治不得法。病情隱伏。亦謂之伏邪。有初感治不得法。正氣內傷。邪氣內陷。暫時假愈。後仍復作者。亦謂之曰伏邪。有已發治愈而未能除盡病根。遺邪內伏。後又復發。亦謂之曰伏邪。夫伏邪有伏燥、有伏寒、有伏風、有伏溼、有伏暑、有伏熱等。種種精密列論。於六氣伏邪。條分縷晰。皆從實驗中說法。開後學無數治伏邪法門。從來治六氣時感者。能法賅理盡。亦且無多。治六淫伏邪者。更略焉不詳。是則臨證之醫。辨別不易清楚。施治未免有誤。天枉者多矣。如吉人先生之著。洵爲發古人未發之旨。立古人未立之法。不特嘉惠醫林。抑且澤及病黎。是書前刊三三醫書第二集中。今已售罄。不再重印。炳章恐

伏邪新書 提要

年久失傳。爰爲重校。增以圈點。採入本集。



## 序

伏邪爲病。前人未有特筆。暢明言之。凡近世醫生。所謂調理本症是也。以其病持久而徐。變動不速。奏效不易故也。其實內有伏邪爲病者。十居六七。其本臟自生之病。不兼內伏六淫者。十僅三四。前人未嘗分別著書立說。以故伏邪與本臟生病。皆所混雜不分。而總以調理本症目之。以金匱與和劑局方等之古法治之。僅按其外面自現症候名目用方。按圖索驥。有效有不效。總未得究其病根之法。分別用方。在本臟自生之病。或有對症之理。在伏邪爲病之症。不知祛邪外出之法。故鮮能收功。予經歷多年。覺本臟自生病不兼伏邪者。用古法治。可以奏效。若兼伏邪。卽難應手。一遇全因伏邪爲病。而累及本臟自病者。更無全愈之日矣。俗人徒以試藥戲藥目之。以爲病不可治。而予創立伏邪說治法。分別六淫治之一面。

扶正。一面祛邪。不操切圖功。務使內伏之邪氣外解。臟腑之真元復舊而後已。念年以來。獲效甚夥。於心甚安。不敢自秘。爲獨得之奇。願以公諸後世。非予敢獨創爲異說也。以內經有春傷於風。夏爲飧泄等論。吳氏葉氏。已先開伏暑法門。予因隅反。覺六氣皆有內伏爲病者。故條分縷晰。六氣伏邪。分別診治法。以告後學。蓋邪機隱伏。病根深藏。非若新感易於辨識。易於祛除也。

著者識

# 伏邪新書目錄

伏邪病名解	一
伏燥	二
伏寒	七
伏風	一
伏溼	一八
伏暑	二一
伏熱	二五



伏邪新書目錄

# 伏邪新書

清 鎮江 劉吉人 著述

鄞縣 曹炳章 圈校

## 伏邪病名解

感六淫而卽發病者。輕者謂之傷。重者謂之中。感六淫而不卽病。過後方發者。總謂之曰伏邪。已發者而治不得法。病情隱伏。亦謂之曰伏邪。有初感治不得法。正氣內傷。邪氣內陷。暫時假愈。後仍復作者。亦謂之曰伏邪。有已發治愈。而未能除盡病根。遺邪內伏。後又復發。亦謂之曰伏邪。夫伏邪有伏燥。有伏寒。有伏風。有伏溼。有伏暑。有伏熱。

## 伏燥

其面色如常。但中正印堂年壽兩顴等處。間有白氣隱於皮膚之裏。白而不澤。舌苔白腐。（白如銀灰色。亦有黃白相間者。如表心紙色而厚。）甚則僅如錢大一塊。在舌中心而四面如駁去者。或四面有白腐而中心如挖去者。脈象沉取短澹。浮取反覺小滑。（兼勝氣者脈兼緊。左右彈。兼勝復氣者脈兼大數。）胃脘不舒。（中氣故覺痞悶也）此伏燥常見之形症也。

燥金邪氣。伏於陽明。發爲嘔吐翻胃。當胸脘痛。腸結（內有燥屎如羊矢豆。內結而大便反澹泄。或細如金菓條。或滯下。）滯下。（大便不爽。痛而不通之候。）噎膈（俗傳膈食病。皆由燥屎而成。紫虛四言脈訣。有翻胃嘔吐。結腸者亡之論。予以燥結下之。無不生者。）無汗。或但頭汗出。（無汗燥傷津液也。但頭汗出者。頭



屬陽明部也。）加減調胃承氣湯主之。去芒硝。加蘇子、歸身、淡荵蓉、火麻仁。潤以下之之法也。

燥金邪氣。伏於陽明。日久不解。傳入衝任。發爲當臍而痛。（時作時止。時緊時鬆。）疝瘕癥結。脫營血枯。久則成乾血癆症。（乾血癆。本世俗之俗名。然惟此一症。名實相符。）治如上法。加桃仁、蘇木、烏賊骨、杏仁、蘇子、蘇梗以通之。此寓補於通之法。（桃仁、蘇木、烏賊骨。溫通活血而不傷氣。杏仁、蘇子、蘇梗。少用之以爲助。以調氣降氣。生甘草梢亦能通下。）日久虛甚者。參用通補丸、奇經丸、脈結而牢緊者。天台烏藥散加巴霜法。亦可參用。

燥金邪氣。伏於兩厥陰血分。（肝與胞絡皆主血）兼及衝任。男子虛疝血虛之人。日漸瘦弱。嗆咳寒熱似癆。少腹拘急似痛非痛。脇下疝痛。（如帶束腰際狀者。帶脈亦病。）大肉削脫。（津液消亡也）脈芤虛短澹者。當歸羊肉湯主之。（用

歸身一錢。連皮羊肉三斤。白煨另煎加入食羹。獨用亦可。補血潤燥之法也。女子月事正盛。及男子血不虛者。燥氣縛血。結成瘕母。痞塊癥瘕。腹脹痛者。化癥同生丹主之。虛者。人虛症實。通補奇經丸參用。人虛症實。故用通補兼施法。燥金邪氣。伏於手太陰肺絡。發爲肺痿。皮毛枯。津液槁。嗆咳咯血。天府穴痛。胸痛如夾。未化熱者。紫蘇子湯主之。方用杏仁、玉竹、柏子仁、生甘草、蘇子、火麻仁、阿膠。化熱者。脈數大兼芤。潤燥救肺湯主之。即喻氏清燥救肺湯。去桑白皮加葶仁。

燥金邪氣。伏於陽明。傳入足太陰脾絡。少腹兩旁。夾臍而痛。甚不能直身。如伸直則脾之大絡拘急。而痛更甚。大便細若金菓條。亦有羊屎矢豆糞在內者。五仁丸主之。脾約。麻仁丸亦可參用。此條當與前陽明法參用。

燥金勝氣。陽虛不旺者。感之頗似寒症。以其脈緊澹而小。舌白無汗。形類傷寒。

（用散寒藥則化熱。（脈變小數。口渴睛紅等證。）用清涼藥則又似寒。（脈又變小緊。而澹緩細結等陰象。口中生水。此甘寒藥之弊也。）用苦寒藥。（如芩、連、知、柏之屬。萸、貝、山梔等類。）則益燥而血液乾元氣減。用溫補。（如黃耆、潞黨、蒼朮）則中宮壅塞不通。用消導化痰藥。（如陳皮、半夏、厚朴、山楂、神麴、鷄內金等）則劫傷胃陰。（胃汁津液。反壅塞於胃之上脘不降。口生涎沫。燥極反澤矣。）燥結愈堅。（胃汁燥乾。腸中無津液滑潤。則燥屎愈加堅結難下矣。）兼勝氣爲次寒。爲清邪。當溫攻潤下之者。誤用寒下法。必變生厥冷肢逆。汗出如水。陽氣旺者易化爲火。（即燥金復氣也。脈數有力。舌黃。）化熱即從火熱治之。故燥氣化火之症易治。（人人能識。人人能治。但在化而不化。脈象方數。舌色初黃之候。誤用苦寒。則難治矣。）

按燥金之症。與七情抑鬱悲憂思症相似。以其同爲秋氣傷人。治法皆以春和



生發之氣解之。（脈同一濇脈。而有長短浮沉之異。燥傷血故脈沉而短。憂鬱生於七情不適。善傷氣。故脈浮濇而長細。金性沉着堅斂。易生燥屎。憂鬱則無之。故憂鬱用蘇梗、製香附。溫和行氣。舒暢氣機。伏燥用蘇子、杏仁、歸身。有油汁之品。溫潤血液。）而一由六淫燥氣內伏。一由七情抑鬱而生。學者當考其同中之異。分別用藥以施治焉。又按燥極反澤。口生涎沫。與熱邪入營。口反不渴。津唾多。胃熱則廉泉開。症相似。（熱症舌質多紅紫。苔薄白如雪。青杭綢色。燥症舌色不甚紅紫。少有分別。）而熱症可清。燥症不可清也。至於熱症末傳。陰液大傷。脈反小濇。燥症陰傷。脈亦小濇。（熱症小濇。然靜中有動。多扎濇相兼者。燥症以濇爲本脈。其人形症未久。未大傷陰津。卽有濇脈。一爲末傳敗象。一爲初中傳本脈。病之久暫深淺。其候不同。亦易變也。）學者亦當細心分別焉。蓋燥卽乾也。一則是西風吹乾。一則是火氣炕乾。其耗傷津液則同。一乾燥而

治法則大有不同。一宜清潤。甘寒而潤。（火燥治法也）。一則宜溫和。甘平而潤。（燥金治法也）。

## 伏寒

其人面色淡黑而黃。（如浮烟籠罩黃黑。皮裏有青白氣。隱隱現於年壽、山根、額上、兩顴、臥蠶等處。）爪甲色淡不甚紅。（微兼青白）舌苔薄白（如敷米飲。如染豆漿）而潤。舌質淡。（不甚紅）脈沉遲弦細而弱。痛者兼緊。痛甚則如新張弓弦。或兼結食不甚消。（有食入半日而吐出。仍未腐化者。）行動言語皆遲緩。神氣消索。小便清長。此伏寒常見之形證也。

寒邪伏於足陽明經。傷胃之陽氣。胃汁冷發爲胃寒。飲食不消。胸悶脘脹。（胃汁冷。陽氣困。故消化不速。而有是症。）吐水。（津液不消。陽氣不足。脾不消水液也。）

（甚則腰以下。如坐冷水中。（胃陽不足。腎陽亦憊也。）喜熱惡寒。（此寒從胸受。或從足背受者。故無傷寒表症。）治以甘溫。溫中散寒湯主之。（乾薑、砂仁、附片、甘草、蔻仁、苓朮）加灸足三里、胃脘、中脘、畏灸者。以蒜泥代灸法。或散陰膏貼中脘穴。

寒邪伏於手陽明。手太陽經。發爲腸癖、白痢、五更冷瀉。（瀉色白、臭腥淡）少腹痛有定處。綿綿不已。非得熱熨。不能解也。白芷、乾薑湯主之。（白芷、桂枝、破故紙、乾薑、菴蓉、甘草、萊菔子）灸二腸俞。散陰膏貼臍。貼大小腸俞穴。

寒邪伏於足三陰經。（肝脾腎三陰經。由足心臍腹而受。）發爲少腹痛。爲奔豚氣。氣上冲痛。（兼衝任脈病）爲伏梁。（任脈病也）爲寒疝。（厥少陰衝任病）爲足筋拘攣。（陰蹻病也）膝冷脛痠。（腎病也）感寒即發者。溫暖三陰湯主之。（吳萸、木香、乾薑、肉桂、附片、甘草）疝者加荔枝核、橘核、元胡索。足筋拘攣



者。加五加皮、虎骨膠、木瓜。灸三陰交、湧泉穴。散陰膏貼之亦可。畏灸者。以炒鹽填臍中。上加薑片灸之。不傷皮肉。火氣緩緩入腹。灸一火急按之。使火入腹爲補火法。

寒邪伏於手太陰肺。輕則咳喘。甚則哮喘。吐寒飲白沫。（白沫如水不黏。不能引絲。有絲亦易斷。）感寒即發。輕者蘇杏二陳湯主之。重者麻黃湯。兼足三陰症。仲聖小青龍湯。麻黃附子細辛湯。苓桂朮甘湯選用。（兩太陰脈。虛緩而遲弦。按之滑者。兼溼痰水飲症也。故用苓桂朮甘湯。實土以制水也。）灸肺俞穴。或散陰膏貼。（天府肺俞穴。亦可。）

寒邪伏於衝任二脈。女子天癸後期。短縮而少。少腹膀胱際痠痛。子宮虛寒。血凝經閉。則爲癥結血蠱。（女子天癸適至。衝任二脈虛。或食冷。或下部受寒。每多致此。）仲聖桃仁承氣湯主之。生化湯亦可主之。子宮虛寒者。寧坤丸。癥結者。化癥

回生丹。

寒本水氣靜順之化。其氣凝冽。故有冰凝之患。人之血液也。得寒則冰凝。水液反少。不比溼邪。水液反多也。其感寒而水飲停蓄。爲吐水喘哮痰飲之症者。非其人陰液有餘。卽犯滋潤之弊。故經文曰。寒淫於內。治以甘熱。佐以甘辛。良以陰液少者。感寒則易化爲燥也。（甘屬土。以土尅水。用甘者亦勝制之義也。甘辛發散屬陽。以舒陽氣而化爲汗也。）陽氣旺者易化熱。（用甘潤以保護津液。使陽氣舒和。運津液而爲汗。使寒從汗解。由皮毛而出。無化熱之弊也。）內經冬傷於寒。春必病溫。此寒猶伏在皮毛腠理。其人陽氣旺。陽鬱久而化爲溫熱也。（世醫讀王氏經緯。故只知寒化熱爲伏邪。而不知有六淫本氣伏於內。從內而發之伏邪矣。故此篇不得不作也。）化燥者。參用燥金治法。化熱者。參用伏熱治法。有其人陽氣不足。陰液有餘。則自始至終爲寒氣。不化燥熱而水液不消。與溼氣合而爲寒

痰水飲之症者參用溼邪治法（脈沉遲而滑者陰液有餘可用溫燥沉遲而瀋者陰液不足不可燥則以甘辛溫法治之）

按伏寒脈症頗與七情憂鬱思慮相似（蓋思則脈多沉遲甚則結者憂鬱氣滯脈亦遲瀋）但伏寒脈左寸人迎必應七情脈左寸人迎不應若兩關右寸氣口脈見沉遲細結之象而無上第三四條足三陰症與手太陰症者從七情思慮治之但用溫和舒散其陽氣而已不可用以上之法也（人迎主外感六淫伏邪雖無表症亦外感入內者也內傷以氣口診之見東垣內傷外感辨）

## 伏風

其人面色如常但鼻上山根年壽微現青氣隱隱臥蠶顴際亦微青白爪甲青白白睛帶青舌苔浮而易去（無定色間有菜色青黃相間）舌質如雪青紡綢之



兼青者。色暗不鮮。其脈弦緩。往來滑利如波浪之湧。按之則芤。浮取則虛。神志蕩蕩然。胸中嘈飢善餓。或有微惡風之狀。（青。木色也。浮而易去無定色。風善行而數變也。舌質兼青暗。風伏於內。血色變也。弦。肝木本象也。緩。一息四至。風之正象也。滑利如波浪者。血被風氣鼓蕩而行也。滑利似津液有餘。而按之芤者。風耗血液也。浮取則虛。風不在表而入裏之候。衛陽返虛也。）此伏風常見之形證也。風伏足陽明太陰。脾胃土受木尅。風氣疏土。運化較速。時欲嘈飢。食已欲瀉。（此即內經春傷於風。夏爲飧泄症也。風伏入夏。土旺不受邪。故能捍邪而病發也。胃能化食。全賴膽汁入胃以化之。風。甲木膽氣也。故運化速於平時。脾陰土也。主統運水液。風陽邪。陽主動。故運消水液亦較速也。飧。食也。以嘈飢而時時欲食也。食已即欲瀉者。運化太速。水分不及分別清濁。故乾稀皆從大腸而出也。此似土虛之症。不知土旺之候。伏風發作而爲病。法宜培土抑木。祛其伏風。）桂枝湯主之。

（桂枝木、生甘草、杭白芍、木香。桂枝去皮用木。使入裏也。甘草培土。白芍能於土中瀉木。微加木香者。以配白芍也。日久欲化熱者。去木香加木瓜少許。）久不愈者。橄欖茶飲之。（橄欖與木瓜。皆木中之金也。善制風木。此勝制法也。橄欖四五枚。打破泡汁。緩緩飲之。如無鮮者。蜜餞甜橄欖。亦可用之。）

風入陽明之裏者。腹痛喜按。白礬紅糖丸。（此亦勝制之下法也。以明礬末用紅糖蒸化。和爲丸。如桐子大。每服七丸。或十四丸。使風氣從大便而解之法也。）飧泄不已。小兒則成疳疾。牛肉、全蠍粉。（方載吳鞠通解兒難中）大人則成消食。風消骨瘦。混元一氣丹吞之。（即生雞蛋一枚。溫水浸溫吞之。）甘草芍藥湯。少加鷄金、全蠍。

風伏脾絡。大人夾臍而痛。（有鬆緊。有止息。）戊己丸。全蠍湯下。小兒臍風撮口。（未發之先。面色如土。既發則額上黃。黃至口角不治。治法詳幼科鐵鏡中。夏氏

燈火十三醮法。口不能張。脣若荷包。撮不能乳而哭。木香疏風飲主之。（木香、全蠍、桂枝、蟬退、木瓜、芍藥、甘草）

風伏肺絡。鼓盪痰飲。發爲喘咳吐白沫。兼寒者。麻黃湯。不兼寒者。白芥子湯獨用。兼化熱者。麻杏石甘湯。耗傷津液。發爲噎咳。桑菊薑杏湯。（桑葉、菊花、薑仁、杏仁）兼化熱者。加冰糖、川貝母潤之。痰涎實者。釀爲肺癰。咳吐臭痰。濃濁異常之多。獨用白芥子。或用芥子末拌（青黃牙白）菜蘸麻油。當菜食之。數日則風痰可從大便下。（古有陳芥菜瀉治肺癰法。予因思陳瀉難得。且鹹能傷血。棘人喉嚨。臭而難食。改用此菜食之。治效甚夥。）化熱者雪羹湯。（大荸薺、淡海蜆頭）熱甚加甘草（酒炒）大黃微降之。

按伏風喘咳噎咳之症。誤用辛溫。其變症頗有失血吐紅似勞者。喘咳之症。誤用滋補。亦多纏綿。飲食不進似癆者。誤滋補者。三子養親湯。誤辛溫者。桑菊薑



杏湯加冰、貝。

風伏肝絡。發癰厥瘕。眩暈抽搐。目睛斜視。（此卽俗謂羊顛風等類也。經謂之癰。方書謂有五癰。有夜發晝發。陰蹻陽蹻脈病也。肝絡血液不甚虛者。有風痰流飲入經絡隧道。故或發或愈。）明礬、鬱金、橄欖汁爲丸。緩緩治之。血虛者左癱右瘓。手足不能舉。痿痺還原酒主之。（方載後）

風伏陽明肉腠理爲癢。爲虛腫。（癢甚腫甚。自頭面起一二日。徧身皆腫。）桑菊飲加鈎藤、蟬退主之。不治及治未盡者。變生癰癩。（輕者爲癰。重者爲癩。）還原酒主之。

風入膝眼犢鼻穴。發爲鶴膝風。膝腫大。腿細。屈伸不利。還原酒主之。

風入環跳穴。發爲附骨痛風。不治則成附骨疽。三退二香散主之。（露蜂房、人髮、製沒藥、蛇退、製乳香）共研細末。酒調如乾麵式。服一團。陳酒下取汗。還原酒主

之。

風入衛陽。頭生白屑。面皮乾燥。漸及徧身。發爲白癬。陰液不足。好色之人。發爲腎臟風。俗名陰癬。（生於兩胯陰間。漸及兩股。）還原酒加減主之。在上生白屑者。去油松節加乾浮萍、葛花。在下部者。去油松節加黑大豆、阿膠、黑芝朮、龜板膠。血熱者爲紫癰風。加酒炒大黃。血氣虛者爲白癰風。（卽白斑駁雜）加潞黨參、黃耆、防風。（白斑多有兼溼者。宜加油松節用之。）

風入陽明。頰車穴痠痛。口不能張。爲骨槽風。辛桂芷黃湯主之。（細辛、白芷片、黑大豆、肉桂炒大黃、芥穗）

風入陽明肌肉。厥少陰筋骨。肌肉麻木。筋骨痠痛爲風痺。化熱則爲白虎痛風。風痺者。還原酒主之。痛風者。白虎湯加鈎藤。

風入筋骨。歷節疼痛癢腫。走竄不定。甚則癰筋壞骨。鼻塌毛髮脫落。手足拘攣。日

久則皮破流水。潰爛浸淫。骨節脫離而死者。俗名曰大麻風癘疾。又曰癘風。（此風症。廣東名曰麻風。各省皆由彼處傳來。亦如楊梅瘡毒。名曰廣瘡。亦由廣東傳來。二症末候形證。大抵相似。蓋同一氣候之症。源同而流異也。楊梅毒不服輕粉。不入筋骨。麻風人內之精氣不虛。不入筋骨。蓋同一厲氣也。）未癘筋壞骨鼻腫者。還原酒主之。已癘筋壞骨者。五虎七液丹主之。方用全蠍、斑蝥、蜂房、蜈蚣、蛇退各一兩。皆焙存性研末。明雄精、月石各五錢。研細末。酒炒大黃末四兩。諸末合爲一處。磁盤盛之。加側柏葉、鮮荷葉、大青葉、佩蘭葉、紫背浮萍、野菊花、五葉藤。各取自然汁一兩。（青菓連核磨汁一兩。石菖蒲磨汁七錢。）傾入前末藥內。乾則研細再傾。以汁盡爲度。陰乾再研。猪油拌爲丸。如梧桐子大。每日服三十丸。生甘草湯下。服至泄瀉止。停數日。消息胃氣再服。弱者減之。壯者增之。痿痺還原酒方。（土炒鈎藤一兩、白歸身五錢、炒小胡麻一兩五錢、人乳拌油松節五錢、酒炒桑椹



子二兩、夜交藤一兩五錢、蜜炙絡石藤七錢、九節石菖蒲五錢、川牛膝八錢、五加皮鹽水炒五錢、十大功勞子七錢、伸筋草七錢、薄橘紅五錢、鹽水炒沙苑子一兩五錢、千年健八錢、大秦艽一兩二錢、尋骨風六錢、藕節鬚一兩、猪脊髓五條、杭白芍八錢、蠶繭四十九枚、白花酒六斤。酒浸一宿。隔水煮一炷香。存性五七日。每日隨量飲之。治腎臟風。陰癰者。去油松節。加熟地二兩。）

## 伏瀝

其人面色黃白。惟天庭兩太陽微暗。鼻有油垢。皮膚潤澤。舌質淡。邊如鋸齒。苔無正色。黃白灰雜相混。其脈緩弱。沉取則滑利。喜食香脆。惡飲。（兼熱脈則緩大。化熱則脈數。兼寒脈則弦遲沉。寒則遲細如屋漏。）體重神困。此伏瀝常見之象也。溼邪伏於兩太陰者。寒熱往來如瘧。又似虛勞。午後熱甚。綿綿不已。或微咳。或不

咳。口涉。舌白滑苔薄。胸悶。飲入輒脹。食不消腹脹。或自利溏瀉。小便不爽。脈右關寸緩。藿香正氣丸主之。六君子丸亦主之。三仁湯亦可選用。

溼邪伏於足太陰厥陰者。脾不統血。則血化爲水。女子不月。男子少腹脹大。小便不爽利。沉沉澤澤。毫無所苦。呵欠。倦怠。嗜臥。四肢重。久則浮腫。香連丸、左金丸、戊己丸。選用。脈見兩關緩。

溼邪伏於兩陽明足太陰者。胃陽困。泄痢後重。腹痛。時作時止。面浮。見右關寸緩。痢痛甚者脈兼結。小兒發爲疳疾。頭毛槁。腹大。化熱則嘈飢。時時欲食。食亦不多。不消食已而泄。神朮丸、異功散、香砂枳朮丸。

溼邪兼熱。伏於二少陽。二太陽經者。寒熱。小便赤。自汗。目胞浮。脈緩大兼數。見於左關寸。舌苔黃膩。黃芩滑石湯。

溼邪兼熱。伏於二厥陰經者。善怒。脇下痛。有止息。女子經前腹痛。月事不爽。色淡。

黃。男子疝瘕。脈左關寸。右尺緩大兼數。舌苔黃灰而膩。金鈴子元胡索散。

淫邪兼熱。伏於手太陰足陽明者。發爲陽黃。舌黃灰而膩。脈右關寸緩大而數。苡仁滑石湯。

淫邪伏於兩太陰。兩厥陰。足少陰者。兩脈弦緩。痰飲停蓄。喘咳嗽稀痰。面微浮。甚則如哮喘嘔吐狀。如胃寒。小青龍湯。外台茯苓飲。見水心怯。欲作寒戰者。膏肓受淫。須灸膏肓俞二穴。砒鼓丸少少與之。不知。再加二粒。

淫邪伏於足少陰腎經者。小便濁。腰脹。腰以下如坐水中。面色黃而暗。如油垢狀。脈兩尺緩大。如按綿包。鷄絲魚翅湯。（魚翅如平常調和。亦可加鷄絲。）兼寒淫者。發爲陰黃。茵陳朮附湯。金毛狗脊五加皮湯。兼熱者。發爲陽黃。黃汗。滑精。茵陳大黃湯。麻杏石甘湯加細辛。滑精者。二妙丸。黃芩白朮散。

陽氣虛陰液足者。易化爲寒淫。陰液虛陽氣旺者。易化爲淫熱。陰陽平等者。淫邪



本氣始終不變。有因藥而變者。不可不知。（如久利則陰傷陽餒。如久燥則陰傷陽亢之類。潤之則病深不解。補之則驚悶煩躁。下之則潤泄不止。）鷄絲魚翅湯。（母鷄、沙魚翅、治法如酒席烹煮法。不拘多少。量力酌用。大約每日極少一小碗。多則二小碗。連湯連翅飲食之。貧者以烏魚羹代之。即黑魚有七星者。白湯煮食。不可加酒鹽。）金毛狗脊五加皮湯。（金毛狗脊一兩、五加皮五錢、附片一錢、苡米五錢、木通一錢、酒炒鹿角霜一錢、何首烏三錢、炒。）

伏暑（暑屬少陽相火。同氣相求。多手少陽三焦。手厥陰心胞絡症相火亦寄於肝膽。亦有足少陽足厥陰症。兼溼氣者。多太陰脾肺之症。）

暑字從日。夏日炎烈。天上太陽火氣也。在六氣則爲少陽相火。其邪氣傷人。皆由人頭背口鼻皮毛而入。夏日受暑而不即病者。以從人之汗孔。化汗而出也。若汗

孔閉。津液虛。陰氣不足。送邪出表。則病作矣。有送而未盡出表。日復一日。積累暑邪內伏。至秋方病作。或至秋末冬時而作者。皆爲伏暑。秋初即發者輕。易治。冬月方發者重。難治。不兼溼邪與穢濁之氣者。治法可與伏熱同參。

其症惡寒身熱。氣虛入暮熱甚。口或渴或不渴。（不渴者已入血分矣）面色額上黑暗。紫氣隱於皮膚之內。頭眩體痠自汗。有汗亦不退熱。其脈兩關寸虛大而芤。兩尺長大洪數。尺膚熱甚。舌苔白沙。舌質紅紫。（甚有薄白苔。如雪青杭綢色。反覺滑潤者。）此伏暑常見之形症也。治宜荷梅湯、六一散、生脈散、白虎湯。四法選用。（惡寒甚者。用白虎湯加薄荷。脈芤虛甚者。生脈散加六一散。）入暮熱甚。似瘧非瘧。舌紅潤。口不渴。天明得汗始退熱。入暮又熱。是暑邪已深入伏於少陽厥陰血分也。青蒿鱉甲煎主之。

暑邪伏於手太陰肺經者。日晡咳甚。肌熱。右寸芤虛。喉中乾甚則氣喘。生脈散主

之。欲作肺痿者。（暑熱伏肺陰。津液乾則痿。）天府穴痛。（天府穴。肺之募也。在乳上三脇間。）咳引胸腹痛。（陰氣傷也。）毛槁髮焦。（則痿已成矣。肺之華在皮毛。毛槁髮亦乾槁矣。至此候則危。）大劑生脈散加濂珠粉主之。貧者以鷄子清代珠。溫水浸熱。生吞之。連黃亦可食。

暑伏於手足太陽。手足少陽經者。口苦而渴。小便不利。頭眩心煩。手足心熱甚。尺膚熱甚者。六一散主之。

暑伏於足厥陰肝經者。或渴或不渴。嘔酸水。脇痛。脈左關弦數。椒梅湯主之。

暑伏於手厥陰胞絡血海者。夢多怪異。少腹脹痛。時作時止。嘔。胸悶不思食。煩躁。女子月事不調。男子疝瘕癥結。甚或譫語。吳氏加減桃仁承氣湯主之。

暑伏於兩太陰者。舌白口渴。腹脹氣怯。寒熱似瘧。有汗不解。小便已。洒然毛聳。右寸虛大。右關弦緩。左關細澹。此兼足太陰溼氣爲病也。東垣清暑益氣湯主之。



暑兼溼氣。伏於兩太陰者。舌苔薄白而滑。脈緩身重。藿香正氣散主之。熱甚者。加滑石湯送下。

暑兼溼氣。伏於足陽明太陰者。舌白。脈弦緩而大。無汗。或但頭汗出。香薷飲主之。暑兼溼氣。伏於足厥陰陽明者。吞酸、心悸、脇痛。消暑丸主之。化熱脈數大者。椒梅薄荷湯。脈緩弦細而滑不鼓指者。雖渴甚。左金丸、香連丸選用。

暑兼溼氣。伏於足厥陰。太陰大絡者。脇痛、吞酸。日久變生停飲。脇下漉漉有聲。脈弦、舌滑。香附旋覆花湯。

暑兼溼氣。伏於兩陽明。及手太陽小腸者。脈右關寸左寸皆緩滑而大。滯下紅白。後重裏急。腹中時痛。木香檳榔丸主之。化熱脈數大。有力鼓指者。調胃承氣湯加薄荷主之。脈振指有力。按之芤者。可參用熱症治法。增液承氣湯主之。

暑邪伏久。深入足厥少二陰。與足陽明經者。失治（謂不得治法）日久。陰液傷

耗。大肉削脫。皮毛枯槁。脈弦濇而緊勁。或細若蝦游。發爲戰慄抽搐。角弓反張。或形似虛癆。而有外症病移者危。（有外症病移者。尙可救治。以其正氣尙能捍邪外出也。潰久則難矣。）勉救之。用大定風珠法。加珍珠。合增液承氣。

伏熱（相火爲暑。君火爲熱。熱卽二火之總名也。凡暑熱不兼溼症者。皆可以熱名之。皆可以熱症法治之。）

其症惡寒。頭眩身熱。形類傷寒。但身裏之熱甚於表。（胸腹、手足心、腋下、胯內、較背項諸陽部更熱。不似傷寒表熱甚也。）日晡熱甚。日輕夜重。（入暮熱甚。不若傷寒日夜綿綿。熱無退時。無輕重之別也。）有汗亦不退熱。或汗出退。至時復熱。（不若傷寒表熱。可以一汗而解也。此是分別處。）口或渴或不渴。（渴者輕。易治。不渴者重。難治。不渴者熱邪深入血分。用清潤藥服之。使達至氣分則渴。能渴

而甘飲。則熱邪已淺一層矣。）脣燥。（口雖不渴。其脣必燥。以口中津液被火灼。以舌舐脣。脣上津液易乾燥。如豆腐皮米湯鍋焦狀。）面雖黃暗。睛明二穴。鼻孔及額上。必有紫赤之色。隱於皮膚之裏。（冒看黃黑浮於外。如煙煤籠罩。如久禁風塵日晒。細看或背光看。則紫紅隱於內矣。）週身骨節痠。（骨節痠者。熱。骨筋皆被熱灼也。肝腎熱之明症也。）腰痛。（腎水為熱所灼也。）胸悶。（肺管中津液。與胃脘中胃汁。為熱所灼。津汁少則肺胃之氣不滑利故悶。）自汗。（津液熱逼。走於皮毛之外也。雖有汗。手足心必無。足心更難得汗。）頭眩。（如酒醉狀。）其脈沉數。兩尺長大。（浮取細軟。沉取則數而有力。或靜中有動。或促。）舌色白沙。（如米粉鋪紅紙上。或如雪青杭綢色。）舌質絳紫。（深入血分則反滑潤。）此乃手足少陽厥陰。足少陰伏熱。常見之形症也。（凡六淫伏邪。首列常見之形症。其下雖不言及。皆當與常見之形症。參合而斷。病伏熱之症。尤當加意。問其



初病形症。與首列者合否。以下諸條。不詳述者。省筆墨耳。治宜青蒿鱉甲湯。或青蒿二甲湯。（不言手太陰症。以肺經伏熱。伏尚未深。其症與初感無甚大異。且鞠通。天士。有太陰伏暑在前。人易知識。不必再述。）

伏久傳入陽明。（即以上之症。日久不愈。或誤服二陳三仁等。辛溫宣中之藥。或未服藥。熱邪循經傷耗胃汁。傳入胃中而生熱結。）但頭汗出。或身半以下無汗。或嘔或不甚嘔。便秘。身半以上自汗。便溏瀉醬色。誤藥甚者。（多服絳、穀、枳、朴、砂仁。辛溫化痰之品。）則津液上逼。壅於胃脘上口。則口生涎沫。（狀若水飲。）辰巳時熱甚煩悶。其脈或芤或洪。（芤者胃汁已傷。所存者少。洪者較輕。有洪芤并見者。）或細數。按之濇而有力。（陰液陰氣。皆傷於熱也。濇見於沉部。精血亦耗也。有力鼓指。邪熱之力也。）舌質紫。苔或黃。（黃宣者正象。易治。有紅孔膩滑者難治。必有他故。）或燥。（燥者正氣。黃燥易治。黑燥難治。防其由潤而變燥。變為

神糊脫津。熱症未傳之候則危。）或潤。（潤者熱入血分。熱逼津液上泛也。）或白腐而厚。（熱症有白苔厚腐之苔。無寒症苔。乃胃中濁氣。熱逼濁氣上蒸。故厚如腐渣堆鋪狀。溼痰寒痰油膩之症。苔雖厚而膩粘舌上。不服苦溫宣化藥宣透終不腐。）或中心裂。（有直裂一條者。是氣分不足也。有橫裂二三條者。有直橫俱有裂紋者。皆陰津傷也。有裂如冰片紋者。腎水血皆傷耗也。直塊如挖去者。胃中陰汁大虧也。有無苔赤舌。而中心如挖去一片皮者。胃汁大虧。損及胃裏膜也。有舌尖如挖去一片皮者。有舌邊破裂者輕。）胸悶或拒按。（拒按者。按之痛。正象也。人易知爲陽明胃中結熱。其病輕。以其正氣尙能捍邪。尙自知邪實也。）或不拒按。（不拒按者重。必其人下症初見之時。尙知拒按。延誤多日。不下正陰已傷。正不能捍邪。邪熱安結於內。賊已久踞城池。城中人反覺無賊。兵來克復。賊難安居。又亂作矣。正陰稍復。正能捍邪。則反知悶而拒按矣。必待下盡。邪結方解。）

治宜調胃承氣湯。陰液乾耗者。合增液法潤之。如當下不下。邪結在胃之上中脘者。易變譫語。煩躁狂迷。土實尅水。耗盡腎陰。水不濡木。肝木生風。直視搖頭。督脈實強。角弓反張則危。昏迷靜臥。或自言自語。唧唧嚶嚶。聲音不高。呃逆聲如擊木。是內傳手少陰厥陰。心與胞絡。胃陰欲脫之候。則危在旦夕。甲日甚。（土被木尅。正五行氣受尅。甲爲土。運有餘。今土實而土助旺尅水。是五行化氣尅水也。病更甚。藥難見功。）戊日險。（正五行土尅水化氣。五行戊屬火。運有餘。火土炎烈。金水氣虛者。不堪命矣。故多難延殘喘者。）每見於辰巳二時。（辰巳時氣血注於脾胃。）肺脈弱。氣逆。多絕於寅卯二時。（寅卯時。血注肺與大腸。且金絕於寅。肺病怕寅時。）辰戌丑未四時。土旺尅水。腎陰敗者。多絕於四時之內。陽明伏熱。腸胃中有燥屎。熱結旁流。自利稀水者。增液承氣合調胃法主之。（凡係陽明熱結。皆有首條與上條。傳入陽明之形症。熱傷胃汁。腸胃中之脂膏。不甚



滑利。故宿糞難下。熱邪逼迫。津液稀汁。上下消亡。上則嘔吐明汁清水。下則熱瀉。暴注清水。甚有清水中如蛋白而下者。其僅泄瀉糞醬色。金黃。金紅色者。猶爲輕症。故下陽明熱結。用增水行舟法。使水漲舟浮。方能行動。如初下用增液調胃法。雖下出稀水稀糞。或黑水或清水。有腐渣脚如石屑狀者。皆可下之症。難下之症也。不必驚懼。仍守法更加重用之。下至有糞色稍見小效。下至宿糞。如鞭如馬栗如羊矢豆。甚有小如豌豆。黑堅如鐵子者。下去之後。復待大便新黃。如鷄爪葵花。黃白相兼。色軟如折帶。盤若小蛇之糞。其熱乃真盡之候。始停下法。用養正法調理。如加減復脈湯。芍藥甘草湯等類。不比傷寒化燥下法。傷寒化燥。有燥屎無熱邪傷陰。故傷寒未化燥屎。誤用大小承氣。下稀水者。十有九脫不救。熱症用增液調胃二承氣。下無形之熱爲重。下有形之宿糞爲次。不過借有形之糞水。驗無形之熱邪。解未解。盡未盡耳。熱邪有重輕。下有難易之別。熱結輕者。一下便得燥糞。

而症解者。稍重者。初下便得溏醬色。再下得燥屎解。有初下得稀黃糞。再下得黑垢。再下轉醬溏。再下燥屎。再下得新黃折帶恭始解者。有初下得青黃糞水。再下得黑水。如洗黑灰垢水三四下。始能得黑垢。如藕黏黑血條。五六下後。始轉換醬溏燥屎者。有初下得清水。再下得蛋白漂水中。二三次下之。始得清水蛋花糞少許。然後漸轉黑水。黑垢。醬溏等樣者。有初下得清水。中夾黑屑如鍋焦。黑屑如茶末。再下得清水。中有白屑脚沉底。如炒黃腐渣屑。或如石屑粗粉。然後始轉蛋花糞等樣。有初下已得燥糞症。脈不減。再下得前樣等物者。有中間已得燥屎。其症不減。再下得羊矢豆後。始轉新黃折帶方解者。有下得燥屎後。症脈不減。或症減脈不減。或脈減症不減。再加生脈法。合前法下之。又得黑爛水糞。或得小鐵丸硬子之後。始漸轉黑垢。醬等樣者。其症則始輕後重。先不渴後反渴。先不大燒熱。後反大燒熱。先舌不黑。後反舌黑。先脣不焦破。後反焦破。總之下症先不全現。後反

下症全現。皆藥攻病外達之象也。攻陽明伏熱。推大黃爲第一良將。元明粉次之。生甘草則宰相安民。運餉駕馭將士。扶助國脈之大功臣也。前所述各樣之糞水。皆一層重一層。層次甚多。險象疊現。清水以下。皆奇險難治之症。現症多可怕煞人。病家醫士。多心驚膽戰。而予敢守定潤下增水行舟之法。而收人難能之功者。其要訣祕法。惟在於脈任尋按。愈下之。愈覺脈象起有神。有力鼓指。按之愈覺有力。雖細弱如無脈。按之至筋骨間。覺細數有力之一二動。下之一二劑。反覺有脈者。皆可救之症也。經歷多年不爽。故敢述之。以告後學。案驗列後。此皆陽明熱結。當下失下。日久遏伏而成之症。治之之法。總不外乎增液調胃二承氣。故細述所下之物。以堅後學之心。特用藥有重輕加減。要貴隨症變化耳。

陽明伏熱。傳入血分。週身血脈皆熱。氣旺者發紅疹。氣弱者邪深發紫斑。（俗名葡萄溫症）犀角大青湯。合調胃承氣主之。氣虛者加北沙參。氣旺者發疹。加薄



荷油三四滴。（疹高起而巨手者。肺氣旺也。癰不高起。氣虛者邪陷。不能外達。反有中凹者。有欲爛破者。皆危候也。如顏色鮮紅不紫。黑癰雖大無妨。）

陽明伏熱。發爲牙癰。牙疳。喉疳。口臭者。胃已腐也。增液承氣湯主之。（牙癰者輕。牙疳者疳蝕也。牙齦紫暗黃白。橫延如蠶蝕葉之狀。喉疳者喉外不腫。尙輕。重者內外皆腫。極危。腫者外面宜用針刺出血。內需大下大瀉。方能挽回。如不瀉及不大瀉者。有腐胃爛腸。爛喉爛舌。鼻流臭涕者。涕有紅白黃水而臭。由陽明熱傳入腦髓者。皆十難救一二之症也。僅流黃水。湯內加薄荷油五七滴。如不嫌麻刺。或不覺薄荷辛。而反覺甜者。倍加與之。）

陽明伏熱。發爲瘡瘍。或發爲疫痘。腰痛甚者。增液承氣湯。合青蒿龜板煎主之。發而未盡。瘡痂愈復。變爲瘡蠱。或變爲浮腫。以上法加薄荷油三四滴主之。有疹後發腫。有癰後發腫。有瘡後發腫者。其腫與溼腫無異。但皮色不

黃而紅。皮上撫摸之。覺毛孔如有刺。病人覺刺痛。稍重則不覺痛。有衣角衣邊輕掃之而覺痛者。誤作溼腫治之必壞。（世醫見腫。多作溼腫治之。不知浮腫。有幾種病因。故經歷雜論。有浮腫辨法。此陽明伏熱變生浮腫者。由於熱邪竄入肌肉故也。雖腫皮不甚光亮。不甚黃白。皮內有血色隱於內。必稍兼色。必有以上伏熱形症。即現在不見以上伏熱形症。其初病之時。必已現過。醫者切脈問症。必問其初症情形。與現在形色。參合斷之。自無疑惑矣。有陽明伏熱之症。下之已通。燥糞已下。而忽然紅腫。乃內裏餘熱外達也。再下之。見折帶新黃糞則消。）

陽明手太陰。足少陰伏熱。發爲下痿皮槁。或內作肺痿。乾咳引痛。或內作腎痿。腰痛足痿。足皮發宣。增液承氣加龜板雪羹湯主之。實者發爲熱痺。見於手足腿腕肩臂而痛。其痛處色微紅。前方加忍冬藤、桑枝。下部加木瓜少許以引經。（經曰。肺葉焦。令人痿。肺主皮毛。肺熱耗傷津液。則毛髮枯槁而不生。咳則牽引胸脇痛。

耗及腎水。少腹亦覺牽引抽痛。咳則筋骨震。有欲咳而不敢咳之勢。腰爲腎府。足爲腎司。虛則足不能立。其足皮發宣者。陽明主肌肉。故皮肉宣厚。如隔布袋。搔癢甚則麻木不仁。氣體實者。正能捍邪熱。故僅見四肢癢痛。恐人誤作風寒溼痺痛治。故標明痛處。皮色微紅。有血熱之象。或不見紅色。以手按之。指縫際皮色。卽現紅紫血印。指按處白印。是熱傷肌肉。脈絡之血的實證據也。

陽明、少陰、督脈、陰蹻、伏熱。發爲筋急拘攣。脊強反張。腿並不能開。膝彎曲而不直。增液承氣加龜板、犀角、猪脊髓主之。（此條人每以風症目之。而不知熱症亦有是症也。熱入督脈。則脊強反張。以督脈之陰液。被熱所耗也。入督脈之藥。多係溫品。寒品少有。而予於古人無法處思出一法。用大黃以瀉陽明。陽明會督脈於頭。瀉陽明卽所以瀉督脈也。猪脊髓鹹寒滋潤。以猪爲水畜。能治火熱。卽用其督脈。以補人督脈之陰液。清人督脈之火也。脈經曰。尺左右彈者。陰蹻脈爲病。動苦少。



腹拘急而疔痛。足內攣。又曰。陰蹻脈爲病。當下之。此腿並不能分開。膝曲而不直。足陰蹻脈內攣急之證據也。其未筋攣以前。必有少腹拘急之症。既攣之後。或反不自覺矣。此症雖筋骨拘攣而不知痛。下之至知筋痛。再下之。由小痛至於大痛。復下之。由大痛日漸輕減。至於不痛而後伸開。再清其餘熱。養其腎陰。方漸復。若誤作風溼痺症治之。易至不救。

陽明伏熱。當下失下。日久變生外症。名曰病移發。（其症界乎癰疽之間。有初起紅者。暈大白粒小。紅暈易散大。潰亦易於平爛。敷以陽癰藥。則變腐黑紫暗。用提膿藥。則流水而不得膿。更易漫延散大。有初起顏色不變。漫腫無頭而皮熱。愈摸愈熱。肉中脈管青紫色。生於手臂腿下者輕。生於腰背股腋胸腹者重。難治。有內生胃癰。外發於胃脘穴部。有內生腸癰。而外發於少腹臍腰下者。有發於腎脬穴者。有發於肺脬穴者。皆難救治。必須先治內症。待內症減而後可顧外症。若先閉

過外症邪出之路。內必加重不救矣。故外用從治法。使引熱外出。內用勝治法。外貼散陰膏。和陽膏。（能散能斂）增液調胃承氣湯主之。（陰液不虛者。調胃承氣主之。陰液虛虧者。增液承氣主之。氣虛者另加北沙參。）陽明足少陰。手太陰伏熱。狀似虛癆乾咳。或吐白沫（甚則粉紅白沫）夜熱骨蒸。飲食不納。肌肉消索。大肉削脫。大骨枯槁。皮黑毛槁。色如麵垢。猪膚湯。猪腎湯。合調胃增液法。加龜板主之。（富者加珍珠、燕窩。貧者以生鷄子代之。）陽明與肺腎熱久。陰傷津液枯槁。則乾咳無痰。反咳吐白沫者。此沫非溼氣飲水也。乃肺腎胃津液。被熱邪逼迫而上也。甚則紅白相間。熱傷血絡。肺絡傷破也。粉紅色者。肺本色也。其病必危。夜熱骨蒸。陰虛內熱。本象也。病甚則熱邪內陷。反自不覺蒸熱矣。胃陰傷者。先食不香。難納米飯。若用藥再燥。劫其陰。遂致亦不能容飲水矣。肉消骨立。皮黑枯槁如麵垢。肺主皮毛。毛槁皮垢。乾而棘手。邪傷肺汁之症也。胃主肌肉。大肉即合

谷兩臂兩腿之鼠肉也。病者無鼠肉。胃汁已將竭也。大骨枯槁。謂骨瘦如柴。骨節鋒露。骨孔空陷也。腎主骨主髓。腎熱已久。骨髓枯槁。骨衣之油皆耗。故大小骨空深陷。畢現於外也。用猪膚湯去白。（粉蜜）單用猪膚。即猪之厚皮也。取其鹹寒微甘而多脂膏。能除大熱。能填補胃汁。肺汁骨髓。功力最大。猪腎湯取猪爲水畜。位鎮亥方。上應室宿。得乾六之精。能生坎水。有一六共宗之妙。爲水畜中之水臟。以補人之腎水。大有殊功。本草不載其能。前人謂無補益之性。但可用以引經。而予則以卦理斷之。每獨用以爲大將。而成功收效。神妙無比。調胃、增液、承氣、合龜板。治病之本也。加珍珠者。取珠爲蚌胎。蚌受月華而孕胎成珠。月者先天金水之母。太陰之精。取先天金水之氣。以補人先天金水之氣。有再造肺腎之功。極富者用數錢。文武火日夜煎服。但煎至水泛白卽服。珠有光。放水再煎。煎至無光。再換再增。但宜吊空煎。不可沉底。力薄者用二三分。乳極細以藥湯送下。燕窩取其滋



潤肺液耳。生鷄子。亦有重造肺腎。填補胃汁之功。溫水浸熟生吞之。象形補形。能補人稀汁。尤能補肺臟中之蛋白汁。不特貧者可用。富人亦可兼用之。收功更易矣。

陽明少陰伏熱。戊癸合化爲火。發爲瘧瘧。（俗名子母瘧）每日辰巳時大熱。午後方退。日晡復大熱。天明方退者。青蒿二甲煎合增液承氣湯主之。（辰巳時。血氣注於脾胃時也。日晡酉時。氣血注於腎經時也。世人見病有去來發於二時。皆目爲子母瘧。而不知其時。是何經主事。其瘧來寒輕熱重。或但熱不寒。故名曰瘧瘧。宗內經凡病至其年月日時復發者。當下之之旨。故主以增液承氣。得燥糞下後。見新黃折帶糞。辰巳時熱方解。青蒿二甲煎。治少陰伏熱之正劑。得熱汗至足心。日晡夜熱方解。）

陽明少陰伏熱。夜間熱甚。逼迫津液。血滯滯下。俗名痢疾。調胃承氣湯主之。日久

上嘔。下則完穀不化者。加白芍、龜板、阿膠主之。（熱痢滯下之症。多由於陽明伏熱而成。熱邪逼迫腸中脂膏血垢而下。腹痛時作時止。痛甚則便。便後痛減。不入少陰。夜間不熱。一入少陰。則夜間熱痛。則少腹拘急。身不能直。故以調胃承氣主之。若誤治傷陰燥傷胃汁。則舌光無苔而嘔惡。下則完穀不化。此乃邪熱不殺穀。非脾土虛無火者比。良以腸胃中脂膏刷盡。米穀不能兜留故也。故加白芍之酸寒以和陰氣。合甘草有奠安腸胃之功。龜板鹹寒以勝大熱。阿膠填補脂膏。令能留存米穀也。仍以調胃承氣加味者。取寓通於補。得燥糞則痢自止矣。）

陽明伏熱。與足厥陰合病。發為胸悶脘痛脅痛。（俗名肝胃氣痛）翻胃嘔吐。噎膈（俗名痛膈）便澹者。調胃承氣加白芍、烏梅、花椒主之。（結熱在陽明胃脘。故胸悶而脘間食入輒脹痛甚。得大便則減痛。或泄氣則減痛。脅痛者。厥陰肝絡之血。亦受熱邪也。肝木上犯胃土故嘔吐。世人皆以胃寒胃氣目之。以辛溫降氣

治之。每多反增嘔吐。不能納穀。勢成膈食之症。不知實屬肝胃熱邪上犯所致。便結者無正相好屎。非便秘即便澹。而細如貓屎。甚或如金菓條。雖便亦不甚多。皆腑氣通而不通之證也。故主以調胃承氣之緩下。而加椒、梅、芍以和肝。取甘酸鹹苦以和胃。而降胃之熱結也。）

陽明伏熱。與兩厥陰衝任帶三脈合病。男子疝氣。結核便毒。（腎囊陰莖兩旁腫大如癰）女子天癸不調。或崩或漏。或帶下。或經不行。或妄言妄見。如有鬼神依附狀。或燒熱體蒸。咳噎消瘦。而少腹脹。（俗名乾血癆症）加減桃仁承氣湯主之。陰液乾涸。形消骨立者。加增液潤之。（此條即內經云。二陽之病發心脾。有不得隱曲。女子不月。其傳為息賁風消者。死不治之症。二陽即兩陽合明。陽明病發也。心脾有不得隱曲。謂女子善鬱。不得遂其隱曲之私心。故胸脘不舒。飲食少進也。其傳為息賁者。即胸中當脘處。墳起一塊。狀如覆杯而熱也。風消骨瘦也。衝脈



麗於陽明。任脈與衝脈會合。同爲血海。爲月經之源。帶脈橫繞於身。當帶緊之所。渾如一帶。陽明胃陰虛。則帶脈拘急。如帶束緊之狀。帶脈麗足少陽膽。與厥陰肝。肝膽熱。胃熱。則白帶下。甚則黃色。或赤帶下。胞絡爲血臟。生血發血之源。衝任之上游也。衝任不通。血海瘀熱。上犯心胞絡。故妄言妄見。血多而熱甚。妄行則血崩。天癸當去而不去。欲行而不行。行亦不暢。爲漏。血海有瘀熱停滯。庸醫再用芎歸等溫通之藥。則血中稀汁明汁如水液者。耗乾血輪。血塊乾涸於內。反更不得流行。故燒熱骨蒸。瘦損之症成矣。俗有乾血癆之名。惟此因熱瘀而成之症。最合名實相符。惜世有其名而無其法。予因名悟出治乾血之法。必先令乾血變爲稀汁。方能流行。故主以吳氏加減桃仁承氣湯。用大黃入衝任陽明以逐熱瘀。桃仁助之。乾甚者加增液潤之。添補血中稀汁。使復其流動之流質。而後可通行也。其病根不過陽明伏熱耳。陽明熱解。則衝任諸脈絡之血熱自解矣。予屢驗有功。誰謂

內經死症無治法耶。

陽明厥陰伏熱。發爲息賁。（胸中墳起一塊。狀如覆杯。按之皮愈熱。）瘧母硬塊者。加減桃仁承氣湯主之。（此熱結熱痞。熱瘧熱痞之治法也。瘧母結於脅下。熱瘧熱邪歸結之所也。）

陽明伏熱。吐血鼻衄。女子天癸逆行者。加減桃仁承氣湯主之。（此血逆熱行治法也。）

陽明伏熱當下。脈尙滑利。痰涎津液多者。不可與調胃增液二承氣。當以葶貝承氣湯下之。氣實者加枳實。氣虛者加北沙參。

伏邪新書終

伏邪新書 伏熱

四四



〔清〕

田雲槎

編著

伏  
陰  
論

中國醫學大成



## 伏陰論提要

清田雲槎撰。雲槎字宗海。漢川人。其凡例云。治病必先正名。則立方有準。如先利後嘔。厥陰轉筋之疾。原與先嘔後利。腹痛轉筋之霍亂病有間。而世人概目爲霍亂。浪投苦寒。次則鍼砭。死亡者不可勝計。而矯其弊者。又或辛烈過甚。亦成危候。漢按。每春夏淫雨之年。陰霾太過。夏秋之季。此症卒發。所行方道。如鬼傳疫。再四推求。皆陰邪伏藏。孫絡所致。故立伏陰之名。以示區別。云云。必先有淫雨陰霾天氣。而陰寒雨濕之邪。人感吸之。深伏孫絡。故先利後嘔。甚則厥逆轉筋。蓋無其氣候。必無是病。凡例又云。既揭伏陰之病源病狀。應將傷寒金匱中之陰病。有與伏陰同派者。分別繹出。其霍亂載於傷寒例者。亦必繹出。俾得比類並觀。是書首揭總說。次載症辨。再分爲原病、變症、死候、禁令、瘥後、比類、舌鑑、七則。原病者。未壞之病也。變症者。失治之候也。死候者。難於復理也。禁令者。不可違犯也。瘥後者。須明調理也。比類者。藉以引觸也。舌鑑者。察苔辨症也。體例仿仲景傷寒論文取簡要。便於誦記。一切議論。分註條下。俾一見瞭然。惟比類之陰症霍亂兩證。由傷寒金



匯釋出。別以原文二字。其註解皆取前賢精粹者而集之於註上。別集註兩字。不加釋一意。以滋贅文云。炳章按本書因伏陰爲病多寒證。與王孟英之伏熱伏濕之霍亂原因有所不同。宜將霍亂答問。互相參證。辨清其屬寒屬熱屬濕。分別用藥。庶幾不致誤人。

## 許序

人生六氣之感。爲寒爲溼。屬陰病者居其二。惟其屬陰。故中人往往不覺及其爲厲。則邪據清道。變象橫生。如霾昇空。瞬可蔽日。此際存亡消息。幾有毫釐千里之辨。非洞幾燭微。曷以爲治。生氣通天論。謂人身陽氣如天之與日。失其所則折壽而不彰。陽而失所。陰病可知。折壽不彰。伏禍斯烈。長沙醫聖。知其然也。著卒病論六卷。以治暴發陰病。斡旋二氣。度盡金針。惜書久佚不傳。所存理中四逆白通吳萸諸法。散見於傷寒金匱兩書中。世亦不能盡其用。至南昌喻氏。始申陰病之說。立論開端。獨有見地。但於沈陰內伏。猝發爲患之症。尙未道及。良工心苦。猶不足補長沙之遺也。漢川盧肅卿觀察。以醫名於時。檢其鄉人田雲槎司馬所著伏陰論。洵姚仰南通守見眎。受而讀之。原書首載總義。次症辨。再分爲原病、變症、死候、禁令、瘥後、比類、舌鑑、凡七則。規定四十二方。六十七法。又湯熨三法。推求精審。引證明確。蓋於長沙治暴發陰病之旨。直衍其緒。而定爲伏陰一症。卽陰病之屬。所謂先利後嘔。厥逆轉筋。皆陰邪伏藏之證。與霍亂之先嘔後利。腹痛轉筋。大相逕

庭讀書得間。目光如炬。較喻氏所論。殆有過之。以經驗所心得。闡古義所就湮。則書是也。匪僅長沙之功臣。抑亦南昌之畏友已。因念東南卑溼之地。今年春夏多雨。時癘所發。江海盛行。有稱爲癘螺疹者。朝感夕殂。指青紋陷。醫以霍亂溫疫諸法雜治。南轅北轍。謾過運數。苟出是書證之。可知癘螺一症。卽伏陰卒發之見象。按圖而索。著手可春。非卒病之不可治。而不識卒病者之誤於治也。雲槎司馬著作壽世。是書僅醫寄之一種。余重其有益衛生。且足發明古人之義蘊也。爰屬陳吟伯大令校勘一過。重付刊印。以廣其傳。並序以志之。

光緒三十三年歲次丁未九月知江寧府事善化許星璧撰



## 盧序

天地人身之所寄也。身體四肢之所寄也。五官百骸。爪甲膚髮之所寄也。然則六經大道。其人之具體。而百家技流。其人之爪甲膚髮乎。古之隱淪。皆有位。天地育萬物。與時消息之具。而爲飛爲鳴。爲潛爲蟄。操之人者。不可必也。至其負成人之體。以究成物之性。莫不俯仰上下。先後而一揆。瀛嶠田君。姿特瑰奇。幼誦經史。百家之言。皆有所剖析。當咸同多事之秋。挾策游當路。三起三蹶。自以身廢不用。而爪甲膚髮。或不爲世棄也。爰隱於醫。作醫寄。意者將寄其所寄歟。殊可惜也。

光緒十四年戊子季冬盧維維肅卿謹序

伏陰論盧序

## 關序

今年冬。棠病手足厥逆。不能自診。身熱無汗。但欲寐。自念此少陰病也。生平茹苦寒若飴。不敢決。醫者皆以爲時溫。服藥五六日。下利欲吐。不吐心煩。病益劇。會周怡崧師遣人問疾。命主川中張濟堂先生診視。先生至。切候久。詳訊所苦。索醫方觀之。驚曰。此少陰病也。見證似時溫。當於脈細微辨之。誤服寒涼。遲且不治。爲處理中圓方。加生附子三錢作湯。家人疑藥峻。時棠已大悟。促煎服。一劑下斷。復加減消息之。蓋二十劑有奇而安。暇時憶及漢川田雲槎司馬。嘗以所著醫寄伏陰論二冊見示。誦誦作序。因檢書與先生共讀之。先生曰。是書原本仲聖辨陰病霍亂。稿體例善立法。采方術。因時變通。不戾於古。大有裨於世。惟未見全集。作單行本。則猶有未盡。未幾先生赴荆門之聘。別去。會門人謝拾青來。爲雲槎索序。棠維序者書之綱也。古者撰述家自爲之。唐以後乃有爲人作序者。亦必挾其義蘊。以著可傳之實。或有一二罅漏。亦必表而綴之。無取乎譽也。今是書之義蘊。濟堂先生言矣。惜所謂作單行本有未盡者。未及與先生詳考。無已。棠姑擬之。東南地下。



歲常浸。陰病家溼重寒輕。若西北高亢氣寒。陰病家寒重溼輕。則蘇砂二陳薑附等分有進退。此單行本所宜綴也。神應經曰。百會穴在頂中陷中容豆許。去前髮際五寸。後髮際七寸。馬元臺註證發微曰。髮上百會五寸中央。王宇泰證治準繩。引湯氏曰。百會一穴。前後髮際兩耳尖折中。乃是穴也。方書所載。但云頂上旋毛中。不審有雙頂者。又有旋毛不正者。又銅人三圖。千金翼方曰。太谿穴在足內踝後五分跟骨上動脈陷中。所謂寸分。同身寸分也。右二穴載是書比類中。即所名伏陰病。亦有當及者。單行本采註加詳。則醫者知用也。濟堂先生嘗曰。仲景童便猪膽汁法。用輒不效。深思其理。蓋童便氣味鹹寒。膽汁氣味苦寒。古方劑重汁便少故宜。今用薑附。不過一二錢。而汁便幾於等分。是藥受制也。減之太少。則又無通格拒之力。先生易水激法。用冷水一大盂。待藥作湯成。即取一盞置盂內。隔水激之。數易水。趣令湯冷。頓服。使涼氣外彌。溫性內涵。應手得效。是又闡明仲景妙有變化。是書原病篇中可參用。情且不違。而致大益者也。謹揣稱濟堂先生之意。冀增泰山之壤。至於書之可貴。則濟堂先生名醫。其言也信。

光緒十五年己丑冬十二月漢陽關 棠敘

## 黃序

夫驂白蜺。馭翠螭。翔集紫虛。弭節蓬島。世謂仙靈。吾聞之矣。降離升坎。肄素女之經文。損角益商。窮軒皇之圖秘。金水韜迹。芝朮駐顏。長生異術。卒未嘗覩焉。流形賦氣。強弱偶判。徑庭知誘。物交脩短。遂分霄壤。縱令中崧產秀。鴻河誕英。眉壽不過百年。恆榦不逾七尺。寢興失節。則疵厲乘之。吐納違和。則沉疴中之。是以十全計上。職鱗次於王官。九折稱良。名彪炳於史策。然而楚莊遭疾。令尹請禱。趙簡嬰疾。閭吏詢巫。豈祈禳之技工。將刀圭之術左。蓋由經絡奧衍。脈候淵微。俞柎不作。岐伯遂往。講針灸者。昧厥砭稜。論湯液者。茫然治案。抑或偏執臆見。服冰禦寒。膚受禁方。屑瓊辟穀。軍謠旁訊。患誤河魚。帝錄遯稽。診迷關蟄。况乎去古愈遠。浮僞彌滋。剽竊丹溪。附會青主。晨披金匱。何益采薪。宵談玉機。空勞求艾。醫道固若斯之難也。田君雲槎。少負奇穎。似飲上池。壯遊通都。更耽素問。涉目創獲。懸解獨超。過靈蘭以浮觴。訪長桑而揮塵。凡夫喜怒哀懼愛惡。七情潛乖於寂感之初。風雨寒暑晦明。六氣交替於亭毒之際。無不瞻毫析證。辨色詳聲。索隱鉤深。研精入妙。



若夫珍藥千品。寶丹百鍊。辛鹹殊味。溫涼異性。刑臣西上。蓋篋未攜。世子南征。筠筐罕擷。綺季密贈。寄奴默識。囊括靈府。薈萃腕下。以故晉侯妖豎。靡有遁形。周易伏蠱。直窮變態。效彰俄頃。功濟塵寰。華蓋成陰。高軒溢巷。韓康居市。襁褓爭歸。葛洪著書。雷電護守。返里多暇。撰伏陰論。題曰醫寄。授簡於予。予惟雲槎。博覽古今。政化得失之跡。周知輿圖山川夷險之要。練達兵家戰勝攻取之機。洞悉郡國興利除弊之舉。顧乃輕祿薄貴。徜徉林壑。遺榮蠲勢。嘯歌槃澗。宅心澹定。消息陰陽。斂氣元虛。權衡金石。族黨脫於病厄。鄉鄰免於疾苦。衛生迓祉。宜書膠東五色之箋。養正延齡。足補淮南九師之訓。此則君以醫寄。而寄君所寄者。又閔且遠矣。

光緒十六年二月朔日黃良輝拜撰



## 黃序

庚寅夏五月。從孫義民應禮部試。報罷南旋。歿於漢陽舟次。時予權漢川縣篆。同里徐詞卿孝廉。遣伾來告。予哭之慟。詢所患。則曰霍亂。因念是疾也。不足以死。而竟死。竊悲門祚之薄。時不能去諸懷。明年田君瀛嶠。以所著伏陰論二卷見示。其言曰。先利後嘔。厥逆轉筋之疾。與先嘔後利。腹痛轉筋之霍亂有間。而世概目爲霍亂。浪投苦寒。次則針砭。死亡者不可勝紀。又或辛烈過甚。亦成危候。又曰春夏淫雨。陰霾太甚。此證卒發。皆陰邪伏藏。故立伏陰之名。其大旨推本傷寒金匱兩書。而一以補張仲景卒病論之遺。以視喻嘉言陰病論。有其過之。嗚呼。吾義民之疾。先利後嘔。厥逆轉筋。卽所謂陰邪伏藏之證。醫者以霍亂治之。其藥之苦寒辛烈。雖不得知。而皆足以死義民。以是知義民之死於醫。非死於疾。而庸醫殺人。罪不容誅矣。田君漢川人。有志當世之務。所著疏濬騰池河說。甚有裨於縣之利病。雖格不能行。予心韙之。今又讀君是書。然則君固真能操醫世之術。而益念吾義民不幸。未遇君以夭其年。爲尤可悲。因書以爲序。

伏陰論黃序

光緒十有七年春二月湘陰黃世崇序

# 自序

陰陽二氣。盛衰相倚。人在二氣交感中。陽淫熱疾。而陰淫寒疾。申豐云。冬無愆陽。夏無伏陰。春無淒風。秋無苦雨。此賴聖人調燮贊化之功。否則氣偏爲害。而方技家通其義者。卒罕覩焉。蓋自仲景昌明醫術。著卒病傷寒。並伏氣溫病。後賢藉爲津梁。主厲氣則有吳又可之瘟疫論。主時氣則有葉天士之溫熱論。雖各抒所見。派別畛分。要皆繼往聖而開來哲。引伸觸類。爲益無方。以是歎前賢之嘉惠後學。信不少也。向使仲景卒病諸篇。流傳至今。則凡諸暴病。當必有所發明。以示後人之準的。而惜乎其年湮代遠。散佚無徵也。漢讀傷寒論。旣恍然於溫熱一門。有伏氣。卽有時感。因疑陰病中類皆時感。何遽無伏氣。徬徨未決者久之。同治庚午秋。游江南歸。至漢皋。見病家先利後嘔。厥逆轉筋。比鄰死亡相隨。續醫者認作霍亂。投以苦寒芳香等藥。或加鍼砭。皆不一效。舉世目爲絕候。漢心竊疑之。按霍亂初起。心腹絞痛。嘔吐而利。此則先利後嘔。並無腹痛。其非霍亂。已有明徵。因默揣本年春霖壞麥。夏日衣綿。決其爲沉陰內伏。晚發爲患。此症當作伏陰治。仲景卒病



論。書雖不傳。而治陰病之理。中四逆白通吳萸等方。散見傷寒金匱例中者。尙堪尋繹。乃略仿其法。試之輒效。隨筆記錄。至光緒乙酉。閱十六年矣。復歷驗四次。遂編校成本。命曰伏陰論。彙諸醫寄帙中。戊子夏秋。此症始見廣閩。繼行江浙。並我湖湘。及吾邑鄉里。其以霍亂法治者。百無一驗。漢複製方送診。全活無算。搢紳鄉耆。集金勸梓。謂當出公諸世。漢自慚謏陋。不能追蹤前賢。然平生得力之處。亦有所不敢自秘者。謹序匡略。勉從所請。並繫以贊。

贊曰。凡陰之伏。胥由愆陽。溼淫寒沴。中絡潛藏。金火交戰。疾勢乃張。苟達斯術。卻疴召祥。

光緒十四年歲次戊子十月立冬日漢川田宗漢撰於對古樓

## 凡例

一、治病必先正名。則立方有準。頭頭是道。如先利後嘔。厥逆轉筋之疾。原與先嘔後利。腹痛轉筋之霍亂病有間。而世概目爲霍亂。浪投苦寒。次則鍼砭。死亡者不可勝紀。而矯其弊者。又或辛烈過甚。亦成危候。漢按每春夏淫雨之年。陰霾太過。夏秋之際。此症卒發。所行方道。如鬼傳役。再四推求。皆陰邪伏藏。孫絡所致。故立伏陰之名。以示區別。

一、伏陰本陽病之屬。仲景著傷寒論十卷。治傳經陽病。著卒病論六卷。治暴發陰病。惜卒病論失傳。而陰病多置弗論。喻嘉言始倡陰病論。於傷寒金匱中摘取條例。闡發陰病之旨。仍於伏陰一症。未嘗道及。今故揭之。

一、傷寒金匱兩書所存之理中。四逆。白通。吳萸等症。皆卒病論散亡之餘。而錯簡者也。茲既揭伏陰之病源病狀。應將傷寒金匱中之陰病。有與伏陰同派者。分別繹出。其霍亂載於傷寒例者。亦必繹出。俾得比類並觀。是書首揭總說。次載症辨。再分爲原病。變症。死候。禁令。瘥後。比類。舌鑑七則。原

病者。未壞之病也。變症者。失治之候也。死候者。難於復理也。禁令者。不可違犯也。瘥後者。須明調理也。比類者。藉以引觸也。舌鑑者。察苔辨症也。

一、伏陰有觸發舊疾而並症者。其狀未能預定。尤須臨診審辨。不得墨守。

一、是書體例。仿仲景傷寒論。文取簡要。便於誦記。一切議論。分註條下。俾一見瞭然。惟比類之陰病霍亂兩症。由傷寒金匱原文繹出。別以原文二字。其註解皆取前賢精粹者而集之於註上。別集註二字。不加釋一意。以滋贅文。

一、是書所用方劑。於方下註明某法。俾知法而後知用。如遵經方。則於方下書經字。用傳方。則書傳字。有因病制宜。另立方法者。則書擬字。並於方後解明立方之意。其方如經前賢所解者。解上並寫集解二字。自解者。寫方解二字。

一、方中所定分量。合照時宜。惟比類一則。所載方劑。悉依古制。其用方有主之有宜。有與有可。與四層。深入醫門者。必知其意。

一、是書症目。略舉病狀。並附方法。以爲展閱之便。

一、是書所揭脈症方法。皆漢入醫以來。研古究今。久經歷驗所得。但醫以活人爲心。故不敢自秘。出問諸世。原非藉以賈名。其或有管見未及之處。尙望諸方家。



補其不逮。是所深幸。  
一、是書編彙已久。對古樓課授生徒。向已標示句讀。今仍其舊刻之。雖於四部古本。例有未合。然便初學。亦當揆表。

伏陰論目錄

卷上

時行伏陰總說	一
伏陰霍亂辨	二
原病	四

卷下

禁令	一
瘥後	三
傷寒陰病比類	八

變症	一二
死候	三〇

金匱陰病比類	一二
傷寒霍亂比類	二六
舌鑑	三〇

伏陰病目並方法

原病七條 計三方 二十法 外湯熨三法

先利後嘔脈微或伏

下利清水噤噤欲嘔 蘇砂平胃散

嘔利耳鳴聲痞 蘇砂平胃散 加乾薑一法 加桂枝一法

肌消目陷目冒肢冷 附子理中湯

轉筋疼痛 附子理中湯 兩方均加艾絨牛膝 蘇砂平胃散 湯熨法

冷汗自出陽復則止

當嘔不嘔其人腰痛 通脈四逆湯

變症十九條 計十九方 二十三法

嘔利止厥回而噦 養胃湯 厥不同而乾嘔 半夏橘皮湯 橘皮湯

心下痞鞭噫氣不除 代赭旋覆湯

呃 附子理中湯加丁香 養胃湯加刀豆子 丁香柿蒂橘皮竹茹湯 丁香柿蒂湯



伏陰論 病目方法

二

頭汗微喘呃聲連連 參附湯調刀豆粉

咳逆 半夏橘皮湯

懊懷 一陳加香砂湯

心下痞塞滿悶 疏中丸

心下痞鞭按之痛 新製理中散

心煩熱飲去衣被肢體若冰 附子理中加童便 正陽丹

心煩冷飲喜風就涼面赤 人參四逆湯

心如焚舌赤飲冷臥地不起 潛陽湯

肢體疼痛手指不握 桂枝養榮湯

卒手足斂拘 桂枝養榮湯去芍藥加附子

心動悸煩熱 炙甘草湯

似寤似寐呼之不應 獨參湯

妊婦伏陰病加芎歸

嘔利止小便不利爲未愈

小便不通不可與五苓 腎氣湯

伏陰病欲解時小便必通利

死候十三條 計十九症

朝發暮死其症肢厥而躁爪甲紫黑

數欠

小便利如豚肝汁

厥回脈微續者生暴復洪大者死身熱汗出如珠速死

轉筋與四逆理中或湯熨艾灸不減

轉筋舌捲囊縮

轉筋少腹疼痛或喘滿

惡寒甚脈伏而躁

厥回小便利爲欲愈復厥下利者死

欲下利而無利時時眩冒

面黑目直視唇痿鼻孔黑齒黑乾死

伏陰 論 病目方法

伏陰論病目方法

厥逆無脈呼之不應

婦人伏陰或未愈或新瘥不可乳哺



# 伏陰論

清 漢川 田宗漢 雲槎 編著

鄞縣 曹赤電 炳章 圈點

## 卷上

### 時行伏陰總說

天地之道。一陰一陽。陽升則陰降。陽浮則陰沉。陽降則陰升。陽沉則陰浮。升降浮沉。陰陽之變化。生殺之徵也。蓋陽氣升於春。浮於夏。降於秋。沉於冬。是故春溫夏熱。秋涼冬寒。爲四序之常候也。四序失。則寒暑愆。非其時而有其氣。則爲異氣。異氣未有不病人者。春夏陽氣開張之際。適值陰雨不止。雨淫溼盛。則陽氣自微。而寒氣自生。寒溼相搏。結成一團陰霾之氣。致人受之。則上客於肺。中客於脾。下客於腎。卽病則名寒溼。如不卽病。其邪必伏孫絡。則爲伏陰。直至夏秋。陰氣內盛。陽氣外洩。久伏孫絡之邪。從陰而化。發端於膜原。膜原在胸膈之內。夾脊之前。正經

胃交關之所。爲諸經之總會也。陰邪踞此。壅遏氣機。清無所升。濁無所降。三焦表裏。營衛氣血。皆爲所阻。於是胸中不樂。頭微眩。四末微麻。小便不通。下利清水。嘔噦欲嘔。一經嘔吐。聲痞耳鳴。面塵肌消。目眶陷。目睛冒。渴飲熱湯。四肢逆冷。脈微或伏。轉筋疼痛。冷汗自出。有類霍亂。變則嘔止而噦。或噫或呃。或咳或懊懣。或心下痞塞。或心煩惡熱。而肢體若冰。甚則心中如焚。渴欲冷飲。搦扇不知風。飲冰不知冷。臥地不起。大要此症。皆以小便通利則生。不通則死。其間有僅下利而不嘔吐者。陰邪就下爲病也。有朝發暮死者。重感於邪也。又有觸發舊疾而並病者。有誤藥鍼而成危候者。有病退失調而終歸冥路者。不可言狀。初治之法。當以溫中通陽爲第一義。大忌苦寒助邪。消尅伐正。如神形已奪。切勿與芳香投鍼石。以氣血不可再奪耳。所謂無盛盛。無虛虛。而遺人夭殃。無致邪。無失正。絕人長命。若轉筋危急。則湯熨之法。最爲穩捷。至於變症用藥。或宜補。或宜通。在臨診審量。其諸方劑。詳訂後條。

伏陰霍亂辨



伏陰一症。古書鮮見。而近代病此最多。因其嘔利轉筋。有類霍亂。故世以霍亂稱之。夫霍亂之義。揮霍撩亂。皆緣寒溫不調。飲食不節。以致風寒暑溼之邪。與宿食冷滯相搏。清濁溷淆。亂於腸胃。而脾胃之氣困矣。爲病則心腹絞痛。嘔利並作。內亂極而之外。則爲轉筋疼痛。大抵霍亂嘔利。必有兼見之狀。如頭痛發熱。惡風惡寒者。爲感風寒而病也。身熱煩渴。氣羸喘悶者。爲感暑邪而病也。身重骨痛。渴飲熱湯者。爲感溼邪而病也。是霍亂固有風寒暑溼之分。故治法有或清或溫之不同耳。若伏陰之病。蓋由春夏感受寒溼陰邪。不卽爲病。伏於肺脾腎三經孫絡。乘人陰氣內盛之時。遂從陰化而發也。其爲病也。先利而後嘔。並無腹痛。較霍亂之卒然心腹絞痛。嘔吐而利者有間。霍亂之候。四時皆得有之。不僅發在夏秋。病則一井之中。僅見一二。伏陰之候。專在夏秋。病則遠近一律。如傳役然。霍亂發暴而退速。伏陰發緩而退不易。霍亂脈大爲可治。微細爲不可治。伏陰脈微或伏。尙屬可治。惟陽氣將通。脈當微續。若暴復洪大者。反不可治。以此較之。源異而派殊。故其名不可不辨也。古人所謂治病必先辨名。識得病名。而後可以究病因。察病狀。則立方用藥。自有把柄。雖千變萬化。却有一定不移之法。予因近代寒溼伏邪。爲



患甚鉅。奈舉世皆以霍亂目之。而方法錯亂。遺人夭殃。可勝惜哉。茲特辨正病名。俾入門診視者。先取而明辨之。則病是者。不爲藥石所誤。而同登壽域矣。

### 原病

伏陰之爲病。先利而後嘔。脈微欲絕。甚則脈伏。一

此揭時行伏陰之脈症也。凡後稱伏陰病者。皆準此。

伏陰病。本寒溼陰邪。伏藏肺脾腎三經孫絡。而晚發也。蓋寒者水之氣。溼者水之標。水爲天一之元。於卦爲坎。而先天屬坤。故在天爲寒。在地爲水。含於土中。爲溼。溼動則爲潮。爲霧。升騰於天。則爲雲。轉而下降。則爲雨。爲露。爲霜雪。得時則萬物得養。失時則萬物致害。如歲火不足。則水氣乘之。春當溫而不溫。夏當熱而不熱。以天之寒氣下降。地之溼氣上升耳。人感其氣。則肺脾腎三經受邪。何者。天氣通於肺。地氣通於脾。水氣通於腎也。又肺脈起中脘。脾脈從胃別上膈。注心中。腎脈從肺出。絡心注胸中。皆經胃交關之所。故寒溼伏邪。發端於此。邪勢將發。則肺脾腎三經之陽氣奪矣。腎陽奪則水無所主。脾陽奪則水無所

制。肺陽奪則肅化失職。膀胱不得宣泄。而水無所通。於是水液泛濫於腸胃。直決而下。故下利清水。水液下利。則陰氣上逆而爲嘔。經云。陽病者上行極而下。陰病者下行極而上。故此病先利而後嘔。脈者血之府。寒盛則血凝。凝則脈不通。故脈微欲絕。甚則脈伏。

伏陰病。胸中不樂。頭微眩。四末微麻。小便不通。下利清水。嘔嘔欲嘔者。蘇砂平胃散主之。二

此承上條以詳其治也。陰邪擁踞膜原。清陽爲其阻遏。不得上達頭腦。旁通四末。故頭微眩。四末微麻。清陽不運。則胃家水穀之精。不得游溢於脾。而上歸於肺。通調水道。下輸膀胱。故小便不通。小便不通。則泛濫腸胃之水。無所消納。故下利清水。然水有或白或黃或黑之別。白色者肺病甚。黃色者脾病甚。黑色及純清者腎病甚。各就其偏勝而化也。嘔嘔欲嘔者。陰邪逼胃也。此際如非溫中通陽之方。不足以破陰邪擁踞之勢。故主以蘇砂平胃散。

蘇砂平胃散

溫中通陽法傳

茅山蒼朮 二錢

厚

樸 薑汁炒

陳橘紅 一錢

甘草 一錢

紫蘇葉一錢 砂仁一錢

共爲粗末。加生薑一錢。大棗三枚。水三杯煎。分三服。不愈再照前煎服。嘔吐清水。加桂枝一錢。水漿不得受。加乾薑八分。轉筋疼痛。加川牛膝二錢。艾絨一錢。下利白水。倍紫蘇。加紅豆蔻一錢。下利黃水。倍蒼朮。下利黑水。或純清水。倍砂仁。如服藥不受。再加童便一杯。冲入藥內。隨嘔隨服。不分劑次。總以不嘔爲度。

解方平胃散一方。原爲滿悶嘔泄設。蓋以陰氣不積胸中。不得滿悶。寒不侵胃。不嘔。溼不困脾。不泄。故方中有蒼朮厚樸橘紅生薑之辛溫。以消陰邪。甘草大棗之甘平。以益脾胃。合爲辛甘通陽之劑。使陽復則陰消。而滿悶自除。嘔泄自止。茲寒溼伏邪。發端於膜原。而爲胸中不樂。頭微眩。四末微麻。小便不通。下利清水。嘔嘔欲嘔。較之滿悶嘔泄。雖異派而同源。故就原方加紫蘇砂仁。以通肺腎之陽。並助諸藥力。溫中行氣。俾肺脾腎三經之陽氣來復。而擁踞膜原之陰邪。可立消矣。

伏陰病。嘔吐清水。耳鳴聲痞。四肢逆冷者。宜蘇砂平胃散加桂枝。水漿不得受者。



再加乾薑。三

上條嘔嘔欲嘔者。陰邪逼胃也。胃家既爲陰邪所逼。則嘔吐在所不免。耳者宗脈之所聚。嘔吐則胃中空而宗脈虛。虛則下溜。脈有所竭。故耳鳴。瘖音聲不曉也。蓋音出於肺。而本於腎。陰氣客於會厭。則肺腎之氣發而不宣。故聲瘖。四肢逆冷者。陽氣衰不能滲榮其經絡。故手足爲之寒也。較上條四末微麻爲甚。此際正氣雖奪。而邪勢方張。當以驅邪爲務。則蘇砂平胃散宜之。加桂枝者。以其辛香內通藏府。外通經絡。爲善通血氣之上品耳。水漿不得受者。陰邪上逆而拒格也。故再加乾薑以散逆。

伏陰病。面塵肌消。目眊陷。目睛冒。渴飲熱湯。四肢逆冷者。附子理中湯主之。四

伏陰病。即首條所訂之脈症也。手足陽明皆爲多氣多血之府。主飢肉。其脈榮於面。大肆嘔利。則腸胃空乏。所以面塵肌消。肌消則目眊陷。五藏六腑之精氣皆上注於目。而爲之睛。嘔利太過。則精氣內奪。故目睛冒。冒者睛竭不能照物。上視而露白也。嘔利傷津。津傷則思水以潤之。陰盛奪陽。陽奪則思火以熨之。故渴飲熱湯。四肢逆冷。上條已言之矣。此症陰邪充斥。內外瀰滿。而陽氣幾盡。

如非離照當空。何以消陰霾而轉陽和。故以附子理中湯主之。

附子理中湯復陽消陰法

附子二錢

人參一錢

白朮生一錢

乾薑一錢

甘草炙一錢

水二杯。煎去滓。分二服。不愈再依前煎服。轉筋。加艾絨二錢。川牛膝二錢。

嘔甚。加半夏一錢。薑汁一匙。沖服。腹痛。加木香一錢。臍下動氣。去朮加肉

桂六分。心中悸。加茯苓二錢。妊婦。加當歸二錢。芎藭一錢。溼盛。易白朮

為蒼朮二錢。呃逆。加丁香柿蒂各一錢。

方人身以陽氣為主。人之有陽。猶天之有日。日光煦照。則萬物發生。陰氣蔽明。

則萬物疵癘。寒溼皆陰慘之邪也。陰邪盛則陽氣衰。衰而不振。其氣乃竭。竭則

真陰絕而死。是故生氣通天論云。陽氣者若天與日。失其所則折壽而不彰。仲

聖有理中四逆真武白通等方。皆為破陰救陽設。茲陰邪充斥。內外瀰滿。而陽

氣幾盡。不得不假附子理中之離照。消陰復陽。以大起生機。原方用人參甘草

補益中土。白朮健脾燥濕。乾薑溫胃散寒。洵治中脘虛寒之的劑也。而此症以



之消陰復陽。重在加一附子耳。至於嘔甚。加半夏薑汁。轉筋加牛膝艾絨。腹痛加木香。動氣去朮加肉桂。心中悸加茯苓。妊婦加芎歸。溼盛易白朮爲蒼朮。呃逆加丁香柿蒂。皆隨症變法。不得拘拘其方。

伏陰病轉筋疼痛者。附子理中湯主之。蘇砂平胃散亦主之。均宜加牛膝艾絨。危急者以湯熨法。<sub>五</sub>

轉筋疼痛者。陰邪搏筋。筋脈因而歛急也。故以消陰復陽之附子理中湯。加牛膝艾絨。溫筋和血。逐溼祛寒。則表裏並治矣。若初起卽轉筋者。又當以驅邪爲重。故以蘇砂平胃散。仍加牛膝艾絨。兩方均宜加之者。以牛膝苦酸。主寒溼痿痺。四肢拘攣。且似人筋。故能直達筋所。舒筋和血。艾絨溫暖。善祛寒溼。有溫中達表之功。能轉肅殺爲陽和。則搏筋之邪。當隨汗解。不得有轉筋入腹之患。若疼痛危急。則以湯熨法。溫筋散邪。以助藥力。而收全功。

### 湯熨法擬

蓼梗並葉根一大束。水煎湯。蒸轉筋痛處。得汗則愈。  
葱白一握。搥作餅。貼痛處。以艾絨如荔枝大。於葱餅上火燃灸之。得煖則愈。



小麥麩升許。酒調焙熱。布包線紮。爛揉痛處。冷則易之。以愈爲度。以上各法。屢用必驗。以須內服通陽方劑。以逐其邪。否則毒復陷裏。反成危候。伏陰病。冷汗自出者。陽復則止。六

伏陰病。冷汗自出者。身冷汗出也。經云。陰勝則身寒。汗出身常清。仲聖云。極寒反汗出。身必冷如冰。是皆爲陰汗而言也。人但知熱能致汗。不知寒亦致汗。寒者非外感之寒也。乃陰盛陽衰。不能衛外。致表虛不固。而汗隨氣泄也。法當察氣虛之微甚。微虛者略扶正氣。其汗自止。甚虛者非甘薑桂附速救。元陽不可大抵此症自汗。不必專司。但權正病之輕重。隨勢用藥。使陽氣來復。而汗自收矣。診者勿以汗出爲慮。浪投固澁。致人於死。

伏陰病。法當嘔。今反不嘔者。必腰痛。或面赤腹痛。乾嘔咽痛。利止脈不出者。通脈四逆湯主之。七

伏陰病。本先利而後嘔。今下利清水。渴飲熱湯。手足逆冷。脈微欲絕。或伏而不見。轉筋疼痛等症。悉具。而反不嘔吐者。腎部虛寒。伏邪就下爲病也。腰爲腎之部分。邪氣發端於此。故知其人腰必疼痛。又或面赤。或腹痛。或乾嘔。或咽痛。或

利止脈不出者。皆少陰腎經虛寒之所致也。大要面赤者。陰盛於下。陽格於上也。腹痛者。陰陽不和也。乾嘔者。陰氣鼓胃也。咽痛者。少陰之邪循經而上結於咽也。利止脈不出者。正氣內奪。血無所主。泣澁而不通也。當此陰邪充斥。生氣已離。亡在俄頃。如非大劑溫通。疾回元陽。不足以挽生機。故主以通脈四逆湯。

通脈四逆湯

甘熱回陽法

乾薑二錢

附子

二錢

甘草

一錢

水二杯。煎去滓。溫服。脈不出。再依前法煎服。轉筋疼痛。加牛膝一錢。艾絨一錢。面赤。加葱白三莖。冷服。腹中痛。加芍藥一錢五分。

乾嘔。加生薑一錢。

咽痛。加桔梗一錢。

利止脈不出者。加人參一錢五分。

腰痛甚。加杜仲一錢五分。

方通脈四逆湯。即四逆之變法也。經云。寒淫於內。治以甘熱。溼淫於內。治以苦

熱。是方備之矣。武進費伯雄曰。陰慘之氣。深入於裏。真陽幾幾欲絕。非此純陽之品。不足以破陰氣。而發陽光。又恐薑附之性。過於燥烈。反傷上焦。故倍用甘草以緩之。茲陰邪充斥。生氣已離。亡在俄頃。當大呼疾叫。以回元陽。而挽生機。又非柔緩之甘草。所能當其任。故倍乾薑。若轉筋加牛膝艾絨。紓筋和血也。面赤加蔥白冷服。通格上之陽也。腹痛加芍藥。和在裏之陰也。乾嘔加生薑。降逆和胃也。咽痛加桔梗。散陰邪之上結。咽中也。下利止。脈不出。加人參。補元氣以復脈也。腰痛甚。加杜仲。益精強志。俾正復邪除也。加減隨宜。貴在審勢。不必刻舟求劍。

變症

伏陰病。嘔利止。厥回而噦者。養胃湯主之。半夏橘皮湯亦主之。若厥不回而乾嘔者。可與橘皮湯。

噦與乾嘔相似。皆有聲無物。但噦聲濁而長。嘔聲小而短。伏陰病嘔利止。厥回而噦者。其因有三。一則胃氣虛槁。肝木乘而鼓之也。一則因津竭而恣飲水漿。



水虛相搏也。一則痰飲乘虛。壅塞胃口。反令胃氣上冲也。總緣嘔利太過耳。養胃湯所以養胃氣。潤枯槁。則肝木無隙可乘。自爾胃安噦止。半夏橘皮湯既有散水調虛之功。又有滌痰降逆之用。則水虛相搏。與痰飲壅塞胃口者。皆能已之。故兩症並治也。若厥不同而乾嘔者。皆膈間陰邪未盡。胃中陽氣不宣。鬱而上逆也。橘皮湯通陽消陰。宣胃降逆。故可與其他肺熱氣壅。熱邪鬱遏胸中。腸胃實滿。膀胱熱結。陽升風動。陰虛火炎。種種致噦者。各有專門。不在此例。

養胃湯

養胃潤槁法

人參一錢

沙參二錢

萎蕤二錢

石斛二錢先煎出汁

甘草一錢

半夏八分

加大棗三枚擘開。水五杯。煎至二杯。去滓分二次溫服。不已。再依前法煎服。

或加生薑八分亦可。

治胃虛津槁之呃逆。加刀豆子一錢煨用。

新瘥不欲食喜飲者。加白芍二錢。

半夏橘皮湯

溫胃散水滌痰降氣法

半夏二錢

橘皮一錢

茯苓一錢

人參一錢

甘草一錢

乾薑一錢

加大棗三枚。擘開。水三杯。煎去滓。頓服。不已。再服。或加生薑八分。欬逆者。亦可與服。

方解。嘔利則劫奪胃津。空乏胃氣。於是土虛木乘而為噦也。養胃湯用人參沙參。萎蕤石斛。甘草大棗。純甘填胃。其樞紐全在半夏之辛平。降逆和胃。運佈津液。則胃氣自復。胃津自還。而木平噦止矣。又半夏橘皮湯。方中以人參甘草大棗。補益胃氣。乾薑茯苓。溫胃散水。半夏橘皮。滌痰降氣。故水虛相搏。痰飲塞胃。皆能已之。兩方均有加用生薑之例。蓋亦散逆之意耳。

橘皮湯 通陽消陰宜胃降逆法

橘皮二錢

生

薑四錢

水三杯。煎去滓。分三服。

方解。凡藥之苦者必降逆。辛者必散鬱。溫者必消陰邪。茲陰邪留於膈間。阻遏胃中陽氣。因而厥逆乾嘔。未可遽進補劑。壅塞氣機。則是方可與也。

伏陰病。嘔利止。心下痞。噫氣不除者。可與代赭旋覆湯。二

嘔利雖止。而胃氣已虛。則厥氣上逆。連衡痰飲。壅塞心下。阻礙氣機。故心下痞。噫氣不除。噫者胸中不舒。氣鬱而出之不覺也。俗謂噯氣。代赭旋覆湯。補中宣氣。鎮逆滌痰。故可與。

代赭旋覆湯補中宣氣鎮逆滌痰法

代赭石一錢 旋覆花二錢 絹包 人參二錢 甘草二錢

半夏二錢 生薑一錢 大棗三枚

水三杯。煎二杯。去滓分二次溫服。不愈再煎服。

方嘔利後。中虛氣逆。雖心下痞。噫氣不除。不可攻伐。以犯虛虛。故用人參甘草大棗生薑溫補中氣。代赭鎮逆。佐人參歸氣於下。旋覆宣氣。佐半夏滌痰於上。濁降則痞可消。清升則噫氣自除。此本傷寒發汗若吐若下。解後心下痞。噫氣不除之方。而此症似可比類並觀。不妨借用。

伏陰病。嘔利後。胃家虛寒而呃者。與附子理中湯。加丁香柿蒂。胃家虛熱而呃者。與橘皮竹茹湯。胃虛痰滯者。與丁香柿蒂湯。胃虛津槁者。與養胃湯。加刀豆子。三



呃者。餉也。氣逆也。俗稱打餉。古謂之噦。誤也。此症有虛有實。有火有痰。有水氣。有冷滯。大要治虛以補。治實以泄。治火以清。治痰以滌。水則分利。滯則消導。固不易之理也。所謂溫而補之。清而泄之。引而伸之。達而降之。推而逐之。開而豁之。無非治呃之法也。惟伏陰之呃。雖微有寒熱之分。而胃虛兩字定矣。如舌苔黑而滑者。胃家虛寒也。與附子理中湯。加丁香柿蒂。溫補以止呃。舌無苔。唇淡紅而乾者。胃家虛熱也。與橘皮竹茹湯。清補以止呃。胸痞不飢。喉間漉漉有聲者。胃虛痰滯也。與丁香柿蒂湯。益胃豁痰以止呃。舌淡無苔。口乾思飲。得食呃稍止者。胃虛津槁也。與養胃湯。加刀豆子。益氣生津以止呃也。

橘皮竹茹湯清補止呃法

橘皮一錢五分

竹茹一錢五分

人參一錢

甘草一錢

大棗三枚

生薑八分

水三杯。煎去滓。溫服。不已。再煎服。

方解伏陰之邪。何以反生熱呃。蓋因藥劑辛燥太過。消灼清津。致胃中津虛生熱。而為呃也。故仍以橘皮竹茹湯補虛生津。散逆清熱。則胃安而呃止矣。

丁香柿蒂湯溫中降逆法

丁香一錢 柿蒂一錢 人參一錢 橘皮一錢

半夏一錢 茯苓一錢 甘草炙八分 生薑一錢

水四杯。煎去渣。分二次溫服。

方解伏陰嘔利後。胃虛痰滯而嘔者。蓋陰邪雖退。而陽氣已虛。虛則水精不運。凝積而為痰也。痰滯則氣逆。嘔之所由生也。方以橘半薑苓佐丁香柿蒂。溫中和胃。降氣滌痰。又以人參甘草補益正氣。俾水精得以運行。則痰消氣順。而嘔逆自止。古人治火嘔亦用此者。從治之意也。

伏陰病嘔利後。頭汗出微喘。嘔聲連連者。急與參附湯。調刀豆粉。四

陰慘之邪。深入於裏。既奪脾胃以爲嘔利。復逼腎氣而走散真陽。厥氣以之上逆。故頭汗微喘。嘔聲連連。當此危亡之候。如非急與大劑參附湯。調服刀豆粉。峻補脾腎。收攝真陽。不足以挽性命於微芒。若用丁香柿蒂橘皮竹茹等方。以爲穩當。則誤矣。

參附湯峻補脾腎收攝真陽法

人參三錢

製附子三錢

刀豆子

二錢煨存性研爲末

水三杯。煎參附至一杯。去渣調刀豆子末頓服。

方補先天無如附子。補後天無如人參。此脾腎兩補之方也。刀豆子溫中下氣。暢腸胃。益腎陽。以之佐參附。理脾和胃。納氣歸元。則頭汗自收。微喘自定。呃逆自止。用末者。蓋取急治之意耳。

伏陰病。欬逆者。與半夏橘皮湯。五

陰邪客於肺。留而不去。則清肅之令不得下行。氣逆而爲欬也。治當開肺逐邪。溫中降逆。則半夏橘皮湯可與也。

伏陰病。心中懊懣。時欲嘔。咯痰得出。則氣鬱少寬者。宜二陳加香砂湯。六

脾陽困則泄。胃陽困則嘔。嘔泄並作。則脾胃兩傷。傷則升降不利。轉輸失職。於是水精不得運佈。而凝積爲痰。痰壅胸膈。則懊懣生焉。懊懣者。鬱鬱不舒貌。比之煩悶尤甚。時欲嘔者。氣鬱欲伸之象。所以咯痰得出。則氣鬱少寬。治痰之法。在上者越之。而正氣已虛。難堪再事峻吐。故宜二陳湯加香鼓砂仁。運脾和胃。理氣化痰。以代吐劑之用。令吐者自吐。而無虛虛之弊。此與傷寒表未解。誤下



而成懊懣者不同。

二陳香砂湯

運脾和胃理氣化痰法

半夏二錢

陳皮一錢

茯苓一錢

甘草五分

淡豆豉一錢

砂仁五分

水三杯。加生薑五分。煎去滓頓服。令痰出乃安。不安再煎服。或藥後以指探咽取吐。俾痰隨吐而出。較之峻吐為穩。

方中不和則痰涎積。二陳為治痰之主藥也。茲伏陰病嘔利後。心中懊懣。時欲嘔。咯痰得出。則氣鬱少寬。其為痰壅胸膈明矣。夫膈上痰患。非吐不除。而吐則正氣益虛。惟以理氣化痰之二陳湯代之。加豆豉砂仁者。以豆豉本穀食所釀。炒香合砂仁。溫中行氣。和胃運脾。俾正氣從斯以安。邪氣從斯而除。藥後復以指探咽者。引伸而取吐也。

伏陰病。心下痞塞。按之滿悶者。疏中丸主之。七

痞塞滿悶。皆不通之象。所以不通者。脾胃之升降失職。濁陰之氣填塞胸腹耳。此症嘔利傷中。中陽虛。則痰氣得以上逆陽位。而為痞塞。故按之滿悶。主以疏

中丸者。所謂中焦如漚。疏而逐之也。

疏中丸

升清降濁理氣化痞法

製半夏二兩

人參一兩

白朮五錢生用

升麻一兩

銀州柴胡一兩

猪苓一兩

化州橘紅五錢

澤泄一兩

曬焦礞末。米湯疊丸。勿令見火。每以三錢。生薑煎湯吞下。日二服。夜一服。以愈

為度。小便通利。其痞自消。

又嘔利後。心下痞。按之則痛。用枳實理中陷胸泄心等方。及湯熨揉盪等法。

不效者。亦可與。

方痞否也。塞滿亦否也。天地不交而為否。嘔利傷中。則脾之清氣不升而下溜。

胃之濁氣不降而上逆。逆則陰氣滿腹。痰飲聚於胸中。而痞塞滿悶之病成矣。

方以人參白朮益胃健脾。補中培土。使升柴從九地之下。升清於上。猪澤從九

天之上。降濁於下。清升濁降。痞塞自開。而轉痞為泰之功。在半夏橘紅之善開

肺降逆耳。半夏散中有斂力。能斂清散濁。故數倍於橘紅也。

伏陰病。心下痞。按之則痛者。新製理中散主之。

嘔利中虛。脾胃困鈍。新進飲食。不能運化。與乘虛上逆之痰氣相搏。故心下痞鞭。按之則痛。法宜溫中補土。行氣導痰。故以新製理中散主之。若與專事消剋通利方。則死不旋踵矣。

新製理中散溫中補土行氣導痰法

人參一兩

白朮生用一兩

茯苓一兩

枳實一兩

乾薑三錢

陳皮三錢

甘草五錢

砂仁三錢

共曬焦爲細末。每以五錢。水一杯煎服。日二服。夜一服。

嘔利後誤食冷滯。或誤餌苦寒藥劑。而成痞鞭疼痛者。亦宜服之。

方解中虛挾寒。脾胃困憊。古人有理中湯丸以治之。若溫邪將發。冷滯適傷。或藥餌苦寒。阻遏升揚之勢。邪氣不得外泄。而壅塞心下。又或傷寒誤下。結胸陷胸。泄心等法不效者。悉以理中方加枳實茯苓。名枳實理中丸。治之神效。蓋方中以人參益胃。白朮健脾。甘草和中補土。乾薑溫中散寒。又加茯苓導邪。枳實通壅。仍以理中名者。變理中氣之義也。中氣旺則運化有權。不問寒凝氣滯。虛逆結胸。皆可立除。茲復加砂仁陳皮。助諸前藥。溫中補土。行氣導痰。雖有堅積。亦



當自化。

伏陰病。嘔利止。或未止。心中煩。喜熱飲。時去衣被。而肢體若冰。與附子理中湯加童便。其煩不退者。正陽丹主之。九

陰邪阻遏陽氣。鬱於胸中。故心中煩。煩者心中悶亂。轉側不安也。又心煩則氣燥。燥則思水以潤之。而喜熱飲者。陽微喜煖也。時去衣被者。陽鬱欲伸也。陽氣既為陰邪所困。不能榮衛於外。故肢體若冰。法宜溫中以振陽氣。而陰邪內外佈滿。不用嚮導。則溫中之藥不得入。故以附子理中湯加童便。藥後煩仍不退者。元陽失守之徵也。夫元陽之氣。生於太極未判之時。藏於水中。而不離乎水。相君火以資運用。故喜溫而惡寒。腎為人之水藏。陰邪侵凌於下。則元陽失守而上。君主為之不寧。又非溫中振陽法。所能安其君相也。設正陽丹者。使相火自歸其宅。君火以之獲安。則煩亂自解矣。

正陽丹辟陰正陽法

龍齒六錢

丹砂一錢  
錢明亮如箭鏃者真

共研極細。每用一錢。開水沖服。并治驚病安魂魄

方龍稟天地純陽之氣以生。出乎震而藏乎坎。其性至動而能靜。故其骨齒收斂正氣。鎮攝元陽。丹砂得天地五行之精以成其質。其色正赤。又爲天地純陽之色。其體屬金。而其色屬火。有兌離之象。以卦驗論。震爲先天之離。兌爲先天之坎。天地所用者水火。人生所用者精神。故斂精之龍齒。並入火藏以養神。清神之丹砂。並入水藏以補精。其能安魂魄者。隨神往來。謂之魂。治精神卽以安魂魄也。本經以此二物列爲上品。以其純陽能通神明也。凡通神明之藥。皆足以辟陰邪而正陽氣。茲陰邪逼動元陽。上乘火藏而爲煩亂。得此辟陰正陽之品。俾元陽返本。心神得安。而煩亂可除。丹砂一錢。而龍齒六錢。以清神之藥宜輕。斂精之藥宜重。且合生成之數也。

伏陰病。心中煩。渴欲冷飲。身無熱而喜風。就涼甚。則搦扇不知風。飲冰不知冷。手足厥而面赤。宜人參四逆湯。<sup>十</sup>

此裏寒下虛。虛陽上泛之所致也。法當益氣破陰。以潛上泛之虛陽。則人參四逆湯宜之。伏陰初起。恆見此候。

人參四逆湯破陰潛陽法

即前通脈四逆湯。加人參二錢。水煎冷服。

伏陰病嘔利止。心中如焚。舌色赤。渴飲冷水。搦扇不知風。飲冰不知冷。臥地不起者。潛陽湯主之。十一

上條嘔利未止。本條嘔利已止。上條裏寒下虛。虛陽上泛所致也。本條泄利太過。真陰虛竭。不特水不濟火。心陽獨亢。且並元陽無所依附。而上乘於心。君相二火相濟為炎。始有此候。雖寒冰不能退此煩躁。故設潛陽湯。此較卒病陰躁有間。卒病與此同一煩躁臥地。惟煩渴不能飲水為辨。

潛陽湯滋陰潛陽法

乾地黄二錢

龜版生一錢

附子製一錢

龍齒生二錢

水二杯。煎一杯。去滓頓服。藥後小便通利。其煩即退。不退。再作服。

方名潛陽者。蓋取潛藏元陽之義也。夫潛陽必先益陰。俾陰足則元陽得有附麗而潛矣。龍稟天地元陽之氣以生。故人之元陽上泛。謂之龍火奮起。茲真陰下奪。水不濟火。心陽既獨亢於上。而元陽又失守於下。兩火交加。而煩躁生焉。地黃色黑歸腎。汁紅養血。血足則陰氣自和。陰氣和則心火有濟。而亢燥自



平。龍與人身元陽合其德。藏於水中。而不離乎水。齒本於腎。能引元陽返本歸宅。第恐龍不安窟。復成亢悔之勢。故用龜版以御之。井泉溫而龍退蟄。故用附子以溫下元。即古之所謂養龍法也。

伏陰病。嘔利止。肢體疼痛。或手指不能握者。桂枝養榮湯主之。十二

疼近於肉。痛近於骨。總緣氣滯血凝耳。蓋營血在於經絡。固藉衛氣以資流行。是血以氣為主宰。而氣亦以血為窟宅。相須而不相離也。茲寒傷營血。則衛氣不得獨衛於身。始有此候。法宜和衛養血。故設桂枝養榮湯。

桂枝養榮湯和衛養血法

桂枝一錢

白芍一錢

甘草一錢

人參二錢

當歸二錢

生薑一錢

大棗五枚

水二杯。煎一杯。去滓溫服。不愈再煎服如前法。下條手足斂拘。得煖稍紓者。去芍藥。加附子一錢五分。

方是方即桂枝湯加人參當歸。以之和衛養血也。原方以桂枝統生薑大棗。辛甘通陽。芍藥甘草酸甘化陰。陰陽和則外邪去矣。茲加人參當歸佐桂枝通行

內外補營陰而益衛陽。則大氣周流。所謂氣血足而百骸理。諸虛疼痛。手指不握。未有不愈者也。

伏陰病。嘔利止。二三日後。卒手足斂拘。得煖稍紓者。與桂枝養榮湯。去芍藥。加附子。十三

初病轉筋疼痛。及筋脈拘急者。陰邪搏筋也。此嘔利已止。二三日後。卒然手足斂拘。得煖稍紓者。乃營衛大傷。筋脈失養。加之寒邪外薄也。故與桂枝養榮湯。加附子。和衛養血。溫經逐邪。則筋脈自紓。去芍藥者。避其酸斂也。知爲寒邪外薄者。以得煖稍紓故也。

伏陰病。嘔利止。脈出而代。心動悸。時煩熱。渴欲甘飲。或鹹飲。口吐白沫。或筋惕者。可與炙甘草湯。十四

嘔利已止。脈伏已出。則知陰邪已退矣。而脈代心動悸。似傷寒炙甘草症也。大要嘔利轉筋。正氣已傷。治法固當以溫陰通陽爲首務。然辛烈太過。當氣液大傷之候。最易劫奪真陰。脈者血之府。原於腎而主於心。真陰竭則心血枯。故脈出而代。心動悸。時煩熱。氣血虧則津液竭。竭則欲飲。胃津竭則飲而思甘。腎液

竭則飲而思鹹。乃不易之理也。口吐白沫者。肺氣虛而燥也。筋惕者。血液無以榮養筋脈也。夫以陰慘之邪。偏釀此枯燥之疾。蓋緣醫者過投辛烈耳。陰皆將盡之孤注。陽僅膏覆之殘焰。惟炙甘草湯可增其殼內絡外之脂液也。故可與炙甘草湯經即復脈湯滋陰和陽法

甘草 二錢

人參 一錢

火麻仁 炒 一錢

阿膠 一錢  
後烱化

乾地黄 八錢

巨麥冬 四錢

桂枝 一錢

生薑 一錢

大棗 三枚

清酒一杯。水三杯。煎去滓。再內阿膠。烱化頓服。日二服。夜一服。

筋惕甚。以火麻仁易酸棗仁。

方本方亦名復脈湯。為滋陰之祖方也。其功固在地黃麥冬人參甘草等。一派甘寒純靜之品。而其妙全在薑桂白酒耳。蓋天地之機。動則始化。靜則始成。使諸藥不得薑桂白酒動盪其間。不能通行內外。補營陰而益衛陽。則津液無以復生。枯槁無以復潤。所謂陽以相陰。陰以含陽。陽生於陰。柔生於剛。剛柔相濟。則營衛和諧。營衛和則氣血化。氣血化則津液生。津液生則百虛理。脈之危絕。



安有不復者乎。茲陰邪已退。而燥涸復起。若非本方滋陰和陽。不足以化生津液。而潤枯槁。

伏陰病。諸症除。似寤似寐。呼之不應。脈微者。爲氣奪。宜獨參湯。十五

諸症除者。謂伏陰應有之嘔利轉筋肢冷溺悶聲瘖耳鳴等症。悉已除也。似寤似寐者。寤主動屬陽。寐主靜屬陰。陰出於陽則寤。陽入與陰則寐。嘔利太過。則元氣大傷。陰陽不相出入。故似寤非寤。似寐非寐。若呼之不應者。非耳閉不聞也。是氣奪不語也。氣奪則脈微。人參大補肺中元氣。肺氣旺則四藏之氣皆旺。陰陽得以和協。精血得以資生。神明得以有歸。而神識自清。機竅自靈。語言自利。寤寐不相混矣。勿作昏厥。浪用芳香開閉。益奪元氣。而速其死也。

獨參湯傳

人參

重則二兩輕則一兩至輕六錢必須量人量症以施之

濃煎頓服。待元氣漸回。隨症增減。

集解柯韻伯曰。一人而係一世之安危者。必重其權而專任之。一物而係一人之生死者。當大其服而獨用之。故先哲於氣幾息血將脫之症。獨用人參二兩。濃

煎頓服。能挽回性命於瞬息之間。非他物所可代也。世之用者。恐或補住邪氣。姑少少以試之。或稍加消耗之味。以監制之。其權不重。其力不專。人何賴以得生乎。如古方霹靂散。大補丸。皆用一物之長。而取效最捷。於獨參湯何疑耶。

妊婦伏陰病。立方須加芎歸。十六

妊婦伏陰病。治法原與常人無異。但須保護胎元。故按症立方。須佐芎藭當歸以保之。

伏陰病。嘔利止。小便不利者。爲未愈。十七

伏陰一症。當以陽和爲愈。小便通利。是陽和之徵也。茲嘔利止。而小便仍不通利者。則知陽氣未和。故云未愈。此是病症進退之關。診者最要細審機宜。以善其後。

伏陰病。諸症除。小便不通者。不可與五苓。可與腎氣湯。十八

膀胱者。州都之官。津液藏焉。氣化則能出矣。嘔利太過。津液已奪。且肺脾腎三經。先爲陰邪所困。膀胱不得氣化。可知。故諸症除。而小便不通。諸症者。卽伏陰所有之症也。不可與五苓者。以津液大傷之後。難堪再事滲利。重竭其液。故禁

之。腎氣湯。功能扶陽化氣。故可與。

腎氣湯

即腎氣丸料扶陽化氣法

乾地黄

入兩酒焙

薯蕷

蕷四兩

山茱萸

二兩

澤瀉

瀉三兩

茯苓

苓三兩

牡丹皮

二兩

桂枝

一兩

附子

炮一兩

車前子

二兩

牛膝

二兩

共為粗末。每用八錢。水一杯煎服。以小便通利為度。不通再煎服。

方名腎氣者。蓋以腎具水火之用。化腎氣即以權水火也。地黄薯蕷丹皮山

茱以養陰中之水。茯苓澤瀉車前牛膝以利陰中之滯。桂附益命火以化陰中

之真氣。真氣化則津生而肺利。土旺而脾和。於是水道通調。旁光自利。小便自

通矣。不作丸而作湯。以湯劑快捷於丸耳。

伏陰病。欲解時。小便必通利。十九

小便通利。則表裏三焦之陽氣和矣。陽氣和則陰邪消。故為欲解。

死候



伏陰病。朝發暮死者。其症肢厥而躁。爪甲紫黑。神識不清也。一

此陽絕陰結之死候也。其症蓋由內伏陰邪。外感寒氣。或汗出浴水。或臥露貪涼。或勞汗感風。或恣飲冷水之所致也。靈樞曰。三虛者。其死暴疾也。得三實者。邪不傷人也。乘年之衰。逢月之空。失時之和。因爲賊風所傷。是謂三虛。素問曰。乘年之虛。則邪甚也。失時之和。亦邪甚也。遇月之空。亦邪甚也。重感於邪。則病危矣。此正重感於邪也。故朝發暮死。

伏陰病。數欠者。陽氣衰也不治。則陽絕而死。二

欠。俗稱呵欠也。經云。人之欠者。何氣使然。衛氣晝日行於陽。夜半行於陰。陰者臥。陽者主上。陰者主下。故陰氣積於下。陽氣未盡。陽引而上。陰引而下。陰陽相引。故數欠。陽氣盡。陰氣盛。則目瞑。陰氣盡而陽氣盛。則寤。此平人陰陽相引之理也。若病伏陰之人。陰邪盛於下。陽氣衰於上。陽氣欲與陰爭。致引陰邪而上。陰上陽下。陽上陰下。彼此互爭。故亦數欠。當急扶陽抑陰。以救危亡之陽。如醫者以爲病人呵欠爲欲愈。因循不治。勢必陰勝陽絕而死。

伏陰病。小便利。如豚肝汁者死。三

小便不利。是陽氣不化。法當扶陽化氣。而醫者以滲利之劑重竭其液。致陰血莫保。隨藥下脫。而洩如豚肝汁。故死。他如溼溫等症。有洩如豚肝汁者。不在此例。

伏陰病。與溫通法。厥回脈微續者生。暴復洪大者死。身熱汗出如珠者速死。四此皆藥餌辛烈太過。暗奪真陰。致虛陽無所依附。出而不返。救陰挽陽。藥之不及。故死。

伏陰病。肢厥轉筋。與四逆理中等方。或湯熨艾灸等法。其病不減者死。五內外溫通。其病不減者。陽氣絕也。陽絕則死。

伏陰病。先轉筋。續至舌捲囊縮者死。六

筋者聚於陰器。而脈絡於舌本。肝者筋之合也。故轉筋之疾。屬於肝。肝藏虛。則陰邪易入。入則筋脈斂束。亂則舌捲囊縮而死。

伏陰病。先轉筋。後少腹疼痛。或喘滿者死。七

少腹疼痛。肝病也。喘。肺病也。滿。脾病也。皆非死症。若由轉筋而致者。未有不死也。何者。轉筋入裏。是陽傳於陰也。陽傳於陰者死。

伏陰病。惡寒甚。脈伏而躁者死。八

內外俱寒。有陰無陽也。

伏陰病。嘔利止。厥回。小便利。爲欲愈。而腹厥下利者死。九

嘔利止。厥回。小便通利。爲陰去陽還。故爲欲愈。而復厥下利者。爲陰復陽消。陰復陽消者。將還之陽氣未安。而陰寒之邪復侵。則陽不能保矣。故死。

伏陰病。嘔利已止。復欲下利而無利。時時眩冒者死。十

此氣質俱亡之候也。嘔利已止。其病當愈。而復欲下利者。陰氣下陷也。無利者。利盡而無物也。時時眩冒者。陽氣上脫也。故死。

伏陰病。面黑者死。目直視者死。唇痿不收者死。鼻孔黑而氣冷者死。齒黑而乾者死。十一

此五者。見一則死。面黑。心氣絕也。目直視。肝氣絕也。唇痿不收。脾氣絕也。鼻孔黑而氣冷。肺氣絕也。齒黑而乾。腎氣絕也。總之面形陰慘。神氣兩奪者。皆死之徵也。

伏陰病。厥逆。呼之不應。脈絕者死。十二



前變症篇。諸症除似寤似寐。呼之不應。脈微者。是氣奪不語。大進獨參湯可愈。本條厥逆。呼之不應。脈絕者。陰邪盛。陽氣絕也。故死。

婦人伏陰病。或未愈。或新瘥。不可乳哺。哺則脫營。其症喘促脹滿。脈大而空。爲難治。十三

營者血之標。血氣爲人身之陰陽。相抱而不相離也。平協則兩相依附。如陽欲上脫。陰下吸之。陰欲下脫。陽上吸之。故不能脫也。婦人伏陰病。或未愈。或新瘥。不可乳哺。小兒者。未愈之時。陰陽各造其偏。新瘥之時。陰陽尙未平協。一經乳哺。則營離而氣孤。氣孤則放肆無歸。而散逆於胸中。故爲喘促脹滿。脈大而空者。營脫之徵也。陰陽脫離。有死而已。故難治。

# 伏陰病目並方法

禁令十條

瘥後七條 計六方 六法

伏陰病新瘥不得瞑 半夏湯

新瘥不欲食喜甘飲 養胃湯加芍藥

腹滿 桔梗半夏湯

不欲食食亦不化胸腹滿悶 異功散

先食後不食心下微痛按之痛劇 胡米煎

聲顫無力語不接續懶言聲微無氣以動 獨參湯

飲食日增數日或十數日不大便腹無所苦

傷寒論陰病比類十八條 計六方 十法

四逆湯 義見通脈四逆湯

理中圓

伏陰論病目

伏陰論病目

二

白通湯 加猪膽汁一方

真武湯

通脈四逆湯 方見原病篇

吳茱湯

金匱經陰病比類七條 計四方 四法

四逆湯 義見通脈四逆湯

生薑半夏湯

雞屎白散

狗屎一丸

傷寒論霍亂比類八條 計四方 四法

理中丸 方見前

桂枝湯 方義見變症篇桂枝養榮湯

四逆湯 又猪膽汁一方義見通脈四逆湯

舌鑑 計二十五式



初病二式  
易治四式  
可治五式  
危候七式  
死症七式

伏陰論病目

# 伏陰論

清 漢川 田宗漢雲槎編著

鄞縣 曹赤電炳章圈點

## 卷下

### 禁令

伏陰病。禁與清涼苦寒。與之必死。一

經云。無致邪。無失正。絕人長命。喻嘉言曰。病人陽氣不足。陰氣有餘。則禁助陰。泄陽。清涼苦寒。皆助陰。泄陽之藥。用於陰慘之病。是致邪失正也。故與之必死。

伏陰病。心下滿痛。不可消導。消導必死。二

既利且嘔。正氣已奪。難堪再事消剋。即心下鞭滿而痛。不過厥氣虛結耳。若與消導。是虛而益虛。故死。

伏陰病。轉筋疼痛。神形已奪者。不可砭針。三



伏陰爲患。不僅奪陽。併亂營血。轉筋疼痛者。血亂筋虛。陰邪乘而搏之也。神形已奪者。氣血傷。而面塵肌消也。初治則內服溫中通陽之劑。外用湯熨艾灸之法。取其助陽破陰耳。若砭針之法。洩氣破血。施於陽熱夾穢。內外脹滿之痧症。立見奇功。而施於氣血兩奪之伏陰。則大犯虛虛之弊。安有不死。

伏陰病。神形已奪未奪。禁與芳香。四

伏陰本非脹閉之疾。芳香耗氣。投之有損。

伏陰病。氣奪不語者。與芳香即死。五

氣奪不語。較他症內閉不語天淵。氣奪者正氣敗也。當以大劑獨參湯救之。內閉者邪氣實也。當以芳香逐穢。先開其閉。若認此症爲閉症。而投芳香。則幾幾欲息之氣絕矣。

伏陰病後。大便不通者。不可攻下。六

病後大便不通有二。一則津液內奪。腸胃枯槁也。一則泄利太過。糟粕未滿也。若投攻下。則將復之正氣。必隨藥而脫。

伏陰病。冷汗自出者。禁酸斂。七

此皆陰盛陽衰。不能衛外。致汗隨氣洩也。當以扶陽爲是。酸斂止汗。則氣機閉塞。而陰邪益盛。

伏陰病。形肉已奪。小便不通者。不可與滲利。<sup>八</sup>

形肉已奪者。氣血俱敗也。氣血敗則津液竭。五苓等滲利之藥。純陽不化。不但不能通調水道。抑且重奪津液。故不可與。若與暑溼泄利。及傷寒水停少腹比例。則誤矣。

伏陰病。不可過投辛烈。<sup>九</sup>

伏陰之病。固以溫通爲主治。惟期恰中病情。不可過當。若辛烈太過。暗耗真陰。陰邪雖退。而陰液已亡。陰亡則陽無所附。浮游變幻。不可復理。如此死者。醫殺之也。可不慎歟。

伏陰病轉筋。不可與木瓜。與則邪留。<sup>十</sup>

伏陰以小便通利爲愈。木瓜斂陰閉陽。阻澁小便。小便不利。陽氣不和。陽氣不和。則陰邪留而不去。

瘥後

伏陰病新瘥。不得瞑者。宜半夏湯。

靈樞經云。厥氣客於五臟六腑。則衛氣獨衛於外。行於陽。不得入於陰。行於陽。則陽氣滿。陽氣滿則陽蹻盛。不得入於陰。陰虛故目不瞑。治之奈何。飲以半夏湯一劑。陰陽已通。其臥立至。蓋瞑者目合而寐也。目不合則臥不安。厥氣者。陰邪上逆也。茲伏陰新瘥。陰邪已退矣。而胃氣未和。陽不得入於陰。獨行於外。故目不得瞑。宜遵經方。用半夏湯。

半夏湯亦名半夏秫米湯引陽入陰法

半夏三錢

秫米六錢即糯粟米

千里長流水揚萬遍。取三杯。葦薪火煎。飲一杯稍益。以知爲度。覆杯則瞑。汗出則已。須如法煎則效。  
方解。陽氣下交於陰則寐。胃居中焦。爲陰陽出入之道路也。胃不和則道路阻。陽氣不得入於陰。而獨行於外。故不得瞑。半夏和胃通陰陽。秫米益陰利大腸。用千里長流水揚萬遍。葦薪火煎。蓋取急下通關之義。秫米臣半夏。而反倍於半夏者。以大腸爲胃之下關。和胃重在利腸耳。陰陽通則營衛和。故覆杯則瞑。汗



出則已。

伏陰病新瘥。不欲食。但喜甘飲者。可與養胃湯加芍藥。二

病時過服辛燥。暗劫胃陰。較之嘔利所傷者。尤為難復。故瘥後不欲食。不欲食者。胃虛不納穀也。喜甘飲者。土虛津竭也。養胃湯原為養胃潤槁設。此處加芍藥。變為酸甘化陰之劑。則胃陰易復。陰復則胃和。而穀食自進矣。若心下脹痛。不欲食者。不在此例。

伏陰病新瘥。腹滿者。與桔梗半夏湯。三

腹滿有虛有實。皆屬脾病。脾氣不和。而為脹滿。經云。腹滿不減者。為裏實。當下之。腹滿時減者。為裏虛。當溫之。又陽邪內陷。而為脹滿者。則口燥咽乾。陰邪入裏。而為脹滿者。則嘔利厥逆。伏陰新瘥而滿者。脾氣虛不能運佈津液。凝注而為飲邪也。邪勝正虛。則陰陽不和。清濁相混。而腹滿見焉。法宜分理清濁。則腹滿自除。故與桔梗半夏湯。

桔梗半夏湯分理清濁法

半 夏二錢 薑製

陳橘紅一錢

茯苓一錢

甘草五分

桔梗一錢

水三杯。加生薑一錢煎。去滓溫服。

凡痰飲之病。悉以二陳為主方。其功在運脾和胃。理氣化痰耳。本方加桔梗。以桔梗能升能降。佐二陳調和陰陽。分理清濁。則脾虛不能運佈津液。為飲為痰而滿者。庶可即除。

病後不欲食。食亦不化。胸腹滿悶。與異功散。四

病後不欲食者。胃氣虛者。食不化者。脾氣虛也。胃虛則不納穀。脾虛則失健運。飲食不化。則氣機壅塞。故胸腹滿悶。法宜健脾養胃。用異功散。勿認實症而進消導。

異功散健脾養胃法

人參二錢

白

朮二錢薑汁炒

茯苓

苓二錢

甘

草炙一錢

陳皮一錢

共為粗末。加生薑六分。大棗五枚。水一杯煎服。

四君子湯。中正和平。為健脾養胃之良方也。加陳皮名異功散。以主治氣虛。

而兼氣滯。取效最捷。則異功之名稱焉。

病後數日。先食後不欲食。心下微痛。按之痛劇者。宜胡米煎。<sup>五</sup>

病後飲食將開。食之過飽。使新復之脾胃。運化不及。而停滯難消。故爲是候。功散鞭長莫及。非所宜也。惟以胡米煎小和之。切勿與消尅奪正。

胡米煎 理中行滯法

陳米一勺。薑汁浸透。鍋內炒胡成炭。水一杯煎服。

方解米稟天地冲和之氣以生。味甘性涼。理脾和胃。陳者尤佳。用薑汁浸透。炒胡成炭。則行不傷正。爲虛人消滯無上妙方。

病後聲顫無力。語不接續。或懶言。或語聲輕微。無氣以動者。均宜獨參湯。<sup>六</sup>

病時誤投消尅。元氣大傷。故病退而見此等虛象。人參得天地精英之氣以生。其氣屬陽。而其體屬陰。與人之氣體合其德。故於人身無所不補。凡氣血大虛者。均宜服之。

病後飲食日增。數日不大便。甚有十數日不行。而腹無所苦者。勿服藥。如投通利。死不終朝。<sup>七</sup>



伏陰嘔利轉筋。大傷營液。腸胃爲之乾枯。傳道因而鈍滯。故病後飲食日增。而數日不大便。甚有十數日不行者。猶水涸舟停耳。腹中既無所苦。無病可知。飲食日增。則營液日化。遲不數日。營液充足。大便自行矣。故不必服藥。如作實症。浪投通利。必致正氣隨藥而脫。死不終朝。

### 傷寒陰病比類

自利不渴者屬太陰。以其藏有寒故也。當溫之。宜服四逆輩。原文

集註程知曰。言太陰自利爲寒。宜溫者也。少陰屬腎水。熱入而耗其水。故自利而

渴。太陰屬脾土。寒入而從其溼。則不渴而利。故太陰自利當溫也。

程應旂曰。三陰同屬藏寒。少陰厥陰有渴證。太陰獨無渴證者。以其寒在中焦。總與龍雷之火無涉。少陰中有龍火。底寒甚則龍升。故自利而渴。厥陰中有雷火。故有消渴。太陽一照。雷雨收聲。故發熱則利止。見厥而復利也。魏荔彤曰。自利二字。乃未經誤下誤汗誤吐而成者。故知其藏本有寒也。

人參

白朮

甘草炙

乾薑各三兩

右四味。搗篩。蜜和爲丸。如雞子黃許大。以沸湯數合。和一丸。研碎。溫服之。日三服。夜二服。腹中未熱。益至三四丸。然不及湯。湯法以四物依兩數切。用水八升。煮取三升。去滓。溫服一升。日三服。

加減法

若臍上築者。腎氣動也。去朮加桂四兩。

吐多者。去朮加生薑三兩。

下多者。還用朮。悸者加茯苓二兩。

渴欲得水者。加朮。足前成四兩半。

腹中痛者。加人參。足前成四兩半。

寒者用乾薑。足前成四兩半。

腹滿者。去朮加附子一枚。服湯後如食頃。飲熱粥一升許。微自溫。勿發揭衣被。

集解程應旂曰。陽之動始於溫。溫氣得而穀精運。穀氣升而中氣贍。故名曰理中。

實以變理之功。予中焦之陽也。蓋謂陽虛卽中氣失守。膈中無發宣之用。六腑

無灑陳之功。猶如釜薪失焰。故下利清穀。上失滋味。五藏凌奪。諸證所由來也。參朮炙草。所以守中州。乾薑辛以溫中。必假之以燃釜薪而騰陽氣。是以穀入於陰。長氣於陽。上輸華蓋。下攝州都。五臟六腑皆受氣矣。此理中之旨也。若水寒互勝。即當脾腎雙溫。加之以附子。則命門益而土母溫矣。白朮補脾。得人參則壅氣。故臍下動氣。吐多腹滿。皆去朮也。加桂以伐腎邪。加生薑以止嘔也。加附子以消陰也。下多者溼勝也。還用朮。燥溼也。渴欲飲水。津渴也。加朮使飲化津生也。心下悸。停水也。加茯苓導水也。腹中痛。倍人參。虛痛也。寒者加乾薑。寒甚也。

少陰病下利。白通湯主之。原文

集註金鑑曰。少陰病但欲寐。脈微細。已屬陽爲陰困矣。更加以下利。恐陰降極。陽下脫也。故君以葱白。大通其陽而上升。佐以薑附。急勝其陰而緩降。則未脫之陽可復矣。方有執曰。少陰病而加下利者。不獨在經。而亦在藏。寒甚而陰盛也。治之以乾薑附子者。勝其陰則寒自散也。用葱白而曰白通者。通其陽則陰自消也。



程知曰。少陰病。謂有脈微細。欲寐證也。少陰下利。陰盛之極。恐致格陽。故用薑附以消陰。蔥白以升陽。通云者。一以溫之。而令陽氣得入。一以發之。而令陰氣易散也。

汪琥曰。腎虛無火。不能主水。故下利。用白通湯者。溫裏以散寒也。

### 白通湯方經

蔥 白 四莖

乾 薑 一兩

附 子 一枚生去  
皮破八片

右三味。以水三升。煮取一升。去滓分溫再服。

集注汪琥曰。此方與四逆湯相類。獨去甘草。蓋驅寒欲其速。辛烈之性。取其驟發。直達下焦。故不欲甘以緩之也。而猶重在蔥白。少陰之陰。天之寒氣亦為陰。兩陰合而偏於下利。則與陽氣隔絕不通。薑附之力。雖能益陽。不能使真陽之氣必入於陰中。惟蔥白味辛。能通陽氣。令陰得陽而利庶可愈矣。蓋大辛大熱之藥。不過藉以益人陽氣。非有以通之。令真陽和會。而何以有濟也耶。

少陰病。下利脈微者。與白通湯。利不止。厥逆無脈。乾嘔煩者。白通加豬膽汁湯主之。服湯脈暴出者死。微續者生。原文

集解金鑑曰。此承上條詳申其脈。以明病進之義也。少陰病下利脈微者。與白通湯下利當止。今利不止。而轉見厥逆無脈。更增乾嘔而煩者。此陰寒盛極。格陽欲脫之候也。若專以熱藥治寒。寒既甚。必反格拒而不入。故於前方中加人尿猪膽之陰。以引陽藥入陰。經曰。逆者從之。此之謂也。無脈者言診之而欲絕也。服湯後更診其脈。若暴出如燭燼焰高。故主死。若其脈徐徐微續而出。則是真陽漸回。故可生也。故上條所以纔見下利。即用白通以治於未形。誠善法也。

白通加猪膽汁湯方經

葱 白四莖

乾薑一兩

附子一枚生去破八片

人尿五合

猪膽汁一合

已上三味。以水三升。煮取一升。去滓內膽汁人尿。和令相得。分溫再服。若無膽汁亦可用。集解金鑑曰。是方即前白通湯。加人尿猪膽汁也。加尿膽者。從其類也。下咽之後。冷體既消。熱性便發。情且不違。而致大益。則二氣之格拒可調。上下之陰陽可通矣。

少陰病。欲吐不吐。心煩但欲寐。五六日自利而渴者。屬少陰也。虛故引水自救。若小便色白者。少陰病形悉具。小便白者。以下焦虛有寒。不能制水。故令色白也。原文

集解成無已曰。欲吐不吐。心煩者。表邪傳裏也。若腹滿痛。則屬太陰。此但欲寐。則知屬少陰。五六日邪傳少陰之時。若自利不渴。寒在中焦。屬太陰也。此自利而渴。為寒在下焦。屬少陰也。腎虛水燥。故渴欲引水自救。下焦虛寒。故小便色白。下利而渴。小便色白。非裏熱可知矣。

少陰病。飲食入口則吐。心中溫溫欲吐。復不能吐。始得之。手足寒。脈弦遲者。此胸中實。不可下也。當吐之。若膈上有寒飲。乾嘔者。不可吐也。當溫之。宜四逆湯。原文

按溫溫當是嘔嘔。嘔嘔者。乃吐飲之狀也。集註程知曰。此言少陰飲吐。為腎邪上逆。當溫不當吐也。欲吐不吐。陰邪上逆之證也。若始得病時。邪未深入。其手足但寒而不厥。脈但弦遲而不沉細。則為邪實。胸中寒尚在表。屬於陽分。當吐而不當下。吐者有物。嘔則無物。兩者須辨。若膈上有寒飲。但見乾嘔。而不能吐出。則是陰寒上逆。當溫而不當吐也。曰急溫。



者。明不溫則見厥逆無脈諸變證也。

程應旂曰。寒在胸中。法不可下。而屬實邪。但從吐法。一吐而陽氣得通。吐法便是溫法。若膈上有寒飲。乾嘔者。虛寒從下而上。阻留其飲於胸中。究非胸中之病也。直從四逆湯急溫其下可矣。

少陰病。脈微細沉。但欲臥。汗出不煩。自欲吐。至五六日自利。復煩躁。不得臥寐者。死。原文六

集解金鑑曰。此發明上條互詳脈證。失於急溫致變之義也。脈微細沉。但欲臥。少陰寒也。當無汗。今反汗出不煩。乃少陰亡陽也。且自欲吐。陰寒之邪上逆。正當急溫。失此不治。因循至五六日。加之自利。復煩躁。不得臥寐者。此少陰腎中真陽擾亂。外越欲絕之死證。此時即溫之。亦無及矣。

少陰病。二三日不已。至四五日。腹痛。小便不利。四肢沉重疼痛。自下利者。此為有水氣。其人或欬。或小便不利。或下利。或嘔者。真武湯主之。原文七

集註金鑑曰。論中心下有水氣。發熱有汗。煩渴引飲。小便不利者。屬太陽中風。五苓散證也。發熱無汗。乾嘔不渴。小便不利者。屬太陽傷寒。小青龍湯證也。今少

陰病二三日不已。至四五日腹痛下利。陰寒深矣。設小便利。是純寒而無水。乃附子湯證也。今小便不利。或欬或嘔。此為陰寒兼有水氣之證。故水寒之氣。外攻於表。則四肢沉重疼痛。內盛於裏。則腹痛自利也。水氣停於上焦胸肺。則欬喘而不能臥。停於中焦胃府。則嘔而或下利。停於下焦膀胱。則小便不利。而或少腹滿。種種諸證。總不外乎陰寒之水。而不用五苓者。以非表熱之飲也。不用小青龍。以非表寒之飲也。故惟主以真武湯。溫寒以制水也。喻昌曰。太陽篇中厥逆筋惕肉瞤而亡陽。用真武矣。茲少陰之水溼上逆。仍用真武以鎮攝之。可見太陰膀胱與少陰腎一臟一腑。同為寒水。府邪為陽邪。藉用麻桂為青龍。藏邪為陰邪。藉用附子為真武。

### 真武湯方經

茯苓 三兩

芍藥 三兩

生薑 三兩

白朮 二兩

附子 一枚破八片去

右五味。以水八升。煮取三升。去滓溫服七合。日三服。

加減法

若欬者。加五味子半升。細辛乾薑各一兩。

若小便利者。去茯苓。

若下利者。去芍藥。加乾薑二兩。

若嘔者。去附子。加生薑足前成半斤。

集金鑑曰。小青龍湯。治表不解。有水氣。中外皆寒實之病也。真武湯。治表已解。有水氣。中外皆寒實之病也。真武者。北方司水之神也。以之名湯者。賴以鎮水之義也。夫人一身制水者脾也。主水者腎也。腎爲胃關。聚水而從其類者。倘腎中無陽。則脾之樞機雖運。而腎之關門不開。水雖欲行。孰爲之主。故水無主制。泛溢妄行。而有是證也。用附子之辛熱。壯腎之元陽。而水有所主矣。白朮之苦燥。建立中土。而水有所制矣。生薑之辛散。佐附子以補陽。溫中有散水之意。茯苓之淡滲。佐白朮以健土。制水之中。有利水之道焉。而尤妙在芍藥之酸斂。加於制水主水藥中。一以瀉木。使子盜母虛。得免妄行之患。一以斂陽。使歸根於陰。更無飛越之虞。孰謂寒陰之品。無益於陽乎。而昧者不知承制之理。論中誤服青龍發汗亡陽。用此湯者。亦此義也。然下利減芍藥者。以其陽不外散也。加



乾薑者。以其溫中勝寒也。水寒傷肺則咳。加細辛乾薑者。散水寒也。加五味子者。收肺氣也。小便利者去茯苓。以其雖寒而水不能停也。嘔者去附子。倍生薑。以其病非下焦。水停於胃也。所以不須溫腎以行水。祇當溫胃以散水。佐生薑者。功能止嘔也。

少陰病。下利清穀。裏寒外熱。手足厥逆。脈微欲絕。身反不惡寒。其人面色赤。或腹痛。或乾嘔。或咽痛。或利止脈不出者。通脈四逆湯主之。原文

集註金鑑曰。少陰腎也。腎象乎坎。一陽陷於二陰之中。二陰若盛。則一陽必衰。陰邪始得內侵。孤陽因之而外越也。下利清穀。手足厥冷。脈微欲絕。裏陰盛極也。身反不惡寒。面色反赤。其外反熱。格陽於外也。故雖有腹痛乾嘔咽痛等證。亦當倣白通湯之法。加蔥於四逆湯中。以消其陰。而復其陽可也。  
程應旂曰。熱因寒格。無論腹痛乾嘔咽痛。皆下利中格陽之證。即使利止。而脈仍前欲絕不出。亦不得謂裏寒已退。輒妄治其外熱也。須循四逆湯例。消陰翳於下部。但加蔥白。宣陽氣於下焦。使陽氣通而脈亦出。始為真愈。  
少陰病。吐利。手足不逆冷。反發熱者不死。脈不至者。灸少陰七壯。原文

集解金鑑曰。少陰吐利。法當逆冷。今不逆冷。反發熱者。是陽未衰。故曰不死。若脈不至。雖有外熱。恐是假熱。須防陽脫。宜急灸少陰。速通其陽。則脈可復也。程知曰。前條通脈四逆湯。是裏寒外熱。手足逆冷。而脈不至者也。此條用灸法。是裏寒外熱。手足不逆冷。而脈不至者也。少陰動脈。在足內踝。汪琥曰。經云。腎之原出於太谿。灸少陰當灸太谿。二穴在內踝後跟骨動脈陷中。

少陰病。吐利。手足逆冷。煩躁欲死者。吳茱萸湯主之。原文

集註程應旂曰。溫法原爲陰寒而設。故真寒類多假熱。凡陰盛格陽。陰證似陽等。皆少陰蟲惑人耳目處。須從假處勘出真來。方不爲之牽制。如吐利而見厥冷。是胃陽衰。而腎陰並入也。誰不知爲寒者。顧反見煩躁欲死之證。以誑之。是皆陽被陰拒。而置身無地。故有此象。吳茱萸湯。挾木力以益火勢。則土得溫。而水寒卻矣。

吳茱萸湯方經

吳茱萸 一升

人參 三兩

生薑 一兩

大棗 十二枚

右四味。以水七升。煮取二升。溫服七合。日三服。

集解方有執曰。吐則傷陽。利則損陰。厥冷者。陰損而逆也。煩躁者。陽傷而亂也。茱萸辛溫散寒。暖胃而止嘔。人參甘溫益陽。固本而補中。大棗助胃益脾。生薑嘔家聖藥。故四物者。為溫中降逆之所須也。

少陰病。吐利躁煩。四逆者死。原文十一

集解張璐曰。此條與上條不殊。何彼可治。而此不可治耶。必是已用溫中不愈。轉

加躁煩。故主死耳。

少陰病。惡寒。身踰而利。手足厥冷者不治。原文十二

集解金鑑曰。此互詳上條。手足逆冷不治之義也。惡寒身踰而臥。雖係少陰證。而不至於死。若下利不止。手足逆冷不同。是有陰無陽。即不吐利躁煩。亦不可治也。

少陰病。四逆惡寒而身踰。脈不至。不煩而躁者死。原文十三

集解金鑑曰。此總承上三條以明不治之死證也。四逆謂四肢逆冷。過肘膝而不回也。表陽虛故惡寒也。陰主屈故踰臥不伸也。脈不至則生氣已絕。若有煩無



躁。是尙有可回之陽。今不煩而躁。則是有陰無陽。故曰死也。

少陰病。

下利。脈微瀋。嘔而汗出。必數更衣。反少者。當溫其上。灸之。原文

集註程應旂曰。少陰病下利。陽微可知。乃其脈微而且澁。則不但陽微。而陰且竭

矣。陽微。故陰邪逆上而嘔。陰竭。故汗出而勤努責。一法之中。既欲助陽。兼欲護

陰。則四逆附子輩。俱難用矣。惟灸頂上百會穴。以溫之。既可代薑附輩之助陽

而行上。更可避薑附輩之辛竄而燥下。故下利可止。究於陰血無傷。可見病在

少陰。不可以難用溫者。遂棄夫溫也。

少陰病。

下利止而頭眩。時時自冒者死。原文

集註方有執曰。頭眩。俗謂昏暈也。諸陽在頭。下利止而頭眩者。陽無依附。浮越於

外。神氣散亂。故時時自冒也。死可知矣。

張璐曰。人身陰陽相爲依附者也。陰亡於下。則諸陽之上聚於頭者。紛然而動。

所以頭眩。時時自冒。陽脫於上。而主死也。可見陽回利止則生。陰盡利止則死

矣。

汪琥曰。下利止則病當愈。今者反爲死候。非陽回而利止。乃陽脫而利盡也。

少陰病。六七日。息高者死。原文十六

集程知曰。腎爲生氣之原。息高則真氣散走於胸中。不能復歸於氣海。故主死也。

程應旂曰。夫肺主氣。而腎爲生氣之源。蓋呼吸之門也。關係人之死生者最鉅。息高者生氣已絕於下。而不復納。故游息僅呼於上。而無所吸也。死雖成於六七日之後。而機自兆於六七日之前。既值少陰受病。何不豫爲固護。豫爲隄防。致令真陽渙散。而無可復返乎。凡條中首既諄諄禁汗。繼卽急急重溫。無非見及此耳。

魏荔彤曰。七日之久。息高氣逆者。與時時自冒。同一上脫也。一眩冒而陽升不返。一息高而氣根已剝。同一理而分見其證者也。故仲景俱以死期之。

少陰病下利。若利自止。惡寒而踰臥。手足溫者可治。原文十七

集金鑑曰。少陰病惡寒厥冷。下利不止者。陰寒盛也。今下利能自止。手足能自溫。雖惡寒踰臥。乃陰退陽回之兆。故曰可治。

少陰病惡寒而踰。時自煩。欲去衣被者可治。原文十八

集註金鑑曰。少陰病惡寒而踰。陰寒證也。若時自煩。欲去衣被者。此陽回陰退之徵。故曰可治。

### 金匱陰病比類

嘔而脈弱。小便復利。身有微熱。見厥者難治。四逆湯主之。原文

集註金鑑曰。嘔而心煩。心中懊懣。內熱之嘔也。今嘔而脈弱。正氣虛也。小便復利。中寒盛也。身有微熱而復見厥。曰難治者。此爲寒盛格熱於外。非嘔而發熱者比。故以四逆湯勝陰回陽也。

尤在涇曰。脈弱便利而厥。爲內虛且寒之候。則嘔非火邪。而是陰氣之上逆。熱非實邪。而是陽氣之外越矣。故以四逆湯救陽驅陰爲主。然陰方上衝。而陽且外走。其離決之勢。有未可卽爲順接者。故曰難治。或曰嘔與身熱爲邪實。厥利脈弱爲正虛。虛實互見。故曰難治。四逆湯舍其標而治其本也。亦通。  
高世栻曰。嘔者水去寒猶在上。小便當少。今復利者。寒亦在下也。脈弱者。氣衰於內。身微熱者。格陽於外。嘔證如是。則上下寒而內外虛。若見手足逆冷而厥。



者。則表裏陰陽之氣。不相順接。故爲難治。四逆湯主之。生附子壯火回陽以治厥。乾薑溫脾煖胃以治嘔。甘草安中調上下以治內外也。病人胸中似喘不喘。似嘔不嘔。似噦不噦。徹心中憤憤無奈者。生薑半夏湯主之。

原文

集註尤在涇曰。寒邪搏飲。結於胸中而不得出。則氣之呼吸往來出入升降者阻矣。似喘不喘。似嘔不嘔。似噦不噦。皆寒飲與氣相搏。互擊之證也。且飲水邪也。心陽藏也。以水邪而逼處心藏。欲卻不能。欲受不可。則徹心中憤憤然無奈也。生薑半夏湯。卽小半夏湯而生薑用汁。則降逆之力少。而散結之力多。乃正治飲氣相搏。欲出不出者之良法也。沈明宗曰。似喘不喘。似嘔不嘔。似噦不噦。誠不是喘。不是嘔。不是噦也。徹者通也。竟是通心中憤憤然無奈。卽泛泛惡心之義也。

生薑半夏湯方經

半夏 夏半升

生薑汁 一升

右二味。以水三升。煮半夏取二升。內生薑汁。煮取一升半。小冷分四服。日三夜

一服止後。停服。不止再煎。服如前法。

集解李杲曰。生薑半夏辛溫之氣。足以散水飲。而舒陽氣。然待小冷服者。恐寒飲固結於中。拒熱藥而不納。反致嘔逆。今熱藥冷飲。下啗之後。冷體既消。熱性便發。情且不違。而致大益。此內經之旨也。此方與前半夏乾薑湯略同。但前溫中氣。故用乾薑。此散停飲。故用生薑。前因嘔吐上逆。頓服之。則藥力猛峻。足以止逆降氣。嘔吐立除。此心中無奈。寒飲內結。難以猝消。故分四服。使胸中邪氣徐徐散也。

下利手足厥冷無脈者。灸之不溫。若脈不還。反微喘者死。少陰負趺陽者。為順也。  
三原文

集註尤在涇曰。下利厥冷無脈。陰亡而陽亦絕矣。灸之所以引既絕之陽。乃厥不回。脈不還。而反微喘。殘陽上奔。大氣下脫。故死。下利為土負水勝之病。少陰負趺陽者。水負而土勝也。故曰順。

金鑑曰。下利手足厥冷。脈絕無者。有陰無陽之脈證也。雖用理中四逆輩。恐其緩不及事。急灸臍下。以通其陽。若脈還手足溫者生。脈不還手足不溫。反微喘。

者。陽氣上脫也。故死。

下利脈沉而遲。其人面少赤。身有微熱。下利清穀者。必鬱冒。汗出而解。病人必微厥。所以然者。其面戴陽。下虛故也。原文四

集喻嘉言曰。下利脈沉遲。面少赤。身微熱者。陰盛而格陽在上在外也。若其人陽尚有根。其格出者。終必復返。陽返而陰未肯降。必鬱冒少頃。然後陽勝而陰出爲汗。陰出爲汗。陰邪乃解。自不下利矣。陽入陰出。儼有龍戰於野。其血玄黃之象。病人能無微厥乎。

下利後脈絕。手足厥冷。晬時脈還。手足溫者生。脈不還者死。原文五

集喻嘉言曰。脈絕不惟無其陽。亦無其陰。陽氣破散。豈得陰氣不消亡乎。晬時還。乃脈之伏者復出耳。脈豈有一息之不續也乎。仲景用灸法。正所以通陽氣。而觀其脈之絕與伏耳。故其方卽名通脈四逆湯。服後利止。而脈仍不出。是藥已大應。其非脈絕可知。又加人參以補其亡血。斯脈自出矣。成法具在。宜究心焉。

轉筋之爲病。其人臂脚直。脈上下行微弦。轉筋入腹者。雞屎白散主之。原文六



集尤在涇曰。肝主筋。上應風氣。肝病生風。則爲轉筋。其人臂脚直。脈上下行。微弦。經云。諸暴強直。皆屬於風也。轉筋入腹者。脾土虛而肝木乘之也。雞爲木音。其尿反利脾氣。故取治是病。且以類相求。則尤易入也。金鑑曰。臂同背。古通用。臂脚直。謂足背強直。不能屈伸。是轉筋之證也。脈上下行。謂迢迢長直。微弦不和。是轉筋之脈也。中寒之人。外寒盛則手足拘急。轉筋痛不能忍。甚者入腹。則牽連少腹拘急而痛也。主之雞屎白散。以治風寒痺氣之在筋也。

雞屎白散方經

雞屎白

右一味爲散。取方寸匕。以水六合。和溫服。

救小兒卒死而吐利。不知是何病方。原文七

狗屎一丸。絞汁灌之。無溼者。水煮乾者取汁。

集解金鑑曰。凡尿皆發陽氣。用狗屎亦取發陽氣也。

傷寒霍亂比類

問曰。治有霍亂者何。答曰。嘔吐而利。此名霍亂。一原文

集成無已曰。三焦者水穀之道路。邪在上焦。則吐而不利。在下焦。則利而不吐。在中焦。必既吐且利。以飲食不節。寒熱不調。清濁相干。陰陽乖隔。而成霍亂。輕者祇曰吐瀉。重者揮霍撩亂。故曰霍亂。

問曰。病發熱頭痛。身疼惡寒。吐利者。此屬何病。答曰。此名霍亂。自吐下又利止。復更發熱也。二原文

集方有執曰。發熱頭痛。身疼惡寒。外感也。吐利。內傷也。上以病名求病證。此以病證實病名。反覆詳明之意。

三原文霍亂頭痛發熱。身疼痛。熱多欲飲水者。五苓散主之。寒多不用水者。理中丸主之。

集方有執曰。霍亂熱多欲飲水者。陽邪盛也。寒多不用水者。陰邪盛也。五苓散者。水行則熱瀉。是亦兩解之謂也。理治也。料理之謂。中裏也。裏陰之謂。參朮之甘。溫裏也。甘草甘平。和中也。乾薑辛熱。散寒也。沈明宗曰。此言霍亂。須分寒熱而治也。頭痛發熱。身疼痛者。風寒傷於表也。外

風而挾內熱飲食。以致吐利。必欲飲水。當以五苓散兩解表裏。使邪從汗出。裏邪即從小便而去。不欲飲水者。寒多無熱。胃陽氣虛。當以理中丸溫中散寒為主。此以表裏寒熱辨證治病也。

吐利止而身痛不休者。當消息和解其外。宜桂枝湯小和之。原文

集方有執曰。吐利止裏和也。身痛表退而新虛也。消息猶言斟酌也。桂枝湯固衛以和表也。小和言少少與服。不過度之意也。

張錫駒曰。本經凡言小和微和者。謂微邪而毋庸大攻也。

既吐且利。小便復利而大汗出。下利清穀。內寒外熱。脈微欲絕者。四逆湯主之。原文

集註成無已曰。吐利亡津液。則小便當少。小便復利而大汗出。津液不禁。陽氣大虛也。脈微爲亡陽。若無外熱。但內寒。下利清穀。爲陰純證。此以外熱爲陽未絕。猶可與四逆湯救之。

吳人駒曰。既吐且利而大汗出。則泄路盡開。而小便又復利。云復利者。反不欲其利。而爲收藏之地也。下利清穀。內寒外熱。且脈微欲絕。一線之微陽。挽回誠



為不易。四逆之施。詎可緩乎。

吐利汗出。發熱惡寒。四肢拘急。手足厥冷者。四逆湯主之。原文

集程知曰。吐利而復汗出。陽氣幾於走失矣。發熱惡寒。為陽未盡亡。四肢拘急。手足厥冷。不得不用四逆以助陽退陰也。又按少陰證云。惡寒身踈而利。手足厥冷者不治。又云下利惡寒而踈臥。手足溫者可治。此之吐利汗出。四肢拘急。手足厥冷。而用四逆治之者。以有發熱一證也。發熱為陽未盡亡。猶是病人生機。故經又云。吐利手足不逆冷。反發熱者不死。

吐已下斷。汗出而厥。四肢拘急不解。脈微欲絕者。通脈四逆加豬膽汁湯主之。原文

集金鑑曰。霍亂吐下已止。汗出而厥。四肢拘急。脈微欲絕者。乃中寒盛極。阻隔陽氣。不達於四肢也。宜通脈四逆湯加豬膽汁。從陰以通陽也。

吐利發熱脈平。小煩者。以新虛不勝穀氣故也。原文

集鄭重光曰。吐利發汗脈平。陰退陽回。乃有此象。猶以新虛不勝穀氣。而致小煩。蓋霍亂吐利。晬時不可便與飲食。以胃氣逆反。倉廩未固。不可便置米穀耳。


張錫駒曰。霍亂一病。夏秋最多。是風寒暑溼之邪中人。皆能病霍亂。非止一寒邪也。若吐利過甚。損傷中焦之氣。以致陰陽間隔。手足厥冷。脈微欲絕。不多飲水者。無分寒暑。皆宜四逆理中治之。蓋邪盛而正實者。當瀉其邪。邪盛而正衰者。宜扶其正。况夏月之時。陽氣浮於外。陰氣伏於內。復以冷風寒其形。冷水寒其胃。內外皆寒。風暑之邪。未有不乘虛入於陰經者。所以夏月祇有陰證。而無傷寒。今人患暑證死。而手足指甲皆青者。陰證也。古人以大順散治暑。良有以也。

舌鑑

伏陰發端  
膜原多見初  
此舌宜用  
溫通病



伏陰夾冷  
滯立方宜初  
加砂仁乾  
薑溫中化  
滯病




寒溼阻遏中陽。宜理中  
四逆輩。

易治



溼遏胸中。法當辛通滲  
溼。

易治



陰邪阻遏陽氣。鬱而化  
熱。仍當溫通。

易治




陰逼陽泛之舌。不可以  
有黃面作為熱症。當溫  
下元。

可治



伏陰夾風。立方宜加桂  
枝。

易治



心絕肺乘。因瓜果冷滯  
所傷。宜新製理中散。

可治





平。伏陰過服辛燥。權用甘


病後多見此舌。氣虛之象。宜溫中益氣。

煎。新瘥食輦之舌。宜胡米


可 治



可 治



可 治




湯。陰竭陽泛之舌。宜潛陽

氣液兩竭。宜炙甘草湯。中虛亦有此舌。宜補中。

根尖俱黑。中節獨白。陰邪逼走真陽之象。急急救陽。用附子理中輩。


危 候




危 候




危 候




伏陰夾食。胸腹滿痛。宜  
新製理中散。無津不治。



辛烈灼津。權用甘潤。如  
石斛等味。救津可也。




寒溼結藏。法宜溫通。




陰寒之極。與理中四逆。  
厥不同者死。



之。陽氣衰微。宜理中等溫




陰盛陽絕。死不治。




火被水尅不治。

死症




陰盛氣亂。必死之舌也。

死症



舌捲而潤。卵囊必縮。陰寒極則經脈斂不治。

死症




舌痿不能言。陽氣絕矣。

死症



邪陰盛。真陰絕。死不治。

死症





以上二十五式。專爲伏陰病繪。然兼症則變。難於拘定。茲略舉其概。俾臨診有權。不致生死相混。

## 伏陰論終

伏陰論卷下 舌鑑

跋

田君瀛嶠。字雲槎。余畏友也。余不敏。不克承先人志。操尺寸柄。以變理民物。爲兩間彌陰陽之憾。妄思於里黨中聊爲補救。又苦家無積儲。志多未逮。因憶范文正公云。不爲良相。當爲良醫。用究心醫理。閱十餘稔矣。然未敢出而應世也。田君負不羈才。具經世略。足跡遍天下。卒不得志於時。歸寄於醫。蓋其幼而聰慧。於書無所不讀。雖小道曾三折肱焉。今年夏秋。疫癘大行。傳染殆遍。時醫皆掣肘。死者相枕籍。友人勸余以術壽世。因得晤田君。聆其緒論。凡診一病。皆洞悉本原。以故余立一方。必質於田君。心心相印。全活無算。至是德余者。益頌田君之神。因而日與過從。藉資砥礪。得讀其所著醫寄伏陰論一書。方祖仲景。法師靈蘭。其用藥也。約而精。其立方也。奇而正。發前人所未發。補前人所未逮。明白簡易。盡善盡美。洵救世之金丹也。用跋卷末。以誌欽佩。

光緒十四年戊子孟冬月植三周宗槐謹跋



伏陰論跋

〔清〕

隨萬寧

著述

羊毛瘟論

中國醫學大成





## 羊毛溫論提要

清、隨霖撰。霖字萬寧。上元人。嘗考張石頑醫通載番痧卽黑痧。此與明羊毛痧。皆爲天行痧毒云。乾隆時。醫宗金鑑有羊毛疔之名。或亦是此類疫症。胡雲谷云。明季羊毛痧。登時遍身瘡腫。中有白毛數莖。不治則半白死。有砭出惡血得生者。殆卽丹毒溫毒癘毒之類歟。惟因向無是病。故鮮有良方。醫無專科。而書亦乏善本。清乾隆末嘉慶初。隨君始發明羊毛瘟證論專書。據云羊毛溫證。擦之確有一種似羊毛之絲而出。且擦出其毛。其病立解。詳考病源。確爲一種疫毒。隨霖云。羊毛之爲病也。始則微寒發熱。或憎寒。或壯熱。或發疹塊。面色微青。唇紅而脹。舌有薄苔。紅點裂紋。胸中滯塞。身脹痠麻。手足不利。前心後心或有斑點。或無斑點。及病至。面色青板。身重不仁。皮膚紫脹。脈不至。則無救矣。考醫宗金鑑內載羊毛疔一證。初起時身發寒熱。狀類傷寒。但前心後心有紅點。又如疹形。視其斑點。色紫黑者爲老。色淡紅者爲嫩。宜服蟾酥丸汗之。毒熱不盡。憎寒壯熱仍作者。宜服五味消毒飲汗之。如發熱口渴。便閉脈沉實者。邪在裏也。宜黃連解毒湯。加生大黃一

錢五分。葱頭五個。清之。治法。先將紫黑斑點。用衣針挑出。如羊毛狀。前心後心。共挑數處。用黑豆蕎麥。研粉塗之。即時汗出而愈。又法。用雄黃末二錢。青布包紮。蘸熱燒酒。於前心擦之。自外圈入內。其毛即奔至後心。再於後心擦之。其羊毛俱拔出於布上。忌茶水一日。竊思疔有羊毛。與近日羊毛時證。大略相同。即以治疔之理。而會通其意。治此證亦可也。今時邪由毒氣。土藏鬱蒸。金化。忽有羊毛。類似蠶絲。其毛倒生。膚裏膜外。針刺皮膚。絕無點血。剔出羊毛。長者七八寸。短者二三寸。剔未盡者。再以蕎麥麵。用陰陽水和團。自胸前圈滾至腰。滾約百餘轉。麵糰中粘毛甚多。遍身全滾。皆有。投以加減。雙解散。至肺氣舒暢。血脈流通。大汗如雨。或發疹塊而愈。其意即內經金鬱泄之。土鬱奪之之旨。其書列伏邪窮源。溫病論。羊毛論。辨惑論。羊毛瘟證。治羊毛瘟疑。似辨。羊毛瘟不治症。婦人嬰兒羊毛瘟。治法。羊毛瘟針法。備用諸方。通用藥物等。窮源竟委。辨析無遺。誠治羊毛瘟證之要書也。今刊印裘氏印本。而重校圈點者。



# 方序

余家世業醫。而余不知醫。且並不識藥性。幼時羸而善病。每喜與醫士遊。蓋醫乃仁術。業斯藝者。類能以仁宅心。余需次金陵六載。所識醫士。如王式昭、徐景伯、隨萬寧、周碩園。皆長於方脈。濮韞良長於外科。汪藕塘長於按摩。之數君子者。律身行己。必信必果。又存心濟人利物。鄉里僉稱爲善人。凡道路橋梁之傾圯。不便於行人。及祠宇報賽廢墜者。不惜積貲。以成善舉。殆紙不勝書。癸丑冬。余感風寒之疾。四肢痛不可忍。晝夜呼號。輾轉床蓐。瀕死者數矣。式昭、景伯以藥起之。因式昭、景伯得識萬寧。萬寧偉軀幹。亭亭如鷄羣之鶴。時有塵埃外想。與之談。穆如藹如。不覺矜躁之俱釋也。茲萬寧以所著書問敘於余。余閱其自敘之辭。及循名療治之法。殆發前人所未發。而又明白簡要。一覽無遺。余雖不知醫。而萬寧利濟婆心。於斯方見。昔賢謂不爲良相。卽爲良醫。萬寧覃精殫思。祖軒岐。宗倉越。法劉、張、朱、李。亦旣多歷年所矣。而更參以己見。集成是書。可爲烹魚之釜鬻。濟川之舟楫。異日隔垣早見。望色先知。深造正無窮期也。萬寧勉乎哉。



嘉慶元年丙辰臘月吉日整飭江南通省鹽法分巡江寧兼管水利道前刑部郎中律例館纂修官濟南方昂書於江寧巡署之靜遠堂

## 王序

余交隨君萬寧有年矣。每與談岐黃家說。知其淵源有本。不與尋常術士比。心竊敬之。夫醫之爲道。奧妙無窮。非深究靈樞素問之旨。而加之以神悟。不能得其會通。世之業此者。率泛涉本草歌訣。便爾懸壺。暨乎心不應手。或至僨事。絕不自省。而返求其理。故雖三折肱。九折臂。終未爲良也。隨君殊於是。宜其學益精而全活者衆。是不以術視醫。而以道視醫。故能如是。近日撰羊毛溫證論一編。出而問世。實闡前人所未盡發。而紬繹其旨。其有功於牛哲。施及於後世者。大矣遠矣。證治原委。已詳自敘。余何庸更贊一言。姑贅數語。以誌欽佩云爾。隨君兼善於詩。談醫之餘。間出其吟咏以相訂正。則余有互相裨益者。余將序而傳之。以見其餘事作詩人。昔范文正公比良醫於良相。今我隨君。不又於杏林中增一佳話也哉。

嘉慶元年中元日菊莊姻弟王金英琴手書

## 陳序

余素不知醫。亦不習方藥。嘗讀周禮一書。言醫者至詳。有掌其政令者。有分而治之者。蓋職有專司。能有獨擅也。聚藥以供醫事。而渾名曰毒。宇宙太和。鮮大災沴。其以危困而請於醫府者。氣有不和也。須以偏勝之物攻之。當則止疾。否則必傷。慎之曰毒。不亦宜乎。其有不愈之狀。則各書所以入於醫師。非獨藉以制其食。誠以醫不能無失。且爲後鑑也。然則方藥之有書也。殆周官法戒之遺意歟。吾鄉隨萬寧先生。誠篤溫厚。施與好善。鄉里咸推重焉。秋七月。余以給假南旋。適從弟婦以危證。得先生雙解方藥而愈。因出近所著羊毛溫證論。問敘於余。夫溫疫者。古方也。羊毛疔者。御纂金鑑中所備載也。會通其意。而名爲羊毛溫證者。隨氏之心解獨得也。善說詩者。不以文害辭。不以辭害意。以意逆志。是爲得之。隨氏之書。意以逆之耶。刊以問世。不敢自私。又以知其良工心苦。而虛且公也。雖然。余竊爲著書者有二難焉。才高者堅持門戶之見。專以博辨攻訐爲長。安知不有以二書不能合此證。古所無爲隨氏咎乎。然隨氏固已明言其以意會通矣。又何用嘵嘵者。

爲質下者篤信而不善學之。凡遇一證。輒云羊毛瘟證。針以挑之。麵以擦之。妄引隨氏法以自衛。此又隨氏不及料而實爲此書之罪人也。惟證宜雙解者。卽以雙解法行之。方證相對。胸無成見。藥用當而通神。斯古法賴以不泯。而隨氏之苦心。庶幾與之俱傳乎。此書中難發之隱。不獨爲著書者補之。且爲讀書者告之。兼以質之吾鄉以醫名世諸君子。以爲何如也。是爲序。

嘉慶元年秋八月旣庭陳廷碩拜撰



## 徐序

氣失平而爲疾。奇症原多。藥用當而通神。良方最重。唯症非經見。愈徵靡眼之清。斯方有必傳。彌著婆心之苦。金陵隨萬寧先生。學本六經。醫已三世。久神脈息。肱折於三。尤諳時邪。氣分其五。近有瘟證。前未盛行。今遇良醫。確昭神效。火蒸臟腑。感歲氣於司天。肺主皮毛。鬱膜間之毒縷。尋常未識。診誤卽危。解散不先。救遲亦殆。惟先生善參古法。妙活靈機。以走癩之奇。通出蛇之變。如扁鵲之攻媮理。明且察於秋毫。類秦和之辨陰陽。治更分於歧路。柔毛盡剝。有目皆知。仙指纔臨。無人不活。未忍私爲己有。輯症成書。還思善與人同。彙方壽世。蓋先生仁心爲質。名教夙敦。負郭本無。獨重春秋之祀。先生原寒士。集會五百金。買盤槐田四十餘畝。每年租利。爲春秋祭祀用。趨庖久有。常循詩禮之箴。已天性之羣推。君陳孝友。尤路人之共戴。司馬陰功。范叔袍憐。給單寒而何旣。周郎困借。拯貧餒以良多。而且弄月吟風。無非天趣。宜其調梅種杏。盡是春風。昌素不知醫。嘗欽抱道。睹得心而應手。實相雙解之功。數起死而回生。豈止一毛之利。郭玉之醫以意。效卽丹方。

巫彭之藥有經。此尤龍秘質之同方同術。莫疑抱朴之增。可知有經有言。足補靈樞之闕。

乾隆六十年乙卯冬伯子徐世昌拜撰

# 自序

瘟疫一證。自古有然。卽周禮所謂四時癘疾也。其所感之氣。變幻難以言狀。而靈樞素問。及各名家。並未立瘟疫之名。迨吳又可始著方論。吾鄉戴麟郊先生。又著廣瘟疫論。有辨氣、辨色、辨脈、辨舌、辨神之說。足爲後學津梁者。更加詳備已。但瘟疫中有羊毛一種。則從未有言之者。歲辛卯。此證頗行。俗呼爲羊毛疹子。臨證頗難措手。霖恭讀御纂醫宗金鑑外科疔瘡內載有羊毛疔證治之法。除毛有方。用藥有則。顯立成規。遂會通其意。格以所感之氣。所入之門。所出之處。及其病作之形。異心推究。酌方療治。多獲生全。越今多載。欲以鄙見質諸同志。因作羊毛溫證論。似可與吳戴相發明。夫瘟疫之變。在外證既可化毛而成疔毒。在內證亦可化毛而伏皮膚。其相形而得名者。正可循名而立法。雖此證不多見。而近年亦往往有之。恐窮鄉僻壤。突遇此證。療治失宜。貽誤匪淺。謹將治而得效方藥。一一誌之。然醫理淵微。不免掛漏。仍祈高明。再加博採。補所未備。未必非醫門之一助云。

乾隆六十年歲在乙卯冬十月上元隨霖萬寧甫識



羊毛溫輪自序

# 羊毛溫論目錄

## 卷上

伏邪窮源論	一
溫病論	二
羊毛論	四
辨惑論	六
老少男女貧富不同治	七
臨證規則	八
申明溫邪出三陽病治	九
申明溫熱攻三陰病治	九
羊毛溫證規則	一〇
申明羊毛雙注證治	一一

## 卷下

申明羊毛單注證治	一二
羊毛溫邪疑似辨	一三
羊毛溫類證治	一五
婦人有孕病羊毛溫治	二二
婦女病羊毛溫行經治	二六
嬰兒病羊毛溫治	二六
羊毛溫邪不治證	二九
摘鍼論	三一
鍼式	三二
人圖	三三
除羊毛法	三五

備用諸方	一
五味消毒飲	一
黃連解毒湯	一
加減雙解散	二
加味涼膈散	三
荆防敗毒散	四
溫證解毒散	四
五黃丹	四
瓜蒂散	六
珠黃散	六
東垣普濟消毒飲	六
陶華三焦石膏湯加減	七
犀角大青湯	八
消癰青黛飲	九

節庵導赤各半湯	九
清燥救肺湯	一〇
景岳玉女煎	一〇
局方甘露飲	一〇
犀角地黄湯	一一
黃連阿膠湯	一一
景岳理陰煎	一一
製甘草湯	一二
當歸六黃湯	一二
清骨散	一三
龍膽瀉肝湯	一三
易老瀉白散	一三
猪苓湯	一四
導赤散	一四



六味地黃湯	一四
資生健脾丸加減	一四
陳氏抱龍丸	一五
清涼飲	一五
上清飲	一六
加味黃連解毒湯	一七
回生湯	一七
新製蘭膏湯	一八
新製止呃湯	一八
左金地骨飲	一九
加味佛手散	一九
回生丹	二〇
冷飲烏梅湯	二三
紫雪金丹	二三

大辟瘟丹	二六
通用藥物	二八

羊毛溫論目錄

# 羊毛溫論

清 上元 隨 霖萬寧著述

鄞縣 曹赤電炳章圈校

## 卷上

### 伏邪窮源論

夫天地之氣。萬物之源也。伏邪之氣。疾病之源也。惟醫以意格以理而明之。氣。陽也。神爲之主。輕清象天。無形而能生物。資始之根也。血。陰也。氣爲之主。重濁象地。有形而能乘載。資生之根也。一動一靜。互爲之根。溯萬物之初。運至氣至。並歲干氣化。而太過不及。則有偏勝之災。夫病生之始。外因內因。並不內外因。而邪乘口鼻。則有伏藏之害。氣勝者和。氣不勝者病。其伏藏之邪。溫毒也。蓋非四時六氣之溫邪。乃山澤鬱蒸之毒。名曰厲氣。卽內經所謂苛毒是也。如評熱論。問有溫病者。汗出輒復熱。而脈躁疾狂言。不能食。病名爲何。對曰。病名陰陽交。交者死也。此論



四時六氣之溫也。又刺熱篇。肝熱病者。小便先黃。腹痛多臥。身熱。心熱病者。先不樂數日。乃熱。脾熱病者。先頭重煩痛。顏青欲嘔。身熱。肺熱病者。先淅寒厥起毫毛。惡風寒。舌上黃。身熱。腎熱病者。先腰膝痠。苦渴飲。身熱。此論情慾內蒸之熱也。欲知五臟之熱。可望而知之。肝熱左頰先赤。肺熱右頰先赤。脾熱鼻赤。腎熱頤赤。心熱顏赤。病雖未發。見赤色者。治之。名曰治未病。但伏邪之毒。鬱久而發。上升下降。從胃土關隘之所。毒蒸變化。化生羊毛。至於病及內。以達外。必然先見於色。要知毒火梟張。早爲攻伐。免致貽禍。再能未病而窮之。其醫更備矣。此病非四時六氣之邪。又非情慾之賊火。乃伏邪毒火之爲害。每致人悶絕。可不慎歟。但索本窮源。難以透達。微撮其要以備一參耳。

溫病論

夫溫熱之爲病。醫知之矣。此非六氣四時之溫。乃厲氣伏藏之溫也。且述自岐黃淵源正脈。紀歲數千。派分最廣。治各不同。何也。歲氣使然。地勢使然。但能揆度病情。審察病機。靈活者得其巧。固滯者守其法。知不偏而偏者泥於體。似偏而不偏。

者合乎用。經云。法於陰陽。和於術數。夫法也者。無限之體。和也者。無限之用。所以天覆地載。人稟五行。人在氣交之中。美惡之氣。無不感耳。然而本氣貫乎天。運行不息。氣之正也。氣和者。長養萬物。氣偏者。損傷萬物。在人則有強弱。氣則有盈虛。其受氣清者。生神。受氣濁者。生病。是以老少強弱。偶有一息之虛。受其厲氣。鬱於中土。釀久而發流蕩。伏邪毒火。所由來也。夫胃爲十二經之海。十二經都會於胃。胃氣敷布於十二經。惟虛者注之。非一感而卽發。伏久乃發也。其作仍歸於胃。達於三焦。縱現各腑各臟之形。以胃氣爲主。設聚於胃。不能攻逐。毒火仍陷於本注之所。終難釋矣。故毒火攻下之宜早。或問時邪形證。答曰。時邪發動。人身運行之氣。乃爲之阻。陽氣不伸。反爲之寒。陰氣閉塞。反爲之熱。其初病也。舉動如常。忽寒忽熱。旣而面色青白。頭眩難支。腰背脹痛。胸悶氣阻。四肢麻木。聲音低小。煩躁不寧。口渴舌赤。苔白。或黃。或灰黑。或砂白。皆有裂紋。紅紫點布。或舌中無苔。或舌如胭脂。脣若塗朱。嘔吐乾噦。人皆昏沉。譫言狂亂。或出羊毛斑疹。或癰疔腮腫。或頭面浮腫。或咽痛等證。難以盡舉。脈象右大於左。六部不調。或沈伏。或弦數。或洪大。或堅實。無一定之形。皆人稟受之別也。亦由邪伏之輕重也。先見寒熱者。少陽之



初氣也。少陽爲微陽。本爲樞。時邪初泄。病者原不知覺。旣而聚胃。毒火梟張。故有此象。所謂時邪病形者是也。夫時邪者。伏邪之化也。伏邪化形。形似羊毛。蓋非六氣四時之溫明矣。

### 羊毛論

羊毛之爲病也。始覺微寒發熱。或憎寒。或壯熱。或發疹塊。面色微青。脣紅而脹。舌有薄苔。紅點裂紋。胸中滯塞。身脹痠麻。手足不利。前心後心。或有斑點。或無斑點。及病至面色青板。身重不仁。皮膚紫脹。脈不至。則無救矣。伏讀御纂醫宗金鑑內載羊毛疔證一條。初起時身發寒熱。狀類傷寒。但前心後心有紅點。又如疹形。視其斑點色紫黑者爲老。色淡紅者爲嫩。宜服蟾酥丸汗之。毒勢不盡。憎寒壯熱仍作者。宜服五味消毒飲汗之。如發熱口渴便閉。脈沉實者。邪在裏也。宜黃連解毒湯加生大黃一錢五分。葱頭五個清之。治法。先將紫黑斑點。用衣針挑出。如羊毛狀。前心後心。共挑數處。用黑豆、蕎麥研粉塗之。卽時汗出而愈。一法。用明雄黃末二錢。青布包紮。蘸熱燒酒。於前心擦之。自外圈入內。其毛卽奔至後心。再於後心



擦之。其羊毛俱拔出於布上。忌茶水一日。竊思疔有羊毛。與近日羊毛時證大略相同。卽以治疔之理。而會通其意。治此證亦可也。且人身災眚。自古迄今。備載病目。有增無損。有書載而未見。有病見而無書者。誠可悼歎。所以一時之病證。一方之疾厄。古人筆之於書。以備後人參考。知某書有此等病也。夫業醫者。智圓行方。心小膽大。臨證卽師。療證卽法。今時邪由毒氣。土藏鬱蒸。金化。忽有羊毛。類似蠶絲。其毛倒生。膚裏膜外。針刺皮膚。絕無點血。剔出羊毛。長者七八寸。短者二三寸。剔未盡者。再以蕎麥麵用陰陽水和團。自胸前圈滾至腹。背心圈滾至腰。滾處約百餘轉。麵團中毛多。遍身全滾皆有。投以加減雙解散。至肺氣舒暢。血脈流通。大汗如雨。或發疹塊而愈。蓋此證獲效於雙解之方。治法卽倣羊毛疔證。五味消毒飲。黃連解毒湯。加大黃。蔥頭之意。要亦內經金鬱泄之。土鬱奪之之旨。清太陰。通陽明。達三焦。爲無上法門。非重劑硝黃。烏能勝其病哉。伏邪毒重者。連投大劑雙解膏。黃用一二十兩。亦不爲過。但稍有疑畏之心。莫能解釋其疾。或有誤治者。以寒熱作瘧治。胸悶氣脹作停食受寒治。或以溫中燥濕治。或以達原破氣治。病日加增。昏悶而死。至於不能醫治者。病來急速。氣阻神昏。面色青慘。站立不起。肢冷

脈無。故不治也。所謂不治者。毒火與元氣勢不兩立。并於上焦。陽氣不行。肺胃不通。卽經云諸氣臍鬱。皆屬於肺。此爲悶絕之由。其可治者。惟臨證之時。不可不細心耳。

辨惑論

或問卯酉之歲。陽明司天。燥氣主之。又乙庚化金。金生辛。辛生肺。肺生皮毛。羊毛一證。自然歲運氣化。乃非卯酉之歲。亦見其證。非乙庚化象。亦見其證。有一方見羊毛證。有一方不見羊毛證。再者毛生皮內。名曰羊毛。拔出形似蠶絲。何以不名蠶絲。而名羊毛。至藥用峻重涼攻。何以不傷氣血。病愈易於如常。識羊毛證候。何法以別之。亦有服輕藥而獲效者。何不盡用輕藥而治之。答曰。歲運氣化。可知客氣流行。有風氣之變化否。且在地有高下。天有陰晴。皆統乎一氣。萬物皆備於土。如天時晴久。其氣伏之轉深。故各方病見之有異。然則天運之妙。其可知耶。其不可知耶。其運氣之旨。譬如走盤之珠。無一定之時也。但氣之變化。固不常在。而物由之。而人應之。難以執一論也。至毛生皮內。如合麴然。因氣之所感。伏藏於土。金



氣蓄之。火氣蒸之。故從金化。素問云。金位之下。火氣乘之。考之周禮夏官註云。羊屬南方火。說文羊祥也。易說卦兌爲羊。其質好剛。曲禮羊曰柔毛。月令註羊火畜也。其病伏藏毒火。謂之羊。非無因也。考之說文。蠶任絲也。蠶吐有數丈之絲。羊生無數尺之毛。是羊毛耶。是蠶絲耶。果是羊毛乎。非也。伏藏毒火。取其名耳。且身中伏邪。卽毒火也。火可燎原。火可炎燒氣血。其毒火浮於肺胃三焦。攻之速者。毒火卽解。其氣血未曾損傷。故病退卽如常人。至於識證易於明顯。毒火輕者。自然涼藥輕攻。毒火重者。斷不可以輕藥。其毒火最速。毒重藥輕。則腐腸爛胃。及至受害。則悔無及矣。故余另有規則治法備方。

### 老少男女貧富不同治

溫邪之爲病。因病以訂方。因氣以知病。實因人以治也。何以言之。人類不齊。有老少焉。有男女焉。有貧富焉。推而言之。有形樂志苦。有志樂形苦。有形志皆苦。有形志俱樂。又如是種種各別。其受毒氣則一也。大抵老者氣血就衰。形如枯樹。不可摧殘。治宜早解其毒。於攻之中。量其毒注輕重也。幼者氣血未定。腸胃脆薄。不任



毒發。急宜早攻。當思一兩歲時。作七十歲觀。一週以內。作八九十歲觀。自然百無一失。婦人之病。與男子無異。所異者。胎前產後。經期月候耳。至於貧者勞力。飲食自倍。無酒色可思。無機關可用。故腠理常實。而有病拖延。當以急攻為主。免致毒傷內臟。至於富者。或終身逸樂。不免累於酒色。或過於勞心。食少事煩。其腠理恆虛。而有病即醫。亦宜量其攻伐。除邪即安正也。至老少用藥攻伐。十之四五不可太過。至於婦人胎產。病羊毛溫證。並婦女行經等證。另有分治。此其大略也。若夫神而明之。變而通之。又在會心者自用焉耳。

### 臨證規則

病患難知。有規則而能知。道爲化象。法爲至理。萬法歸一。在於得其要領。人非生而知之。必有資於規則。務須膽與識俱。心隨理運。臨證推尋。詳明果決。若識見不真。先迷向往之路。膽力不壯。同歸廢弛之塗。終不能遇病而驅之也。蓋溫邪見證。有發熱惡寒。有微熱惡寒。有無熱惡寒。有發熱不惡寒。其溫邪出於陰陽臟腑而別之也。陰爲臟。陽爲腑。其脈亦有陰陽。脈之浮、洪、數、長、實。五陽也。脈之沉、遲、微、弦、

瀋。五陰也。至內伏之邪。以右手寸口爲主。浮爲在表。沉爲在裏。數爲在腑。遲爲在臟。陽病陰脈。陰病陽脈。死生判斷。不盡然也。惟脈有神者準也。欲知病愈未愈。脈大爲病進。脈緩爲病退。

### 申明溫邪出三陽病治

溫邪自裏達表。邪出少陽。則微作寒熱。口苦作嘔。舌微現白苔。苔中有紋。夾雜紅點。頭忽眩暈。胸脇脹悶。方用荊防敗毒散。合溫證解毒散治之。繼以加減雙解散。溫邪出陽明。發熱不惡寒。口渴唇燥。舌苔厚白。或現黃苔。皆有紫點。苔見裂紋。頭痛胸脹身痠。煩躁嘔吐。面色紅亮。惡人與火。方用加減雙解散主之。次用白虎湯。溫邪出太陽。惡寒發熱。頭痛脊強。項痛拘束。或嘔或瀉。口淡不渴。舌有滑苔。或黃或白。皆有紅點裂紋。面色灰滯。便數。或遺精。方用荊防敗毒散。加滑石一二兩。次用加減雙解散。

以上溫邪出三陽。依方調治。至於病有變異。宜照備方選用。

### 申明溫熱攻三陰病治

溫熱攻太陰。煩躁忽熱。肢冷身倦。氣急吐衄。腹滿泄瀉。口渴不飲。舌如砂壘。神昏語錯。脈沉數者生。浮軟者不治。

溫熱攻少陰。渴躁狂妄。壯熱忽寒。咽痛胸脹。忽阻忽喘。自利不食。面赤脹亮。脈數大不急者生。或急或散者不治。

溫熱攻厥陰。面色灰滯。舌強脣紫。苔黑而乾。抽搐悶亂。呃逆連聲。微熱肢冷。腹脹囊縮。或囊腫而破。或胃口作痛。痛至少腹。脹硬如石。脈弦數不強者生。或如新張弓弦。或細而短者俱不治。

以上溫邪攻三陰難救之病。宜早服加減雙解散。黃連解毒湯。再依病證。增減用藥。至病有變異。宜照備方選用。

### 羊毛溫證規則

羊毛見證。有輕重之分。宜詳細申明。但此病之來。人皆不覺。而爲醫者。未曾多見。亦或見者。未必深識。何況於病家。焉得信其爲羊毛證乎。夫溫證羊毛伏鬱毒火。有注於厥陰少陽者。有注於少陰太陽者。有注於太陰陽明者。此爲雙注證。毒邪



極重者也。有注於少陽經者。有注於陽明經者。有注於太陽經者。此爲單注證。毒火少輕也。

### 申明羊毛雙文注證治

厥陰少陽形證。寒熱似瘧。面青色滯。脣燥乾嘔。舌苔白滑。有紫點裂紋。周身振動。腹內如梗兩條。胸悶氣急。忽毒火衝動。人事昏亂。兩目徬徨。驚悸直視。角弓反張。如畏刀鋸。如見鬼神。治法。外除羊毛。內服加減雙解散。增雄鼠糞七枚。次用五黃丹。珠黃散。紫雪金丹。並犀角。羚羊。地丁。蒲公英。銀花。雄黃解毒等藥。

少陰太陽形證。時發寒熱。面色青赤。脣燥舌破。苔黃點紫。咽喉不利。周身板束。四肢麻木。骨痛如碎。頭如斧劈。或嘔或瀉。胸悶氣脹。晝夜不安。小便閉塞。煩躁不寧。治法。外除羊毛。內服加減雙解散。增羌活。兼服五黃丹。次用加味涼膈散。黃連解毒湯。並服金汁。人中黃。牛黃。銀花。蒲公英。解毒等藥。

太陰陽明形證。壯熱微寒。四肢厥冷。面色青灰紫脹。唇掀腫裂。舌本紫赤。苔如粉白。有刺。兼有紅點裂紋。渴欲多飲。飲又嘔吐。牙床出血。胸脹腹痛。狂躁氣急。治法。

外除羊毛。內服加減雙解散。兼五黃丹。繼服加減大柴胡湯。並服西瓜水、犀角、羚羊、人中黃、銀花、蒲公英、地丁、雄黃、牛黃解毒等藥。

申明羊毛單注證治

少陽形證。寒熱如瘧。面色微青。神倦身重。頭眩目澁。口苦喜噦。舌有薄苔。或黃或白。皆有點紋。胸悶心煩。治法。內服荆防敗毒散。兼服五黃丹。外除羊毛。次服五味消毒飲。並加減雙解散。增雄黃少許和服。

陽明形證。不惡寒。忽發熱。脣乾微渴。面青微紅。舌如積粉。有細紋紅點。胸悶身倦。頭暈作煩。不能安臥。治法。內服升麻葛根湯。兼服五黃丹。外除羊毛。次服加減雙解散。白虎湯。

太陽形證。寒熱身重。面青微赤。頭痛脊強。或嘔或瀉。胸悶氣脹。舌本紫色。苔見白滑。有細點裂紋。脣乾咽燥。口淡而黏。渴而不飲。小便赤澁。或遺精。或淋濁。治法。內服荆防敗毒散。兼服五黃丹。外除羊毛。次服加減雙解散。猪苓湯。

以上雙注單注羊毛溫證。用藥調治。使病者汗出徹。舌浮白苔點紋皆退。或偏



身作癢。或發疹塊。以熱退毛除爲愈。又雙注單注形證。不必拘於日期。惟辨臟腑毒火之輕重也。至於治法。俱以太陰肺陽明胃少陽三焦爲主。其最要者。陽明胃腑。胃爲水穀之海。五臟之源。十二經總會之地。當於此處逐毒。不可忽略。實者宜用加減雙解散。虛者宜用新製蘭膏湯。並服五黃丹。倘毒重本虛。亦宜加減雙解散。不可太過。至四損不可正治。由於大勞大慾。及大病久病。氣血兩虧。陰陽並竭。名爲四損。又病羊毛溫邪。最難調治。宜臨證時細加詳察。是氣虧。是血虧。是元陽虧。是元陰虧。必至審定。然後施治。得當爲良。

### 羊毛溫邪疑似辨

羊毛溫邪。亦有疑似難明。須辨質之虛實。毒之輕重。毛之有無。有似虛寒而伏大熱。有似雜病而治不能痊者。此疑似之證。貽誤匪輕。然而虛者宜輕逐毒火。實者大可涼攻。毒之輕者宜緩攻。毒之重者宜急攻。羊毛有無。用蕎麥麵團圈擦。醫皆能知之也。至於虛證似實。實證似虛。毒輕似重。毒重似輕。外無疹點。內有羊毛。類似雜證。而有羊毛。類似虛寒。而伏大熱。最難詳辨。若不細心體認。辨出真情。何能



破其隱蔽。療其病患耶。

羊毛溫邪。虛證似實。如陽氣素虧。氣短少息。陰血素虧。面色痿黃。至毒火伏藏於內。神反精壯。面反光亮。初病微覺寒熱。胸反不脹。擦有羊毛。舌本赤色。浮有白苔。現有點紋。脈象虛洪。或見細數。渴而不飲。煩而不躁者是也。縱宜宣伐。於攻藥之中。兼以養氣和血為主。

羊毛溫邪。實證似虛。精神素健。飲食倍常。毒伏於內。神反倦怠。面反青白。心慌頭眩。內燒無力。時忽發麻。用蕎麥麵團擦身有羊毛。舌本紫色。現有厚苔。或黃或白。紫點裂紋。脈象數實。或浮軟沈堅。喜飲不多。昏沈困睡者是也。急宜宣伐。於攻藥之中。重用膏黃。芒硝為主。並用珠黃散。紫雪金丹。

羊毛溫邪。毒輕似重。毒火發作。面色青紅。壯熱煩躁。無汗口渴。胸悶不寬。舌苔薄黃。點紅紋細。脈象洪數。攻伐解毒之藥。利於輕用。

羊毛溫邪。毒重似輕。毒火發作。舉動如常。面色青滯。微熱惡寒。口淡嘔痰。惡心胸悶。舌苔灰白。紫點裂紋。脈象沈實。攻伐解毒之藥。利於峻重。

羊毛溫邪。毒火發動。胸悶惡寒。皮膚忽木。前後心無點。周身無疹。或神昏氣悶。或

潮熱不止。或飲食減少。或嘔酸痰。或不發熱。俱用蕎麥麵團圈擦前心後心。如有毛者。宜服解毒攻伐藥除之。

羊毛溫邪。有大熱似寒。四肢厥冷。身重不仁。面青浮腫。目瞪神呆。脣淡而皺。舌苔灰白。紫色細點。嘔吐痰沫。痰有辛味。胸悶神昏。早覺甦醒。午後如死。脈象沈微。獨右尺見促脈。余初臨此證。類似虛寒。慄慄一息。疑爲必死。細推證象。早覺甦醒。右尺脈促。舌苔灰白。有細紫點。痰有辛氣。脣有皺紋。此非寒證。所有以蕎麥麵團圈擦前後心。有毛。果卽此證也。譬諸人事。言多者必假。一語者反真。審之醫理證象。少者爲真。多者爲假。人身四肢。爲諸陽之本。頭爲六陽之首。又臟不和則九竅不通。陽氣不能運動。卽現諸般寒象。若陽氣宣通。其寒自散矣。此病之形證。有一二生機。不可不救。方用黃連解毒湯。加大黃。繼以理脾和肝。羊毛溫邪。類似雜證。如胃痛、脇痛、腹痛、傷風、停食、積聚、冷痰、嘔吐等證。病證甚多。難以枚舉。或問何以別之。答曰。易識其證。面青胸脹。舌有點紋。脈象有力爲準。宜從羊毛溫治。不宜從雜病治。

## 羊毛溫類證治



羊毛溫邪。重證用加減雙解散。一日兩服。若病劇不解者。當半日中盡二服。

羊毛溫邪。面現青色。舌有點紋。寒熱胸悶。周身拘板。頭眩作痛。是此證也。如舌現點紋。寒熱胸悶。身痠作痛。面色不青。非此證也。蓋溫邪病。羊毛病。各從其證調之。亦不拘於溫證羊毛證之方。要知合宜而用。

羊毛溫邪。四時發作。夾表邪者。宜先服荊防敗毒散。次服加減雙解散。得汗得利。爲愈。

羊毛溫邪。表裏熱盛。或發癰疹。或頭面腮腫。宜用加減普濟消毒飲。兼服五黃丹。羊毛溫邪。病作不識。昏悶狂躁。忽寒忽熱。延至四五日。或十餘日。用蕎麥麵團圈擦。擦出毛有五色。其毛甚健。治法。用黃連解毒湯。加大黃、石膏、蒲公英、防風、雄黃、黃蜜。

羊毛溫證。伏邪發動。煩躁發熱。惡寒頭痛。面色青滯。舌赤苔黃。浮黑有刺。口渴神昏。診脈右手數實。左手關尺空虛。此係肝腎素虧。溫毒極重。病急不可緩治。亦不宜補陰托邪。此證屢次經見。速用加減雙解散。逐去毒火。外除羊毛。保全氣血。不致火灼陰陽。內陷變證。若畏涼攻。則無濟矣。



羊毛溫邪。伏毒發動。寒熱痰血。面青色滯。舌有點紋。或素有血證。當此毒火內蒸。其血必然漸湧。脈象洪數。以溫邪爲主。治法外除羊毛。內服加減雙解散。次以清熱解毒。和肝養血調理。

羊毛溫邪。毒火發動。面色青滯。舌有點紋。忽作寒熱。煩躁內燒。便血不止。或素有便血。脈象數大。以溫邪爲主。治法外除羊毛。內服加減雙解散。次以黃連解毒湯。加白芍、地榆、銀花、苡仁而愈。

羊毛溫邪。痺痛十餘日。忽寒忽熱。自腹痛至腿足。又至肩背。晝夜不安。醫以桂枝、杜仲、牛膝、秦艽等藥不效。更加煩躁。病象甚危。面色青板。舌有紫點。身痛難以轉側。脈象數實。治法外除羊毛。內服黃連解毒湯。加蟬衣、僵蠶、石膏煎汁。加雄黃、熟大黃、黃蜜和服。數劑而愈。

羊毛溫邪。雙注單注證。誤服溫燥藥。如霍香、厚朴、烏藥、木香等藥。至毒火傷其氣血。病加沈重。宜用黃連解毒湯。白虎湯。加黃蜜、雄黃和服。氣弱者不易收功。如本質氣壯者。仍服加減雙解散而愈。

羊毛溫邪。發動毒火。面色青滯。舌尖紫赤。寒熱胸悶。口眼歪斜。不語肢廢。人事昏

沈。類似中風病情。診脈忽沈數而伏。忽洪大而實。脈證不應。非中風也。以溫邪法治。外除羊毛。用瓜蒂散探吐。次服加減雙解散。五黃丹。吐瀉宣通爲要。並服紫雪金丹。珠黃散。若服藥後溫毒外達。內臟素虧。右寸虛弱。欬嗽浮熱。煩躁言蹇。日輕夜重。宜早服清燥救肺湯。晚服黃連解毒湯。加蟬衣。殭蠶。白附子。水煎去渣。和雄黃。熟大黃。黃蜜。溫服。繼以解毒清熱。扶脾養陰而愈。

羊毛溫邪。腹脹寒熱。周身浮腫。面色青亮。舌有白苔紫點。脈象洪實。外除羊毛。內服加減雙解散。增入大腹皮。薑皮。兼服五黃丹藥。服數劑後。腫消毒解。再以清理餘毒。扶脾而愈。

羊毛溫邪。咽痛欬嗽。痰濁聲低。脈象數實。舌有黃苔。布有赤點。面色青滯。忽然發紅。胸悶背脹。內燒煩躁。食減神倦。醫多以虛弱治。延久不愈。細診此證。若論虛勞本病。則五火並蒸。氣血漸損。損盡而已。如心火灼金。欬嗽胸悶。肝火乘胃。面浮色青。兩頤忽紅。食減作瀉。腎火炎上。咽痛喉燥。水泛痰沫。脾火內焚。肌肉索澤。膚如甲錯。肺火內燒。音啞無聲。痰如蟹沫。五臟火焚。脈必細數。或虛洪。或弦急而空。此皆難療之病也。至所見之脈證。用蕎麥麵團擦出有毛。脈數實。面青色滯。舌有赤



點。數條病形。有三條訛別。豈可定爲虛弱耶。治法宜用蘭膏湯。外除羊毛。病者胸悶覺寬。身增寒熱。次用加減雙解散。並五黃丹。紫雪金丹。繼以理脾和肝。清熱解毒而愈。

羊毛溫邪。鼻衄不止。或口齒出血。或耳內出血。忽寒忽熱。舌現黃苔。布有紫點。胸悶減食。神倦心煩。脈象數實。面色青滯。治法外除羊毛。內服加減雙解散。次服犀角地黃湯。如齒衄。白虎湯。如耳衄。黃連解毒湯。溫毒若減。統以清涼飲治之而愈。羊毛溫邪。惡寒肢冷。一月有餘。胸悶食少。頭暈心煩。舌有紅點。脈數有力。醫以肝鬱伏寒治。用桂枝。木香等藥。其病日增。審病有寒。脈則不數。舌有紅點。必有瘟毒。所謂惡寒肢冷。此熱厥也。宜用新製蘭膏湯。兼五黃丹服。外除羊毛。惡寒漸退。數解黃沫。肢冷回陽。繼用黃連解毒湯。並調理脾胃而愈。羊毛溫邪。潮熱月餘。面色青滯。舌有黃苔。布有紅點。脈象數實。胸悶作煩。食少神倦。治法外除羊毛。內服加減雙解散。繼以清熱解毒。和脾而愈。羊毛溫邪。七八日後。病退微喘。食少神倦。忽昏忽明。絕無病苦。脈象細數。寸口脈微。此陽氣不足。欲脫之象也。法用補中益氣湯。加麥門冬。生地黃救之。



羊毛溫邪。七八日後。餘邪不退。神昏氣怯。忽寒忽熱。腹中微痛。胸忽作悶。脈象虛洪。寸口脈濇。此陰氣不足。欲脫之象也。法用理陰煎。加黃連、石膏救之。

羊毛溫邪。病十餘日。毒火未盡。腎虛呃逆。自下而上。方用六味地黃湯。加磁石、石斛、黃柏、黃連。

羊毛溫邪。肝虛呃逆。自左而上。用理陰煎。加代赭石、旋覆花、白芍、川黃連。繼服六味地黃湯。加防風。

羊毛溫邪。脾虛呃逆。自右而上。用理陰煎。加丁香、柿蒂、川黃連。次用四君子湯。加薏苡仁、澤蘭葉、白芍、黃芩、川貝母。

羊毛溫邪。三焦呃逆。自中而上。用新製止呃湯。

羊毛溫邪。肺虛呃逆。連聲不止。不知所來。法用茅草探嚏。內服參麥湯。加葶藶子、石膏、杏仁。

羊毛溫邪。毒火痰結。煩躁昏亂。寒熱氣促。呃逆連聲。肺胃壅閉。脈數而促。治法外除羊毛。內服加減雙解散。並服五黃丹。

羊毛溫邪。毛已擦出。大解紅沫。脇痛急迫。難以轉側。已服加減雙解散數劑。舌苔

黃厚。浮黑布有點紋。神昏煩躁。忽熱忽寒。方用黃連解毒湯。加當歸、白芍、石膏、滑石、雄黃、黃蜜。兼服紫雪金丹。

羊毛溫邪。已得汗解。毛出。延久不愈。病因溫邪發動。誤服桂、附、乾薑、草果、蔻仁等藥。致伏毒不除。陰陽氣怯。臟腑賊火內生。真火無權。類與溫邪初起之火相同。辨其證候。在色在脈。有病形可考。如面色青灰。與青滯有辨。脈象虛洪。與實數有別。治法。用犀角、地黃湯。並參麥湯救之。生地用一二兩。人參用一二錢。繼用六味地黃湯。加白芍、當歸、沙參、麥冬、黃芩、黃連。

羊毛溫邪。病證輕減。氣血空虛。脈象洪大而軟。神和能食。苦於夜不安臥。煩熱內燒。行動少勞。自汗不止。方用當歸六黃湯。加茯神、炒棗仁。繼用製甘草湯。

羊毛溫邪。毒火已退。人事清爽。神虛忽煩。安臥食少。方用黃芩湯。加薏苡仁、菡豆、石膏、澤蘭葉。倘病久藥煩。宜用加減資生健脾丸。早晚服之。

羊毛溫邪。毒火未盡。欬嗽連聲。食少作嘔。方用黃連解毒湯。加杏仁、薏苡仁、澤蘭葉。並服瀉白散。加石膏、桔梗、大貝母。

羊毛溫邪。病後復發。本證。或胃痛。或脇痛。法用黃芩湯。加澤蘭葉、川黃連。兼服逍

遙散。加石膏、烏梅肉。

羊毛溫邪。毒火已退。素有肝鬱。氣逆阻脹。心煩內熱。夜不能臥。法用甘露飲。加旋覆花、代赭石。

羊毛溫邪。病愈復患。素有疾病。宜依常治方法。倘有餘邪不盡。方中加石膏、澤蘭葉。

羊毛溫邪。病後狐惑。似病非病。情不能釋。治法凡飲食之中。皆用石膏泡水烹煮。

羊毛溫邪。毒壅胃口。湯藥不下。法用鮮薑一片擦舌。雜證同法。

羊毛溫邪。毒火熾盛。不能納藥。法用甘蔗漿、梨汁、西瓜水、蘗薺汁。俱微溫服。冷服亦可。

羊毛溫邪。外除羊毛。內服加減雙解散。煩躁不寧。渴嘔吐蟲。氣逆胸脹。法以冷飲烏梅湯兼服。

### 婦人有孕病羊毛溫治

有孕婦人患羊毛溫邪。其雙注單注。病證形象。一一如前治法同。然設羊毛未出。



已出未透。俱用加減雙解散。去薑黃、芒硝。量服數劑。毛除毒解。繼以扶脾養胎。方用加減資生健脾丸。並用四物湯。至清理毒火。方用黃連解毒湯。重用石膏。有孕婦人患羊毛溫邪。有毒火極重者。外除羊毛。內服加減雙解散。去薑黃、芒硝。倍用石膏。設邪火內擾。忽然漏血。胎恐不安。致有損傷。宜審胎元。主養血脈。分其臟腑。依經調治。方用加減雙解散。去薑黃、芒硝。按妊脈之月加藥。至毒火輕重。醫量之耳。

羊毛溫邪。有妊一月。厥陰肝臟脈養。火擾漏血。方用加減雙解散。去薑黃、芒硝。

以下按月方同本方。增入白薇一兩。繼用黃連解毒湯。加白芍、當歸。

羊毛溫邪。有妊二月。少陽膽經脈養。火擾漏血。本方黃芩用五錢。增入血餘二錢。

羊毛溫邪。有妊三月。少陰心臟脈養。火擾漏血。本方黃連用二錢。石膏二兩。當歸

五錢。

羊毛溫邪。有妊四月。手少陽三焦脈養。火擾漏血。本方石膏用三兩。炒山梔一兩。

羊毛溫邪。有妊五月。太陰脾臟脈養。火擾漏血。本方石膏用一兩。白芍五錢。防風

四錢。黃連二錢。

羊毛溫邪。有妊六月。足陽明胃經脈養。火擾漏血。本方石膏用四兩。炒山梔四錢。當歸五錢。

羊毛溫邪。有妊七月。太陰肺臟脈養。火擾漏血。本方石膏用三兩。黃芩五錢。白芍五錢。炒山梔三錢。增入川貝母五錢。

羊毛溫邪。有妊八月。手陽明大腸脈養。火擾漏血。本方石膏用二兩。黃芩五錢。炒山梔三錢。當歸五錢。增入炒枳殼一錢。

羊毛溫邪。有妊足月。少陰腎臟脈養。火擾漏血。未破漿胞。本方石膏用二兩。當歸五錢。增入川芎。川貝母各一錢。

羊毛溫邪。有妊將生。燒躁煩亂。似欲生產。又不能生。忽然癰瘋大作。抽搐昏沈。牙關緊閉。急用川芎一錢。全當歸五錢。殭蠶三錢。蟬退十四枚。河水煎去渣。和紫雪金丹三錢服下。即能癰止。生孩下地。產婦宜多服童便。米湯。

羊毛溫邪。新生產後。羊毛擦出。毒火漸輕。方用加味佛手散。

羊毛溫邪。產後五六日。或十餘日。毒發雙注證。脈象沈實。寒熱胸脹。周身拘痛。面青唇厥。舌乾而赤。或苔黃而膩。或灰白。均有紫點裂紋。或頭痛如裂。煩躁狂亂。或

毒結乳癰。或四肢腫痛。或面腫唇掀。耳腫作痛。治法。外除羊毛。內服加味佛手散。去桂枝。清水煎去渣。和同生丹一粒服之。如不愈。服新製蘭膏湯。繼用解毒養陰。理脾而愈。

羊毛溫邪。產後四五日。毒火發動。微寒壯熱。頭痛作暈。心煩口渴。內燒腹痛。四肢麻木。周身拘束。面青色滯。舌赤苔黃。或白布有點紋。晝夜不安。治法。外除羊毛。內服加味佛手散。增入秋石、雄黃、黃蜜。兼服同生丹。如不愈。並服紫雪金丹。燈心湯下。

羊毛溫邪。產後十餘日。面色青滯。舌紫苔黃。布有細點。嘔吐痰水。忽寒忽熱。頭痛眩暈。胸悶氣脹。治法。外除羊毛。內服加味佛手散。兼服五黃丹。

羊毛溫邪。產後一月。內外寒熱。胸悶面青。舌赤。治法。外除羊毛。內服新製蘭膏湯。並五黃丹。病退即止。繼服加減資生健脾丸。

羊毛溫邪。產後四五十日。毒火雙注。面青舌紫。有苔有點。煩躁譫言。壯熱內燒。治法。外除羊毛。內服加減雙解散。去硝黃。增元明粉、熟大黃、雄黃。並服五黃丹。繼服新製蘭膏湯。



以上有治胎前產後。法未盡善者。務須臨證參詳活人更多矣。

### 婦女病羊毛溫行經治

婦女患羊毛溫邪。毒火擾動血室。或逢當期。暴下不止。人事昏沈。譫言狂躁。治法外除羊毛。內服加減雙解散。方內當歸用五錢。黃芩三錢。增入白薇一兩。數服後病退。繼以清熱解毒。養血理脾。不至經枯經閉。淋瀝不調爲害。

婦女患羊毛溫邪。毒火迫血。不當行經。忽然而行。血湧昏亂。譫言發厥。邪火更熾。治法外除羊毛。內服加減雙解散。方內石膏用四兩。當歸用五錢。增入羚羊角尖五錢。白薇五錢。大生地一兩。取汁沖服。並服紫雪金丹。燈草湯下。

婦女患羊毛溫邪。毒火擾動精府。帶下如水。腰痛束脹。寒熱煩躁。舌有紫點。胸悶口渴。治法外除羊毛。內服加減雙解散。方內石膏用二兩。增入羌活一錢。雄黃三分。次服猪苓湯。加蟬衣、殭蠶、石膏、澤蘭葉。倘本質素虧。溫邪解退。宜培補陰陽。如大造丸、固本丸。皆可通用。

### 嬰兒病羊毛溫治

嬰兒初生下地。多有胎熱發厥。吐沫不哭。肝火生風。手足動搖。法用紫雪金丹三五釐常服。燈草湯下。

嬰兒初生。胎濕生黃。法用陳氏抱龍丸。藟薺清汁和勻。溫服數次而愈。

嬰兒初生。臍風撮口證。由於有孕多慾。法用九製大黃五釐。陳氏抱龍丸五釐。燈草湯和服。

嬰兒初生。胎中毒火。發赤遊風。或發丹毒。由妊娠時烟酒辛羶。食物太過。致有此患。法用鍼砭去其毒血。藥用紫雪金丹一分。燈草湯和服。次以犀角羚羊角石膏。蟬退。荆芥。元參。黃連等分。煎湯服之。

嬰兒下地。三十日內。外發熱變蒸。十月之間。月月忽然發熱。不可作病證醫。此熱由於內生。主長養之氣。至常以藟薺清汁。兼服白蜜湯解之。或用紫雪金丹少許。燈草湯下。

嬰兒變蒸時。素有肝火。生痰發熱。氣促苗竅不通。面色青亮。忽變浮紅。目瞪微搐。法宜羚羊角。石膏。防風。薄荷。鈎藤。鬱金。山查。桔梗。時習多以乳滯着駭撲風爲論。而用疎風消滯鎮驚化痰之藥。服下無效。致病轉劇。危困無救。深可歎也。書云如



保赤子。心誠求之。至審察病情。惟望聞問切。嬰兒在四診之中。已少其三。獨診其色。所以較難診者如此。何況診視羊毛證乎。故略舉數端。爲幼科醫備一參耳。嬰兒感受溫毒。伏而化生羊毛。兒生下地。十月之內。皆無此證。或問何也。答曰。嬰兒氣貫胸頂。呼吸通於顙門。溫毒不能相干。至食五味之早者。顙門合之亦早。七八個月。或作此證。或兩三個月亦有此證。由母有瘟邪。子亦受之。其病形象。手足忽冷。頭身忽熱。面色青滯。或青浮紅。唇乾口渴。舌有紅點。氣促神倦。治法。外除羊毛。內服加減雙解散。其分數約全劑十之三四。能吐能瀉。可服米粥。繼以新製蘭膏湯。五黃丹酌量服之。毒火已退。宜用加減資生健脾丸。嬰兒患羊毛溫邪。適逢出痘。急宜外除羊毛。否則閉痘不出。六日以前。依羊毛治法。方用加減雙解散。增人中黃、牛子、雄黃、蘆根、芫荽。六日以後。仍歸痘證法治。嬰兒患羊毛溫邪出痘。證係雙注。宜忌雞汁、魚辛。倘服此物。昏阻煩亂倍增。嬰兒患羊毛溫邪出痘。證係單注。外除羊毛。內依痘證治法。羊毛溫邪出痘。務須除毛爲急。擦浴並施。羊毛溫邪兼之出痧。其法相同。



## 羊毛溫邪不治證

毒注不解。人事昏厥。胸脹如石。不能呼吸。皮膚紫黑。脈不至者死。

毒火雙注證。誤服溫燥藥者死。

毒重脈空。神昏煩亂者死。

毒火熾甚。口鼻出血。狂躁膽言。脈虛散者死。

毒火注絡。周身拘痛。痛急昏厥。面色青收。手足紫脹浮腫。脈急或伏者死。

舌紫無苔。鼻孔如煤。面紫脹亮。人事昏沈者死。

目紅滄血。氣促脈微者死。

腹脹如石。叫痛不休。舌紫有刺無苔者死。

煩躁喘阻。抽搐鼻撮。眼眶落陷者死。

呃逆不止者死。

張狂直視。舌強不語者死。

氣急吐蛔。循衣被者死。

舌卷囊縮者死。

發熱脈躁。狂言不食。舌赤無苔者死。

毒留不退。體如烟熏。搖頭氣急者死。

噎欬不食。氣喘神倦者死。

溫邪病退。元氣散亂者死。

屢汗而病不退者死。

久熱不退。脈虛者死。

病後不食。唇青或黑。昏倦肢冷者死。

挑羊毛至膜無血者死。

婦人有孕。毒火迫血不止。神昏阻厥者死。

婦人產後昏厥。腹痛阻脹。浮腫紫色者死。

婦女熱入血室。暴下不止。神昏狂躁。喘阻舌強。不食者死。

嬰兒病昏厥直視。脹阻喘悶。欬噎不食。浮腫紫亮。口鼻出血者死。

毛毒閉悶。痘痧不出者死。

## 摘鍼論

萬事由於前定。災殃測理分明。治法求源。細參靈典。內有鍼砭。用其補泄。倘能俞穴處準。卽得臟腑氣至。夫鍼自上古。傳有九數。其形各別。九者。以按天地人身。四時陰陽。九宮之謂。至於病有浮沈。刺有淺深。經絡血脈。補瀉得宜。各盡其妙。經云。一天二地。三人四時。五音六律。七星八風。九野。身形亦應之。如人皮應天。人肉應地。人脈應人。人筋應時。人聲應音。人陰陽合氣應律。人齒面目應星。人出氣應風。人九竅三百六十五絡應野。故一鍼皮。二鍼肉。三鍼脈。四鍼筋。五鍼骨。六鍼調陰陽。七鍼益精。八鍼除風。九鍼通九竅。除三百六十五節氣。此之謂有所主也。今見羊毛溫證。常用九鍼。內第一鍼開皮。七鍼刺俞。其鍼處在胃之上脘。胃之下脘。又胃俞左右。皆刺其俞。在背心自上數下第十二椎骨節兩旁。此四處有點。亦或無點。按此四處施治。先用毫鍼刺此四處。再用鑱鍼開皮無血。拔出羊毛。有血卽止。余欣然明白。有是證暗合是法。但鍼砭流傳已久。偶中一二。未能十全。所以未通行也。至於天地之間。運化無窮。時逢有疾。其治不謀而合。此天地之機合乎道也。



夫醫教自黃帝之後。二千五百有餘年。自仲景之後。千有餘歲。其未可見者衆矣。其往可稽者灼然。若不知年之所加。氣之轉運。病之虛實。治之補泄。不可以爲醫矣。謹述圖翼於左。

九鍼之一名鑱鍼




其頭大。其末銳。取法於巾  
鍼。去末半寸漸銳。長一  
寸六分。


九鍼之七名毫鍼



尖如蚊蟲喙。取法於毫毛。

長一寸六分。







## 除羊毛法

蕎麥研細成粉。用冷水熱水各半。和勻成團。手握在病者胸前圈擦至腹。背後圈擦至腰。再擦膀腕腿腕四處。再擦頭面遍身。其毛盡出。多擦爲妙。事後病不復發。有用燒酒和蕎麥麵成團擦者亦好。有用青布浸熱燒酒。遍身圈擦。其毛亦出。用蕎麥麵。陰陽水和團圈擦。並治風寒氣鬱脹悶。反胃欬嗽痺痛皆效。此乃偶遇之方。並錄。

羊毛溫論卷上 除羊毛法

# 羊毛溫論

清 上元 隨 霖萬寧著述

鄞縣 曹赤電炳章圈校

## 卷下

### 備用諸方

五味消毒飲

金銀花三錢

野菊花

蒲公英

紫花地丁

紫背天葵各一錢二分

水煎。去渣。加無灰酒半杯服。

黃連解毒湯 治羊毛溫邪。毒火內熾。壯熱狂越。煩躁目赤。咽乾脣燥。錯語不眠。吐血衄血。熱盛發癍。或周身痺痛。腹痛嘔吐。

黃連三錢

黃柏三錢

山梔子二錢

黃芩二錢



水煎。去渣溫服。

加減雙解散 治溫證羊毛毒火。頭痛煩躁。寒熱胸悶氣脹。頭目眩暈。口苦耳聾。脣燥咽乾。舌有黃苔。或膩滑。或粉白。厚薄不一。夾有紅點裂紋。甚至乾而有刺。或黑或中空。或舌本鮮赤無苔。或渴或不渴。或吐痰水。惡心譫言昏厥。並治毒在下部。腰痛足腫。毒在皮膚。發赤游丹。疹塊癰痧。毒在少陽。寒熱如瘧。口苦而噦。毒在陽明。煩熱而吐。腮腫面腫。狂躁而渴。毒在大腸。瀉痢膿血。毒在脾臟。腹堅大而痛。毒在少陰。咽痛微熱。內燒吐血。毒在厥陰。頭痛目眩。筋惕抽搐。口歪不語。呃逆神昏。以上諸證。不得盡見。若見一二證相同。即用此方。

錦紋大黃三錢

芒硝二錢

黃連一錢

黃芩二錢

山梔子一錢

石膏一兩

飛滑石三錢

荊芥一錢

防風一錢

桔梗二錢

甘草一錢

蘇薄荷一錢

連翹去心一錢

全當歸一錢

白芍藥一錢

蟬退殼十二

白殭蠶三錢

廣薑黃七分

河水煎。去渣。下芒硝攪勻。再加無灰酒五錢。黃蜜三錢。和勻溫服。

此方係河間論中雙解散。加殭蠶、蟬退殼、廣薑黃。方內減去白朮。恐閉毒火。減去麻黃。恐傷衛氣。伏邪毒火。以理氣為主。佐以宣表。方用荆防、蟬、桔、薄荷、連翹、石膏以解表熱。薑黃、殭蠶、山梔行氣宣鬱。芩、連、滑石、甘草解泄毒火。硝黃蕩滌腸胃毒垢。歸、芍調養血脈。酒和氣血。蜂蜜潤腸。亦能解毒。是乃除邪解毒之妙方也。

本方減去荆防、甘、桔、石膏、滑石、芒硝、當歸、連翹。加柴胡、橘皮、枳實、黃柏。方名加減大柴胡湯。治羊毛溫毒邪作寒熱。

加味涼膈散。溫證羊毛火鬱於上。壯熱面赤。脣燥舌乾。煩躁譫言。胸悶氣滯。脈象數實。此方主之。

生大黃三錢

黃連二錢

黃芩二錢

山梔子二錢

蘇薄荷三錢

甘草一錢

連翹去心二錢

白殭蠶三錢

蟬退殼十二枚

廣薑黃七分

嫩竹葉一錢

水煎去渣。下芒硝三錢。攪勻。再加無灰酒半盃。黃蜜三匙和服。如嘔吐口渴。本方加石膏一兩。心中煩熱。加麥冬。

荆防敗毒散 治四時溫邪。伏有羊毛。頭目眩痛。四肢軟倦。忽寒忽熱。腰背強痛。胸悶不寬。

羌活二錢

獨活一錢

荆芥二錢

防風三錢

柴胡八分

前胡二錢

甘草一錢

桔梗二錢

薄荷二錢

川芎一錢

枳殼一錢

雲赤苓三錢

鮮薑一錢

水煎去渣。溫服。如溫毒甚重。加生大黃五錢。蟬退十二枚。僵蠶三錢。按此升燥太甚。用之宜慎。

溫證解毒散 治羊毛溫邪。毒火伏鬱。頭面腫大。寒熱如瘧。胸脇脹悶。並治一切火毒閉結。不論老少強弱。量其毒之輕重服之。此方惟以攻宣伏邪。保全正氣。不至毒火傷元為主。

生大黃四錢

僵蠶三錢

薑黃七分

蟬退殼十二枚

共研細末。每服二錢。加黃蜜三匙。陳酒半盃。開水和服。或蜜酒為丸。名太極丸。五黃丹 治一切溫毒宣伐之妙方也。另有湯引。



生大黃二兩

人中黃五錢

明雄黃五錢

廣薑黃三錢

牛黃一錢

硃砂五錢

冰片五分

蟬退殼五錢

殭蠶一兩

共研細末。用黃蜜、陳酒爲丸。重二錢一粒。

一、治頭面腫大。菊花一錢。薄荷八分。水煎去渣。和丹一粒。連服數次。以消爲度。

一、治羊毛溫證。石膏一兩。水煎去渣。化元明粉一錢。和丹服。

一、治癰疹痧痘火毒赤遊丹腫等證。石膏一兩。犀角鎔屑一錢。水煎去渣。和丹服。

服。

一、治溫瘧。寒少熱多。青蒿二錢。石膏五錢。水煎去渣。和丹服。

一、治紅白毒痢。腹痛墜脹。當歸二錢。黃芩一錢。水煎去渣。和丹服。

一、治伏熱吐血。秋石五分。開水化。和丹服。

一、治伏邪。胸悶頭痛。薄荷一錢。川芎五分。水煎去渣。和丹服。

一、治溼毒瘡厲。蠱毒膿瘡。疥癬癰腫。疔瘍。金銀花一錢。甘草一錢。水煎去渣。和丹服。

丹服。

一、治小兒急驚阻厥。發熱神昏。胸悶氣喘。癇風抽搐。薄荷一錢。鈎藤三錢。水煎去渣。和丹服。

按、方名五黃。治從中極。宣表攻裏。除邪解毒。安輔氣血。旋轉陰陽。黃宮內養。安寧之意也。

瓜蒂散 治溫毒閉塞。羊毛伏鬱。痰結胸中。脹悶煩躁。

甜瓜蒂用炒黃

考之生蒿高平澤間又發明可作羹食除蠱食之金陵俗名北瓜

赤小豆炒等分

共研細末。用酸漿水調溫服。吐不止者。葱白湯解之。吐不出者。含沙糖一塊。即吐出膠痰。溫邪振作。繼服雙解散等藥。

珠黃散 治羊毛溫邪毒火。痰結氣喘。昏迷狂躁阻厥。

珍珠用豆腐包合煮數沸

牛黃色黃有細紋

硃砂研水飛

以上三味。等分研細。用荊薺清汁。和勻溫服。

東垣普濟消毒飲 治羊毛溫邪。惡寒壯熱。體重身倦。頭面腫大。或兩腮腫痛。咽喉不利。喉蛾咽腫。口乾舌刺。胸悶氣脹。

川黃連五錢

黃芩五錢

甘草二錢

桔梗二錢

元參三錢

荊芥穗二錢

防風二錢

升麻一錢

薄荷葉一錢

連翹去心一錢

馬勃一錢

白殭蠶三錢

蟬退殼十二枚

牛蒡子錢炒一

柴胡二錢

炒山梔二錢

生大黃八錢

芒硝四錢

水煎去渣。下芒硝。加黃蜜五錢。陳黃酒五錢。和溫服。

按溫毒乘於清道。陽氣受之。肺主氣。氣為火逼。壅鬱不通。肺氣不降。致浮腫於

頭面。亦有咽痛頤腫等證。東垣云。身半以上。天之陽也。邪氣客於心肺之間。上

攻頭面而為腫耳。並用甘桔、升麻、柴、薄、疏通其氣。芩、連、元參、山梔以降溫邪毒

火。馬勃、殭蠶、牛子以消腫。荊、蟬、翹、防宣熱散結。再加硝黃以攻逐其熱。則溫毒

解散。頭腫皆消。而清氣舒暢矣。

陶華三黃石膏湯加減。治羊毛溫邪。大熱神昏。兩目如火。脣若塗硃。煩躁譫言。

口渴不寐。鼻衄失血。發癍發疹。脈象洪長。此方主之。

黃連三錢

黃芩二錢

黃柏二錢

生石膏四兩

山梔子二錢

淡豆豉二錢

白殭蠶三錢

蟬蛻殼十五枚



水煎去渣。加黃蜜五錢和服。

按此方去麻黃加蟬蛻、殭蠶能解表熱。並解裏熱。急救陰陽。以保性命。或云。此等大熱。何不釜底抽薪。亦是正法。答云。獨不診脈乎。見如是之熱病。見洪長之脈象。其洪者火氣至也。其長者木氣至也。互相尅制。金土被熾。氣血枯槁。腎水內竭。木風鼓動。所謂邪陷厥陰。終難釋矣。或云。何不用清滋一法。清者泄其熱。滋者補其陰。亦是化邪正法。答曰。凡內生之火。宜清。素虧之陰。宜滋。化邪者。化其情慾之邪熱也。非化外因之邪熱也。夫外因邪熱。乘於內臟。焚燒煎煉。精液乾枯。陰陽離散。其命危矣。急宜早圖涼解之法。逐退賊邪。然後清滋有益。方用石膏、豆豉以解表熱。梔柏、芩連以泄裏熱。蟬蛻、殭蠶以搜伏邪。黃蜜滋潤五臟。又能解毒。頗為全備。此羊毛溫邪之妙方也。

犀角大青湯 治羊毛溫邪毒火極重。赤游癰疹。煩躁不寧。神昏壯熱。口渴譫言。脈象洪數。早宜解救。否則癰黑胃爛無效。

犀角尖三錢

升麻二錢

元參五錢

黃連二錢

黃芩三錢

黃柏二錢

山梔子二錢

甘草一錢

大青二錢

如無用青黛水煎服。如脈象數實。本方加蟬蛻十二枚。殭蠶三錢。生大黃四錢。芒硝三錢。黃蜜五錢。

消癰青黛飲。治羊毛溫邪毒火內熾。攻解不當。下遲傷陰。內外火并。攻胃發癰。色現紫赤。狂躁作嘔。此方主之。

大生地二兩

犀角尖三錢

黃連一錢

元參五錢

生石膏一兩

知母八錢

山梔子二錢

柴胡八分

甘草二錢

生大黃一錢

青黛一錢

黃蜜五錢

水煎去渣。入生地汁、青黛、黃蜜和勻服。節庵導赤各半湯。治羊毛溫邪。大病後忽變神昏語錯。目赤脣乾。與粥湯則嘔。不與不思。似臥非臥。形如酒醉。此餘邪內熾。氣血損傷故也。方用

人參一錢

麥冬三錢

茯神三錢

滑石三錢

甘草一錢

知母一錢

黃芩二錢

山梔子二錢

黃連一錢

犀角尖二錢

燈草一錢

黃蜜三錢

水煎去渣。和蜜溫服。

清燥救肺湯。治羊毛溫邪。火傷肺氣。發熱欬嗽。胸中氣悶。煩躁恍惚。類似瘋癱。舌強不語。手足痿軟。並餘邪咳嗽氣急。

沙參五錢

麥冬去心三錢

陳阿膠一錢

火麻仁研二錢

杏仁研二錢

甘草一錢

煨石膏一兩

霜桑葉三錢

枇杷葉去毛蜜製五錢

黃蜜三錢

水煎去渣。入膠蜜和勻溫服。

景岳玉女煎。治羊毛溫毒餘邪。腎陰素虧。虛火炎上。忽煩忽躁。咽乾口渴。衄血牙痛。

煨石膏一兩

知母三錢

麥冬去心二錢

大熟地五錢

懷牛膝一錢

水煎去渣服。

局方甘露飲。治羊毛溫邪已退。陰陽皆虧。硝黃用時未足。致留餘毒。口臭喉瘡。齒齦宣露。吐血齒衄。



天冬二錢

麥冬去心五錢

大熟地三錢

大生地三錢

金釵石斛三錢

黃芩二錢

滑石水飛三錢

甘草二錢

犀角尖二錢

茵陳蒿一錢

炒枳殼八分

枇杷葉去毛三錢

水煎去渣。加黃蜜三錢和服。

犀角地黄湯

治羊毛溫邪漸減。陰虛火熾。吐血衄血。餘毒發癰。

犀角尖三錢

丹皮二錢

白芍藥三錢

大生地八錢

水煎去渣。加黃蜜三錢和服。如熱迫血多。本方加秋石一錢。藕汁一杯對服。

黃連阿膠湯

治火毒灼陰。煩熱解血。疑惑病劇。勢無可依。夜不安臥。證名狐惑。

此湯治之。

白芍五錢

黃連一錢

黃芩二錢

陳阿膠一錢

生鷄子一枚

水煎去渣。下阿膠溶化。再下雞子黃調勻服。

景岳理陰煎 治羊毛溫邪。毒火漸陷。真陰內虛。真陽氣怯。嘔蛔作煩。虛呃痰喘。

大熟地五錢

當歸身三錢

乾薑一錢

製甘草一錢

水煎去渣服。

製甘草湯 治溫邪病後。陰陽氣怯。脈見代象。餘毒不解。神倦自汗。

大生地 四兩

麥冬 去心 一兩

人參 二錢

製甘草 二錢

火麻仁 三錢

陳阿膠 二錢

桂枝木 一錢

水煎去渣。下阿膠化服。

當歸六黃湯 治溫毒餘邪。病延日久。陰氣大傷。內熱心煩。自汗盜汗。食少神倦。脈象洪大。寸短而數。此方主之。

當歸身 三錢

生黃耆 二錢

川黃連 一錢

黃柏 一錢

黃芩 二錢

生地黃 三錢

熟地黃 三錢

水煎去渣溫服。

按、陰虛盜汗。陽虛自汗。餘毒伏鬱。陰陽氣怯。且寐則衛氣行陰。陰不濟陽。致陽火毒火勝。爭於陰。故失守而盜汗。其寤則榮氣行陽。陽不固密。致陰火毒火勝。爭於陽。故浮越而自汗。胃為邪火所傷。內熱心煩。食少神倦。方用當歸、二地滋陰養血。黃芩、黃柏、黃連。令三焦上下火平。黃耆實表建中以生神也。

清骨散 治溫毒攻遲。邪火傷陰。大病之後。骨蒸潮熱。為治勞傷內燒。

銀柴胡二錢

胡黃連一錢

秦艽一錢

鼈甲五錢醋煨

地骨皮三錢

青蒿二錢

知母三錢

甘草一錢

秋石三分

水煎去渣。秋石和服

龍膽瀉肝湯 治溫邪病退。餘毒留於肝腎。脇痛耳聾。口苦咽乾。筋痿陰汗。陰囊

腫痛。白濁便血。忽寒忽熱。

龍膽草三錢

黃芩二錢

山梔子二錢

木通一錢

車前一錢

銀柴胡一錢

甘草一錢

當歸二錢

生地黃五錢

如伏邪未盡。加蟬蛻七枚。僵蠶二錢。

水煎去渣。下黃蜜三錢。和勻溫服。

易老瀉白散 治肺經伏火。餘毒未盡。或寒熱。或潮熱。內燒欬嗽。

桑白皮二錢

地骨皮五錢

甘草一錢

川黃連一錢

粳米三錢



水煎去渣服。

猪苓湯 治溫邪病後。溼熱腹脹。小水不利。飲食減少。微熱不退。並治溫邪熱熾。

滑精帶下白濁。

滑石水飛五錢

猪苓一錢

澤瀉一錢

陳阿膠一錢

水煎去渣。下阿膠和勻服。

導赤散 治心經伏熱。並治溫證餘邪。小便赤色。心煩神倦。睡臥不寧。

生地黃五錢

木通一錢

甘草一錢

嫩竹葉一錢

水煎去渣溫服。

六味地黃湯 治溫邪病後。腎元本虧。又經邪火煎灼。陰氣更虧。

熟地黃八錢

山萸肉四錢

山藥四錢

雲茯苓三錢

丹皮三錢

澤瀉三錢

水煎去渣。下食鹽一分和服。

資生健脾丸加減 治羊毛溫邪漸平。中土素虧。食少不運。藥煩停藥。此丸主之。

並治有孕患溫邪證。毒火已退。惟宜扶土。此安胎之妙方也。

防黨參一兩

於白朮一兩土炒焦

橘紅八錢

製甘草五錢

桔梗八錢

薏苡仁一兩

白藕豆一兩

山藥一兩

雲茯苓一兩

炒查肉五錢

焦神麴一兩

炒麥芽一兩

黃連五錢

建蓮肉一兩

當歸一兩

白芍藥一兩

金銀花八錢

石膏一兩

右研細末。煉熟黃蜜爲丸。每服三錢。開水送下。

陳氏抱龍丸。治風痰壅盛。或發熱欬喘。或發驚搐。嬰兒初生胎毒等證。並治羊

毛溫毒痰阻。

九製膽星四兩

天竺黃一兩

雄黃五錢

硃砂五錢

麝香三分

琥珀三錢

西牛黃一錢

右藥味另研細末。極足分量。合在一處。用甘草一觔。水煮濃汁。搗丸。每兩作十丸。陰乾。金箔爲衣。蠟殼封固。用時去蠟殼。燈心湯和服。或薄荷湯亦可。或勑菴

清汁和服。

清涼飲。治羊毛溫邪。壯熱煩躁。頭重口渴。唇腫舌燥。腮腫失血。

石膏一兩

澤蘭葉二錢

蟬蛻殼十二枚

白殭蠶三錢

黃耆一錢

黃芩二錢

山梔子二錢

丹皮二錢

大生地黃五錢

當歸一錢

甘草一錢

銀花三錢

秋石三分

黃酒五錢

黃蜜五錢

水煎去渣。下秋石、酒、蜜和勻溫服。

上清飲。治羊毛溫邪。壯熱微寒。體重舌乾。音低口渴。氣急胸悶。咽痛面腫。忽有

抽搐。神昏阻厥。

石膏五錢

澤蘭葉二錢

元參三錢

黃芩二錢

黃連一錢

山梔子一錢

連翹一錢

金銀花一錢

甘草八分

蟬蛻殼十二枚

白殭蠶二錢

白附子五分

桔梗二錢

橘紅一錢

黃蜜三錢

黃酒三錢

水煎去渣。酒蜜和服。

按方治溫毒伏於上中二焦。肺為主病。則金不能左旋。木自不能右旋。致有抽阻氣急之象。其方用石膏、白附一降痰。一散熱。餘藥佐以解毒。宣通伏火。



加味黃連解毒湯 治羊毛邪毒。發熱心煩。身軟神倦。舌有紫點。胸悶食少。小水黃赤。脈象沈數而大。並治毒重餘邪。

黃連一錢

黃芩二錢

黃柏二錢

山梔子一錢

桔梗二錢

甘草一錢

金銀花一錢

車前子一錢

木通一錢

六神麴錢炒二

蟬蛻十枚

白殭蠶三錢

水煎去渣。加生大黃末五分。黃蜜三錢。和勻溫服。

同生湯 治羊毛溫邪。七八日後。表裏大熱。或誤服溫燥藥。又毒火發動。致神昏不語。胸脹氣急。或哭笑無常。手舞足蹈。謔妄不寧。脈象洪數。重按不足。此湯治之。

南沙參二兩

麥冬三錢

雲茯神二錢

生地黄五錢

當歸一錢

犀角尖二錢

黃連一錢

黃芩二錢

山梔子一錢

丹皮二錢

知母二錢

滑石三錢

甘草八分

蟬蛻殼十枚

白殭蠶二錢

釵石斛四錢

元明粉二錢

黃蜜三錢

水煎去渣。下元明粉、黃蜜。和勻溫服。  
按溫毒發作。陽明燥金主氣。金被火傷。木風擾動。心神不寧。此方扶元氣。救元陰。除邪定風。解釋毒火。

新製蘭膏湯。治羊毛瘟邪。氣血虧損。或產後半月。內伏羊毛毒火。胸悶食少。寒熱頭身作痛。嘔吐黃水。口苦黏膩。腹脹脇痛。遍身麻木。倦怠神昏。氣阻發厥。並治餘邪。口淡作乾。煩熱不寐。

澤蘭葉三錢

石膏五錢

蟬蛻殼十二

白殭蠶二錢

桔梗二錢

甘草一錢

防風一錢

炒山梔一錢

薄荷葉一錢

黃芩一錢

新會橘紅一錢

元明粉一錢

當歸一錢

白芍藥二錢

雄黃二分

黃蜜三錢

水煎去渣。下元明粉、雄黃、黃蜜。和勻溫服。如毒重深伏。加熟大黃二錢和服。  
新製止呃湯。治羊毛溫毒。餘邪氣虛。呃逆心煩不寧。食少作噦。神倦微熱。胸脹不臥。

人參一錢

半夏八分

甘草五分

葶藶子一錢

白芍三錢

熟附子五分

吳茱萸五分

用黃連五分煎水。拌炒雲茯苓二錢。西瓜子殼四兩。水煎去渣服。

左金地骨飲。治羊毛溫邪。內傷金土。木氣橫逆。脇痛不止。氣閉壅脹。難以轉側。

脈象弦大。或沈弦而細。並治牙疼。久不能愈。此方主之。不可加減。

大熟地五錢

骨碎補去毛蜜製三錢

釵石斛三錢

白芍藥五錢

雲茯苓一錢

蟬蛻七錢

磨刀水煎。去渣服。

加味佛手散。治羊毛溫邪。新生產後。毒火伏鬱。神昏口渴。胸脹氣阻。頭痛身麻。

燒熱譫言。忽寒忽熱。眩暈不寐。或腹中停瘀作痛。

川芎二錢

全當歸五錢

生黃耆三錢

荆芥穗一錢

澤蘭葉三錢

五靈脂醋炒一錢

延胡索酒炒五分

查灰二錢

桂枝木五分

蟬蛻殼十枚

白殭蠶一錢

水煎去渣溫服。如毒重。加秋石一錢。雄黃二分。黃蜜三錢和服。如寒困毒火。加

上肉桂三分。減去桂枝。



回生丹 治婦人產後諸疾。污穢未淨。及實邪脹痛。瘀血衝逆。並治羊毛溫毒等證。另有湯引。

生黃耆	二兩	白朮	五錢	青皮	三錢	木瓜	三錢
全當歸	錢一兩五	川芎	八錢	香附	八錢	地榆	錢五
蒲黃	五錢	赤茯苓	八錢	桃仁	八錢	大熟地	五錢
懷牛膝	五錢	山萸肉	五錢	京三稜	三錢	五靈脂	五錢
甘草	五錢	荊芥穗	五錢	新會橘皮	五錢	白芍	五錢
烏藥	一兩	乳香	一錢	沒藥	一錢	廣木香	一錢
白僵蠶	一兩	蟬蛻	五錢	廣薑黃	三錢	紅麴	八錢

右為細末。用大黃膏為丸。彈子大。金箔為衣。大黃膏法。用蘇木三兩。河水五碗。煎至三碗。去渣。紅花三兩。炒黃色。用無灰酒二觔。煮十數滾。去渣。小黑豆一升。水煮留汁三碗。黑豆晒乾。研末俱聽用。生大黃一觔為末。用米醋八碗。熬成膏。次下蘇木湯。紅花酒。黑豆汁。攪勻。又熬成膏。貯於盆。將鍋焦焙乾為末。同黑豆末前藥末合丸。

一、治羊毛溫邪。新產後。用秋石四分。泡湯和丸溫服。

一、治產後伏毒。面青忽紅。唇乾舌赤。鼻中流血。煩熱頭痛。遍身影點成癍。用丹

三粒。加黃蜜一匙。黃酒一鍾。童便一鍾。調勻溫服。

一、治妊婦因患溫證。子死腹中。務須審脈。辨證。察舌。有無青黑。方用川芎一錢。當歸二錢。煎湯去渣。加童便一杯。黃酒三錢。黃蜜三錢。元明粉一錢。化丹三粒。服之即下。

一、治產後敗血停滯。並毒火擾亂。如見鬼神。語言顛倒。用燈草一團。黃連三分。水煎去渣。加秋石三分。化丹兩粒溫服。

一、治產後溫毒擾亂。敗血腹痛。周身浮腫。或四肢浮腫。食少氣喘。皮膚俱見赤色。用生桑皮一錢。水煎去渣。加童便一鍾。黃蜜三錢。化丹三粒溫服。

以上治產後溫證四條。大有神效。此丹治產後雜證更妙。故附錄以廣濟之。

一、催生遇難產之際。用丹一粒研碎。貯碗。加葱白三枚。黃酒一茶鍾。重湯蒸熱。去葱服之。立刻就生。

一、產時橫逆難生。並胞衣不下。用丹一粒。開水和。加黃蜜一匙。童便一杯。黃酒

一杯溫服。

一、產後兒枕痛。惡露不盡。用丹一粒。開水和。加沙糖一匙溫服。

一、產後頭痛身熱。有汗。用開水化丹一粒服之。

一、產後眼昏腰痛。身似角弓。用川芎五分。全歸一錢。白薇一錢。生黃耆一錢。荆

芥八分。水煎去渣。化丹二粒服之。

一、產後崩中。惡露不止。血如肝色。周身拘束。潮熱不退。用開水、黃酒各半。化丹

一粒服之。

一、產後血暈。頭旋眼黑。語言錯亂。用白芍藥一錢。菊花五分。水煎去渣。化丹一

粒。加童便一杯服之。

一、產後胸悶。口乾煩渴不寧。因停滯飲食。用炒山查一錢煎湯。化丹一粒服之。

一、產後寒熱如瘧。用開水化丹一粒。加黃酒一杯溫服。

一、產後忽寒忽熱。欬喘。心煩驚悸。口渴。用生黃耆、全當歸各一錢。荆芥、川芎各

三分。水煎去渣。化丹一粒服之。

一、產後二便不通。用枳殼五分煎湯。化丹一粒。加黃蜜一大匙服之。



一、產後失音。用甘菊五分。桔梗八分。訶子四分。煎湯。化丹一粒服之。  
一、產後無乳。用丹一粒。加天花粉、歸身、炒山甲各三分。研細末。入黃酒開水化服。

一、治婦人經水不調。用葱白二枚。泡湯化丹二粒服之。

冷飲烏梅湯。治羊毛溫邪。毒火衝逆。嘔吐有蟲。水漿不入。煩躁胸悶。並治暑火嘔痰。胸脇刺痛。乍熱心煩。

烏梅 四十枚

龍腦薄荷 三錢

金銀花 三錢

共熬汁去渣。下冰糖三兩化冷服。

紫雪金丹。治內外熱熾。狂躁譫妄。熱鬱發癰。痰湧抽搐。目瞪神呆。陽毒發黃。口舌生瘡。脚氣衝厥。羊毛溫毒。玳瑁溫證。瘡瘍溫瘧。痧痘瘡毒。喉風中暑。諸般溫毒。一切實火閉結。沈困。及小兒胎毒。臍風。撮口。胎黃。胎驚。五癰。急驚等證。大有神效。每服一二錢。或四五分。或五七釐。燈心湯下。病深者宜藥多。病輕者宜藥少。智者量之。婦人有孕忌服。惟子癇宜服。此方神化莫測。難以盡述。溯其功候。妙擬還丹。宜於齋戒清靜。誠心辦理。擇地選吉。每日望空焚香煉成。更以醮謝。

忌鷄犬婦女孝服。並身體不潔者。宜避。計開用物。

銅鍋九口。上安鉛蓋。大木瓢二箇。麻布口袋一箇。大乳鉢一箇。手磨一箇。細絹篩大三箇。小二箇。大銅箸一副。刻漏香十四枝。柳木棒十根。銀鼎一箇。土基竈九箇。大甕缸三箇。雪水五擔。桑柴八百觔。板炭一百觔。羊城礮一箇。鹽土棉紙多備。

計開揀選道地藥物。辨別真偽。

生礦金一百八十兩。河水淘淨。再用雪水二擔。泡一周天。攪之萬遍。取金分九處。用雪水文火煮。在子時下四刻。取起金。仍分九處。煉水歸甕。再用雪水武火煮。在午時下四刻。取起金。煉水歸甕。即將泡金水。子時煉水。午時煉水。合在一處聽用。

寒水石四十八兩。用煉水武火煮四刻。一次去渣。生石膏打碎四十八兩。用煉水文火煮一時一刻。去渣。飛滑石四十八兩。用煉水武火煮六刻。去渣。靈磁石醋煨四十八兩。用煉水文火煮一時四刻。去渣。升麻一十六兩。用煉水武火煮三刻。去渣。元參一十六兩。用煉水文火煮一時。取汁。再下煉水一半。武火煮三

刻去渣。甘草一十六兩。用煉水文火煮一時二刻去渣。犀角鎔尖一十六兩。用煉水文火煮一時取汁。再下煉水用武火煮四刻去渣。羚羊角鎔尖一十六兩。用煉水文火煮一時取汁。再下煉水用武火煮四刻去渣。

以上藥汁共熬至滴水不散候煉。

朴硝六十四兩。用羊城礮裝蓋好。鹽土用棉紙封固。板炭圍火煉四刻取起。過篩再煉提淨。得三十八兩四錢為準聽用。

上沈香五兩。廣木香三兩。上檀香二兩五錢。丁香一兩。以上四味另研細末。大塊硃砂研細。水飛三兩六錢五分。血色琥珀研細二兩四錢。赤珊瑚枝研細二兩四錢。西牛黃生吐為上。研細二兩四錢。大珍珠用豆腐披開。珠貯其中。豆腐合一水煮一二沸。取珠子研細。用三兩六錢。

其煉丹法。用前藥汁下煉淨硝。以柳木棒擦勻。合煉三刻。宜防硝升。將藥歸入銀鼎內。再下四味香藥擦勻。封固。入轉丹法。俱用卯酉時中隔水蒸。用板炭文火一時為一轉。第九轉候吉時成功。起首水蒸三轉開封。下硃砂、琥珀、珊瑚。擦勻封固。水蒸三轉開封。下西黃、珍珠。擦勻封固。水蒸二轉開封。下當



門子麝香一兩。乳細擦勻封固。候吉時到。水蒸一轉成功。取起銀鼎。埋在土中。退火三日。取起開封。收貯瓷器中。勿令泄氣為妙。  
大辟瘟丹 凡時行疫證。以絳紗囊裝丹。懸於當胸。或繫左腕。可無傳染。治病錄後。

桔梗三兩

陳橘皮三兩

麻黃錢五根節四分

香三兩

升麻三兩

生香附五兩

半夏薑汁炒一兩

烏梅煨熟去皮

滑石水飛一兩

紫蘇葉七錢

雄黃研細水飛

雌黃研細水飛

生大黃三兩

赤小豆六兩

鬼箭羽二兩

丹參五兩

忍冬藤花三兩

山茨菇去毛二兩

千金子去油一兩

廣木香五兩

茅蒼朮生一兩

山豆根五兩

五倍子二兩

北細辛去葉一兩

麝香當門子三錢

紅芽大戟米泔浸去骨一兩

右為細末。糯米粥和。重一錢一粒。用硃砂一兩。研細水飛為衣。忌烘乾。宜用天

醫日合。或端陽午時更妙。

一、治瘟疫伏邪。陰陽二毒。狂躁昏亂。胸膈阻滯。毒邪未發。用薄荷泡湯磨服。

一、治羊毛溫邪毒火發動。微見寒熱。恍惚神迷。頭痛或眩。面色露青。舌有紅點。或有疹塊。胸膈身板。用石膏泡水磨服。

一、治霍亂絞腸痧。或感山嵐瘴氣。溫痢溫瘧。俱用燈草湯磨服。

一、治中蠱毒。狐狸毒。並野菌。河豚。死牛馬肉。草木。鳥獸等毒。腹痛嘔吐。氣阻神昏。俱用黃酒磨服。

一、治類中風。口眼歪斜。語言蹇澀。牙關緊閉。並治歷節風痛。筋骨拘攣。手足腫痛。行步艱難。俱用淡薑湯磨服。

一、治九種心痛。胃痛腹痛。頭暈作嘔。並治急中癰痛。鬼氣狂叫。奔走失心。羊癇諸風。俱用開水磨服。或淡薑湯亦可。

一、治男婦傳尸骨蒸。勞瘵咳嗽。為蟲所傷。每上半個月。每日早間。用開水磨服一粒。

一、治婦人癥瘕積塊。經閉不調。腹中作痛。夢與鬼交。俱用紅花煎湯磨。加黃酒少許服之。

一、治小兒驚風發熱。積聚腹痛。五疳潮熱。疹疹溫邪。俱用薄荷葉泡湯磨服。

一、治偏正頭風。左右上下牙疼。俱用生萊菔汁磨敷患處。內用開水磨服。  
一、治癰疽發背。無名腫毒。俱用燒酒磨。加蟾酥冰片敷患處。已成即潰。未成即散。內服用開水磨。

通用藥物

金汁。即人糞。用罈裝封固。埋土中數十年後。變如清水。地漿。掘土下三尺。水和。臘雪水。雄黃。白茅根。青蒿。夏枯草。茵陳蒿。燈草。青黛。人中黃。刺蒺藜。生大黃末。射干。白丑末。栝蒌皮。栝蒌實。去淨油。天花粉。生首烏。山豆根。木通。澤瀉。忍冬藤。升麻。石菖蒲。馬勃。紫背浮萍。活水蘆根。赤柳。紫背天葵。蕎麥麵。蒲公英。萊豆。黑豆粉。萊菔生汁。菁菜水。斬汁。馬齒莧。黃瓜汁。絲瓜汁。巴旦杏仁。梨汁。西瓜水。甘蔗漿。紫背荷葉。藕汁。勒薺汁。粳米。以下九味。宜於慎用。麻黃。桂枝。細辛。乾薑。辛夷。鮮薑。茅蒼朮。附子。烏藥。

羊毛溫論終



## 後記

《增評傷暑全書》三卷。明·張鶴騰撰。成書于天啟三年（公元一六二三年），後佚，復由清·葉子雨于舊書肆中購得重訂而成。

張氏字鳳達，穎郡（今安徽阜陽）人。明代治溫名家之一。本書爲論暑之專著。張氏原序有云：若傷暑一證，醫書止列小款中，世皆忽之，一遇是證，率日爲傷寒，以發散等劑投之，間加衣被取汗，甚灸以致傷生者，累累不悟，可不悲歟。乃發願搜羅群書，研挾名賢，驗之臨證，著爲是帙以濟世。上卷首論暑病之源與天時地氣之關係；繼辨傷寒、傷暑之別，非但病源不同，且臨證表現、治療方法亦異；再就暑厥、暑風、暑瘍、暑瘵、絞腸痧、時疫、寒疫諸多暑病之發病特點、治療大法及所宜方藥，一一闡述。中卷匯附古代名醫論暑之精華及治暑之醫案。下卷采輯治暑常用方五十有餘，詳備主病、服法。張氏之論言簡意賅，葉氏增

評補其不逮，堪稱暑病「全書」。茲以上海科學技術出版社一九八六年版《珍本醫書集成》（內科類）之《增訂傷暑全書》爲參校本，在保存《大成》本特色之前提下正其錯訛。

《伏氣解》一卷。清·葉霖撰。霖字子雨，江蘇揚州人。葉氏自序云：是書具論四時陰陽伏氣之理，他病不及焉，凡七篇，都爲一卷，號曰「伏氣解」。書中所論病瘧、熱病、五臟痿病、五臟移熱、暑燥、痧脹等，「皆能闡軒歧未發之秘，明天人一貫之理」。

《伏邪新書》一卷。清·劉吉人撰。是書卷首伏邪病名解云：感六淫而不即病，過後方發者，總謂之曰「伏氣」。他若已發而治不得法，病情隱伏者，初感而治不得法，正傷邪陷，暫時假愈，後仍復作者，已發治愈，未能除根，遺邪內伏者，亦復之曰「伏邪」。且伏邪有伏燥、伏寒、伏風、伏濕、伏暑、伏熱之種種矣。是書將上述精密列論，于六氣伏邪，條分縷晰，實開後學無數治伏邪法門。本書曾刊《三三醫書》第二集

中，特以爲校本并正其錯訛。

《伏陰論》二卷。清·田宗漢著，成書于光緒十四年（公元一八八八年）。田氏又名瀛嶠，字雲槎，漢川（湖北漢陽）人。

是書凡例云：其體例仿仲景《傷寒論》，文取簡要，便于誦記。主要闡發多發于夏秋間以先痢後嘔、厥逆轉筋爲特點之伏陰病，首揭總說，次載症辨，再分原病、變症、死候、禁令、瘥後、比類、舌鑒七則。條理井然，抒發精詳，有獨到之處。本書以上海科學技術出版社一九八六年版《珍本醫書集成》（內科類）之《醫寄伏陰論》爲參校本。

《羊毛瘟論》二卷。清·隨霖撰，書成于乾隆十六年（公元一七五一年）。霖字萬寧，上元（江蘇江寧）人。是書又名《瘟症羊毛論》。

羊毛溫證者，可見憎寒發熱、胸中滯塞、身脹酸麻、發疹發斑等。據云擦之確有一種似羊毛之絲而出，且擦出其毛，其病立解，故得是名。是書上卷列伏邪窮源、溫病論、羊毛論、辨惑論、羊毛瘟證治、羊毛瘟



疑似辨、羊毛瘟不治症、婦人嬰兒羊毛瘟治法等。下卷載備用諸方及通用藥物等。所論窮源競委，辨析無遺，誠治羊毛瘟證之要書也。茲以一九二四年杭州三三醫社鉛印本《三三醫書》第二集之《羊毛瘟證論》校其錯訛。

李其忠

書目

(一) 黃帝內經素問集註	(清) 張隱庵	(二五) 南病別鑑	(清) 葉香岩	(三七) 程杏軒醫案	(清) 程杏軒
(二) 黃帝內經靈樞集註	(清) 張隱庵	(二六) 瘧疾玉衡	(清) 薛生白	(三八) 何濟安醫案	(清) 何濟安
(三) 傷寒明理論	(明) 吳有性	(二七) 瘧疾時疫治療法	(清) 郭石陶	(三九) 邵蘭蓀醫案	(清) 邵蘭蓀
(四) 傷寒九十論	(明) 許叔微	(二八) 增詳傷暑全書	(清) 趙養微	(四〇) 吳鞠通醫案	(清) 吳鞠通
(五) 陰證略例	(清) 王好古	(二九) 伏氣解	(清) 張鳳遠	(四一) 冷庵醫話	(清) 陸定圃
(六) 傷寒兼證析義	(清) 張倬	(三〇) 伏邪新書	(清) 葉子南	(四二) 柳洲醫話	(清) 魏玉璣
(七) 傷寒六經辨證治法	(清) 尤在涇	(三一) 羊毛痘論	(清) 劉吉人	(四三) 鵝塘醫話	(清) 張景岳
(八) 傷寒補例	(清) 張錫子	(三二) 溫熱逢源	(清) 田雲梯	(四四) 先哲醫話	(清) 凌田惟素
(九) 傷寒來蘇集	(清) 周學海	(三三) 隨息居霍亂論	(清) 陳寶鑑	(四五) 潛齋醫話	(清) 王士禛
(一〇) 重刊金匱玉函經	(清) 趙養微	(三四) 霍亂霍亂答問	(清) 王士禛	(四六) 友漁齋醫話	(清) 黃道憲
(一一) 沈註金匱要略	(清) 沈自南	(三五) 霍亂霍亂要	(清) 陳寶鑑	(四七) 對山醫話	(清) 毛對山
(一二) 金匱要略心典	(清) 尤在涇	(三六) 鼠疫快微	(清) 余伯陶	(四八) 客塵醫話	(清) 許壽衡
(一三) 金匱翼	(清) 尤在涇	(三七) 增補詳註溫病條辨	(清) 吳鞠通	(四九) 巢氏諸病源候總論	(唐) 巢元方
(一四) 脈經	(晉) 王叔和	(三八) 十藥神書	(清) 葉子南	(五〇) 儒門事親	(金) 張從正
(一五) 重訂太素脈秘訣	(明) 杜光庭	(三九) 增訂十藥神書	(清) 葉子南	(五一) 重訂靈蘭秘要	(明) 王肯堂
(一六) 脈說	(明) 劉伯祥	(四〇) 痰火點雪	(清) 胡慎庵	(五二) 知醫必辨	(清) 李士材
(一七) 醫燈續焰	(明) 吳崑	(四一) 理虛元鑑	(清) 胡慎庵	(五三) 研經言	(清) 莫枚士
(一八) 望診遵經	(清) 葉子南	(四二) 虛損啓微	(清) 洪錦華	(五四) 醫學讀書記	(清) 尤在涇
(一九) 臨證驗舌法	(清) 周學海	(四三) 何氏虛勞心傳	(清) 何嗣宗	(五五) 市隱廬醫學雜著	(清) 王士禛
(二〇) 醫古辨證新法	(清) 劉伯祥	(四四) 症因脈治	(清) 葉子南	(五六) 醫學源流論	(清) 徐大椿
(二一) 脈學輯要評	(清) 劉伯祥	(四五) 周慎齋遺書	(清) 葉子南	(五七) 慎疾芻言	(清) 徐大椿
(二二) 瘟疫論	(明) 吳有性	(四六) 脈因證治	(清) 葉子南	(五八) 醫學心悟	(清) 程鍾齡
(二三) 醫門普度溫疫論	(清) 孔以立	(四七) 醫林改錯	(清) 葉子南	(五九) 神農本草經	(清) 吳普
(二四) 張氏溫暑醫旨	(清) 張翰香	(四八) 醫學舉要	(清) 葉子南	(六〇) 珍珠囊補遺藥性賦	(元) 李東垣
(二五) 溫熱暑疫全書	(清) 周學海	(四九) 一草亭日科全書	(清) 葉子南	(六一) 雷公炮制藥性解	(明) 李中梓
(二六) 溫證指歸	(清) 周學海	(五〇) 異授眼科	(清) 葉子南	(六二) 藥微續編	(清) 王士禛
(二七) 溫熱病指南集	(清) 周學海	(五一) 銀海指南	(清) 葉子南	(六三) 醫方考	(明) 吳鶴皋